

মরু প্রান্তর

তরুণকুমার ভাদ্রা

লিউ এন্ড গার্লিশার্ম আইভেট লিমিটেড



দ্বিতীয় সংস্করণ—আশ্বিন, ১৩৬৫

অক্টোবর, ১৯৫৮

প্রকাশক :

জে. এন. সিংহ রায়

নিউ এজ পাবলিশার্স প্রাইভেট লি:

২২, ক্যানিং স্ট্রিট

কলিকাতা-১

প্রচ্ছদপট :

অজিত গুপ্ত

মুদ্রক :

রঞ্জিতকুমার দত্ত

নবশক্তি প্রেস

১২৩, লোয়ার সারকুলার রোড

কলিকাতা-১৪

উৎসর্গ

জ্ঞানশব্দ বহেন্-কে

—ভাইসাব্

দ্বিতীয় সংস্করণের ভূমিকা

“মরুপ্রান্তর” আমার প্রথম সাহিত্যিক প্রয়াস। ভেবেছিলাম বোধহয় শেষও। এত অল্পকালের মধ্যে তার জনপ্রিয়তা আমায় পাঠকসমাজের কাছে করেছে চিরকৃতজ্ঞ। কি জানি হয়তো আঁকাবাঁকা দীর্ঘ “কিউ”-এর শেষ প্রান্ত থেকে একটু এগোতে পেরেছি। “সীট” না পাই, ভীড়ে হারিয়ে যাবার আনন্দ তো পাব।

অসংখ্য চিঠি পেয়েছি—কোনোটায় প্রশংসা, কোনোটায় উপদেশ, আশীর্বাদ আর কিছুতে নির্জলা গালাগালি। সবাইকেই ধন্যবাদ।

মরুপ্রান্তরে এই একবছরে অনেক কিছু পরিবর্তন এসেছে। বিস্তারিত লিখতে বসলে হয়তো নতুন করেই লিখতে হবে। দ্বিতীয় সংস্করণে শুধু ছোটো একটা পরিচ্ছেদ জুড়ে দিলাম।

শিমলা রোড
সিভিল লাইনস
ভোপাল
“রাধীপুর্ণিমা”
১২ই ভাদ্র ১৩৬৫
২২-৮-৫৮

তরুণ কুমার ভাদুড়ী

● ম রু প্রা স্ত র ●

●

MARUPRANTAR
Travelogue
by
Taroon Coomar Bhaduri

“আপকা পাসপোর্ট?”

“পাসপোর্ট?”

“হাঁ। আপ শহর জাইয়েগা না?”

“জী হাঁ।”

“লাইয়ে আপকা পাসপোর্ট। চার ঘণ্টেকা অন্তর ওয়াপস আ জাইয়েগা।”

পোর্ট অফিসারের সন্দিক্ত প্রশ্নের খোঁচায় সস্থির ফিরে আসে। ওপরে তাকিয়ে দেখি, জাহাজের মাঝুলে চাঁদ-তারা মার্কী সবুজ নিশান। পাকিস্তান। কায়েদে-আজম মহম্মদ আলী জিন্নার রাজনৈতিক স্বপ্নের বাস্তব পরিসমাপ্তি; হিন্দু-মুসলমানের রক্তে গড়া পাকিস্তান। খালিকুজ্জমান সাহেবের কাল্পনিক প্যান-ইসলাম রাজ্যের ‘সিটাডেল’—পাকিস্তান।

কোথায় যেন একটু ব্যথা পাই। জমশেহজী নওশরগজী মেটা, জমনাদাস মেহতা, আর, কে, সিধওয়া, ঈয়রামদাস দৌলতরাম আর আল্লা বক্স-এর তৈরি ভারতের রমণীয় শহর করাচী আজ আমার কাছে কত অচেনা! করাচী আজ পাকিস্তানের রাজধানী, আর ‘টু নেশন’ থিওরীর মনুমেন্ট পাকিস্তান আজ আমার কাছে বিদেশ। তাই পোর্ট অফিসার আমার কাছে চায় পাসপোর্ট।

অন্যমনস্কভাবে পাসপোর্টটা অফিসারের হাতে তুলে দিই। ঘুরিয়ে ফিরিয়ে অনেকক্ষণ দেখে তিনি বললেন, “আপকা ক্যামেরাভী ছোড় যাইয়ে।”

“ক্যু?”—একটু রেগেই উত্তর দিলাম।

পাসপোর্টের ‘প্রফেশন’-এর জায়গায় লেখা ‘জার্নালিস্ট’ শব্দটার ওপর দু-চারবার আঙুল বুলিয়ে অফিসার এবার চড়া গলায় বলে উঠলেন,—“If you want to go ashore, keep your camera here, or else stay back in the ship.”

মুখ নিচু করে জাহাজের গ্যাব্বায়ে দিয়ে নেমে এলাম। মনটা বড় ক্ষুণ্ণ হয়ে যায় যাত্রার শুরুতেই আমার কত পরিচিত করাচী শহরের এই অভ্যর্থনায়। কিন্তু ভুল বললাম। করাচী তো আজ

আমার পরিচিত শহর না। করাচী তো আজ আমার কাছে বিদেশ। হবেও বা! কে জানে?

হোক না বিদেশ, তবুও দু'দিন জাহাজে থাকার পর জমি স্পর্শ করে বড় ভালো লাগল। করাচীর জমি আর দিল্লীর জমির মধ্যে তো আর তফাত নেই। আর আমার নাগপুরের মাটিও তো সেই একই জিনিস। জাহাজের ডেকের বোটকা গন্ধে, যাত্রীদের অবিরাম কলহে আর চেষ্টামেচিতে, আর সমুদ্রের একঘেয়ে নীল লোনা জল দেখতে দেখতে মেজাজটা বিগড়ে ছিল। জমিতে পা দিতেই তাই করাচীকে বড় সুন্দর মনে হলো।

যাওয়াটা যেন এক রকম হঠাৎই ঠিক হয়ে গেল। কোথাও কিছু নেই, শখ চাপল মিডিল-ইস্ট দেখতে হবে। বন্ধুরা জুকুটি করে জানালেন, 'শিয়ার ওয়েস্ট অফ টাইম এণ্ড এনাজি'। "কি হবে মিডিল-ইস্ট গিয়ে? তার চেয়ে সেই সময়টা ইউরোপ ঘোরো কাজ দেবে।" যতই বলি মিডিল-ইস্ট দিয়েও তো ইউরোপ যাওয়া যায়, তবুও তাঁরা একটু ক্ষুণ্ণ হয়ে তর্ক উপস্থিত করেন, "না, না। সে কথা নয়। দু'মাস মিডিল-ইস্টে সময় নষ্ট করে কি হবে? তার চেয়ে সেই দু'মাসও ইউরোপের আরো অগ্র জায়গাগুলো ভালোভাবে দেখো। অনেক কিছু শিখবে, অনেক কিছু জানবে। মিডিল-ইস্টে ছাই আছে কি? শুধু কতকগুলো হোমরা-চোমরা গায়ে-গন্ধ আরব, বালি আর তেল।"

কিন্তু কেন জানি না এত তর্ক সত্ত্বেও মন বোঝে না। কতদিনের আশা মিডিল-ইস্ট দেখব। রোমান্টিক মিডিল-ইস্ট। লরেন্স-এর মিডিল-ইস্ট। ফারুক আর নারীমানের মিডিল-ইস্ট। শাহ, সোরায়া, আতাউল্লা, কাসানী আর মোসাদেকের মিডিল-ইস্ট। ওমর খৈয়াম আর সাদীর মিডিল-ইস্ট। কামাল আতাতুর্ক আর ইসমৎ ইনেমুর মিডিল-ইস্ট। জগলুল পাশা, নোকরাশী পাশা, স্মার অ্যালেক কার্কব্রাইড, জেনারেল বার্কার আর গ্লাব পাশার মিডিল-ইস্ট। গ্রাও মুফতী, নাহাশ পাশা, ইবন সউদ, আবদুল্লা, ফইজালের মিডিল-ইস্ট। আর আমার চেনা-অচেনা কত টমাস, ইমরান বে, ফাহারিয়া, আবদাল্লা, গুলর, ফজল, নিক, সাবাহাল, ইনজে, শামীমে, কামেল, আহমদ ডিনগার,

আশুর, আবু রফতের, আর লক্ষ লক্ষ গরীব, গৃহহীন, অশিক্ষিত, রুগ্ন আরব আর তুর্কের মিডিল-ইস্ট। শুধু কি তেল আর বালি? বালির তূপের মধ্যে কত না রক্ত আজ শুকিয়ে আছে। বালির বৃকে আজ চিরনিদ্রায় ঘুমুচ্ছে কত নাম-না-জানা আরব আর ইহুদী। মরুভূমির বুক ফুঁড়ে ফাটল দিয়ে ঠেলে বেরোচ্ছে আজ কত না চাপা কান্না! মাইলের পর মাইল তেলের পাইপ-লাইনের মধ্যে আছে কত না লক্ষ লক্ষ আরবের চোখের জল আর দেহের রক্ত, কত চক্রান্ত, শোষণ আর কত মোসাদেকের কারাবাস।

সেই মিডিল-ইস্টের পথে আজ আমার যাত্রা শুরু।

খবরের কাগজে কাজ করছি আজ ১২ বছর। তাই খবরের কাগজের রাজনীতির সঙ্গেও খুবই ভালোভাবে পরিচিত। যখন যাওয়ার একটা মোকা পাওয়া গেল, একেবারে যাকে বলে ‘ক্যাচ ইট বাই দি টেল’ করে মাঠে বলে বেরিয়ে পড়লাম। যা থাকে কপালে। যাবার ইচ্ছা মিডিল-ইস্ট আর ইউরোপ। সম্বল মোটে ৫০০০ টাকা। প্রতিনিশিয়াল টাউনের ইংরেজী খবরের কাগজের ‘চিফ রিপোর্টার আর ফিল্ম এডিটরের’ ভাঙ্গ্য কবে যে ‘ফরেন ট্র’ স্কলারশিপ বা ডেলিগেশন মেম্বারশিপের শিকে ছিঁড়ে পড়বে তার তো ঠিক নেই। তাই নিজেই বেরিয়ে পড়লাম।

যোগাযোগটাও মন্দ হলো না। ইস্তানবুলে (টার্কী) হচ্ছিল Third Inter-national Physical Education Congress। রওনা হবার ১৫ দিন আগে ভারতীয় টিমের নেতা গোপালনাথ পাঠক একদিন হঠাৎ আপিসে এসে বললেন,—“ভাছড়ী চলো, তুম ভী চলো”। বুড়ো পাঠকজী ক্লেপেছে নাকি?

ঢাল নেই তরোয়াল নেই নিধিরাম সর্দার। পাঠক সাহেব ‘অফার’ দিলেন, যদি আমি টার্কীতে ভারতীয় টিমের পাবলিক রিলেশন অফিসারের কাজ করি তার বদলে ভারতীয় টিম আমাকে দেবে বস্ত্র থেকে বসরা আর বসরা থেকে বস্ত্রের জাহাজ-ভাড়া—অবশ্য ডেকে। বাকী ‘তুমহারা জিম্মদারী’। ‘কুছ পরোয়া নেই। জরুর যায়গা’।

বলে তো ফেললাম, কিন্তু মোটে ১৫ দিন সময়ের মধ্যে পাসপোর্ট, টাকাপয়সা, জামাকাপড় কি করে যে কি হবে কিছুই

ভেবে উঠতে পারি না। যা হোক করে টাকাপয়সা যোগাড় হলো। এইবার পাসপোর্ট। এই পাসপোর্ট যে কত ঝকঝকি ব্যাপার তা এক ভুক্তভোগীই জানে। তার ওপর আবার আছে হেলথ সার্টিফিকেট, ইনকাম ট্যাক্স ক্রিয়ারেন্স সার্টিফিকেট, ভিসা। বাপরে বাপ, একেবারে নাজেহাল করে ছেড়েছিল। বস্তুতে পরে এক বন্ধু বলেছিলেন স্বাধীন ভারতে ইম্পোর্ট এক্সপোর্ট লাইসেন্স যোগাড় করা যত সহজ, পাসপোর্ট পাওয়া তত সহজ মোটেই না।

হাজার হলেও খবরের কাগজে কাজ করি, কিছু ‘ইনফ্লুয়েন্স’ও আছে, তবুও পাসপোর্ট পাওয়ার যে এত ঝকঝকি তা আগে কে জানতো! যে আপিসেই খোঁজ করি সেইখানেই জবাব পাঠি ফাইল চলে গিয়েছে। কিন্তু কোথায় যে গিয়েছে আর কেন যে গিয়েছে তা কেউই বলতে পারে না। এক ডিপার্টমেন্টে অথবা ডিপার্টমেন্টকে গালাগালি দেয়। পুলিশ এনকোয়ারী, একবার ডিস্ট্রিক্ট লেভেলে আর একবার স্টেট লেভেলে। তারপর শুনলাম ঘুরে-ফিরে ফাইলটা সব লেভেল ক্রশ করে সেক্রেটারিয়েটে এসেছে। দিলাম ধর্না পলিটিকাল এ্যাণ্ড মিলিটারী ডিপার্টমেন্টে।

“হলো মশাই আমার পাসপোর্ট? আর তো পারি না।” জিজ্ঞাসা করি এক কেরানীবাবুকে।

“কব অ্যাপ্লাই কিয়া”—আধ-পোড়া সিগারেটটা নিভিয়ে পকেটে ফেরত রেখে জবাব দেন ‘বাবু’ আমার দিকে না তাকিয়েই।

“আরে বাবা অ্যাপ্লাই তো ১৫ দিন হলো কিয়া, কিন্তু এ যে দেখছি অ্যাপ্লাই অ্যাপ্লাই নো রিপ্লাইয়ের ব্যাপার।”

“আরে ব্যস। আমরা পাস তো ছ’ মহিনে পহেলকা অ্যাপ্লিকেশন পেণ্ডিং পড়া হাঁয়।”

“এটা কি খুব গর্বের কথা হলো?” একটু রেগেই যাই।

“দেখুন মশাই, আপনার মন্তব্য শোনার জন্য আমরা এখানে বসে নেই। আমরা অনেক busy”—ক্ষেপে গিয়ে মারাঠী কেরানীবাবু এবার থিঁচিয়ে ওঠেন।

“নিশ্চয়, নিশ্চয়। আপনারা ভীষণ busy। নইলে দরখাস্ত ছ’মাস ধরে পেণ্ডিং কেন পড়ে থাকবে।” নিজের মনেই গজর গজর করতে করতে বেরিয়ে আসি।

যখন অনেক কাঠ-খড় পুড়িয়ে পাসপোর্টটা হাতে পেলাম, মনে

হলো যেন হলদীঘাটের যুদ্ধ জয় করেছি। তবুও কি ‘ব্রাউন’ সাহেব সহজে পাসপোর্টটা হাতে তুলে দেয়! ওপর-নিচে আমায় দেখে ফটো মিলিয়ে ঘুরিয়ে-ফিরিয়ে আলগোছ করে দিলেন—যেন কতই কষ্ট হচ্ছে দিতে। যাক, একটা ‘হার্ডল’ পার হলো। এবার হেলথ সার্টিফিকেট।

গেলাম কর্পোরেশন আপিসে। ইনজেকশন্ ড্যাকসিনেশন্ আগেই হয়েছিল। দরকার শুধু হেলথ অফিসারের সই আর ‘সীল’। ভদ্রলোককে ভালোভাবেই চিনতাম। খবরের কাগজের লোকদের পেছনে একটু বেশি ঘোরাফেরা করার অভ্যাস ছিল। নাহুস-নুহুস চেহারার এই বাঙালী সাহেবের সঙ্গে প্রায়ই দেখা হতো আমাদের ‘বড়বাবু’র মিষ্টির দোকানে। মিষ্টি একটু বেশি খেতেন। কিন্তু তাঁর মেজাজের বেলায় তাঁকে এই অপবাদ কেউ দিতে পারত না।

“কি চাই মশাই?” হেলথ অফিসার সাহেব ইংরেজীতেই ক্ষেপে ওঠেন।

বললাম কি চাই।

“But you can’t enter my room like this all of a sudden.”

যেন মহাপাপ করেছি! হাঁটি-হাঁটি-পা-পা করে বেরিয়ে এলাম। অবাক লাগল। ভদ্রলোকের কি মাথা খারাপ হয়েছে। বাইরে এসে চাপরাশীর হাত দিয়ে এবার কার্ডটা পাঠালাম।

ওষুধ ধরেছে। বত্রিশটা দাঁত বের করে হাসতে হাসতে এবার হেলথ অফিসার নিজেই বেরিয়ে এলেন। কত অ্যাপোলজি! ‘চিনতে পারিনি’। ‘খেয়াল করিনি’। ‘চিনতে পারলে কি আর আপনার মতো জার্নালিস্টকে’... ইত্যাদি, ইত্যাদি।

যাক হলো দ্বিতীয় ‘হার্ডল’ পার। এবার ফাইনাল ‘হার্ডল’। আর একটু লাফাতে পারলেই নির্বাণ ‘ভিক্টরী স্ট্যাণ্ড’—কেল্লা ফতে। চাই ইনকাম ট্যাক্স ক্লিয়ারেন্স সার্টিফিকেট। আরে ইনকামই নেই তার আবার ক্লিয়ারেন্স সার্টিফিকেট। কিন্তু কথায় বলে না ‘ল ইজ্ অ্যান অ্যাস’ (Law is an ass)।

গেলাম আপিসে। বেশ স্মার্ট গোছের এক ছোকরা অফিসারের কামরায় পৌঁছে দিলেন এক কেরানীবাবু। অফিসারটি বোধ হয়

নতুন আমদানী। এক নিঃশ্বাসে গোটা কুড়ি প্রশ্ন ঝাড়লেন। একটার উত্তর দিতে না দিতেই দ্বিতীয় প্রশ্ন তৈরি। বাংলায় অনুবাদ করলে তাঁর প্রশ্ন আর আমার উত্তরগুলো ঠিক এ রকম দাঁড়ায় :

“করেন যাবার জন্তু অর্থ আপনি কোথা থেকে পাচ্ছেন?”

“তাতে আপনার কি দরকার মশাই?”

“যদি আপনার সার্টিফিকেটের দরকার থাকে তাহলে আমারও দরকার আছে। আর সার্টিফিকেটের দরকার না থাকলে— আমারও দরকার নেই।”

“ধরুন, বন্ধুদের কাছে ধার করেছি।”

“ধরুন-টরুন না। ঠিক করে বলুন। ধার করেছেন?”

“হ্যাঁ।”

“কত?”

“তাও দরকার?”

“বললাম তো।”

“ধরুন হাজার পাঁচেক।”

“আবার ধরুন! পাঁচ হাজার?”

“আজ্ঞে?”

“বন্ধুদের নামগুলো বলুন।”

“কেন?”

“দরকার আছে।”

“ক্ষমা করবেন মশাই, নাম বলতে পারবো না।”

“তাহলে আমাকেও ক্ষমা করবেন আমিও সার্টিফিকেট দিতে পারবো না!”

উঃ! কি লজ্জুত। রেগে প্রায় চিৎকার করেই বলে উঠি “দুস্তোর ছাই। ধরুন। না-না ধরুন না। আমি আমার নিজের পয়সাতেই যাচ্ছি। কোথা থেকে পেলাম? ধরুন। থুড়ি। বউয়ের গায়ের গহনা বিক্রি করেছি। বাপের সম্পত্তি বেচেছি। নিজের কোট, প্যাণ্ট বেচেছি। হয়েছে?”

“না। এসব হলো কি করে?”

এবার মাত্রা ছাড়িয়ে যাচ্ছে দেখে বলতে যাচ্ছিলাম “না মশায় আপনার সিঁজুক থেকে টাকা চুরি করেছি।” কিন্তু যে

গরু ছুধ দেয় তার নাকি লাথিও সহ্য করতে হয়। তাই চুপ করে থাকলাম। হঠাৎ সাহেব বিকট জোরে হেসে উঠলেন।

“I am sorry gentleman. You have come to the wrong man. You come under ‘E’ Ward. Mine is ‘D’ Ward. You have to go to the officer in ‘E’ Ward. Next room.”

“কি ?” মাথায় রক্ত চেপে গিয়েছিল। বলেই ফেললাম, “I can see that I have come to the Wrong man.”

“It was just a mistake. I am sorry—একটু বিনয় দেখালেন ‘ডি’ ওয়ার্ড।

“Indeed it was, to make you an officer”—সাহেব চাপরাশী ডাকবার জন্ত ঘণ্টা বাজাবার আগেই কথাটা বলে বেরিয়ে তাড়াতাড়ি ‘ই’ ওয়ার্ডের সাহেবের কাছে পৌঁছলাম। সত্যিই ভয়লোক। ‘ই’ ওয়ার্ড পাঁচ মিনিটেই কাজ শেষ করে দিলেন। সার্টিফিকেট তো পেলামই আর সেই সঙ্গে পেলাম ‘গড স্পীড’ আর ‘ব্যাঁ ভয়াজ’।

মানুষে মানুষে কত তফাত !

বেশ লাগল ত্রিবেদী সাহেবকে। বড় মিশুক লোক। যদিও ‘হাউ-ডু-ইউ-ডু’ পর্যন্ত চেনাশোনা ছিল, ট্রেনে কয়েক ঘণ্টার মধ্যেই বেশ জমিয়ে তুললেন আলাপ ত্রিবেদী সাহেব। ললতাদিন ত্রিবেদী। কিছুদিন হলো ডিস্ট্রিক্ট অ্যাণ্ড সেনসনস্ জজের কাজ থেকে অবসর গ্রহণ করেছিলেন। আমার সঙ্গে উনিও নাগপুর থেকে বসে মেলে উঠলেন। রিটারার করে আবার ওকালতি করছিলেন। তাই একটা কেস সংক্রান্ত ব্যাপার নিয়ে যাচ্ছিলেন। ট্রেন ছাড়ার কয়েক মিনিট পরেই কাছে এসে বসলেন।

“বেশ সুন্দর”—হাসতে হাসতে বললেন।

“কি ?” একটু অবাক হয়ে গিয়েছিলাম।

“এই কত লোক আপনাকে ‘সি-অফ্’ করতে এসেছিল।”

“ও !”

বাস ! ত্রিবেদী সাহেব বেশ জমিয়ে তুললেন। স্টেশনে গাড়ি থামলেই বলেন, “কুছ খাইয়ে”। নাছোড়বান্দা। কখনও চা কখনও

মিষ্টি। এক ধরনের লোক হয় যাদের কখনও ‘না’ বলা যায় না। ত্রিবেদী সাহেব সেই দলের। কথাবার্তায় বুঝলাম বিস্তর পড়াশুনা করেছেন ত্রিবেদীজী। বললেন, জন গান্ধারকে ওঁর খুব ভালো লাগে। শুরু করলেন নিজের দীর্ঘ ৩০ বছরের চাকরি-জীবনের ইতিহাস। অপূর্ব স্মরণশক্তি ভদ্রলোকের। কবে কোন্ কেসে কোন্ আসামী কি ডিফেন্স দিয়েছিল তা পর্যন্ত মনে ছিল। হঠাৎ গম্ভীর হয়ে গিয়ে একবার বললেন, “দেখুন মিঃ ভাট্টা, আজ যখন কখনও কখনও পুরনো কেসের রায়গুলোর কথা মনে করি, বেশি করে মনে পড়ে ফাঁসির হুকুমগুলোর কথা। অনেক ‘ডেথ সেনটেনসই’ দিয়েছি। বেশিরভাগই হাইকোর্টে কনফারমড হয়েছে। মাঝে মাঝে ভাবি এই যে আমাদের আইন—‘টুথ ফর টুথ, আই ফর আই, ডেথ ফর ডেথ’,—সেটা কি ঠিক? কি জানি?”

ত্রিবেদী সাহেব একটু বিচলিত হয়ে পড়েন। অল্প কথা পাড়বার চেষ্টা করি। কিন্তু ঘুরে-ফিরে সেই ফাঁসির কথাই বলেন। “জানেন একবার একটা খুনের আসামীকে ফাঁসির হুকুম শোনাতেই লোকটা হঠাৎ পাথরের মতো নিশ্চল হয়ে যায়। তারপর একটা বিকট চিৎকার করে কেঁদে উঠল। তার সেই চিৎকার আর কান্না আমার মনে আছে”—ত্রিবেদী সাহেব নিজের মনেই বলে চলেন।

ছোটবেলা থেকেই ফাঁসি দেখার বড় শখ ছিল। ১৯৪২-র আন্দোলনে জেল দেখা হয়েছিল বটে, কিন্তু ফাঁসি দেখা আর হয়নি। পরে খবরের কাগজে ঢোকান পর সে স্মৃযোগ ছু’-একবার এসেছিল।

মনে পড়ে প্রথমবার যেবার অনেক ছুজুত করার পর ফাঁসি দেখার স্মৃযোগ পেয়েছিলাম, তারপর ২১৩ দিন ভালো করে খেতে ও ঘুমুতে পারিনি। চোখের সামনে সেই ভয়াবহ দৃশ্যটা কেবলই ভেসে উঠত। ২৪।২৫ বছরের ছোট জাতের একটি মেয়েলোক। নিজের ছ’বছরের শিশুকে হত্যা করার অপরাধে ফাঁসি হয়েছিল। ফাঁসির পর মেয়েটার সমস্ত শরীরটা যেন একটা ধনুকের মতো বোঁকে গিয়েছিল।

গাড়ি থেকে না নামা পর্যন্ত ত্রিবেদী সাহেব সমানে তাঁর কর্মবহুল জীবনের অভিজ্ঞতা বলতে থাকলেন। বাইরে যাচ্ছি শুনে অনেক উপদেশও দিলেন। নামবার আগে গম্ভীর আলিঙ্গন করে

বললেন, “আই উইশ ইউ অল সাকসেস ইয়ংম্যান।” ফিরে আসার পর যখন তাঁর সঙ্গে দেখা করতে যাই ত্রিবেদী সাহেব ভীষণ খুশি। “আই নিউ, ইউ উইল কাম অ্যাণ্ড সি মি। আই হ্যাভ রেড অল ইয়োর ওয়াণ্ডারফুল আরটিকলস্।”

আজ বারবার ত্রিবেদী সাহেবের কথা মনে পড়ছে। মারা যাবার দু’দিন আগেও দেখা হয়েছিল। তেমনইভাবে অভ্যর্থনা জানিয়েছিলেন। সেই স্মৃত মুখখানা আজ কেবলই চোখের সামনে ভেসে ওঠে।

দুই

বম্বে। ‘গেটওয়ে অফ ইণ্ডিয়া’। শহর তো নয় একটা ছুজুগ। যতবারই বম্বে এসেছি, আমার কেবলই স্টিফেন জুইগের ‘We have become a nation of pushed and being pushed’ কথাটা মনে পড়েছে। কোনো কিছু নেই সব ব্যাপারেই একটা হৈ-হৈ, রৈ-রৈ। ট্রামে, বাসে, সিনেমায় ‘কিউ’ দিয়ে দাঁড়াও—হয় ধাক্কা দাও, নয়তো ধাক্কা খাও। মানুষ যে মানুষের প্রতি কত ‘ইনডিফারেন্ট’ হতে পারে, তা দেখতে হলে এক বম্বে শহরই যথেষ্ট।

আর এমন সময় বম্বে পৌঁছলাম যে, বরুণ দেবের কৃপায় বাইরে বেরোবার জো নেই। কি অদ্ভুত বৃষ্টি। কোনো কিছু নেই, হঠাৎ আকাশ ভেঙে বৃষ্টি। বম্বের লোকগুলো বোধ হয় সব সময় ছাতি নিয়ে ঘুরে বেড়ায়। নয়তো বৃষ্টির সঙ্গে সঙ্গে এত লোক ছাতি মাথায় দিয়ে যায় কি করে!

বেশ ভাবনায় পড়ে গেলাম। এই বৃষ্টির মধ্যে কি করে সব কাজ হবে। ভিসা যোগাড় করা, ট্রাভেলার্স চেক, প্যাসেজ আবার তারপর আছে ‘ই’ ওয়ার্ডের সই-করা ফর্মের জোরে ইনকাম ট্যাক্স ক্লিয়ারেন্সের ফাইনাল সার্টিফিকেট যোগাড় করা। হাতে মোটে তিন দিন সময়। তাছাড়া অনেকের সঙ্গেই দেখা করতে হবে।

“বলতে পারেন মশাই ‘গভর্নমেন্ট অফ ইণ্ডিয়ার’ আপিসটা কোথায়?”—জিজ্ঞাসা করলাম এক ব্যস্তবাগীশ মারাঠী

ভদ্রলোককে। হন্ হন্ করে চলতে চলতে না থেমেই তিনি উত্তর দেন, ‘মালা মাইত নেই’ (আমি জানি না)। একটু অবাক হয়ে ভাবছি, এমন সময় ওপরে তাকিয়ে দেখি, গভর্নমেন্ট অফ ইণ্ডিয়ার’ আপিসের সামনেই দাঁড়িয়ে আছি। এই হলো টিপিক্যাল ‘বম্বেওয়ালা’।

গেলাম দাদরে সীতাদির বাড়িতে। সীতাদি আবার একটু ‘রেড’। বাড়িময় স্টালিন লেনিনের ছবিতে ভর্তি। সীতাদিকে বেশ লাগে। ঠঠাৎ একবার আলাপ হয়েছিল। বৃষ্টিতে আমার ঝোড়ো কাকের মতো চেহারা দেখে হেসেই খুন। যেই শুনলেন, কেবিন-এ জায়গা পাইনি, ডেক-এ যাবো, সীতাদি এমন ভয় দেখালেন যে, আমার তো অবস্থা কাহিল। বললেন, এই মন্থুনে আরেবিয়ান সী ভীষণ ‘রাফ’ আর তাছাড়া যাচ্ছে তো ৫০০০ টনের বি. আই. এস. এন-এর ছোট জাহাজে—দেশলাইয়ের বাস্তের মতো ছলবে। তারপর আবার ‘ডেকে’। ভীষণ ‘সিক’ হয়ে পড়বে। রীতিমতো ঘাবড়ে গেলাম। জাহাজে যখন সত্যিই ‘সিক’ হয়ে পড়ি, তখন কেবলই সীতাদির কথা মনে পড়তো। কিছুতেই ছাড়লেন না—খাইয়ে তবে ছুটি। যাবার সময়ে বললেন, “চেপ্টা করে একবার রাশিয়াটাও ঘুরে এসো।”

বম্বে যখন এসেছি ভাবলাম বম্বের ‘ফিল্মী ছুনিয়াটা’ একবার ঘুরেই নিই। পুরোনো বন্ধু কিশোর সাহুর বাড়ি গেলাম। চেম্বরে কিশোরের বাড়ি—‘বাটিকা’। কিশোরের স্ত্রী শ্রীতি শান্তিনিকেতনের ছাত্রী। কিশোর চুংখ করছিল যে, লোকে ওর বই আর আর্ট বুঝল না। ‘ময়ূরপঙ্খ’ নিয়ে তখন কিশোর খুব ব্যস্ত। বললো, রোমে দেখা হবে। হলিউড থেকে সাবুকে এনে ক’দিন খুব হৈ-চৈ করল কিশোর। কিন্তু পর পর ক’খানা বই মার খেয়ে সাহু একটু কাহিল। ওর কলেজ-জীবনের শখ ‘হ্যামলেট’ করবার। করেছিলও। মন্দ হয়নি বইটা, তবুও ‘বক্স অফিস’-এ যাকে বলে একেবারে ‘ফ্লপ’।

কিন্তু যদি বম্বে এসে মোতীলালকে না দেখা হয়, তাহলে বম্বের ফিল্ম-ল্যাণ্ডের কিছুই দেখা হলো না। মোতীলাল এখনও ‘গ্রীন’। ওরকম ভদ্রলোক খুব কমই দেখেছি। আর লোকটা অদ্ভুত হাসতে পারে। একবার ওর সম্বন্ধে লিখেছিলাম,

—‘ফিল্মল্যাণ্ড্‌স্‌ নট্‌ বয়’। মোতীলাল হো-হো করে হেসে বলেছিল,
“People say it, but boy you have written it.”

মোতীলাল যেন একটা ছরস্তু হাওয়া। চোখে-মুখে সব সময় একটা ছুঁছুঁমি-ভাব। সবাইকে ওর ভালো লাগে আর সবাই ওকে ভালোবাসে। ওর একটা ‘ফ্যাড’ আছে—গাড়ি কেনা আর গাড়ি বেচা। বাজারে নতুন মডেলের মোটর বেরোল কি মোতীকে কিনতেই হবে। একটা নেশা হয়ে দাঁড়িয়েছে। এই গাড়ি নিয়ে একবার বড় মজা হয়েছিল। যুদ্ধের সময়। পেট্রোল র্যাশনিং। হঠাৎ মোতী একটা প্যাকার্ড গাড়ি কিনল। রাতদিন সেই গাড়ি নিয়ে ‘টো-টো কোম্পানী’। একদিন পুলিশ কমিশনার ওকে ডেকে পাঠালেন। বললেন—“মোতী। মাসে আট গ্যালন পেট্রোল তোমার বরাদ্দ। এই বিরাট গাড়ি নিয়ে তুমি রাতদিন ঘুরে বেড়াও। Where do you get all the Petrol from?”

মোতীর আবার সেই খিল খিল করে হাসি—“But sir, my car does’nt run on petrol.”

“What nonsense” পুলিশ কমিশনার টেবিল চাপড়ে বলে ওঠেন। তাড়াতাড়ি পকেট থেকে প্যাকার্ড কারের “ইনস্ট্রাকশন” বইটা বের করে ধরলো মোতী সাহেবের সামনে। সাহেব প্রথমে কিছুই বুঝতে পারেননি। পরে বুঝতে পেরে বিকট জোরে হেসে ওঠেন।

‘ইনস্ট্রাকশন’ বইয়ের প্রথম পাতাতেই লেখা ছিল, ‘Packard runs on Reputation’।

অনেক কাঁঠখড় পুড়িয়ে ভিসা ইত্যাদি যোগাড় হলো। বিদেশী রাজদূতাবাসে যেরকম ব্যবহার পেয়েছি, ছুঁথের সঙ্গে বলতে হয় আমাদের নিজেদের সরকারী দপ্তরে তা পাইনি। সুভাষ বন্স একবার আই. সি. এস-দের সম্মুখে ঠিকই বলেছিলেন, “Neither Indian nor Civil nor Service”। অনেক লোকের সঙ্গেই মিশেছি আর অনেক লোকের সম্পর্কেই এসেছি, কিন্তু বলতে কোনো বাধাই নেই যে, আজ পর্যন্ত বিশ্বের গ্রীক কন্সাল-জেনারেলের মতো অমায়িক আর মিষ্টভাষী অফিসারের সঙ্গে

সাক্ষাৎ হয়নি আর বস্বেতেই-ইনকাম ট্যাক্স ক্লিয়ারেন্স আপিসের বড় সাহেবের মতো বদমেজাজী লোকেরও দেখা পাইনি।

গ্রীক কন্সালের আপিসে যাওয়ার সঙ্গে সঙ্গে, পাঁচ মিনিটের মধ্যে ভিসা পেয়ে গেলাম। পককেশ, সুপুরুষ সাহেব যখনই জানতে পারলেন, আমি ‘জার্নালিস্ট’ বিনামূল্যে ভিসা পেয়ে গেলাম। হ্যাণ্ডশেক করে বললেন, “আই অ্যাম শিওর ইউ উইল এনজয় ইউর স্টে ইন মাই ওয়াটারফুল কাণ্ট্রি”।

“আই অ্যাম শিওর আই উইল। এ কাণ্ট্রি ছাট হাজ্ সাচ্ এ ওয়াটারফুল কন্সাল-জেনারেল, মাস্ট বী ওয়াটারফুল ইনডীড”, বললাম।

“সো কাইণ্ড অব ইউ”।

ইনকাম ট্যাক্স ক্লিয়ারেন্স আপিসে গিয়ে দেখি অসম্ভব ভিড়। ঘণ্টার পর ঘণ্টা লোকে দাঁড়িয়েই আছে। মাঝে মাঝে শুধু বড়সাহেবের বিকট চিংকার আর গালাগালি শুনতে পাওয়া যায়।

ইরাক দূতবাসে গেলাম। এই একটা জায়গা, যেখানে আমার ভিসা যোগাড় করতে একটু বেগ পেতে হয়েছিল। অনেক কষ্টে সাত দিনের ট্রান্সিট ভিসা পেলাম।

ফার্স্ট সেক্রেটারীর সঙ্গে কথা বলতে বলতে হঠাৎ একটা মস্ত ভুল করে বসলাম। বললাম, ইসরাইলও যাবার ইচ্ছা আছে। সেক্রেটারীর কান লাল হয়ে উঠল। “ইউ শুড্ হ্যাভ টোল্ড মি ছাট অলিয়ার, ইন ছাট কেস নো ভিসা উড্ হ্যাভ বিন গ্র্যাণ্টেড টু ইউ”।

ব্যাপারটা বুঝতে না পেরে একটু অবাক হয়েই গিয়েছিলাম। পরে জিনিসটা বুঝতে পেরে নিজের বোকামির জন্য আপসোস হলো। মধ্যপ্রাচ্যের আরব দেশগুলোর সঙ্গে নতুন ইহুদী রাজ্য ইসরাইলের সম্বন্ধ যাকে বলে একেবারে ‘ড্যাগার্স ড্রন’।

সেক্রেটারী জানালেন যে, তিনি বাগদাদে খবর পাঠাবেন। তিনি আমাকে ‘ওয়ান’ করলেন, কোনো মিডিল-ইস্ট দেশ যদি জানতে পারে আমার কাছে ইসরাইলের পাসপোর্ট আছে, বিপদের সম্ভাবনা খুব বেশি। (ইসরাইলের জন্তে আলাদা পাসপোর্ট নিতে হয়) পরদিন শুক্রবার হওয়াতে সিরিয়ান ভিসা পেলাম না, নয়তো সেখানে ব্যাপারটা একটু সামলে নিতাম।

বসরা বন্দরে নেমে বুঝতে পারলাম, ব্যাপারটা কত ‘সিরিয়স’। পোর্টে আমার মালপত্র তন্ন তন্ন করে খোঁজা হলো। কাস্টমস অফিসার বললেন, ‘জাস্ট ফর্মালিটি’। কিন্তু বেশ বুঝতে পারছিলাম যে, বম্বে থেকে খবর পৌঁছে গিয়েছে। অফিসারের মেহনতই সার হলো। তিনি আমার ইসরাইলের পাসপোর্টটা আর খুঁজে পেলেন না। পাবেন কোথা থেকে! ব্যাপার বেগতিক দেখে ইসরাইল যাবার বাসনা তখনকার মতো ত্যাগ করে বম্বেতেই সে পাসপোর্টটা রেখে এসেছিলাম।

পরে বুঝতে পারি, আরব রাষ্ট্রগুলো আর ইসরাইলের এই শত্রুতা সমস্ত মধ্যপ্রাচ্য আর পৃথিবীর কত বড় সমস্যা। ব্রিটিশ মিডিল-ইস্ট পলিসি যে এর জন্ম কত দায়ী, তা বুঝতেও পরে কষ্ট হয়নি। ব্রিটিশ লেবার গভর্নমেন্ট আর আর্নেস্ট বেভিনের কাঁধে দায়িত্ব কিছু কম না। জীবন দিলেন শুধু শাস্তিদূত কাউন্ট ফোক বার্নাডোট আর হাজার হাজার আরব আর ইহুদী।

অনেকদিন পরে সুদূর বম্বেতে বাঙাল কথা শুনতে পেয়ে একটু আশ্চর্য লাগল। ইরাকী দূতাবাসে পূর্বে বাংলার হজযাত্রী মুসলমানের ভিড়। সারাজীবনের জমানো অর্থ নিয়ে হজে যাচ্ছে কুদ্দুস মিয়াঁ এবং আরো অনেকে। বৃদ্ধ কুদ্দুস মিয়াঁ। কোমর বেঁকে গিয়েছে, শীর্ণ চেহারা। তবু জীবনের শেষ সন্ধ্যায় তার সে কি আশা—সে যাবে মক্কা-মদিনায়!

বাইরে আসছি এমন সময় কুদ্দুস আমাকে ডেকে ওঠে—“বাবু আপনি বাঙালী?”

“হ্যাঁ”।

“ওরে বাঙালীবাবু। আপনি আমাগো বাঁচাইলেন বাবু”—কুদ্দুস তার দলটিকে উদ্দেশ্য করে বলে।

“আইজ চাইর দিন চাইর রাইত বম্বেতে পইড়া আছি। এগো ভাষাও জানি না। কাইল জাহাজ ছাড়ব, কাগজপত্রর যোগাড় করতে পারি নাই। এইক হালা কিছু পয়সা ধাঙ্গা দিয়া মাইরা দিছে। বাবু আপনে বাঙালী, একটু মদদ কইরা দেন। খোদা আপনেরে সুখে রাখবেন।”

কুদ্দুসকে নিয়ে আবার গেলাম ফার্স্ট সেক্রেটারীর কাছে।

“What is the problem now ?”

জিজ্ঞাসা করেন সেক্রেটারী সাহেব। অনেক বুঝিয়ে-শুঝিয়ে কুদ্দুস আর তার দলের কাজটা তাঁকে দিয়ে করিয়ে নিলাম।

“But these people are Pakistani nationals...How are you concerned ?”

সেক্রেটারী এবার একটু হেসে জিজ্ঞাসা করলেন।

বললাম—

“But only a few years back they were very much like me. They came from Bengal, my own province...Moreover it is just helping a man in distress. There is no other concern.”

ভিসা পেয়ে কুদ্দুস হাতে যেন স্বর্গ পেল। ভাবে খোদার মেহেরবাণী। এ তো জানে না যে, আজকের দিনে মক্কা-মদিনা যেতে হলে খোদার মেহেরবাণীর চেয়ে বেশি প্রয়োজন গভর্নমেন্টের দেওয়া পাসপোর্ট আর দূতাবাসের দেওয়া ভিসা।

জাহাজে বারবার কুদ্দুস আমার কাছে এসেছে। ঢাকার কোন এক সুদূর গ্রামের কুদ্দুস মিয়াঁ। একদিন সকালে কাছে এসে দাঁড়াল। কিছু যেন বলবে। জিজ্ঞাসা করি—“কি মিয়াঁ ?”

“বাবু আপনারে একটা কথা কহু—” আমতা আমতা করে উত্তর দেয় বৃদ্ধ।

“বলো না।”

“আপনি রাইগ করবেন না তো ?”

“আরে রাগ করবো কেন, বলোই না।”

“আপনের লাইগা এটু চিড়া গুড় আনছি। দ্যাশের তৈরি। এতে তো কোনো দোষ নাই।”

“দাও না তাতে কি হয়েছে।”

একরাশ চিঁড়ে আর গুড় একটা পুঁটলি করে কুদ্দুস সামনে এনে ধরে।

“এত কি হবে মিয়াঁ ?”

“রাখেন না। আমাগো গেরামের জিনিস।”

জাহাজ থেকে নামবার সময় কুদ্দুসের হাতে একটা দশ টাকার নোট গুঁজে দিয়ে বলি, “রাখ মিয়াঁ।”

“বাবু, আপনি কি হজে যাবেন?”

“না কুদ্দুস, আমি যে হিন্দু। আমায় তো যেতে দেবে না।”

হঠাৎ কুদ্দুস একটা প্রশ্নাম করে বসে। “খোদা আপনাকে সুখী রাখেন।”—বৃদ্ধ কুদ্দুসের চোখের কোণে একটু জল চিক্ চিক্ করে ওঠে। নিজের অজান্তেই পকেট থেকে রুমালটা বের করে নিজের চোখের কাছে নিয়ে আসি।

কুদ্দুসের সঙ্গে আর দেখা হয়নি। হয়তো হাজী হয়ে সে আবার ঢাকার কোন এক সুদূর গ্রামে ফিরে গিয়েছে—হয়তো ফিরতে পারে নি। কে জানে? অনেকেই ফেরে না।

কুদ্দুসের খোদা কিন্তু আমার মজলই করেছিলেন। মা পাড়ার লোককে ডেকে বলতেন, “আমার ছেলে বিলাত ফেরত।”

মাঝে মাঝে এখনও কুদ্দুসের কথা মনে পড়ে—তার চোখের কোণে জল চিক্ চিক্ করছে—‘বাবু আপনি হজে যাবেন?’ এখনও চোখের সামনে ভেসে ওঠে জাহাজের ডেকের এক কোণে ছেঁড়া মাহুরের ওপর হাঁটু গেড়ে নমাজে বসা কুদ্দুসের চেহারাটা। ভোরের আধো-আলো, আধো-আঁধারে ওকে দেখাতো একটা ‘সিলুয়েট’-এর (Silhouette) মতো।

তিন

ধীরে ধীরে বস্ত্রের সাদা সাদা অট্টালিকা, ফ্যাক্টরীর চিমনি আর সবুজ গাছগুলো দিগন্তে মিলিয়ে যেতে লাগল। ‘বি. আই. এস. এন’-এর এস. এস. “দ্বারকা” জাহাজ আস্তে আস্তে হলে-তুলে বস্ত্র বন্দর ছেড়ে চলল। ফোঁটা ফোঁটা বৃষ্টি শুরু হওয়াতে বাইরে আর বেশিক্ষণ দাঁড়ান গেল না, ভিতরে যেতে হলো। কিন্তু ভিতরে যেতেই মেজাজটা খারাপ হয়ে গেল। কেবিনে জায়গা না পাওয়ায় ডেকে যেতে হচ্ছিল। জাহাজের ‘পার্সার’ জানালেন যে, করাচীতে একটা কেবিন সিট খালি হলে জায়গা পাব। কিন্তু করাচী না পৌঁছনো পর্যন্ত দু’দিন যে কি করে কাটিয়েছি তা আমিই জানি। ‘ডেক’ যে একটা কি ভয়াবহ স্থান তা এই বি. আই. এস. এন-এর

৫০০০ টনের ‘দ্বারকা’ জাহাজে না চড়লে বোঝা শক্ত। ওই তো জাহাজ তার আবার শখের নাম ‘দ্বারকা’! কানা ছেলের নাম পদ্মলোচন! শুনেছি গভর্নমেন্ট নাকি ডেক প্যাসেঞ্জারদের ‘ওয়েলফেয়ারের’ জন্তু একটা কমিটি বসিয়ে ছিলেন। আজকের যে-যার ‘ওয়েলফেয়ারের’ দিনে, প্যাসেঞ্জারদেরকী যে ‘ওয়েলফেয়ার’ হয়েছিল জানা নেই। উঃ অসহ্য ব্যাপার এই ডেক। ছোট্ট ডেকে কত যে যাত্রী তার ইয়ত্তা নেই। ম্যাজি়মাম ক্যাপাসিটি বলে কোনো কথা এই কোম্পানীর ডিকশনারীতে নেই। এক গাদা মানুষ—ছেলে, মেয়ে, বুড়ো, জোয়ান, সব গোয়ালঘরের মতো ঠাসা ডেকের মধ্যে। কোন্টা মানুষ আর কোন্টা বোঁচকা বোঝা দায়। একই জায়গায় রান্না, বাসন-ধোয়া, বমি করা, কাপড় কাচা। সে যে কি দৃশ্য এখনও ভাবতে গেলে গা ঘিন-ঘিন করে।

যাত্রীদের মধ্যে বেশিরভাগই আরব নয়তো ভারতবর্ষ আর পাকিস্তানের মুসলমান—যাবে হয় করাচী নয়তো পারস্ত উপসাগরের ছোট ছোট বন্দর মাসকাট, বহেরিন, ওমন বা কুয়েট।

ধীরে ধীরে জাহাজের উপর রাত নেমে আসে আর সঙ্গে সঙ্গে বেড়ে যায় ঝগড়া, মারামারি, কান্নাকাটি, যাত্রীদের চিৎকার। ঘুমুতে না পেরে উপরের ডেকে উঠে এলাম। আকাশের কোণে কালো ঘন মেঘ। সমুদ্রের ঢেউগুলো এসে জাহাজের গায়ে আছড়ে পড়ছে আর মাঝে মাঝে তীব্র সার্চলাইটের আলো পড়ে সামনের জলরাশি চিক্‌চিক্‌ করে ওঠে।

কতক্ষণ যে একভাবে রেলিং-এ ভর দিয়ে দাঁড়িয়েছিলাম জানি না। হঠাৎ মনে হলো পিছনে যেন কেউ এসে দাঁড়িয়েছে। “এস্কিউজ মি, মে আই হ্যাভ এ সিগারেট?”—সুন্দর চেহারার এক যুবক মিষ্টি হেসে সামনে এসে দাঁড়াল। অনেকক্ষণ পরে কথা বলার একজন লোক পেয়ে হাতে যেন স্বর্গ পেলাম।

“আই অ্যাম ম্যাকগ্রেগরী। ইউ মে কল মি গ্রেগ।”

নিজে একটা ধরিয়ে আর ওকে একটা সিগারেট দিয়ে বলি,—
“হাউ ডু ইউ লাইক ম্যাক?”

“জাট্‌ ইস ওয়াণ্ডারফুল। শী অলসো কল্‌স্‌ মি ম্যাক”—হঠাৎ গ্রেগ একটু বিষন্ন হয়ে যায়।

আর্মেনিয়ান যুবক ম্যাকগ্রেগরী। বস্বে থেকে বেড়িয়েছে ভাগ্যের অন্বেষণে। অটোমোবাইল মেকানিক্। জিজ্ঞাসা করলাম, “যাবে কোথায়?” জবাব দিলো, “আলটিমেট ডেসটিনেশন্ ফ্রান্স।”

ব্যাপারটা ঠিক বুঝতে না পেরে ওর দিকে তাকাতেই ও নিজেই বুঝিয়ে বললো। ‘উইদাউট ফুড’, টিকিট কেনার পর ওর কাছে আছে ৩০ টাকা। বসরায় আর্মেনিয়ান চার্চ আছে। ওর আশা, সেখানে অর্থ সাহায্য পেয়ে ও ফ্রান্সে যেতে পারবে আর শুরু করবে ‘নিউ লাইফ’। “দেন আই উইল কাম ব্যাক অ্যাণ্ড ম্যারী ডেইজি অ্যাণ্ড টেক হার টু প্যারিস টু।”—অসীম সাহস আর আশা।

ম্যাক অনর্গল কথা বলে চলে। ইতিহাসের পাতা তুলে ধরে আমার সামনে—কোথায়, কবে, কোন দেশে আর্মেনিয়ানদের উপর অত্যাচার হয়েছিল। কতক্ষণ ওর সঙ্গে কথা বলেছি জানি না, তাকিয়ে দেখি সামনের আকাশ লাল হয়ে উঠেছে।

ছপুর ১২টার সময় আবার ম্যাক এসে হাজির। বলল সেকেণ্ড ক্লাস কেবিনের ‘লাউঞ্জ’ খুব ভালো ‘কোল্ড’ বিয়ার পাওয়া যাচ্ছে। যদি ইচ্ছে থাকে সে যোগাড় করে দিতে পারে। ডেক প্যাসেঞ্জারদের তো আর অত সুবিধে নেই।

ঘণ্টাখানেক পরে ম্যাক চার বোতল বিয়ার নিয়ে উপস্থিত। সোদিন লাঞ্চ ওর সঙ্গেই খেলাম। যখন শুনল পরদিন সকালে করাচী পৌঁছানর পর আমি কেবিনে শিফট করব তখন একটু মনমরা হয়ে গেল।

রাত প্রায় তিনটে। কোন রকমে এক কোণে গুয়েছিলাম। একটু তন্দ্রা এসেছে হঠাৎ কয়েকজন লোকের ফিস্ ফিস্ করে কথাবার্তা শুনে কানটা খাড়া হয়ে উঠল। করাচীযাত্রী কয়েকজন মুসলমান রাজনীতি চর্চা করছিল।

“পাকিস্তান আব মুসলমানোকো রহনে লায়ক নহী রহা”—একজন মন্তব্য করল।

“কুঁ?”

“সব শরিয়তকে খিলাফ কাম হোরহা হয়। ইয়ে মহম্মদ আলী কোই কামকা নহী। বহুত জ্যাদা বাঙাল কি বাত করতা হয়।”

“কায়েদে-মিলাং মরহুম নবাবজাদা লিয়াকৎ আলী খাঁ-সাহেব
বহোত আছে আদমী থে।”

“বিলকুল”

“জী”

“জী”

“জী”

ডেকের আর এক কোণে তাকিয়ে দেখি এক বিরাট বপু আরব
দশ টাকায় একটা “হীরা” বিক্রির চেষ্টায় একজন যাত্রীর সঙ্গে ধীরে
ধীরে কথা কাটাকাটি করছে। খানিকক্ষণ পর অনেক দরদস্তুর
হয়ে সাড়ে সাত টাকায় সওদা হলো। আরব মহাখুশি—একটা
রঙীন পাথর সে হীরা বলে সাড়ে সাত টাকায় বেচেছে আর
খন্দের তার চেয়েও বেশি খুশি—সে মোটে সাড়ে সাত টাকায়
হীরা কিনতে পেরেছে।

অনেক কষ্টে হাসি চেপে রেখেছিলাম।

রাজনীতি আলোচনা শেষ করে আগের দলটা ততক্ষণে পোর্টলা-
পু’টলি বাঁধতে শুরু করে দিয়েছে। ভোরের আলো জাহাজের
ডেকের ওপর এসে পড়েছে। জাহাজের মধ্যে বেশ একটা গুণ্ডগোল
শুরু হয়ে গেল। ‘প্রমিসড ল্যাণ্ড’ করাচী আর কিছু দূরেই।

করাচী। নামটা মনে হতেই কেমন যেন একটা ‘একসাইটমেন্ট’
বোধ করলাম। তাড়াতাড়ি দৌড়ে উপরের ডেকে গিয়ে দাঁড়িলাম।
রেলিং-এ ভর দিয়ে খুব জোরে একটা নিঃশ্বাস নিলাম। ভোরের
মিষ্টি হাওয়া বড় ভালো লাগল। জাহাজের ভেঁপু বিকট জোরে
বেজে উঠল আর জাহাজ ধীরে ধীরে বন্দরের ভিতরে ঢুকতে শুরু
করল। কতদিন পরে আবার করাচী দেখব! নিজের অজান্তেই
কোথায় যেন একটু ব্যথা পেলাম। গলাটা ধরে এল—কেন জানি
না। ১৯৫৩ সালে বোধ হয় করাচী আমায় মনে করিয়ে দিলো
১৯৪৭-র পার্টিশান আর তার ছঃ্শ্বপ্ন। মাহুশে-মাহুশে হানাহানি,
মারামারি, কত রক্তপাত, কত চোখের জল!

“আর ইউ আনওয়েল?”

ঘুরে দেখি কখন ম্যাকগ্রেগরী আমার পাশে এসে দাঁড়িয়েছে।

“নো ম্যাক। আই অ্যাম অলরাইট।”

ধরা গলায় ম্যাক বলে, “ফ্রম্ নাও অন্ ইউ উইল বি এ কেবিন্

প্যাসেঞ্জার, অ্যাণ্ড আই উইল রিমেইন ইন্ দি ড্যাটিং ডেক। বাট আই উইল কাম ফর মাই বিয়ার টু ইউ”—শুকনো হাসি হাসে ম্যাক।

“শিওর ম্যাক”—ওর হাতটা শক্ত করে চেপে ধরি।

জাহাজের গ্যাঙ্গওয়ে দিয়ে নামছি। ইঠাৎ “আপকা পাসপোর্ট?”

“পাসপোর্ট?”

“হাঁ। আপ্ শহর জাইয়েগা না?”

“জী হাঁ।”

“লাইয়ে আপকা পাসপোর্ট। চার ঘণ্টেকা অন্তর ওয়াপস্ আজাইয়েগা। আপকা ক্যামেরাভী ছোড়্ জাইয়ে।”

“ক্যু?”

“If you want to go ashore, keep your camera here or else stay back in the ship.”

পোর্ট অফিসারের হাতে পাসপোর্ট আর ক্যামেরা তুলে দিয়ে মুখ নিচু করে জাহাজের গ্যাঙ্গওয়ে দিয়ে নেমে আসি।

ধীরে ধীরে বেরিয়ে এলাম করাচীর রাস্তার উপর।

স্বাধীন পাকিস্তানের রাজধানী করাচী। মাথার ওপর কে. এল. এম. কোম্পানীর এক বিরাট ‘কনস্টেলেশন’ দেখি মোরীপুর এরোড্রমে নামার জন্য বোঁ বোঁ করে ঘুরছে।

“বাগার রোড চলো”—সামনেই দাঁড়ানো একটা ট্যাক্সিতে উঠে পড়লাম।

চার

ঘরের কোণে রাখা চেয়ারটায় বসে ১৬।১৭ বছরের রোগা, লম্বা একটা ছেলে চুপ করে তার বাবা আর তাঁর বন্ধুর আলাপ আলোচনা শুনছিল। বড় বড় চোখে তার তীক্ষ্ণ দৃষ্টি! কান দুটো খাড়া করে প্রত্যেকটা কথা সে যেন গিলে খাচ্ছিল।

“না, না আপনি ভুল করছেন। ছেলেটার ভবিষ্যৎ খুবই উজ্জ্বল। আপনি ওকে বিলাতেই পাঠান। পারিবারিক ব্যবসার মধ্যে ওকে আর ঢোকাবেন না।”

ভারত আর পাকিস্তানের একটা মাপের নিচে ‘টাইম’ পত্রিকা কাপশন দিয়েছিল—‘Pieces of Hate’. শুভ মার্বেলের তৈরি সমাধির সেই শাস্তিময় পরিবেশের মধ্যে দাঁড়িয়ে সেকথা বার বার কেবলই মনে হতে লাগল। ‘Death is a great leveller’ কথাটাও কেন জানি না ভুলতে পারছিলাম না। সঙ্গে আনা কিছু ফুল সমাধির উপর সন্তুর্পণে রেখে কিছুক্ষণ দাঁড়িয়ে আছি, আর শাস্ত পরিবেশের সেই স্তব্ধতা ভঙ্গ করে হঠাৎ ইরশাদ শ্লেষের স্বরে বলে উঠল “ভাইজান”।

কঠিন বাস্তবের আঘাতে সস্থির ফিরে আসে। অন্ত্রমনস্কভাবেই উত্তর দিই “বলো ইরশাদ ভাই?”

ইরশাদকে এখানে আসার সময় একটা ‘বার’ থেকে উঠিয়ে নিয়ে এসেছিলাম। সে তখন বিয়ারের নেশায় চূর।

জড়িয়ে জড়িয়ে বললো, “ভাইজান, ইকবাল পড়েছে?”

‘মজ্জব নহী শিখাতা আপসু মে ব্যার রাখ্‌না।

হিন্দী ইয়ায় হাম—বতন হায়া হিন্দোস্তা। হামারা ॥

সারে জই সে আচ্ছা.....’

অমর কবি ইকবালের অমর পংক্তি। ‘ধর্ম কাউকে শেখায় না শত্রুতা,—হিন্দুস্তানী মোরা, দেশ মোদের হিন্দুস্তান।’ জিন্না সাহেবের সমাধির সামনে দাঁড়িয়ে ইরশাদ বোধহয় বাজ করছিল অদৃষ্টের পরিহাসকে। ‘টু নেশন থিওরি’ আর ধর্মের ভিত্তিতে গড়া পাকিস্তানের জন্মদাতার ‘মাজার’ (সমাধি)-এর সামনে ধর্মের একতার বাণী। পাকিস্তান আবার আজ ইকবালকে বলে ‘পাকিস্তানের গ্রাশন্টাল পোয়েট’, যেমন বলে নজরুলকেও।

কথা ঘুরিয়ে ইরশাদকে জিজ্ঞাসা করি “জিন্না সাহেবের শেষমুহূর্ত সন্মুখে কিছু জানো?”

“একটা বিরাট ট্র্যাজেডি ভাইজান। যে গলা দিয়ে এত বিষ ছড়িয়েছিল তাঁর থোটে ক্যানসার তো হবেই। যাক্‌গে, যা শুনেছি তাই বলছি। জিয়ারত থেকে কোয়েটায় ফিরে আসেন আর সেইখানেই শরীর একেবারে ভেঙে পড়ে। বললেন, ‘আমাকে করাচীতে নিয়ে চল’। ১১ই সেপ্টেম্বর এলেন করাচীতে আর সেই রাতেই সব শেষ”। ইরশাদ থামল।

ইরশাদ আবার বলতে লাগল “জানি না কতদূর সত্যি, কিন্তু

কেউ কেউ বলে যে, ১০ তারিখে জিন্নার দিদি ফতিমা তাঁকে বিছানা থেকে একটু উঠে একদাগ ওষুধ খেতে বলায় জিন্না বলেন যে, বিছানা থেকে উঠতে তাঁর কষ্ট হচ্ছে। জানো ভাইজান, এই সিচুয়েশনটা মনে হলে আমার এক কবির দুটো অপূর্বলাইনের কথা মনে পড়ে”—একটু গম্ভীর হয়ে ইরশাদ কবিতাটি আবৃত্তি করল।

‘কাল তো কহতে থেে বিস্তর সে উঠা যাতা নহী।

আজ ছুনিয়া সে চলে জানে কি তাকত আগই ॥’

অপূর্ব! কবি তাঁর শ্রেয়সীকে বলছেন “কাল তো বলেছিলে শয্যা থেকে উঠতে কষ্ট হচ্ছে আর আজ পৃথিবী থেকে চলে যাবার শক্তি তুমি পেয়ে গেলে!”

কোনো একটা ট্র্যাজিক সিচুয়েশনের মধ্যে হাসির খোরাক যোগাতে বোধহয় ছুনিয়াতে ইরশাদের জুড়ি আর কেউ নেই। কবিতাটার লাইন দুটো তখনও একটু ভাববার চেষ্টা করছি এমন সময়, “কিন্তু কায়েদে আজম বড় অবিচার করে গেলেন। শুনেছি তাঁর কাছে নাকি ৩০০ গরম স্টুট ছিল। কয়েকটা আমার মতো লোককে দিয়ে গেলে কিছু কাজ হতো”—বলে ইরশাদ নিজের কোটের একটা ছেঁড়া অংশ আমার দিকে তুলে ধরল।

“জিন্না সাহেব ৩০০ স্টুট, ১০০ খানেক ফাইল, অজস্র টাকা, দিদি ফতেমা আর মুসলীম লীগকে রেখে মারা যান। মরার সময় কেউ কিছুই নিয়ে যেতে পারে না”—

—এবার ইরশাদকে দার্শনিকের মতো শোনা যায়।

“মানুষের মৃত্যু নিয়ে অনেক কবিই অনেক কিছুই লিখেছে। তোমাদের Tagore লিখেছেন, Death Oh my Death, come and whisper in my ears, কিন্তু কবীরের মতো বুঝি কেউই লেখেনি” ইরশাদ এবার করীরের দোঁহা শোনায়—

‘হম্কা ওড়াবে চাদরিয়া রে, চলতি বিরিয়া

প্রাণরাম যব নিকসন্ লাগী

উলট গই দোনয়ন-পুতরিয়া ॥

ভীত্রে সে জব বাহার লায়ে

ছুট গই সব্ মহল আটরিয়া ॥

চার জনে মিলি খাট উঠায়ন,

রোবত্ লে চলে ডগর ডগরিয়া

কহত কবীর শুনো ভাই সাধো

সঙ্গ চলেগী ওভী স্বখী লকড়িয়া ॥

ঐ শেষের লাইনেই সব। মরবার সময়ে তুমি যাবে, তোমার সঙ্গে যা যাবে, তা শুধু কিছু শুকনো কাঠ, আর কিছুই না।

ইরশাদ হেসে বললো, “চল যাই, একটু নমাজ পড়ে আসি।”

ইরশাদ আর নমাজ! কালনেমীর মুখে রামনাম! একটু ভ্যাভাচাকা খেয়ে গিয়েছিলাম। বললাম, “সে কী হে, মসজিদে আবার তোমার কি কাজ? বিয়ারের গন্ধে তোমার খুদা যে পালিয়ে যাবেন।”

“না, ভাইজান, নেশাটা আজ তোমার জন্তু ভালো করে জমতে পারেনি। তাই খুদাতালার কাছে একটু আর্জি পেশ করতে হবে।”

“কিন্তু ইরশাদ-ভাই, শুনেছি তোমাদের কোরানে নাকি মদ্যপান পাপ?” একটু মস্করা করি।

“বিলকুল গলত্। একেবারে ভুল। মোদ্দা কথা হচ্ছে—‘পিনা হারাম নহী, নশা হারাম হ্যায়’। মানে মদ্যপান পাপ না, মাতলামি করা অতি গর্হিত কাজ।”

একেবারে ডাইলেকটিক্সের লজিক।

একরকম জবরদস্তী করেই ইরশাদকে ট্যাঙ্কিতে টেনে ওঠাই। কবি মানুষ আর তার উপরে আবার বিয়ারের কিঞ্চিৎ রঙীন নেশা। ইরশাদের ততক্ষণে বেশ ‘মুড’ এসে গিয়েছে। ট্যাঙ্কিতে উঠেই ওকে ইকবালে পেয়েছে।

“ইকবালের একটা অপ্রকাশিত কবিতা শুনবে? জানি না আসলে কার লেখা। কিন্তু কেউ কেউ বলে নাকি ১৫ বছর বয়সে ইকবাল তাঁর ভূগোলের খাতায় একটা ম্যাপ এঁকে তার উপরে লিখেছেন :

‘গোসলখানা পঁহচ গয়া বাবুর্চিখানা সমঝকে।

বোরীমে হাত ভাল দিয়া দস্তানা সমঝকে ॥

দিল্লী পঁহচ গয়া, লুখিয়ানা সমঝকে।

মসজীদ পঁহচ গয়া ময়খানা সমঝকে ॥’

মানে,

বাবুর্চিখানা ভেবে গোসলখানাতে পৌঁছে গেলাম। দস্তানা ভেবে হাত ঢোকালাম চটের থলিতে। লুখিয়ানা যাব ভেবে চলে গেলাম দিল্লী আর পানাগার মনে করে মসজিদে ঢুকলাম।

ইরশাদ নিজেই হেসে খুন। ইরশাদকে ঠেকানো দায়। ও

একেবারে যাকে বলে ‘ইরেসিস্টিবল’। আর একবার যখন ইকবাল নিয়ে পড়েছে, ক্লিফটন্ বীচ না পৌঁছান পর্যন্ত ও আর থামবে না।

আজ স্মার মহম্মদ ইকবালকে আমরা প্রায় ভুলতে বসেছি। উর্দু সাহিত্যের চেনা-অচেনা, বিখ্যাত-কুখ্যাত কবি আর ‘শায়র’দের বাজে লেখনীর নিচে সেই মহাকবি আর তাঁর অমর কীর্তি আজ প্রায় চাপা পড়ে গিয়েছে। উর্দু আর ফারসীতে অনেক কবিই হয়েছেন, কিন্তু কয়েকজন ছাড়া কেউই ইকবালের স্বচ্ছ ভাষা আর শৈলীর কাছ দিয়েও ঘেঁষতে পারেননি। ঠিক জানি না কিন্তু আমার মনে হয়, এযুগের কবিদের মধ্যে রবীন্দ্রনাথ ছাড়া ইকবালের মতো আর কোনো কবিরই লেখা এত দেশী-বিদেশী ভাষায় অনূদিত হয়নি। এদেশে আমরা অবশ্য ইকবালের লেখা অনুবাদ করবার কোনো চেষ্টাই করিনি। হিন্দীর আক্রমণে উর্দু প্রায় লোপ পেতে বসেছে।

একজন বিদেশী লেখক ইকবাল সম্বন্ধে লিখেছেন, ‘Like Goethe Iqbal is a great seer and humanist’। উর্দু সাহিত্যের কতটুকুই বা জানি? কিন্তু যতবারই ইকবালকে পড়তে আর বুঝতে চেষ্টা করেছি, তাঁকে ততই বেশি ভালোবেসেছি। কি অনবত্ত কল্পনাশক্তি, কি ছন্দ, আর কি ভাবধারা!

ইকবাল লিখতেন উর্দু আর ফারসী ভাষায়। একজন তাঁকে জিজ্ঞাসা করে, তিনি হঠাৎ ফারসীতে কেন লেখা শুরু করলেন। ইকবাল উত্তর দেন—‘আমি আরবী ভাষায় লিখতে পারি না বলেই ফারসীতে লিখতে শুরু করি।’ কিন্তু ইকবালের সাহিত্য আজ আরব ছনিয়ার কোণেও পৌঁছে গিয়েছে। তাঁর ‘তারানা-ই-মিল্লি’র আরবী অনুবাদ ‘আল-বসির’ পত্রিকায় প্রকাশিত করে হাসান-অল্-আজমী সাহেব আরব ছনিয়ার কৃতজ্ঞভাজন হয়েছেন। মিশরের কবি সৈদী অলী সবলান্ অনুবাদ করেছেন ইকবালের অমর কীর্তি ‘শিকওয়া আউর জবাব-শিকওয়া’। ইরাকের বিখ্যাত মহিলা কবি আমিনা মুরুদ্দিনও বাগদাদে ইকবালের অনেক কবিতা আরবী ভাষায় অনুবাদ করেছেন।

কিন্তু ইকবালকে আরবী ছনিয়ায় পরিচয় করিয়ে দেবার গৌরব দাবী করতে পারেন বিখ্যাত সাহিত্যিক ডক্টর আবদুল

ওহাব আজম। তিনি আগে রুমীর ‘মাথনাওই’ অনুবাদ করেছেন আর ইকবালের ‘পায়াম-ই-মশরীক’র অনুবাদ তাঁর আশ্চর্য কীর্তি। কিছুদিন করাচীতে থেকে উঠে শিখে তিনি ইকবালের ‘জবর-ই-কলিম’ও অনুবাদ করেন। টার্কীতে ডাঃ অলী গনজেলী, ইন্দোনেশিয়ার বহরাম রজ্জাকুটী, আর ইরানে বাহার খোরসানী তাঁর ‘সবক্-সিনাসী’ নামক বইয়ে ইকবালের কবিতা নিয়ে পুরো একটা অধ্যায় লিখেছেন।

পাশ্চাত্য সাহিত্যেও ইকবালের দান কিছু কম নয়। ডাঃ নিকলসনের ‘আসরার-ই-খুদীর’ অনুবাদ, আরবারীর ‘পায়াম-ই-মশরীক’র অনুবাদ সুন্দর সাহিত্য-কীর্তি। আরবারী ‘পায়াম-ই-মশরীক’র অনুবাদ পড়ে করেছেন আর তাঁর নাম দিয়েছেন *Tulips of Sinai*। পরে তিনি অনুবাদ করেন ‘জবুর-ই-আজমের’ গজলগুলো আর নাম দেন ‘*Persian Psalms*’। কিরনান সাহেব লেখেন ‘*Poems of Iqbal*’। আলতাফ হুসেনের ‘শিকওয়া আউর জবাব-শিকওয়ার’ ইংরেজী অনুবাদ, নিয়াজের ‘খিজরী রাহর’ অনুবাদ ছাড়াও আরবারী সাহেব করেন ‘রমুজ-ই-বেখুদী’র অনুবাদ।

‘দিওয়ান-ই-সমসী তাবারেজের’ অনুবাদের ভূমিকায় প্রোফেসর নিকলসন লিখেছেন,

“My translation seems to reconcile the claims of accuracy and art, it is therefore in prose.”

ইরলাঞ্জন বিশ্ববিদ্যালয়ের প্রোফেসর হেল ‘পায়াম-ই-মশরীক’র অনুবাদ জার্মান ভাষায় করেন, কিন্তু প্রকাশিত হবার আগেই তাঁর মৃত্যু হয়। মারবুর্গ বিশ্ববিদ্যালয়ের প্রোফেসর আনেমারী সিমেলের কাছে বোধহয় সেই পাণ্ডুলিপিগুলি এখনো আছে। ফ্রান্সের মাদাম ইভা মেয়রোভিচ ইকবাল পড়ে এতটাই অভিভূত হন যে, তিনি ফারসী ভাষা শিখছেন ‘জবুর-ই-আজম’ ফারসী ভাষায় অনুবাদ করার উদ্দেশ্যে।

প্রথম ইয়োরোপীয় ভাষায় ইকবাল অনূদিত হন ইটালীয়ান-এ। প্রোফেসর আলসেনডরো বাসোনী ইকবালের ‘জবিদনামা’ ‘*Il Poema Celeste*’ নাম দিয়ে সুন্দর অনুবাদ করেছেন। হেলসিন্কির একটি ছাত্র কিছুদিন আগে ইকবাল সম্বন্ধে একটি থিসিস্ লিখেছে। আমেরিকার ইয়েল ইউনিভার্সিটির প্রোফেসর

নর্থপের পরিচালনায় ও কেমব্রিজ বিশ্ববিদ্যালয়েও ইকবাল সম্বন্ধে বিস্তারিত গবেষণা হচ্ছে। করছে সবাই শুধু আমরা ছাড়া। বছরে একবার ‘ইকবাল-মুশায়রা’ করেই আমরা খালাস!

ইকবালের ফারসী ভাষায় লেখা কবিতা অনেক আগেই আফগানিস্থানে প্রচারিত হয়। তিনি তাঁর অমর কীর্তি ‘পায়াম-ই-মশরীক’ আফগানিস্থানের ভাগ্যহীন রাজা আমানুল্লাহকে উৎসর্গ করেন। আমানুল্লাহ যখন দেশ ছেড়ে পালিয়ে যান, তখন জেনারেল নাদির খান আফগানিস্থানে শৃঙ্খলা ফিরিয়ে আনার জন্য প্রস্তুত হন। লাহোর স্টেশনে ইকবাল তাঁর সঙ্গে দেখা করেন আর তাঁকে প্রচুর অর্থসাহায্য করতে তৈরি হন। নাদির খাঁ, যতদূর জানা যায়, অর্থসাহায্য নেননি, কিন্তু ইকবালের প্রতি তাঁর গভীর শ্রদ্ধা জন্মায় আর ১৯৩৩ সালে তিনি ইকবালকে আফগানিস্থানে আসবার জন্য আমন্ত্রণ জানান। তখন জহির শাহ আফগানিস্থানের রাজা। ইকবাল ফিরে এসে ‘The Traveller’ নামে একটি কবিতায় তাঁর আফগানিস্থান ভ্রমণের অভিজ্ঞতা বর্ণনা করেন। কাবুলে ইকবালের বিরাট অভ্যর্থনা হয়েছিল এবং এক সম্বর্ধনা-সভায় তাঁকে “Poet-prophet of the East” বলে অভিহিত করা হয়। সদর সালাউদ্দিন সেলজুকী অনেকদিন পর্যন্ত দিল্লীতে আফগানিস্থানের কল্যাণ-জেনারেল হিসাবে ছিলেন এবং তিনি ছিলেন ইকবালের অভিন্নহৃদয় বন্ধু। যতবার ইকবাল দিল্লী গিয়েছেন, তিনি সেলজুকীর গৃহেই আতিথ্য স্বীকার করেছেন।

ভারতের শিক্ষামন্ত্রী মোলানা আবুল কালাম আজাদ যখন ১৭ বছর বয়সে লাহোর ‘আজুমান-ই-হমায়ত ইসলাম’-এর এক সভায় ভাষণ দেন মহাকবি ইকবাল আর হালি তখন সেখানে উপস্থিত ছিলেন। তাঁরা দু’জনেই মোলানা সাহেবের প্রতিভা দেখে মুগ্ধ হন।

প্রোফেসর কিরনানের ‘Poems of Iqbal’, কবির উর্দু কবিতাগুলির অনুবাদ। একটি কবিতার অনুবাদের কিছু অংশ :

‘...You are a pinch of dust, and blind ; I am a
Pinch of dust that feels—
Are You the flowing stream that lifts from
life’s dry fields, their blight or I ?’

প্রোফেসর আরবারীর ‘Tulips of Sinai’-এ এক জায়গায়
লিখেছেন :

‘...Thou art the painter ; thy design
Inspires and moves this brush of mine ;
Thy hands the living world, adorn,
And shape the ages yet unborn.
Much sorrow in my heart I had
That by the tongue could not be said ;
Love, lovelessness, truth, treachery—
All things alike are sprung of thee.’

প্রজাতন্ত্রবাদের (ডেমোক্রেসীর) ব্যাখ্যা অনেক রাজনৈতিক
দার্শনিকই করেছেন, কিন্তু ইকবাল ছ’লাইনে যে ব্যাখ্যা করেছেন
তা অতুলনীয়। ডেমোক্রেসী কি ? ইকবাল বলেছেন,

‘জমহুরিয়ত বহু তর্জেকুমত ইয়ায় জিস্মে
বন্দোকো গিনা করতে ইয়ায়, তোলা নহী করতে।’

দেশের ভবিষ্যতের কথা ভেবে মহাকবি হয়তো চিন্তিত হয়ে
পড়েছিলেন, তাই অনেক আগে লেখেন—

‘বতন কি ফিক্‌ কৰ্‌ নাদী, মসীবত আনেওয়ালী হায়া
তেরী বর্বাদিয়ো কে মশ্বিরে ইয়ায় আসমানোঁ মে ॥’

অনুবাদের ধৃষ্টতা না করে ইকবালের অমর সৃষ্টি থেকে কয়েকটা
লাইন তুলে দিলাম :

‘কিয়া রফয়ত কী লজ্জত, সে ন দিল্‌ কো আশ্না তুনে,
গুজারী উম্পত্তী মে মিসালে-নকসেপা তুনে ;
ফিদা করতা রহা দিল্‌ কো হসীনো কী অদায়োপর
মগর দেখী ন ইস্‌ আইনে মে আপনী অদা তুনে ॥

‘তুঁডতা ফিরতা ছ’ এ ‘ইকবাল’ অপনে আপকো
আপ হী গোয়া মুসাফির আপ হী মনজিল ছ’ ময়’।

‘দুনিয়া কি মহফিলোঁ সে উকতা গয়া ছ’ ইয়ারব্‌,
কয়া লুৎফ্‌ অজুমেন মে জব দীল্‌ হী বুঝ গয়া হো’।

‘উঠায়ে কুছ বরক্‌ লালে নে, কুছ নরগিসনে কুছ্‌ গুলনে,
চমন মে হর্‌ তরক্‌ বিখ্‌রী ছই হায়া দাস্তা মেরী’।

আর বিখ্যাত সেই চার পংক্তি :

‘ফিরদোস্‌ যে রুমী সে ইয়ে কহতা থা সানাই
মশরিক্‌ মে অলীতক হায়া বহী কাস্‌ বহী আশ

হল্লাজ্ কী লেकिन ইয়ে রবায়ৎ হ্যায় কি আখির
ইক মর্দে কলন্দর নে किया राजे खुदी फाश ॥’

ইরশাদকে ইকবালে পেয়েছিল, তাই ইকবালের সম্বন্ধে এত কথা আমারও মনে হলো। অনেক চেষ্টা করেছি মহাকবি ইকবালকে বুঝতে। কিছু নিজে বুঝেছি কিছু ইরশাদ বুঝিয়েছে, কিন্তু মনে হয়, ইকবালের গভীরতার কোনো হৃদিসই আজ পর্যন্ত পেলাম না।

“লেও ভাইজান, ক্রিফটন বীচ আগয়ে।” ইরশাদ বলে ওঠে।

পাঁচ

আশ্চর্যনগরীতে গিয়ে রূপকথার অ্যালিস্ একটু অবাক হয়ে গিয়েছিল। স্বাধীন পাকিস্তানের রাজধানী করাচীতে এসে মনে হয় যে, পাকিস্তানের রাজনীতিও ‘অ্যালিস্ ইন্ ওয়াণ্ডারল্যান্ডের’ মতো ‘গেটিং কিউরিওসার এ্যাণ্ড কিউরিওসার’ (Curiouser)—আশ্চর্য থেকে আশ্চর্যতর। কখন যে কি হবে বলা যায় না, কোথায় এর পরিণতি ভাবতে মাঝে মাঝে ভয় হয়। নাজিমুদ্দিন, লিয়াকৎ আলী, মহম্মদ আলী, চৌধুরী মহম্মদ আলী, শহীদ সুরাবদী, গুলাম মহম্মদ, ইসকন্দর মির্জা—নয় বছরের মধ্যে কত যে লোক এল-গেল তার হিসাব মেলানই মুশকিল ব্যাপার। রাজনীতির অছিলায় ৯ কোটি লোকের ভাগ্য নিয়ে যে ছিনিমিনি চলছে তার শেষ কোথায়?

অনেকদিন আগে শ্রীনগরে এক সন্ধ্যায় ঘণ্টাখানেক ধরে আলাপ করেছিলাম বুদ্ধ গুলাম রশুলের সঙ্গে। রশুল রাজনীতি জানে না। আজাদ কাশ্মীরে আজাদীর পান্ডা না পেয়ে পালিয়ে এসেছিল শ্রীনগরে। ঘণ্টাখানেক পরে যখন রশুলের কাছ থেকে বিদায় নিয়ে আসি, জলভরা চোখে সে একটা কথাই বলেছিল ‘সাহাব্ হাম বরবাদ্ হোগায়া।’ ছোট্ট চার অক্ষরের একটা কথা ‘বরবাদ্’ কিন্তু পাকিস্তানের ভবিষ্যতের ছবির কথা মনে করিয়ে দেয়। পাকিস্তানের প্রতি কোনো বিদ্রোহই আমার নেই। চেয়েছিলাম পাকিস্তানও আমার দেশের সঙ্গে সঙ্গে গড়ে উঠুক, সমৃদ্ধিশালী হোক—মাঝে মাঝে মনে সন্দেহের মেঘ জমে ওঠে।

আজ নয় বছরের হিসাব নিকাশ করতে গেলে অনেক গলদই বেরোবে। কত এগ্রিমেন্ট, কত আলোচনা, কত কিছুই তো হলো, কিন্তু সব পড়ে রইল ওয়েস্ট পেপার বাস্কেটে। নেহরু-লিয়াকৎ প্যাক্ট নিয়ে লোকের মনে কত আশাই হয়েছিল, কিন্তু কোথায় সে প্যাক্ট। লিয়াকৎ আলী বেঁচে থাকলে জানি না কি হতো কিন্তু আজ সে প্যাক্ট-এর কোনো দামই নেই।

সেদিন সকালে আলতাফ হোসেনের ‘ডন’ কাগজটা পড়ে মনটা বড় বিষন্ন হয়ে পড়েছিল। পাকিস্তানকে তখন ‘রিপাবলিক’ করার জ্ঞা খুব তোড়জোড় চলেছে। ‘ডন’ এক মস্ত সম্পাদকীয় লিখে প্রশ্ন করেছিল, ‘Republic for the People or Republic for the Few’। আসল কথা ওখানেই। সেই চিরস্তন ঝগড়া ‘হ্যাভস্ আর হ্যাভ-নটস্’দের মধ্যে, যাদের আছে আর যাদের নেই। এত হৈ চৈ এত চেষ্টামেচি, কিন্তু ‘যাদের নেই’ তাদের আজও কিছু নেই। কত আশা কত উৎসাহ নিয়ে হাজার হাজার লোক গিয়েছে সীমান্তের ওপারে—কিন্তু পায়নি কিছুই। জিন্মা সাহেবের সমাধির কিছু দূরেই করাচীর দুর্গন্ধময়, নোংরা রিকিউজীদের কলোনী দেখে এসেছি। ভোরবেলায় মোয়াজ্জিনের আজানের সঙ্গে সঙ্গে তারা অভিশাপ দিতে শুরু করে নিজেদের ভাগ্যকে আর পাকিস্তানের গভর্নমেন্টকে। বাঙালী দেয় পাঞ্জাবীকে গালি, সিন্ধী দেয় পাঞ্জাবীকে গালি, উত্তর প্রদেশের মুসলমান দেয় বাঙালী, পাঞ্জাবী আর সিন্ধীকে গালি আর ছয় ফুট উঁচু পাঠান করে সবাইকার বাপাস্ত।

আমার বন্ধু মোয়েদ সিদ্দিক। একদিন হঠাৎ নাগপুর থেকে চলে গেল। মাসখানেক পরে লাহোর থেকে চিঠি ‘I have come over to this side’, তারপর আর চিঠি পড়া যায় না। মধু আর দুধের নদী দেখতে গিয়েছিল মোয়েদ, কিন্তু দেখেছিল শুধু ‘খুন আউর আঁসুকী দরিয়া।’ কিন্তু নাগপুরের ফার্নিচার বিক্রেতা হাজি ফজলের সঙ্গে করাচীর রাস্তায় দেখা হতে সে জানাল, সে মহা সুখেই আছে। ফার্নিচার ব্যবসা ছেড়ে পাঠ্য-পুস্তকের (text book) ব্যবসা করছে। বই ছাপা হবে বিলেতে। দু’দিন পরেই হাজি ফজল বিলেত চলে গেল। ঘুরে ফিরে সেই একই কথা ‘হ্যাভস্ আর হ্যাভ-নটস্’।

সেদিন করাচীর রাস্তায় ঘুরতে ঘুরতে দেখছিলাম পণ্ডিত নেহরুর অভ্যর্থনার জ্ঞাত শহরে বেশ তোড়জোড় চলছিল। মহম্মদ আলী প্রধান মন্ত্রী হয়ে নেহরুকে আমন্ত্রণ জানিয়েছেন। ভারতবর্ষে আর পাকিস্তানে মহম্মদ আলীর নেতৃত্বে অনেকেরই আস্থা হয়েছিল। কিন্তু কি হলো? কাজের মধ্যে মহম্মদ আলী বেইরুটে গিয়ে আরেকটা বিয়ে করে খুব হৈচৈ করলেন আর দিয়ে গেলেন পাকিস্তান-আমেরিকান মিলিটারী প্যাক্ট। তারপর এলেন চৌধুরী মহম্মদ আলী। তাঁর দান হলো বাগদাদ প্যাক্ট আর ‘সিটো’। নাজিমুদ্দিন, লিয়াকৎ আর গোলাম মহম্মদ তো আগেই গিয়েছেন। দেখা যাক, শহীদ সুরাবর্দী আর ইন্সন্দর মির্জা সাহেব এবার কি করেন। ক’দিনে যে ভেক্সি দেখিয়েছেন; তাতে বেশ ঘাবড়েই যেতে হয়। আবার শহীদ সাহেবের ‘ডাইরেক্ট অ্যাকশনটা’ মন থেকে মুছে ফেলতে বেশ একটু মুশকিলই হয়।

কিন্তু মিশরের স্যুয়েজ ক্যানালের ব্যাপারটা নিয়ে মির্জা আর শহীদ সাহেব একটু বানচাল হয়ে পড়েছিলেন। বাগদাদ প্যাক্টের অবস্থাও সঙ্গীন। ছ’জনেই ‘সেলসম্যান’ হয়ে ঘুরে বেড়ালেন মধ্যপ্রাচ্যে, প্যান-ইসলাম-ইজমের টোটকা নিয়ে—কিন্তু কেনার লোকই নেই। প্যান-ইসলাম-ইজমের দিন ঘনিয়ে এসেছে। মিশরের নাসেরের ওপর খাপ্পা হয়ে গিয়েছিলেন ছ’জনেই। নাসের ওদের ‘কায়রো টকস্’-এ আমন্ত্রণ তো জানালেনই না, উপরন্তু ইউ.এন. ফোর্সে পাকিস্তানের সৈন্য নিতেও তিনি নারাজ। সব গোলমাল হয়ে গিয়েছে আর তার ওপর আবার আওয়ামী লীগও প্রায় ভেঙে পড়ার মতো হয়েছে। হাঙ্গারীর ব্যাপারটা নিয়ে পাকিস্তান একটা বেশ চাল চলেছিল, কিন্তু কিস্তিমাত হলো না। ইউ.এন. হস্তক্ষেপের দোহাই দিয়ে মির্জা সাহেব আর শহীদ সাহেব কাশ্মীরের বেলায়ও সেই নীতি লাগাবেন ভেবেছিলেন, কিন্তু কৃষ্ণ মেনন সব গোলমাল করে দিলেন। অতঃপর কি করা যায়? বসে আছেন ছ’জনেই, ‘দুসরা মোওকা’ খুঁজছেন। কিন্তু ভাবনা হয়, দুসরা মোওকা আসার আগে পদ্মপত্রে জলবৎ পাকিস্তানের রাজনীতিতে মির্জা-সুরাবর্দী পার্টনারশিপ টিকে থাকলে হয়।

পাকিস্তানের কথা ভাবলেই আজ মনে পড়ে গভর্নর-জেনারেল গুলাম মহম্মদের কথা। গুলাম মহম্মদ না থাকলে পাকিস্তানের

অবস্থা যে কি হতো বলা কঠিন। রাজনীতির মারপ্যাঁচের মধ্যে থেকেও তিনি বেশ বুঝতে পেরেছিলেন যে, ‘পলিটিক্স ইজ দি লাস্ট রিকিউজ অব অল স্কাউণ্ডেলস’। নিশ্চিত ‘বরবাদী’ থেকে তিনি অনেকবারই পাকিস্তানকে বাঁচিয়েছেন। খাজা নাজিমুদ্দীনের বরখাস্ত আর কনস্টিটিউয়েন্ট অ্যাসেম্বলীর অবসান ঘটিয়ে তিনি পাকিস্তানের রাজনীতিতে বেশ একটা তোলপাড়ের সৃষ্টি করেন। মৃত্যুশয্যায় শুয়ে জিন্না সাহেব পাকিস্তানের ভবিষ্যতের সঙ্গে গুলাম মহম্মদকে জড়িয়ে যান। কিন্তু গুলাম মহম্মদ জিন্নার স্বপ্ন বাস্তবে পরিণত করতে পারলেন না। ওপারের ডাক এসে গেল।

গুলাম মহম্মদ সম্বন্ধে অনেক কথা শোনা যায়। একবার সাত দিন ধরে তিনি নিজের আপিস-ঘরে বসে পাকিস্তানের বাজেট তৈরি করেন। বাজেট শেষ হয়ে গেলে একটা ইঞ্জি-চেয়ারে গিয়ে বসেন, হাতে একটা বই। চেয়ারে পা তুলে দিয়ে হঠাৎ তিনি জোরে হেসে ওঠেন। প্রাইভেট সেক্রেটারী দৌড়ে ঘরের মধ্যে গিয়ে অবাক! গুলাম মহম্মদ হেসে লুটোপুটি খাচ্ছেন। উকি মেরে প্রাইভেট সেক্রেটারী দেখেন, গুলাম মহম্মদের হাতে ‘জীভস্ ওমনিবাস’।

জানি না কতদূর সত্যি, কিন্তু লণ্ডনের ‘টাইমস্’ খবরের কাগজের প্রতিনিধি রজার টুলমিন আমায় একবার বলেছিল যে, মৃত্যুর কিছুদিন আগে থেকেই গুলাম মহম্মদের মানসিক অবস্থা স্বাভাবিক ছিল না। রজার বলেছিল, তাঁর নাকি মাঝে মাঝে ‘ডিলুউশন’ হতো। একদিন রাত বারোটার সময় কমাণ্ডার-ইন-চীফকে ফোনে অর্ডার দেন, জেনারেল মোবিলাইজেশনের। পরের দিন সকালে যখন তাঁর কাছ থেকে লেখা অর্ডার চাওয়া হয়, গুলাম মহম্মদ মনেই করতে পারেন না যে, রাতে তিনি কোন অর্ডার দিয়েছিলেন।

তবু মাঝে মাঝে ভাবি যদি গুলাম মহম্মদ আরো কিছুদিন সুস্থ শরীরে বেঁচে থাকতেন, তাহলে বোধহয় ভালোই হতো—পাকিস্তানের তো বটেই—ভারতবর্ষেরও।

পাকিস্তানের কথা ভাবতে গেলে আজ আরেকজনকে মনে পড়ে—খান আবদুল গফফর খান—সীমান্ত গান্ধী। শিশু-সুলভ,

সৌম্যমূর্তি, সেই বৃদ্ধ সেদিনও ছিলেন পাকিস্তানের কারাগারে আর ভাগ্যের এমনই পরিহাস যে, তিনি বন্দী হন তাঁর ভাই ডাঃ খান সাহেবের হুকুমে। কতবার তাঁকে কংগ্রেস সেশনে দেখেছি। পকেট-ভর্তি কাজু-কিসমিস নিয়ে প্যাণ্ডেলের বাইরে এসে ছোট ছেলেমেয়েদের বিলোচ্ছেন! দুর্ধর্ষ পাঠানদের নেতা, অহিংসার প্রতীক সীমান্ত গান্ধী জেলে বসে হয়তো ‘থোরো’র (Thoreau) মতোই ভেবেছেন, ‘অত্যাচারের সময় অ্যায়ত্তর লোকের স্থান কারাগারেই।’

বাদশাহ খানের পিতা বহরাম খান সিপাহী বিদ্রোহের সময় ইংরেজ সরকারের পক্ষে লড়েছিলেন আর তাঁর ছেলে জীবন-ভোর যুদ্ধ করলেন ইংরেজদের বিরুদ্ধে। বাদশাহ খান যখন আলীগড়ে পড়তেন, তখন মৌলানা আবুল কালাম আজাদের ‘আল-হিলাল’ পত্রিকার লেখা তাঁকে রাজনীতিতে আকৃষ্ট করে। তারপরের ইতিহাস কারোর অজানা নেই। পাকিস্তানের জন্মের পরেও তাঁর কারাজীবন শেষ হয়নি। দীর্ঘ আট বৎসর পরে ছাড়া পেয়ে তিনি ফিরে গিয়েছিলেন উৎসাহে, মোজেসের ‘প্রমিসড ল্যান্ডে’ প্রত্যাবর্তনের মতো। ওল্ড টেম্‌স্টামেন্টের ‘প্রফেটের’ মতো এই দীর্ঘকায়, সুপুরুষ পাঠান বারবার ফিরে গিয়েছেন কারাগৃহে। তাঁকে বাইরে রাখতে পাকিস্তানের কর্তাদের সাহস নেই।

‘রাওয়ালপিণ্ডি কনস্পিরেসী’ কেসে পাকিস্তানে যে ক’জন লোককে ধরা হয়েছিল, তার মধ্যে অন্তত দু’জন, মেজর-জেনারেল আকবর খান আর ফৈজ আহমদ ফৈজ নাম-করা লোক। মেজর-জেনারেল আকবর খান এবার রাজনীতিতে যোগ দিয়েছেন আর কাশ্মীর আক্রমণ করার হুমকি দিচ্ছেন। খবরের কাগজে একটা বিবৃতিতে তিনি বলেছেন যে, কাশ্মীর যুদ্ধের সময় পাকিস্তানের কমান্ডার-ইন-চীফ জেনারেল গ্রেসী জিন্না সাহেবের বলা সত্ত্বেও ভারতবর্ষ আক্রমণ করেননি।

আর ফৈজ আহমদ ফৈজ কবি। তাঁকে পাকিস্তানের শ্রেষ্ঠ ‘শায়র’ বললেও অত্যাুক্তি হবে না! অপূর্ব তাঁর কল্পনা-শক্তি আর লেখন ভক্তি। পিণ্ডি কেসের বন্দী অবস্থায় তিনি তাঁর জীবনের

কিছু শ্রেষ্ঠ কবিতা রচনা করেছেন। ‘পাকিস্তান টাইমস্’-এর তিনি নির্ভীক সম্পাদক আর তাই বন্দী অবস্থায়ও তাঁর লেখনীকে বন্ধ করার সরকারী প্রয়াসকে ব্যঙ্গ করে লিখলেন :

‘মতাএ-লৌহ-কলম্ ছিন গইতো ক্যায়া, গম্ হায়া,
কি খুনে-দিল্ মে ডুবোলী হায়া উজলিয়া ময়নে ;
লবো পে মুহব্ লগী হায়া তো ক্যায়া, কি রখ্ দী হায়া
হর এক হল্কেয় জন্জীর মে জবী ময়নে ॥’

আমার হাতের কলম কেড়ে নেওয়াতে আমার কোনো দুঃখ নেই। আমি আমার আঙুল ডুবিয়ে নিয়েছি রক্তরাঙা হৃদয়ে। আমার মুখ বন্ধ করে দেওয়াতে কি হয়েছে, প্রত্যেক শৃঙ্খলের গলায় আমার ভাষা আমি রেখে দিয়েছি।

‘সুবহে—আজাদী’ কবিতায় ফৈজ পাকিস্তানে স্বাধীনতার রূপ দেখে তাঁর ব্যথা প্রকাশ করেছেন।

‘ইয়ে দাগ্ দাগ্ উজালা ইয়ে শব গুজ্জেনা সহর,
বহ ইন্তেজাব্ থা জিসকা, ইয়ে ব ; সহর তো নেহী ;
ইয়ে বহ সহর তো নেহী জিসকী আরজু লেকর
চলে থে ইয়ার কি মিল্ জায়গী কঁহি না কঁহি ॥’

জেলের অন্ধকার সেলে বসে ফৈজ লিখলেন :

‘লজ্জতে খাব্ সে মখমুর হাঁওয়ায়ে জাগী,
জেল্ কী জহব্ভরী চোর সদায়ে জাগী,
দুব্ দরবাজা খুলা কোই, কোই বন্দ ছয়া
দুব্ মচলৌ কোই জন্জীর ; মচলকে রোই
দুব্ উত্ৰা কিসী তালেকে জীগর মে খনজব্
সব্ পট্‌কনে লাগা রহ রহ কে দরীঁচা কোই ॥’

ফৈজ রোমান্টিক কবিতাও লিখেছেন :

‘ন জানে কিস্ লিয়ে উম্মীদওয়ার বৈঠা হঁ,
এক এয়ায়সী রাহপর জো তেরী রাহগুজার ভী নহী ॥’

আবার :

‘তেরা জমাল নির্গাহো মে লে কে উঠ্ঠা হঁ ।
নিখব্ গই হায়া ফিজা তেরে প্যারহন্ কি লী,
নসীম্ তেরে শবিস্তা সে হোকে আই হায়া
মেরী সহব্ মে মহব্ হায়া তেরে বদন কী লী ॥’

কিছুদিন আগে দিল্লীতে পাকিস্তান হাই-কমিশনার খাজা গজনফর আলী ‘ইকবাল-ডে-মুশ্শায়রা’র আয়োজন করেছিলেন।

পাকিস্তানের অনেক কবিই এসেছিলেন। ফৈজ মাহমুদ ফৈজকে নেহরুর এত ভালো লাগে যে, তিনি ফৈজকে টেনে নিজের বাড়ি নিয়ে গিয়ে অনেক রাত পর্যন্ত তাঁর কবিতা শোনেন।

সেদিন দিল্লীর মুন্সায়রাতে কিছু বেরসিক শ্রোতাদের ভীড়ে অনেক ভালো ভালো গজল, রুবাই আর নজম মাঠে মারা গিয়েছিল। ‘আদবে-মহফিল’ না জানা থাকায় এই সব বেরসিকের দল ডিনারজ্যাকেট আর শিফনের শাড়ির বাহার দেখিয়ে স্থানে অস্থানে ‘বাহ-বাহ, ছুবারা ইশাক’ আর হাততালি দিয়ে মুন্সায়রাটা প্রায় পণ্ডি করেছিলেন।

পাকিস্তানের কবিদের নিয়ে আলোচনা করতে হলে আরেক জন কবির কথাও বাদ দেওয়া যায় না। তিনি হলেন ‘জোশ’ মলিহাবাদী। ‘জোশ’কে বলা হতো ‘শায়রে ইনকিলাব’ (বিদ্রোহী বা ক্রান্তি কবি)। তার অনেক কবিতাই এদেশের যুবকদের দেশ-প্রেমে উৎসাহিত করেছে। আজ জোশ পাকিস্তানে। তাঁর কবিতা মৃত-প্রায়। টাকা-আনা-পাই হিসেব করতে জোশ আজ ব্যস্ত। কবিতা ছেড়ে সিনেমা হাউস চালাচ্ছেন। অথচ জোশ যখন ভারতবর্ষ থেকে চলে যান তখন বলেন যে, উর্দুর ভবিষ্যৎ ভারতবর্ষে অন্ধকার তাই তিনি পাকিস্তানে চললেন। ইন্সপির মিজ কি মস্তাই যে জোশের কানে দিলেন, কোনো তর্কই তিনি শুনলেন না। এখনও ভাবতে দুঃখ হয়, জোশ, যিনি আজীবন ধর্মের গোড়ামির বিরুদ্ধে নিজের কলম চালিয়েছেন, তিনি আজ ধর্মের ভিত্তিতে তৈরি পাকিস্তানে।

‘চীন-ও-আরব হামারা’ প্লোগানওয়ালাদের যিনি একদিন চ্যালেঞ্জ করেছিলেন, যিনি গেয়েছিলেন ‘অ্যায় বতন, অ্যায় বতন, অ্যায় বতন, জানে-মন, জানে-মন, জানে-মন’ তিনি আজ পাকিস্তানে, আর কিছুদিন আগেই পাকিস্তানের খবরের কাগজওয়ালারা জোশকে কাফির বলে গালাগাল করেছিল। আর পাকিস্তানে চলে যাবার মাস ছয় আগেই ভারত সরকার জোশকে সম্মানিত করেন ‘পদ্মবিভূষণ’ উপাধি দিয়ে।

আজও মনে পড়ে জোশের কবিতা। শৃঙ্খলিত ভারত জোশকে ব্যথিত করে কিন্তু তার চেয়েও ব্যথা পান তিনি এই ভেবে যে,

আমরা নিজেরা শৃঙ্খল সম্বন্ধে উদাসীন ছিলাম। নিজের মনের ভাবকে তিনি প্রকাশ করেন :

‘বাহ্ এ নাকানী মৃত্যু এ
কার্বাহ্ যাতা রহা
কার্বাহ্ কে দিল সে এইসাসে
জিয়াঁ জাতা রঁহা।’

পাকিস্তান যাবার আগে জোশ দিল্লীর ভূতপূর্ব পুলিশ সুপারিন্টেন্ডেন্ট, খান বাহাদুর মিয়াঁ মোহাম্মদ সাদীককে (এখন লাহোরে) একটা চিঠি লেখেন। তাঁর পাকিস্তান যাবার কারণ দেখিয়ে তিনি বলেন যে, উর্দুর ভবিষ্যৎ ভারতবর্ষে অন্ধকার আর তিনি তার পরিবারেরও আর্থিক, সাংস্কৃতিক ও ভাষার ভবিষ্যৎও খুবই অন্ধকার মনে করেন। চিঠির শেষে জোশ লিখেছেন—

‘It is not easy to turn the face from one’s own country for ever. It is such a tragic thing that if it befalls on a mountain, streamlets of blood will begin to flow from it. Over here, I remember the trees of my country, rivers of my country its gardens and friends and relatives who have stayed behind.’

‘My heart feels a terrible void : songs of sorrow and frustration create chaos in my mind and my whole existence has turned into a great funeral procession.’

‘To whom do I belong ? I belong to nobody. Which land should I call my country ? I ran away from Hindi. Urdu is running away from me, I have no place to rest in this world.’

‘But anyhow, now I am nearing the shore : I shall strike out my arms a few times more and reach the shore from where no body returns.’

এটা বোধ হয় জোশের কন্ফেসন। জোশের এই চিঠিটা আমায় তাঁর বহুদিন আগে লেখা একটা কবিতার কথা মনে করিয়ে দেয় :

‘দো গজ্ জমিন চাহিয়ে
দেখে কঁহা মিলে
উঠনে কো তো উঠে ইয়ায়
তেরে আস্তান সে হাম ॥’

জোশকে হারিয়েছি ছুঃখ নেই কিন্তু উর্ছ সাহিত্য যেন জোশকে না হারায়। ‘মেরে জুবনা কে দেখো উভার’-এর মতো কবিতা যেন জোশ আর না লেখেন। তাতে উর্ছ সাহিত্য কলঙ্কিত হবে। সিনেমায় সস্তা গান লিখে একদিন শাহির লুখিয়ানভী ছুঃখ করেছিলেন...‘আজ উন গীতৌকো বাজার মে লে আয়া ছু’, আজ চান্দী কে তরাজুপে তুলেগী হরচীজ...’। ভয় হয় হয়তো একদিন জোশ সাহেবও তাঁর কবিতা বাজারে বিক্রি করতে আসবেন।

ক্লীফটন বীচ থেকে ফিরতে ফিরতে বেশ দেরী হয়ে গেল। ইরশাদকে বললাম, চলো হে ভাই আমাকে পোর্টে পৌছে দাও। রাস্তায় ট্যাক্সিটা দাঁড় করিয়ে “পাঁচ মিনিটে আসছি” বলে ইরশাদ নৈমে গেল। ফিরে এসে জানাল যে, জাহাজ কাল রাতের আগে ছাড়বে না। অনেক কার্গো লোড করতে হবে। রাস্তার ধারে দোকান থেকে ফোন করে ইরশাদ খবরটা ঝোঁগাড় করেছে আর আনন্দে আত্মহারা হয়ে আমাকে রাস্তার মাঝখানে জড়িয়ে ধরে প্রায় নৃত্য করতে লাগল।

“অনেকদিন পরে দেখা, চলো আজ একটু ফুটি করা যাক। খুব গুজরেগী জব মিল বৈঠঙ্গে দিওয়ানে দো”—দেখি ইরশাদের পকেটের ফাঁক থেকে ছইস্কির বোতলের মুখ উঁকি মারছে।

“দেখো ইরশাদ। বেশি ভালো না। একদিন ছইস্কিই তোমাকে খাবে” বলে বোঝাবার চেষ্টা করি ইরশাদকে। “এত বেশি মাত্রায় খেলে বরদাস্ত করতে পারবে না।”

দেবদাসের ভাষায় ইরশাদ গম্ভীর হয়ে জবাব দেয় “কোনু কামবখত বরদাস্ত করনে কি লিয়া পিতা হ্যায়। The more I drink, the more sobre I am.”

“চল বাড়ি চল” ইরশাদ আমাকে প্রায় এক রকম টেনেই গাড়িতে ওঠায়।

“তোমার আবার বাড়ি কি হে?” একটু অবাক হয়ে ওকে জিজ্ঞাসা করি।

“ও তুমি জানো না বুঝি একটা কেলেক্কারি করেছি।”

“কেলেঙ্কারি?”

“হ্যাঁ, বিয়ে করেছি।”

আকাশ থেকে পড়লাম। ইরশাদ বিয়ে করেছে! ইরশাদের মতো ছন্নছাড়া মাতাল ভবঘুরে বিয়ে করতে পারে কখনও কল্পনাও করতে পারি না।

“গুলশ্নকে দেখলে তুমিও বিয়ে করে ফেলতে হে”, ইরশাদ আমার আশ্চর্য হওয়া দেখে বলে।

“কিন্তু তুমি দেখলে কোথায় আর সেই বা তোমায় দেখল কখন? লভ অ্যাট ফার্স্ট সাইট নাকি?” কৌতূহল চাপতে পারি না।

“বাস্। নজর সে নজর মিলি মুলাকাত করলি। রয়ে দোনো খামোস পর বাতেন্ করলি। That explains everything.” ইরশাদ ট্যাক্সি-ড্রাইভারকে তার বাড়ির দিকে গাড়ি ঘোরাতে বললো।

ছয়

ইরশাদকে আমি জানি অনেকদিন থেকেই। কিন্তু চিনতে আজও পারলাম না। ওকে আমি আগে ‘হোল্ড-অল্’ বলে ডাকতাম। কারণ ইরশাদ ছিল কবি, গায়ক, সাংবাদিক ও আরও অনেক কিছু। ও সেই দলের লোক যাদের বলা হয় ‘আনপ্রোডিক্-টেবল্’। কখন যে কি করে আর বলে বসবে তার স্থিরতা নেই। স্থান কাল পাত্র কোনো বিবেচনাই সে করবে না। ইরশাদের এই গুণের জন্মেই বোধহয় ওকে ভালোবেসেছিলাম। এতদিন পরে সেদিন দেখা হলো কিন্তু ওর কোনো পরিবর্তনই হয়নি। যেরকম লক্ষ্মীছাড়া ‘ট্রাম্প’ ছিল তাই আছে। আছে বললে ভুল হবে, কারণ ইরশাদ আর নেই। আছে ওর স্ত্রী গুলশ্ন—ওর স্মৃতি নিয়ে বেঁচে। সে কথা পরে।

গান বাজনার মহফিল হলে ইরশাদকে ঠেকানো যাবে না। মহফিল যেখানেই হোক না কেন ইরশাদ ঠিক বসে আছে আসর জমিয়ে। নেশায় বৃন্দ হয়ে থাকলেও তালের ভুল হলেই ইরশাদ ধরবে আর সে গায়কই হোক আর গায়িকাই হোক, তার জ্ঞান করে ছাড়বে। দিল্লীতে একবার ও এক বাঈজীর বাড়িতে গিয়ে তালের ভুল সহ্য করতে না পেরে পানদান ছুঁড়ে মেরেছিল আর সেই নিয়ে কি বিত্রী কাণ্ড!

সেই ইরশাদ যখন জানালো যে, ও বিয়ে করেছে তখন একটু হকচকিয়ে গিয়েছিলাম। ইরশাদ আর বিয়ে-করে-সংসার-পাতা ইরশাদ, এ-ছোটো জিনিস একসঙ্গে কোনোকালেই কল্পনা করতে পারিনি। কিন্তু ঐ যে ইরশাদ বলতো ‘হোতা বহি যো মঞ্জুরে-খুদা হোতা’। হয়েছিলও তাই, কিন্তু খুদার মর্জি বড় নির্মম ক্লাইম্যাক্স এনে দিয়েছিল।

গাড়ি এসে ইরশাদের বাড়ির সামনে দাঁড়াল। টোকা মারতেই দরজাটা একটু কাঁক হলো আর একজোড়া কালো চোখ হঠাৎ একজন অপরিচিত লোককে দেখেই সরে গেল। যখন ইরশাদের সঙ্গে ঘরের মধ্যে ঢুকলাম গুলশন পর্দার একপাশে দাঁড়িয়ে। “গুলশন, হামারা জিগরী দোস্ত, ইয়ে ব্রাডি হিন্দুস্তানী। লেও ভাই, খানা খিলাও ইনকো।

ইট্টোডাকশনের বহর শুনে গুলশন একটু হাসল। গালটা একটু লাল হলো। “তশরিফ রাখিয়ে ভাইসাব” বলে ভিতরে চলে গেল।

সেতারের সৃক্ষ বন্ধারের মতো বেজে উঠল গুলশনের চারটে ছোট টুকরো কথা। এতক্ষণে বুঝতে পারিলাম ইরশাদ কেন বলেছিল গুলশনকে যে দেখবে সেই ভালোবাসবে।

খাবার সময় ইরশাদের পাত্তা নেই। বিয়ারের নেশায় তখনও একটানা ঘুমুচ্ছে। গুলশন একটু অপ্রস্তুত হয়ে পড়ল। বুঝিয়ে বললাম, ইরশাদকে আমি অনেকদিন থেকেই চিনি আর ওর জন্তে আমার কাছে অপ্রস্তুত হতে হবে না। খাওয়ার পরে কখন যে গুলশনের সঙ্গে গল্প করতে করতে চেয়ারে ঘুমিয়ে পড়েছি জানি না। ঘুমটা ভাঙল যখন দেখি গুলশন একটা বালিশ আমার মাথার নিচে রাখবার চেষ্টা করছে। তাকিয়ে দেখি সন্ধ্যা হয়ে এসেছে। উঠতে না উঠতেই গুলশন চা নিয়ে হাজির। চোখে মুখে আবার সেই কিন্তু-কিন্তু ভাব। “ভাইসাব চলুন, আপনাকে শহরটা ঘুরিয়ে আনি।”

“কেন ইরশাদ কোথায়?”

“ও বেরিয়ে গিয়েছে। আসতে দেরী হবে। যাবার সময় বলে গেল আপনার দেখাশোনা করতে। বলুন তো কি বিপদ! কোথায় আপনার সঙ্গে থাকবে তা নয় গানের মহফিলে চলে গেল।”

“গানের মহফিলে ? কোথায় ?”

গুলশনের মুখটা আবার লাল হয়ে উঠল। কিছুই বললো না, শুধু মাথা নিচু করে রইল। বললাম, “বুঝেছি। কিন্তু কোথায় পাওয়া যাবে ওকে ?”

“শব্দনের ওখানেই গিয়ে থাকবে। সেখানেই তো রোজ আড্ডা হয়।” মুখ নিচু করেই উত্তর দেয় ইরশাদের শরিকে-জিন্দগী-গুলশন।

কে শব্দন কিছুই বুঝলাম না। কথাটা জিজ্ঞাসা করে নিজেই একটু অপ্রস্তুত হয়ে পড়েছিলাম, চুপ করে দাঁড়িয়ে রইলাম। নিস্তর্রতা ভঙ্গ করল গুলশন নিজেই—“ভাইসাব, আমি আর পারছি না। ও আমাকে খুবই ভালোবাসে। এর চেয়ে বেশি আমি আশা করি না। কিন্তু আমার চেয়ে বেশি ভালোবাসে ও গানকে— শব্দনের গানকে।” গুলশনের গলার স্বর কেঁপে উঠল। “ওকে ওখান থেকে অস্তুত আজকে নিয়ে আসুন। একদিন না হয় নাই শুনল গান।” জলভরা চোখে কথাটা বলেই গুলশন দৌড়ে ভিতরে চলে গেল। দাঁড়িয়ে দাঁড়িয়ে অনেকক্ষণ পাশের ঘর থেকে ভেসে আসা গুলশনের বুকভাঙা কান্না শুনলাম।

আমায় ওখানে দেখে ইরশাদ একটু অবাকই হয়েছিল। ওদের চাকরের কাছে অনেক কষ্টে ঠিকানা নিয়ে যখন শব্দনের ফ্লাটে পৌঁছলাম, মহফিল বেশ জমে উঠেছে। শব্দনের মালকৌশ তখন ঘরের মধ্যে এক অপূর্ব ইল্রজাল সৃষ্টি করেছে। ইরশাদ নেশায় চুর। ঘরের সেই নিস্তর্র, রুদ্ধ হাওয়ায় শুধু সঙ্গীতের রেশ। ঝড়ের মতো ঘরে ঢুকতেই একসঙ্গে কয়েকজোড়া চোখের রোষভরা দৃষ্টি আমার দিকে ঘুরল। ইরশাদও। কিন্তু সবাই নির্বাক। শব্দন তানপুরার উপর মাথা রেখে তখন মালকৌশে সুরের জাল বুনে চলেছে। সেই তন্ময়তা ভাঙতে মন চাইল না। প্রায় ২০ মিনিট পরে গান থামল। বিরক্তির সঙ্গে উঠে এসে একটু ঝাঝালো স্বরেই ইরশাদ বললো, “তুমি কাহেকো ইহাঁ আয়ে ?”

“ঘরে চলো ইরশাদ ভাই।” ওকে মিনতি জানাই।

“তুমি যাও। আমি মিয়াঁ কি মল্লার শুনে তারপর যাবো।” ইরশাদ বঁকে বসল।

আমার মাথায় তখন রক্ত চেপে গিয়েছে। বললাম যদি আমার সঙ্গে ও না যায় আমি সোজা পোর্টে আমার জাহাজে ফিরে

যাব। ওষুধ ধরল। টলতে টলতে আমায় শাপ দিতে দিতে
ইরশাদ গাড়িতে উঠে বসল।

বাড়িতে যখন ঢুকি তখন রাত প্রায় সাড়ে এগারোটা।
গুলশন্ দরজায় দাঁড়িয়ে। “মাফ্ করনা গুলশন্”। বাস্ ইরশাদের
তিনটে কথাতেই সেই স্বর্গীয় হাসি আবার ফিরে এল। আশ্চর্য
লাগে এত কাণ্ড হয়ে যাবার পরেও মানুষ হাসতে পারে।

গুলশন্ আমায় বোঝাতে চেষ্টা করে, “আজ পর্যন্ত কখনও ও
গানের মহফিল থেকে রাতে দেরীতে ফিরবার জ্ঞান আমার কাছে
মাফ্ চায়নি। আজ বোধহয় বুঝতে পেরেছে আর তাই
অনুশোচনাও হয়েছে। ভাইসাব, তুমি আজ ফরিস্তা হয়ে এসেছ।
তোমার এহ্সান আমি কি করে ভুলবো! তোমায় অনেক অনেক
শুকরিয়া...খুদা তোমার...”

“কিস্ত...?”

“না ভাইসাব। সুবহ কা ভুলা আগর শাম ঘর ওয়াপস্
আয়ায়ে তো উসে ভুলা নেই কহতে।”

গলার কোথায় যেন কি একটা ওঠানামা করছে। চোখের
পাতাটা ভারী মনে হলো। খবরের কাগজটা তুলে নেওয়ার ভান
করে শুধু মুখ থেকে বেরল, “খুশ রহো বহিন্”।

মাঝ-রাতের সেই নাটকীয় মুহূর্তের কথা আজও বারবার মনে
পড়ে। চোখের সামনে ভেসে ওঠে গুলশনের চেহারা আর সেই
কথা ক’টি—“ভাইসাব, তুমি আজ ফরিস্তা হয়ে এসেছ।”

পরের দিন সকালে ইরশাদ আর উঠতে পারল না। গুলশন্
একাই এল পোর্টে আমায় পৌছাতে। জাহাজ ছাড়ল দুপুর ১২টায়
কিস্ত ‘এমবার্কেশন’ ছিল ভোরে। গ্যাঙ্গুয়ে দিয়ে উঠছি, গুলশন্
বললো, “ফির আনা ভাইসাব”।

“জরুর গুলশন্। লোটতে বকত্ ফির আউঙ্গা।”

“খুদা হাফিজ ভাইসাব।”

“খুদা হাফিজ গুলশন্ বহিন্”।

আর পারলাম না। বছরের পর বছরের জমানো সাংবাদিকতার
‘সিনিসিজম’-এর বাঁধ ভেঙে চোখের জল নেমে এল। একদিনের
জন্মে বিদেশে (পাকিস্তান বিদেশ বই কি। মনে নেই পোর্ট

অফিসারের সেই পাসপোর্ট চাওয়ার কথা) এসে এ কী বিভ্রাট!

যতক্ষণ পর্যন্ত দেখা যায় গুলশনকে দেখলাম। আস্তে আস্তে ও ট্যাক্সিতে গিয়ে উঠল। মুখে সেই হাসি। বেশ বুঝতে পারলাম চোখের জল চাপবার চেষ্টা করছে।

ইরশাদ আর আসেনি। আমার জাহাজ যখন মাঝ দরিয়ায় ও হয়তো তখন ঘুম থেকে উঠে ‘গুলশন চা লাও’ বলে চিৎকার করছে।

তিনমাস পরে নভেম্বরের এক সন্ধ্যায় আমার জাহাজ আবার করাচী বন্দরে ফিরে আসে। আমার কথা আমি রেখেছিলাম। ইরশাদকে ‘কেবল’ আগেই করে দিয়েছিলাম। ধীরে ধীরে জেটীর দিকে জাহাজ এগোতে থাকলো আমি চারদিকে তাকিয়ে খুঁজছি ইরশাদকে। কে জানে, আসবে কিনা। হয়তো শব্দমের গানের মহফিল থেকে ফিরেছে ভোর রাতে। আধো-আলো, আধোছায়াতে কিছুই চেনা যায় না। গ্যাকুয়ে দিয়ে নেমে এলাম তবুও কারো দেখা নেই। তবে কি?

হঠাৎ “ভাইসাব, আপ আগয়ে?”

যেদিক থেকে আওয়াজটা এল সেইদিকে ফিরে চাই। কালো জর্জেটের শাড়ি পরা গুলশনকে দেখাচ্ছিল একটা ‘সিলুয়েট’-এর মতো। বুঝলাম ইরশাদ আসেনি। ধীরে ধীরে ট্যাক্সিতে গিয়ে উঠলাম।

“ইরশাদ কি এখনো ঘুমচ্ছে নাকি?” গাড়ি বাণ্ডার রোডের মোড় ঘুরতেই জিজ্ঞাসা করি।

উত্তর দেয় না গুলশন। শুধু ডুকরে কেঁদে ওঠে। “ভাইসাব তুমহারা ইরশাদ ভাই—”

হাত পা সব ঝিম্ ঝিম্ করে ওঠে। কিছু বুঝতে পারি, কিছু বুঝতে পারি না।

“কি হয়েছে গুলশন খুলে বলো। কোথায় ইরশাদ?” কে জবাব দেবে? ট্যাক্সির ঘড়ঘড়ানি আর করাচীর জনবহুল রাস্তার কোলাহলে শুধু শুনতে পাই গুলশনের চাপা কান্না। মাঝে মাঝে ট্যাক্সি ড্রাইভার কিছুই বুঝতে না পেরে এক একবার পেছন ফিরে তাকায়।

ইরশাদ আজ মানুষের ধরা ছোঁয়ার বাইরে। আমার করাচী ছাড়ার মাসখানেক পরেই সে ছনিয়ার মহফিল ছেড়ে অল্প মহফিলে চলে যায়। ডাক্তারেরা বলে, ‘কাসিনোমা অব দি লিভার’। গুল্শন্ বলেছিল সে রাত্রে ঘটনার পরে আর ইরশাদ শব্দের ফ্লাটে যাননি।

নসীবের কি নিষ্ঠুর পরিহাস। তিনমাস পরে সেদিন আবার দাঁড়ালাম এক সমাধির সামনে। একদিন দাঁড়িয়েছিলাম জিন্না-সাহেবের সমাধির সামনে আমি আর ইরশাদ আর সেদিন দাঁড়ালাম ইরশাদের সমাধির সামনে আমি আর গুল্শন্। গুল্শনের হাতে ছিল কিছু নাগিস ফুল আর আমার চোখে ছিল জল। বারবার ইরশাদের বড় শেখের লাইন দুটো মনে পড়তে লাগল—“বাত করতে করতে সো গয়ে হো সাথী, এক বাত ভী পুরি না হো পাই। আধী বাত আধী রাত।”

করাচী আমার কাছে দুর্বিষহ হয়ে উঠল। রাতেই জাহাজে ফিরে এসেছি। গুল্শন্ সেবারের মতো আবান্ন আমায় পৌঁছে দিতে এল। ওকে কি বলবো, কি সাস্থনা দেবো ভাবতে পারি না। ওর দিকে চাইতেও আমার ভয় হয়। কালো চোখ দুটোর নিচে অনিদ্ভার গভীর চিহ্ন। আঁচল দিয়ে গুল্শন্ কান্না চাপার চেষ্টা করে।

“হাজার বরষ জিয়ে গুল্শন্” হঠাৎ কথাটা বলে ফেলি।

“আমায় শাপ দিচ্ছ ভাইসাব? এ-জীবন নিয়ে তুমি আমায় হাজার বছর বাঁচতে বলো? ফির আনা ভাইসাব।”

“হ্যাঁ, গুল্শন্ আমি আবার আসবো।”

“খুদা হাফিজ্ ভাইসাব।”

“খুদা হাফিজ্ গুল্শন্ বহিন্।”

আজ কত ব্যবধান আমার আর গুল্শনের মধ্যে। এক হাজার মাইলের দূরত্ব ছাড়াও একটা দেশের ব্যবধান। কিন্তু গুল্শনকে ভুলতে তো পারি না। আর ইরশাদ? আজও কেন জানি না কোথাও মালকৌশ রাগ শুনলে ইরশাদ ভাইয়ের কথা মনে হয়। প্রতি রাখী পূর্ণিমার দিনে কেন ফেলে আসা এক বোনের জন্ম প্রাণ কেঁদে ওঠে! মাঝে মাঝে ভাবি জিন্না সাহেব যখন ইসলামের দোহাই দিয়ে মুসলমানদের জন্মে পাকিস্তান তৈরি করেন তখন হয়তো ভাবেননি যে, তাঁর ‘হোমল্যাণ্ডে’ এক

ইরশাদ আর এক গুলশনও থাকতে পারে আর সেই গুলশনের এক ‘কাফের’ ভাইসাব হিন্দুস্থানে থাকতে পারে !

মানুষ মানুষকে পূজো করে কি না জানি না। আমায় যদি কোনোদিন করতে হয় তো গুলশনকেই পূজো করবো। পাকিস্তানে যদি কোনদিন নিজের ইচ্ছায় যাই তো যাবো গুলশনের জন্তে আর যাবো তার মেয়ের জন্তে। ইরশাদ বলেছিল মেয়ে হলে নাম রাখবে নাজনীন।

ইতিহাসের গতি তার নিজস্ব। পাকিস্তান এমন সময়ে গড়ে ওঠে যখন জীবনের দাম ছিল সস্তা আর মনুষ্যত্ব আর মানবধর্ম ছিল ঘৃণার বস্তু। যারা চালাক, যারা নিষ্ঠুর, যারা ধর্মান্ধ, তারাই হয় জয়ী। কিন্তু নসীবের চাকা ধীরে কিন্তু নিশ্চিতভাবে ঘুরছে। পাকিস্তানকে আমি ভালোবাসি, কারণ ‘সবার উপরে মানুষ সত্য’—মানুষ সেখানেও আছে আর চিরদিন থাকবে। আমি জানি এক ইরশাদ আর এক গুলশনকে। কিন্তু আরো কত গুলশন আর ইরশাদ আছে! কিন্তু ভয় হয় সেই কথাটা ভেবে ‘The finest hour is always followed by less elevated moments.’ পাকিস্তানেও কি তাই হবে ?

বিষন্ন মনে সে-রাতে জাহাজে ফিরে এসেছিলাম। পাকিস্তানের যে রূপ দেখলাম, তা দেখবো বলে তো কখনও ভাবিনি। মতিলাল নেহরু রোডকে ঔরঞ্জের রোড আর গান্ধী পার্ককে জিন্না-পার্ক-এ পরিণত করলেও ভেবেছিলাম পাকিস্তান ধীরে ধীরে শান্তি, সমৃদ্ধি আর প্রগতির পথে এগিয়ে যাবে। কিন্তু তার কোনো আভাস পেয়েছিলাম কি ? বোধহয় না।

জাহাজের ডেকে অনেকক্ষণ দাঁড়িয়েছিলাম। করাচী থেকে ওঠা এক আরব যুবক পাশে এসে দাঁড়াল। ভাঙা ভাঙা আরবী আর ইংরেজী মিলিয়ে যা বললো তার থেকে এইটুকুই বুঝলাম যে, সেও সাংবাদিক। রফৎ আবু গাজালে জেরুজালেমে (জর্ডন) এক খবরের কাগজে কাজ করে। আমার মতো সেও এসেছিল পাকিস্তান দেখতে। আমি ছিলাম একদিন আর ও ছিল ১৫ দিন। অনেক কিছুই শুনেছে অনেক কিছুই দেখেছে। এবার দেশে গিয়ে লিখবে।

কিছু যেন বলবে রফৎ। জিজ্ঞাসা করলাম, “কি?”

“পাকিস্তান নো গুড।”

এঁা বলে কি? একটু চমকে উঠলাম।

“ইয়েস, পাকিস্তান নো গুড।”

“নো : নো : পাকিস্তান গুড। ভেরী গুড।” প্রতিবাদ করি।

“নো! নো! পাকিস্তান ভেরী ব্যাড। আই রাইট মাই পেপার রফিক্ (ভাই)। অল ধোকা।”

করাচী শহরে এসে রফৎ ‘ধোকা’ কথাটা শিখেছে। রফৎ একা ধোকা খায়নি। আমিও খেয়েছি। ধর্মের ধোকায় তৈরি পাকিস্তানে অনেকেই ধোকা খেয়েছে।

পাঁচ বছরের উপর পাকিস্তানে থেকেও হানিফ চেয়েছিল পালিয়ে আসতে হিন্দুস্থানে। কোনো রকমে ঢুকে পড়েছে জাহাজের মধ্যে কুলীদের ভিড়ে মিশে গিয়ে। জাহাজের লোকরা আর পুলিশের দল ওকে জোর করে নামিয়ে নেবে। না আছে ভিসা, না আছে পাসপোর্ট।

কিছুতেই বোঝে না কিসের ভিসা, আর কিসের পাসপোর্ট। জাহাজের গোলমালে আর পুলিশের টানা-হ্যাঁটড়ার মধ্যে ওর বুকফাটা কান্না শোনা যায় “মুখে দরিয়া মে ডাল লো, মগর করাচী ওয়াপস মৎ ভেজো।”

গুড বাই পাকিস্তান। খুদা হাফিজ গুলশন।

সাত

১৯৫৬ সাল—সময়, রাত দশটা—তারিখ ২রা মার্চ। একটা কালো বিরাট রোলস-রয়েস গাড়ি চলেছিল এরোডোমের দিকে। যাত্রী ছ’জন। ব্রিটিশ পররাষ্ট্র সচিব সেলউইন লয়েড আর বহেরিনের শেখ সুলেমান বিন্ হামীদ অল্ খলিফা। হঠাৎ ক্রুদ্ধ জনতার চিৎকার শোনা যায়, ‘লয়েড গো হোম।’ গাড়ি দাঁড়িয়ে পড়ে। রাস্তা অবরুদ্ধ করে দাঁড়িয়ে আছে এক বিশাল জনসমুদ্র, হাতে তাদের ইট, পাটকেল, লাঠি, সোঁটা যে যা পেয়েছে। জনতার কোলাহল ছাপিয়ে এবার আওয়াজ শোনা যায় পুলিশের টিয়ার গ্যাস, রাইফেলের গুলী, আর বেয়োনেট চালানোর। গাড়ি

আবার চলল, পিছনে তখন রাস্তার উপর পড়ে আছে রক্তমাখা এগারোটা লাশ।

ছ’শ ষোলো মাইলে ঘেরা আর দেড় লাখ লোকের বসতি পারস্ত উপসাগরের ছোট্ট দ্বীপ বহেরিনে সেদিন যে কাণ্ডটা ঘটল, দেশ-বিদেশের খবরের কাগজে তা হেডলাইনের সৃষ্টি করেছিল। পৃথিবীর লোককে তা এই ক্ষুদ্র দ্বীপের অস্তিত্ব জানিয়ে দিলো। আর সেট সেলউইন লয়েড হয়তো এই ভেবে কেঁপে উঠলেন যে, ব্রিটিশ সূর্য বোধ হয় অস্ত যেতে বসল পশ্চিম এশিয়ার দিগন্তে।

মাত্র ৩০ বছর আগে শুরু হয় বহেরিন দ্বীপে ব্রিটিশ প্রতিপত্তি, যখন স্যার চার্লস বেলগ্রেভ আসেন খলিফা শেখ হামিদ বিন্ ইসা আল-এর ‘এ্যাড্‌ভাইসার’ হয়ে। ২রা মার্চ গেলেন সেলউইন লয়েড আর তার কিছুদিন পরেই গেলেন স্যার চার্লস—পেছনে পড়ে রইল তাঁর ৩০ বছরের অক্লান্ত সেবা আর পরিশ্রম। দোষ স্যার চার্লসের না, বোধ হয় সেলউইন লয়েডেরও নয়। দোষ বিংশ শতাব্দীর পশ্চিম-এশিয়ার রাজনৈতিক জাগরণের। একের পর এক সাম্রাজ্যের কলোনীগুলো তাসের ঘরের মতো ভেঙে পড়ছে। মরুপ্রান্তরের মাইলের পর মাইল বালুরাশির বুক ঠেলে আজ উঠছে স্বাধীনতার মন্ত্র। মরুপ্রান্তরে মরীচিকার পিছনে ঘুরতে ঘুরতে এই তো দেখলাম। বহেরিন, ওমন, মাসকাট, কাটর, বুলামী, কুয়েট।

কোনোদিন আবার যখন ফিরে যাব তখন হয়তো দেখবো, তাদের মধ্যে অনেকেই স্বাধীন হয়েছে। সৈয়দ আশুরকে তখন আর ব্রিটিশ পাসপোর্ট নিয়ে বসেতে আসতে হবে না। বহেরিনে নামবার সময় আমায় একটা সিন্ধের রুমাল উপহার দিয়েছিল আশুর তার বন্ধুত্বের নিদর্শনরূপে। জানিয়েছিল নিমন্ত্রণ তার ক্ষুদ্র দ্বীপের ক্ষুদ্র দোকানে আসবার জন্য। আশুরকে বলেছিলাম, আসবো যখন ওর হাতে থাকবে নিজের দেশের পাসপোর্ট। আমার ভাষা ও বোঝেনি। হেসে ইশারায় আমায় বুঝিয়েছিল—‘স্বাধীনতা পাসপোর্ট আর ফ্রিয়ার এঁকে, ম্যাপ দিয়ে হয় না। বুকের উপর হাত রেখে ‘বোঝাল—‘স্বাধীনতা এইখানে অমুভব করতে হয়।’ কে জানে সেদিন সেলউইন লয়েডকে ‘গো হোম’ বলা শত শত জনতার চিংকারের মধ্যে আশুরের কম্পিত আওয়াজ ছিল কি না? নিশ্চয় ছিল, আশুর যে স্বাধীনতা অমুভব করে।

বহেরিনকে বলা হয় “the island of a hundred thousand burial mounds”। মাইলের পর মাইল মরুভূমির বুকের উপর দাঁড়িয়ে আছে বিরাট বিরাট স্তূপ। প্রতি স্তূপের নিচে লুকিয়ে আছে কত না হাসি-কান্নার কাহিনী। ড্যানিশ-বহেরিন, আর্কেলোজিকাল একস্পীডিশনের নেতা প্রোফেসর গুব এক লাখ স্তূপের কথা বলেছেন। তেলের শহর আওয়ালী থেকে উত্তর তীরে খেজুরছায়ায় ঘেরা প্রাস্তর পর্যন্ত ছড়িয়ে আছে এই অসংখ্য স্তূপ। প্রাচীনকালের মানুষের অপূর্ব কীর্তি এই স্তূপগুলোকে মাঝে মাঝে মনে হয় প্রকৃতির খেলা।

মাটির নিচে খুঁড়তে খুঁড়তে পাওয়া গিয়াছে ৫০০০ বছর আগেকার সভ্যতার নিদর্শন। বহেরিন-এর প্রাচীন রাজধানী ‘কাল’ এখন বিরাট স্তূপে পরিণত হয়েছে। পঞ্চাশ একর জায়গার উপর ৩০ ফুট উঁচু এই স্তূপ এক অপূর্ব দৃশ্য। বিরাট এক প্রাসাদ এই স্তূপের নিচে আছে। আর্কেলোজিকাল টিম তিনটি পুরানো মন্দিরের ভগ্নাবশেষ খুঁজে বের করেছে। এর মধ্যে একটা ছিল ‘আইন-উম-এস-সুজর’ ‘স্প্রিং’ এর নিকট ‘দিরাজ’ গ্রামের কাছে। দুটো পাথরের ‘বুল’, একটা পাথরের ধূপদানও বেরিয়েছে। অনেকের ধারণা, ‘বারবার’ স্তূপের নিচে পাওয়া মন্দিরটার স্থাপনা হয়েছিল ৫০০০ বছর আগে। ভারত-মেসোপটোমিয়ার সভ্যতার অনেক নিদর্শনই পাওয়া যাবে আর পাওয়া যাবে সুমেরিয়ান আর ব্যাবিলোনিয়ানদের পৌরাণিক ইতিহাসে বর্ণিত ‘দিলমুন’ শহরের কথা। সুমেরিয়ানরা তাদের ‘অরিজিন’ ‘দিলমুন’ থেকে বলেই বিশ্বাস করে। ‘দিলমুন’ থেকেই এসেছিল আধা-মানুষ আর আধা-মৎস্য সেই অদ্ভুত জীব, এও তাদের বিশ্বাস। যখন ভীষণ বন্যা আসে (Deluge of Genesis) তখন ঈশ্বর ‘অন্লি সারভাইভার’, ‘জিউসুড্রা’ (Ziusudra)—বাইবেলের নোয়াকে পাঠান। ‘গিলগামেশ’ (Gilgamesh) এইখানেই তাঁর খোঁজে আসেন অমরত্ব লাভের আশায়। প্রত্নতাত্ত্বিকরা খোঁজ করলে আরো অনেক কাহিনী—অলীক বা সত্যি বের করতে পারবেন। ‘Jutland Archaeological Society’র ইয়ারবুক (১৯৫৪-৫৫) Kuml-এও অনেক কিছু তথ্য পাওয়া যায়।

আবার কিরে আসতে হয় বিংশ শতাব্দীতে। ১৯২৬ সালে যখন চার্লস বেলগ্রেভ আসেন, বহেরিনের অবস্থা তখন শোচনীয়। রাজধানী ‘মানামা’ প্রায় ধ্বংসের মুখে। বেলগ্রেভ সাহেব এসেই তৈরি করলেন পুলিশ। মিসেস বেলগ্রেভকে দেখে পর্দানশীন বহেরিনের রমণীরা ভাবলেন, এ আবার কি বস্তু। শেখের পাটরাণীকে হাতে বাগিয়ে খুললেন মেয়েদের জন্তে প্রথম স্কুল। সাহেব শুরু করালেন আবার ভুলে যাওয়া ‘Pearl-Fishing’।

এল ১৯৩২ সাল। স্ট্যাণ্ডার্ড অয়েল এল সুদূর কালিফোর্নিয়া থেকে। শেখের চক্ষু ছানাবড়া। পঁচাশি লাখ ডলার। বেলগ্রেভ সাহেব ভাগ বাঁটোয়ারা করে দিলেন। অর্ধেক পাবেন শেখ আর বাকী অর্ধেক ব্যয় হবে জনতার সুরক্ষার জন্তে। শুরু হলো রাস্তা, হাসপাতাল, টেলিফোন। ১৯৫২ সালে রাণী এলিজাবেথ বেলগ্রেভ সাহেবকে ‘নাইট’ উপাধিতে ভূষিত করলেন। স্তার চার্লস-এর উপর নতুন শেখ সুলেমান বিন্ হামীদের অপার কৃপাদৃষ্টি। সাহেব বললেন, আমি আর ইংরেজ নেই, আমি হয়ে গিয়েছি ‘বহেরিনিয়ন’।

হলো না কিছুই। সাহেবের পরামর্শে শেখ দেশ থেকে তাড়ালেন লোকপ্রিয় নেতা আবদুল রহমান বাকীকে। রহমান আশ্রয় পেলেন নাসেরের ইজিপ্টে। ওদিকে আবার জর্ডন তাড়াল গ্লাব পাশাকে। বেগতিক দেখে ব্রিটিশ গভর্নমেন্ট ‘রিকল’ করলেন স্তার চার্লসকে।

পৃথিবীতে যত অনূর্বর যায়গা আছে তার মধ্যে ‘ওমন’ সবচেয়ে নিকৃষ্ট। রাবআলখালির মরুভূমি দিয়ে ক্যারাতান যাওয়াও দুষ্কর ব্যাপার। কিছুদিন থেকে নিকটবর্তী ব্রামী দ্বীপগুলো নিয়েও বেশ গোলমাল চলেছে। ওমনের ইতিহাস খুঁজলে দেখা যাবে যে, বছরের পর বছর নানাদিক থেকে আসা আক্রমণ রোধ করতে করতেই সুলতানদের প্রাণান্ত। নেজদের ওহাবী আমিরদের দলও বেশ কিছুদিন জ্বালিয়েছে ওমনকে। মাসকাট্-এর অবস্থা প্রায় একরকম। মাসকাটে জাহাজ আসার সঙ্গে একদল লোক জাহাজে আসে বিরাট বড় বড় ‘লবস্টার’ বিক্রি করতে। মাসকাটেই দেখা হয়েছিল উইন সাহেবের সঙ্গে। উইন এককালে নাগপুরে পুলিশের

বড় সাহেব ছিলেন, এখন মাসকাটে পলিটিক্যাল এ্যাডভাইসার। আমি নাগপুরের লোক জানতে পেরেই আমার কেবিনে এসে অনেকক্ষণ আলাপ আলোচনা করে যান।

হঠাৎ আঙুল ফুলে কলাগাছ হওয়া যাকে বলে কুয়েটের অবস্থা হয়েছে ঠিক তাই। অবশ্য পারস্য উপসাগরের প্রত্যেকটা শেখের রাজ্যই অয়েল রয়্যালটির দয়াতে ফেঁপে উঠেছে কিন্তু কুয়েটের তুলনায় কিছুই না। কিন্তু অত্যাশ্চর্য শেখদের মতো কুয়েটের এই অফুরন্ত ভাণ্ডার হারেমে আর বিলাসে খরচ হয় না—হয় সত্যিকারের কাজে। স্ত্রীর আবছুল্লা আস্ সলিম্ অস সুবহ হচ্ছেন কুয়েটের শেখ। নিজের ছোট দেশের জন্য তিনি অনেক কিছুই করেছেন। তিন বছর আগে পর্যন্ত কুয়েটের খাবার জল আসত ৮০ মাইল দূর থেকে জাহাজে করে। কুয়েটকে ব্রিটিশ প্রটেকশান দেওয়া হয় ১৮৯৯ সালে—যখন শেখ মুবারাক অটোমান সুলতানদের হাত থেকে বাঁচবার জন্য ইংরেজদের দ্বারস্থ হন। এতে রাশিয়া ও জার্মানীর সম্মানে প্রচণ্ড আঘাত লাগে।

কুয়েটের ভীষণ বিপদ হয় ১৯২১ সালে, যখন সৌদী আরবিয়া থেকে আক্রমণ আসে। ইবন্ সৌদ বহাদ্দিন আগে তুর্কীদের আক্রমণ থেকে পালিয়ে আশ্রয় নেন কুয়েটে আর এখান থেকেই ১৯০২ সালে মাঝ-রাতে তিনি তাঁর বিখ্যাত রিয়াদ আক্রমণ শুরু করেন। কিন্তু কুয়েট আক্রমণ তাঁর ব্যর্থ হয়। ভাবলে আশ্চর্য হতে হয় যে, কুয়েটের লোকেরা সৌদী আরবিয়ার আক্রমণ থেকে দেশকে রক্ষা করতে শুধু হাতে সাতদিনের মধ্যে পাঁচ মাইল লম্বা আর চোদ্দ ফুট উঁচু এক মাটির দেওয়াল শহরের চারদিকে তৈরি করে নেয়। সেই বিখ্যাত দেওয়াল আজও দাঁড়িয়ে আছে। বারো জায়গায় দেওয়ালটা ভেঙে গিয়েছে আর সেই বারো জায়গায় আজও দাঁড়িয়ে থাকে সশস্ত্র প্রহরী। কুয়েটে যেতে হলে তিনটের একটা গেট দিয়ে ঢুকতেই হবে। সশস্ত্র প্রহরীর গায়ে ইংরেজী উর্দী আর হাতে ইংরেজী মেশিনগান।

গত ছয় বছরের মধ্যে কুয়েটের রূপ বদলে গিয়েছে। রাস্তা, ঘাট, হাসপাতাল, টেলিফোন, যানবাহন, স্কুল, নিয়ন-লাইট সবই হয়েছে। রেফ্রিজারেটর, এয়ার-কন্ডিশন, রেডিয়ো আর

মোটরকারের ছড়াছড়ি। মোটরের আওয়াজের জগ্নে মুয়জ্জিনকে আজান পড়তে লাউডস্পীকারের সাহায্য নিতে হয়।

এত মডার্নিটির মধ্যেও পুরনো কুয়েটকে ভালো লাগে। ছোট ছোট মাটির ঘর, গলির ভিড়, গাধার পিঠে চাপানো জলের ভিস্তিওয়ালা, সাগরতীরে লাগানো ‘টউ’, ‘বালাম’ বেশ লাগে। কুয়েটের ধনী ব্যবসায়ী আর শেখদের অনেকেই ইউরোপ আমেরিকা ঘুরে এসেছে কিন্তু তাদের ‘কুয়েটী’ আচার-ব্যবহার আজও যায়নি।

কুয়েটের লোকেরা ফুটবল খেলতে বড় ভালোবাসে। ১১৬১১৭ ডিগ্রী গরমেও মহা ধুমধামের সঙ্গে তারা হৈ চৈ করে ফুটবল খেলে। মতপান নিষিদ্ধ, চুরি ডাকাতি খুবই কম। এখনও চুরির অপরাধে হাত-পা কেটে দেওয়ার শাস্তির কথা মাঝে মাঝে শুনতে পাওয়া যায়।

ওমন, কাটর, বহেরিন, মাসকাট, কুয়েট, বুশায়ার, খোরামশাহ, আবাদান, বন্দর আব্বাস ছাড়িয়ে চলেছি বসরার দিকে। শাতিল-আরব (ইউক্রেটিস আর টাইগ্রিসের সঙ্গম) পার হয়ে চলে এসেছি ‘সিটি অব থাউজেণ্ড এ্যাণ্ড ওয়ান স্মেল’ বসরায়। বসরার গোলাপ দেখিনি কিন্তু আরবদের ‘আইহলেন, আইহলেন’ আর ‘রফিক্, রফিক্’ বলে চীৎকার করে অভ্যর্থনাও গোলাপের চেয়ে কম মিষ্টি মনে হয়নি। শাতিল-আরবের ওপর দিয়ে যখন জাহাজ চলেছিল তখন কেবলই মনে হয়েছে, ছোটবেলায় পড়া নজরুলের “শাতিল-আরব, শাতিল-আরব পূত যুগে যুগে তোমার তীর”। মরুপ্রান্তরের জানা-অজানা কত প্রান্তরেই ঘুরেছি। মাটির তৈরি, ছাদ-নিচু কত কুঁড়েঘরেই আরবদের আতিথ্য গ্রহণ করেছি—গ্রাসের পর গ্রাস খেয়েছি ‘কাওয়া’ (পণ্ডিত নেহরু যতই সুখ্যাতি করুন, খেতে মোটাই সুস্বাদু নয়)। মাইলের পর মাইল ঘুরে বেড়িয়েছি মরুভূমির দেশে। কয়েক মুহূর্তের জন্য দেখা মরুভূমির দিগন্তে সূর্যাস্ত, আজও স্মৃতির অস্তুরালে ঊঁকি দেয়। মনে পড়ে ঘোড়া আর উটের পিঠে-চড়া বেছুইনদের ‘কাফিলা’ চলেছে তপ্ত মরুভূমির উপর দিয়ে একটু সবুজ ছায়া-ঘেরা মরুতানের খোঁজে।

বুশায়ারে এসে ১০০ বছর আগেকার একটা ঘটনা মনে পড়ে যায়। ১৮৫৬ সালে 20th Bombay Native Infantry (এখন

যার নাম Rajputana Rifles) বুশায়ারের দুর্গকে আক্রমণ করেছিল ক্যাপ্টেন উড্-এর নেতৃত্বে। ১৯৫৬ ডিসেম্বরের ১০ তারিখের সেই ঘটনার সেন্টিনারী হলো মথুরাতে। ক্যাপ্টেন উড্কে দেওয়া হয়েছিল ১৮৫৬ সালে ভিক্টোরিয়া ক্রশ।

অনেক দেশের মানুষ বেহুইনরা। সর্বহারা রিফিউজিদের মতো ঘুরে বেড়ায় এক মরুতান থেকে অন্য মরুতানে, এক ফোঁটা জল আর একটু ঘাসের খোঁজে। পরিবর্তনশীল বেহুইনদের স্বভাব বুঝতে অনেক বিদেশীরই কষ্ট হয়। হঠাৎ দপ্ করে রেগে উঠবে বেহুইন আবার প্রাণ দিয়ে সেবা করবে অতিথির। অমুর্বর নিষ্ঠুর মরুভূমির সঙ্গে লড়াই করে সে বেঁচে থাকে।

হিসেব করে দেখা গিয়েছে যে, প্রায় ১৫ লাখ বেহুইন আছে সমস্ত আরব ছুনিয়াতে। ঠিক নিভুল সংখ্যা বের করা দুর্কহ ব্যাপার কারণ বেহুইনরা সেন্সাস-এর ধার দিয়েও যায় না। একবার চেষ্টা করা হয়েছিল সেন্সাস-এর কিন্তু বেহুইনরা ভাবলো যে, একবার মাথা গোণা হয়ে গেলে গভর্নমেন্ট ট্যাক্স আদায় করে টাকাও গুণতে শুরু করবে।

উটের লোমের তৈরি ‘আব্বা’ পরে ঘুরে বেড়ায় বেহুইন পুরুষরা। মেয়েরা আরবদের মতো ‘বোরখা’ পরে না। অচেনা পুরুষ দেখলে গায়ে ঢাকা দেওয়া শালের এক কোণা দিয়ে ঠোঁটের কাছটা ঢেকে নেয়। উটের পিঠে করে মাইলের পর মাইল যাত্রা করে আবার দরকার হলে উটের দুধ ও মাংস খায়। ভীষণ অলঙ্কার প্রীতি বেহুইন রমণীদের। জীবন-সংগ্রামের দরকারে মাঝে মাঝে লুটতরাজ করতেও বেহুইন পেছপা হয় না। আবার তার বাড়িতে একবার নিমক্ খেলে বেহুইন তার প্রাণ দিয়েও অচেনা অতিথির নিরাপত্তার ব্যবস্থা করবে।

বসরায় আলাপ হলো ডাঃ পূরণ সিং-এর সঙ্গে। ভারতের অনররি কন্সাল। বহু বছর কাটিয়েছেন ইরাকে। যশ, মান, অর্থ প্রচুর। এতদূর থেকেও দেশের কথা ভুলতে পারেননি তাই অবৈতনিক কন্সাল হয়ে নিজের পয়সা খরচ করে দেশের সেবা করছেন আর তাতেই তাঁর আনন্দ। বিদেশে আমাদের দূতাবাস-গুলিতে যখন ‘কেরিয়ালিস্ট’ করেন সার্ভিসের ‘স্নব’দের দেখেছি, কি করে তাঁরা গরীব দেশের পয়সা খোলামকুচির মতো ওড়াচ্ছেন

তখন ডাঃ পূরণ সিং-এর নিঃস্বার্থ সেবার কথাই মনে হয় বেশি করে। বসরা শহরে ডাঃ সিং-এর প্রতিপত্তি আর জনপ্রিয়তা প্রচুর। তিনি ভালোবাসেন ইরাকীদের আর ইরাকীরা ভালোবাসে অমায়িক, মুহূভাষী, বুদ্ধ এই শিখ ডাক্তারটিকে।

আবার বুদ্ধ শর্মাজীকেও বড় ভালো লাগে। স্টেশনে আর পোর্টে ঘোরাফেরা করেন যদি কোনো ‘হিন্দুস্থানীর’ সঙ্গে মোলাকাত হয়ে যায়। কবে ইরাকে এসেছিলেন, বোধ হয় মনে নেই। সুদূর শিয়ালকোটের লোক শর্মাজী।

আরেকজন লোকের কথাও আজ বার বার মনে পড়ছে কিন্তু চুংখের বিষয়, তাঁর নামটা ভুলে গিয়েছি—বোস না ঘোষ। দেখা হয়েছিল বসরার ‘মার্গিল’ স্টেশনে ফেরার সময়। গাড়ি থেকে নেমে ‘প্লাটফর্মে’ দাঁড়িয়ে আছি, দেখি থাকী হাফপ্যান্ট-পরা এক ভদ্রলোক স্যুটকেসের উপর আমার নামের লেবেল খুব মনোযোগ দিয়ে পড়ছেন।

“আর ইউ ফ্রম ইণ্ডিয়া”—প্রশ্ন করেন।

“ইয়েস”—গৌরবর্ণ চেহারার ভদ্রলোকটিকে দেখে তাঁর শ্রাশনালিটি সম্বন্ধে কিছু ঠাওর করতে না পেরে আমিও জবাব দিই।

“বাই এনি চান্স আর ইউ এ বেঙ্গলী?”

“ইয়েস বাই অল্ চান্স” ইচ্ছে করেই একটু রসিকতা করি।

“আপনি বাঙালী?” বলে ভদ্রলোক প্রায় চিৎকার করে আমার হাত দুটো চেপে ধরলেন, “মশাই আজ ছ’বছর বাঙলা কথা বলিনি।” অভিভূতের মতো কথা ক’টা বলে তিনি আমার স্যুটকেসটা উঠিয়ে নেন। নানা আপত্তি সত্ত্বেও আমায় নিয়ে যান তাঁর এক বন্ধুর বাড়িতে।

অনেক রাত পর্যন্ত গল্প করেছি তার সঙ্গে। ইণ্ডিয়ান আর্মির হাবিলদার হয়ে এসেছিলেন মেসোপোটেমিয়ায়, ফিরে যাননি দেশে। বসরা থেকে অনেকদূর এক তেল কোম্পানীতে কাজ করেন। মাঝে মাঝে আসেন বসরায়। প্রশ্নের পর প্রশ্ন করে যান বাঙলাদেশ সম্বন্ধে। বোঝাতে চেষ্টা করি, আমি বাঙলার বাইরে থাকি, অনেক কিছুই জানি না, কিন্তু তিনি বুঝতে পারেন না বা বুঝতে চান না।

“আমার অবস্থাটা দেখুন। এখন হয়ে গিয়েছি ‘ইরাকী’। বছর দুয়েক আগে গিয়েছিলাম ভারতবর্ষে, ইরাকী পাসপোর্ট নিয়ে। ভিসার এক্সটেনশন করতে বেশ বেগ পেতে হয়েছিল।” ভদ্রলোক দুঃখ করতে লাগলেন।

পরের দিন পোর্ট পর্যন্ত পৌঁছে দিয়েছিলেন তিনি আর সঙ্গে দিয়েছিলেন বসরার তৈরি দুটো মাটির জলের কুঁজো। কুঁজো দুটোই ভেঙে গিয়েছে কিন্তু ভদ্রলোকের স্মৃতি এখনও জল্জল্ করছে।

বাগদাদ থেকে ইস্তানবুল যেতে ট্রেনে চারদিন লাগে। ট্রেনের নাম ‘টারাস’ এক্সপ্রেস। অসময়ে বাগদাদে পৌঁছনোর জন্তু সিরিয়ান ট্রান্সিট ভিসা যোগাড় হলো না। ট্রেন সিরিয়ান ক্রুটিয়ার দিয়ে যাবে, আর আমাদের এম্বাসির লোকেরা ভয় দেখালো যে, যদি ভিসা না থাকে, সিরিয়ান পুলিশ শ্রেফ ট্রেন থেকে ঘাড় ধরে নামিয়ে দেবে। বুঝিয়ে বললাম যে, আপনারা দয়া করে সিরিয়ান কর্তৃপক্ষকে ‘কেবল’ করে জানিয়ে দিন যে, অমুক অমুক জার্নালিস্ট বিনা ভিসায় যাচ্ছেন, তাঁকে যেন রাস্তায় ভিঙ্গা গ্র্যান্ট করা হয়।

শুষ্ক মুখে থার্ড সেক্রেটারী বললেন, “তা করে দিচ্ছি, কোন ফল হবে না। আমাদের এ্যাডভাইস মেনে আপনি কাল প্লেনে যান।”

যা থাকে কপালে বলে রওনা তো হলাম, কিন্তু ভাবনা হলো যদি নামিয়ে দেয়, তাহলে কি হবে! সিরিয়ান বর্ডার স্টেশন ‘তেল কোচেক’ আসবে রাত দুটোয়।

ট্রেনের কামরার এক কোণে বসে ভাবছিলাম মধ্যপ্রাচ্যের রাজনীতির কথা। ইরাক ইরান, সৌদী আরবিয়া, লেবানন, টার্কী, সিরিয়া, জর্ডন। ইরাক টার্কী আর ইরান একদিকে আর বাকী সব আরেক দিকে। বিশ্ব-শান্তির চাবি আছে এই মিডিল-ইস্টে। তেলের রাজ্যে জল নিয়ে মারামারি। কিন্তু তলিয়ে দেখতে গেলে তেলে-জলে একই ব্যাপার। তেল নিয়ে যাবার জন্তুই তো সূয়েজের উপর এত মায়া ইংরেজদের। ব্যাপারটা ইরান ঠিক বুঝতে পারছে না, কিন্তু জনমতের চাপে যখন আবার আবাদান (এ.আই.ও.সি.) ‘গ্যাশানালাইজ’ করার কথা উঠবে, তখন বুঝতে পারবে। যাক সে কথা পরে।

হঠাৎ গাড়ি এসে দাঁড়ালো মোম্বুল স্টেশনে। ব্রেকফাস্ট খেয়ে যখন কামরায় ফিরে যাচ্ছি, বৃদ্ধ এক ইরাকী রেল কর্মচারী কাছে এসে দাঁড়ালেন। পা থেকে মাথা পর্যন্ত পরখ করে প্রশ্ন করেন, “পাকিস্তান?”

“নো, হিন্দুস্থান” জবাব দিই।

“ছাট ইজ ভেরী ফাইন।”

“হোয়াট ইজ ভেরী ফাইন?”

“ইউ কাম ফ্রম ইণ্ডিয়া। টেল মি হাউ ইজ নেরু”—‘রু’র উপর চাপ দিয়ে জিজ্ঞাসা করেন ভদ্রলোক।

“ইউ মিন নেহরু। ডু ইউ নো হিম?”

“ইয়েস শিওর আই ডু”—নেহরুজীর সঙ্গে লোকটার ঘনিষ্ঠতার কথা ভেবে একটু ঈর্ষান্বিত হচ্ছিলাম, এমন সময় “ওঃ, এভরী চাইল্ড ইন দি ওয়ার্ল্ড নোজ হিম।” “ইজ হি নট গ্যাণ্ডিস সন?”

আশ্চর্য হলাম। বুঝিয়ে বললাম, “নেরু গ্যাণ্ডির সন না—অন্য কারুর সন।”

“হি ইজ এ গুড ম্যান।”

“ইয়েস।”

“অ্যাণ্ড এ স্ট্রং ম্যান টু।”

“ইয়েস।”

“ইয়েস।”

“ইয়েস” বলে ছ’জনেই হাসিতে ফেটে পড়ি। পাশের কামরা থেকে কতকগুলো মুখ বেরিয়ে আমাদের দিকে অবাক হয়ে চেয়ে থাকে।

রাত প্রায় ছোটোর সময় ঘুম ভেঙে যায়। খোঁজ করে জানলাম, ‘তেল-কোচেক’ স্টেশন এসে গিয়েছে। সিরিয়ান ভিসা চেক হবে। আমার প্রাণ তো খাঁচা ছাড়া, এই বুঝি নামিয়ে দিলো। তেত্রিশ কোটি দেব-দেবীর নাম স্মরণ করছি, এমন সময় দরজায় টোকা।

“ইউ জার্নালিস্ট ফ্রম ইণ্ডিয়া?” সুপুরুষ সিরিয়ান ফ্রন্টিয়ার পুলিশ অফিসার দরজায় দাঁড়িয়ে।

“ইয়েস।”

“উই হ্যাভ ইনস্ট্রাকশনস টু গিভ ইউ ভিসা হিয়ার।”

ধড়ে প্রাণ ফিরে এল। খানিক বাদে ছাপটাপ মেরে পাসপোর্ট ফেরত দিয়ে যায় অফিসারটি। বললাম “থ্যাঙ্ক ইউ।”

“রাইট গুড অ্যাবাউট মাই কার্টি” বলে চলে গেল অফিসারটি। তার দেশের সুখ্যাতি করলেই সে সুখী।

পাশের কামরা থেকে করিডর দিয়ে ঘুম চোখে উঠে এলেন মিসেস অ্যান মিলার, চোখে মুখে ভাব “আই টোল্ড ইউ সে।” “কাম লেট আস হ্যাভ এ ডিংক অ্যাণ্ড এ গেম অব ব্রীজ টু সেলিব্রেট।”

পিছন ফিরে দেখি আমার সহযাত্রী জন থমাস এক চোখ খুলে আর এক চোখ বন্ধ করে পাতলা ফিনফিনে রাত্রিবাসে ঘেরা মিসেস মিলারের দিকে চেয়ে আছে।

উত্তরের অপেক্ষায় মিলারকে দাঁড়িয়ে থাকতে দেখে জন জবাব দিলো, “গিভ দি ডিংকস নাও। কীপ দি ব্রীজ ফর টুমরো।”

এক রাউণ্ড লুইস্কীর পর মিসেস মিলার যখন নিজের কামরায় ফিরে গেলেন, তখন প্রায় ৪টা বাজে।

জন তখনও তন্ময় হয়ে মিসেস মিলারের ‘কিংগারের’ কথা ভাবছে।

মস্তুরা করলাম “জন, ডাজন্ট শী লুক কিউটস্টাইথ ছাট ড্রেস অন।”

তন্দ্রার ঘোরে হাই তুলতে তুলতে জন জবাব দেয়, “শী উইল লুক কিউটার উইদআউট ওয়ান।”

বসরার বিরাট বিলিভী কোম্পানীতে এ্যাকাউন্টেন্টের কাজ করে জন। আরব হলে কি হবে হিসাবনিকাশ করে ঠিক বুঝেছে “শী উইল লুক কিউটার উইদআউট ওয়ান।”

আট

“ইস্ আমি যদি সেই ভিড়ের মধ্যে থাকতাম?” ছুঁখ করলেন মিস্ স্মৃতি কলাম্কার।

“ওহ্! দি পুওর চিকেন”, চিকেন রোস্টটা নির্মমভাবে কাটতে কাটতে তাঁর আফসোস জানালেন মিসেস্ দীনা কোতওয়াল।

কথা হচ্ছিল সৌদৌ আরেবিয়ার ‘ফ্যাবুলাস্’ রাজা ইবন সৌদকে নিয়ে। এই কিছুদিন আগে ভারতবর্ষে এসে রীতিমতো একটা তোলপাড় করে গেলেন। সিমলার কুফরী অঞ্চল থেকে ফেরার পথে সৌদের মোটরের চাকার নিচে একটা মুরগী চাপা পড়ে। গরীব

এক বৃদ্ধাকে রাজা তক্ষুনি ক্ষতিপূরণ করেন কুড়িটা টাকা ঝনাৎ করে ফেলে দিয়ে। আবার সিমলায় তাঁকে দেখবার জন্য যে ভিড় হয়েছিল তাতে তাঁর মোটরে ধাক্কা লেগে একটি স্কুলের ছাত্রী অজ্ঞান হওয়ায় তাকে পাঠানো হয় সিমলা রিপন হাসপাতালে আর দেওয়া হয় এক হাজার টাকা। রাজা লুকুম দেন নিজের কন্সালকে যে তরুণীটির সেবার যেন কোনো ক্রটি না হয়।

প্রায় ১৩০ জন সঙ্গী-সাথী নিয়ে এসে এখানে ওখানে প্রায় লাখ পাঁচেক টাকা ছড়িয়ে, এক কাপ চায়ের জন্য ২০০ দাম দিয়ে, ঘড়ি, তলোয়ার আর এস্তার আরব জোব্বা জায়গায় জায়গায় বিলিয়ে ইবন সৌদ বেশ একটা হৈ চৈ করে গেলেন। একসঙ্গে প্রায় ৫০টা মোটরে করে তাঁর পার্টিকে রেলওয়ে স্টেশন থেকে এরোড্রমে যেতে দেখেছি। নাগপুরের কমলা লেবুর প্রশংসা তাঁর মুখ থেকে শুনে নাগপুরবাসীরা গদগদ হয়ে পড়লেন। পণ্ডিত রবিশঙ্কর গুপ্তা আর ডাঃ পট্টভীকে দিলেন ঘড়ি, তলোয়ার আর জোব্বা। পঞ্চাশ জন এরোড্রম স্টাফের জন্য ছুটে ঘড়ি দিয়ে করলেন বিবাদের সৃষ্টি। যাক্, ১৯১২ সালের পর এক স্বাধীন নৃপতিকে তাদের মাঝে পেয়ে নাগপুরওয়ালারা বেজায় খুশি। ১৯১২ সালে নাগপুরে পদার্পণ করেছিলেন পঞ্চম জর্জ।

১৯৫৩ সালে তাঁর পিতা আবদুল আজিজ অল-সৌদ মারা যাবার পর ৫১ বছর বয়সে গদিতে আরোহণ করেন হিজ ম্যাজেস্টি সৌদ বিন্ আবদুল আজিজ অল-সৌদ। গোঁড়া মুসলমান, মত্তপান অথবা ধূমপান কিছুই করেন না। প্রিয় পেয় হলো ‘কাওয়া’। নেহরু-জীকেও খাইয়েছিলেন ‘কাওয়া’। বাগানের ভীষণ শখ আর দিল্লী থেকে তাঁর রাজধানী রিয়াদে পাঠানো হয়েছিল রকমারি ফুলের চারা আর বীজ।

প্রায় সাড়ে ছ’ফুট লম্বা রাজা ইবন সৌদ মধ্যাহ্নে আধ ঘণ্টা আর লাঞ্চার পর থেকে ৪টা পর্যন্ত কোনো এনগেজমেন্ট স্বীকার করেন না; কারণ এই সময় তাঁর নমাজ হয়। তাঁর কনভেয়ের প্লেনের বসবার আসন এমনভাবে সাজানো যে, প্লেন যে দিক দিয়েই যাক না কেন তাঁর আসন সব সময় থাকবে ‘কাবা’র দিকে। এটা অবশ্য শোনা কথা।

সৌদের ঐশ্বর্য অগাধ। তেল বেচে পয়সা। ‘আরামকো’ (Aramco) আরেবিয়ান আমেরিকান অয়েল কোম্পানীর দৌলতে বেশ আরামেই আছেন। প্রায় ৯৫৩,০০০ ব্যারেল তেল উৎপাদন হয় প্রতিদিন, আর হয় ১৫০,০০০ কিউবিক ফিট গ্যাস। সবশুদ্ধ প্রায় ২১৪৫৪ জন লোক কাজ করে তেলের রিফাইনারী ইত্যাদিতে। সৌদ কিন্তু এতেও সন্তুষ্ট নন। দাবি করেছেন বুয়ামী দ্বীপের উপর। ব্রিটিশ গভর্নমেন্ট কিছুদিন আগে আরোপ করেছিলেন যে, ইবন সৌদ আবুধাবীতে Coup de tat করবার তাগিদ আছেন। আবুতলা আল কুরেশী নামে জর্নৈক লোকের দ্বারা সৌদ নাকি আবুধাবীর রাজার ভাই শেখ জইদ বিন সুলতানকে এক বিরাট মোটর গাড়ি আর ৪০ হাজার টাকা ঘুষ দিয়েছিলেন। ইবন সৌদ অবশ্য এই সব ‘অ্যালিগেশন’ অস্বীকার করেছেন।

কিন্তু সৌদের এত অগাধ ঐশ্ব্যের ছড়াছড়ি আজ হলেও কিছুদিন আগে ছিল না। ১৯৪২ সালে সৌদী আরেবিয়ার বাজেট দেখে মনে হতো যেন রাজার নিজের পার্সোনাল অ্যাকাউন্ট। আমদানী আর খরচ ছিল প্রায় ২০ লাখ পাউণ্ড। তাছাড়া ৩০ লাখ ছিল বছরে ব্রিটিশ আর আমেরিকান গভর্নমেন্টের ‘সাবসিডি’ (Subsidy)। মাত্র ছ’বছর পর ১৯৪৮ সালে শুধু তেলের রয়্যালটির আমদানী হয় ৫০ লাখ পাউণ্ডে (স্বর্ণ মুদ্রায়)। ১৯৫০-এ দাঁড়ায় ৭৫০ লক্ষ পাউণ্ডে। তেলের বাজারের দৌলতে ইবন সৌদ কেন, ছোট ছোট অনেক শেখই, আমেরিকার মিলিওনার আর আমাদের রাজা মহারাজার উপর টেকা মেরেছেন। ইবন সৌদ তো তৈলযুগের রক্ফেলার—পৃথিবীর সব চেয়ে গরীব দেশের সব চেয়ে ধনী নৃপতি! স্থানজ্ঞানসিস্কোতে ‘আরামকো’র ২০০নং বুশ্ স্ট্রীটের তেলের দপ্তরের দৌলতে আজ ইবন সৌদ ঐশ্ব্যে গড়াগড়ি খাচ্ছেন। কিন্তু কয়েক বছর আগেও ইবন সৌদ দেশ থেকে দেশে পালিয়ে বেড়াচ্ছিলেন প্রাণের ভয়ে। তাঁর পিতাকে সহ্য করতে হয়েছে অনেক কষ্ট আর বরণ করতে হয়েছে অশেষ দুঃখ। ছোট বয়সে পালিয়ে আসতে হয়েছিল কুয়েটে। ১৯০১ সালে মুষ্টিমেয় লোকের সাহায্য নিয়ে রিয়াদ আক্রমণ করেন আর নিজেকে ঘোষণা করেন নেজাদের আমীর বলে। ১৯১৫ সালে তিনি হন নেজাদের রাজা আর ১৯২৫ সালে হেজাজ আক্রমণ করে তিনি তাড়ালেন

শরীফ হুসেনকে। শরীফ হুসেন ছিলেন ‘হাশেমী’ বংশের অগ্রগণ্য নেতা আর আবদুল্লা আর ইরাকের ফৈজালের পিতা। এবার সৌদ নিজেকে করলেন হেজাজ আর নেজাদের নেতা আমীর—১৯৩২ সালে রাজ্যের নাম দিলেন সৌদী আরেবিয়া। সৌদ ওয়াহাবী সম্প্রদায়ের নেতা আর সেই জন্তু তাঁর প্রতি ‘হাশেমী’ বংশের বিদ্বেষ আজও যায়নি। আবদুল্লা কোনো কালে তাঁকে স্বীকার করেননি আর সৌদও আবদুল্লাকে পাক্তা দেননি।

মক্কা-মদিনার দেশ সৌদী আরেবিয়া। সৌদ ১৯৫২ সালে পিলগ্রিম ফী উঠিয়ে খুব নাম কিনলেন ধর্মপ্রাণ মুসলমানদের মধ্যে। আগে মাথা পিছু ৩৭৫ টাকা ফী নেওয়া হতো। পরের বছরেই তিনি ‘তাইফে’ মারা যান আর ইবন সৌদ হন রাজা।

দশ লক্ষ বর্গমাইলে ঘেরা সৌদী আরেবিয়ার লোকসংখ্যা ৭০ লক্ষ। সঠিক লোকসংখ্যা জানা যায় না। কারণ আরব উপজাতিরা নিজেদের লোকসংখ্যা গণনার সময় বুদ্ধ, জ্রীলোক আর বাচ্চাদের ধরে না। তা ছাড়া বেছুইনরা রাজস্ব দেবার ভয়ে ‘সেন্সাসের’ মধ্যে পড়তে চায় না।

সৌদী আরেবিয়ার বেশির ভাগই মরুভূমি কিন্তু তার মধ্যেও এখানে ওখানে ছড়ানো রয়েছে অনেক মরুত্থান আর উর্বরা উপত্যকা। ইতিহাসের পাতা খুঁজলে পাওয়া যাবে যে, আরেবিয়ার ইতিহাসের শুরু ‘সৃষ্টি’র শুরু থেকে। কারণ, আরবরা বলে যে, জেডা হচ্ছে ঈভের (Eve) জন্মস্থান। আরব উপজাতিদের মধ্যে সম্ভাব কোনো কালেই ছিল না অস্তুত সপ্তম শতাব্দী পর্যন্ত তো নয়ই। সপ্তম শতাব্দীতে হজরত মহম্মদ এই কাজে হাত দেন। তিনি প্রচার করলেন যে, ভগবান মাত্র একজনই আর লোকদের বললেন তাদের পাগান (Pagan) ভগবানদের ত্যাগ করতে আর তাঁকে স্বীকার করতে ভগবানের ‘প্রফেট’ রূপে। কখনো কখনো হজরত মহম্মদ নিজেকে ভুলে যেতেন আর trance-এ পড়ে ঈশ্বরের সঙ্গে হতো তাঁর যোগাযোগ। ঈশ্বরের সেই বাণী তিনি শোনাতেন নিজের ভক্তদের। সেই বাণী লিখে রাখতো শ্রোতার—আর সেই হলো পবিত্র কোরান শরীফ। কোরানের আদেশের মধ্যে একটা হচ্ছে হজ যাত্রা অস্তুত জীবনে একবার।

ঐতিহাসিক প্রমাণ না পাওয়া গেলেও, অনেক লেখকের মতে, প্রথম প্রথম হজরত মহম্মদকে তাঁর নূতন ধর্মের প্রচার করতে তলোয়ারের সাহায্য নিতে হয়েছিল। ধীরে ধীরে আরবরা (তখন তাদের বলা হতো Saracen) এসে দাঁড়ায় ইসলামের সবুজ পতাকার নিচে। হজরত মহম্মদ ৬৩২ সালে মারা যান কিন্তু ইসলামের পতাকা তখন চলেছে দেশ থেকে দেশে—পশ্চিম এশিয়া হয়ে উত্তর আফ্রিকা, এমন কি স্পেন পর্যন্ত।

কিন্তু একতার অভাবে আবার আরেবিয়ার উপর বিপর্যয় আসে। ১৫১৭ সালে তুর্কীর আক্রমণে আরেবিয়া পদানত হয়। প্রথম মহাযুদ্ধের সময় পর্যন্ত সমস্ত দেশটা তাদের দখলে ছিল কিন্তু ভ্রাম্যমান উপজাতিরা আর বেতুইনরা কোন কালে কারো বশ্যতা স্বীকার করেনি, আজও করে না। অষ্টাদশ শতাব্দীর মধ্যভাগে শুরু হয় ‘ওহাবী’ আন্দোলন। এই আন্দোলনের জন্মদাতা ওহাব। তিনি চেয়েছিলেন ইসলামকে কুসংস্কার বর্জিত করতে। অধুনা ইবন সৌদের নেতৃত্বে ওহাবী আন্দোলন ক্রমশ জাতীয় আন্দোলনে পরিণত হয়েছে, আরব ঐক্যের প্রতীক হয়ে দাঁড়িয়েছে, অন্তত সৌদী আরেবিয়ায়।

কর্নেল টি. ই. লরেন্স ছিলেন আরবদের বন্ধু, আর তিনি আরব ঐক্যের জ্ঞাত অনেক চেষ্টাও করেন। আজ লরেন্স সম্বন্ধে নানা-রকম কাহিনী শোনা যায়। কোনো কোনো লেখক বলেন যে, লরেন্স ছিলেন ‘বোগাস’। কিছুদিন আগে একটা বইতে দেখলাম লরেন্স সম্বন্ধে এক নতুন থিওরী বেরিয়েছে। লেখক বলেছেন লরেন্স ছিলেন ‘ইললেজিটিমেট চাইল্ড’ আর তাই তাঁর ছিল এক ‘কমপ্লেক্স’। যাই হোক পশ্চিমের কাছে আরবকে তুলে ধরেন লরেন্সই। ১৯১৩-১৪ সালে সেকেন্ড লেফটেন্যান্ট হয়ে আরব ছুনিয়াতে আসেন লরেন্স আর জীবনের বহু বছর তিনি মরুভূমির দেশে কাটিয়েছেন। তাঁর ‘ডেসপ্যাচ’গুলোকে মিথ্যা ও ক্রটিপূর্ণ বলে অভিহিত করলেও একথা অস্বীকার করা চলবে না যে, তিনি যতটা চিনতেন আর কেউই ততটা আরেবিয়াকে চিনতো না। লরেন্সের ভক্ত আমি নই। কিন্তু বেশ জানি যে, লরেন্স আজ ‘লিজেণ্ড’ (legend) হয়ে দাঁড়িয়েছেন তার কারণ একাধিক।

আরেবিয়ার মধ্যপ্রান্তের মরুভূমিকে বলা হয় ‘দাহনা’। ইংরিজিতে অনুবাদ করলে তার অর্থ হয় ‘Empty Quarter’। মাইলের পর মাইল শুধু বালি আর কঠিন পাথরের স্তূপ। আজ পর্যন্ত শুধু দু’জন ‘হোয়াইটম্যান’ এই মরুভূমি পার হয়েছেন। আরবরাও খুব কমই এই বিরাট মরুভূমির এপার থেকে ওপার গিয়েছে।

মরুপ্রান্তরের পশ্চিম কোণ ঘেঁষে ‘এল এহকাফ’-এর কাছে ধ্বংসপ্রায় এক আরব শহর দাঁড়িয়ে আছে। কার কীর্তি কে জানে কিন্তু মনে হয় যে, নিকটবর্তী মরুস্থানকে দুর্ধর্ষ বেড়ইনদের আক্রমণ থেকে রক্ষা করার জন্যই বোধ হয় তৈরি করা হয়েছিল এই বিরাট প্রাসাদটিকে। কিছু খেজুরের গাছ আর সবুজ গাছগাছড়া দেখে মনে হয়, হয়তো কাছেই আছে কোনো জলশায় বা ছোট কোনো স্ত্রীম। থাকলেই বা কি, আরেবিয়ার সব নদীনালা মতো এও বোধহয় বছরের বেশির ভাগ সময়েই শুকিয়ে থাকে।

রেললাইনের বালাই নেই, সব উটের ক্যারাভান। মদিনা থেকে ইয়েম্মো বন্দর ১৩০ মাইল—বালি আর পাথরের স্তূপের মধ্যে দিয়ে চলেছে উঁচু নিচু রাস্তা। হাজার হাজার লোক প্রতি বছর যায় ইয়েম্মো থেকে মদিনায় এই রাস্তা দিয়ে। ইয়েম্মোকে বলা হয় ‘Gate of the Holy City’। কিছু দিন আগে পর্যন্ত যাত্রীদের দরকার হতো সশস্ত্র পাহারা, কারণ অনেক হতভাগ্য যাত্রী প্রাণ দিয়েছে বেড়ইন আর অগ্ন্যাগ্ন উপজাতিদের হাতে। মক্কা-মদিনায় তারা পৌঁছেছে হতসর্বশ্ব হয়ে নয়তো বা ফিরে গিয়েছে নিজের দেশে মনে এই আশা নিয়ে যে, আবার আসবে পরের বছর মক্কা-মদিনায়। ভীষণ রোদে রোগের যন্ত্রণায় এই রাস্তায় প্রাণ দিয়েছে অনেক ধর্মপ্রাণ মুসলমান ‘কাবার’ দিকে মুখ চেয়ে।

আবার ওয়াদী-মুসা’র Ravine-এর একধারে দাঁড়ালে দেখা যাবে পাথরের নগরী ‘পেট্রার’ ধ্বংসাবশেষ। অতীতকালে পেট্রা ছিল সমৃদ্ধশালী শহর, কিন্তু আজ হয়েছে ধ্বংসস্তূপে পরিণত। খুঁজলে দেখা যাবে এখানে ওখানে পাথরের গায়ে খোদা কিছু উপাসনাগৃহ আর স্মৃতিস্তম্ভ, দু’পাশে অতিকায় পাহাড়ের মধ্য দিয়ে চলে গিয়েছে সড় রাস্তা পেট্রা শহরের গা ঘেঁষে। এই রাস্তা ছিল এককালে প্যালেস্টাইন আর আরেবিয়ার বাণিজ্যের একমাত্র

যোগাযোগ। এখন হেজাজ রেললাইন তৈরি হবার পর এই রাস্তা আর ব্যবহার করে না কেউই। তবুও কিছু সওদাগর তাদের মালপত্র নিয়ে এখনো ভালোবাসে এই রাস্তা দিয়ে হেঁটে ঘোড়া বা উটের পিঠে চড়ে যেতে।

পেট্রার কাছে রয়েছে অপূর্ব কারুকার্যমণ্ডিত এল-দির'র উপাসনাগৃহ। ভাবলেও আশ্চর্য লাগে যে, মরুভূমির দেশে কী করে এই বিরাট সৌধ তৈরি হয়েছিল। আলাদা পাথর বাসিয়ে নয় একটা পাহাড় কেটে। পেট্রার গৌরবশালী অতীতের নিদর্শন এই উপাসনা গৃহ আজও স্মরণ করিয়ে দেয় রোমানদের স্থাপত্যের কথা, অর্থ আর বাণিজ্যের লোভে তাদের পেট্রা শহর অধিকারের চেষ্টার ইতিবৃত্ত। এখন সে রামও নেই সে অযোধ্যাও নেই। বালি আর পাথরের স্তুপের বুকে দাঁড়িয়ে আছে তাদের সেই কীর্তি।

বাগদাদে জন থমাস্ একদিন বললো স্কে আমায় আরবী সঙ্গীত শোনাতে নিয়ে যাবে। জনকে নিরাশ করতে মন চায়নি তাই গিয়েছিলাম গান শুনতে সন্ধ্যা বেলায়। ফিরে এসেছিলাম পরের দিন ভোরে আর জনকে জানিয়েছিলাম আমার অনেক অনেক ধন্যবাদ। মরুপ্রান্তরের দেশে সঙ্গীত! কখনও কল্পনা করতে পারিনি। সঙ্গীতের সমজ্‌দার আমি নই তাই বোধ হয় এই ধারণা মনে পোষণ করেছিলাম। সে-ধারণা আজ ভেঙে গিয়েছে আর বুঝতে পেরেছি সঙ্গীতের দুনিয়াতে আরবের কত দান। ক্যাবারে আর নাইট ক্লাব ঘুরে ঘুরেও যখন আরব সঙ্গীতের কোন প্রশংসাই আমার মুখ থেকে শুনতে পেলো না, তখন জন ছাড়লো তার ট্রাম্প কার্ড। অল্‌ রশীদ স্ট্রীট পেরিয়ে গলির মধ্যে একটা ছোট বাড়িতে আমাকে নিয়ে জন ঢুকলো। খানিকপরে বেরিয়ে এলেন এক বৃদ্ধ। জনের সঙ্গে তাঁর কি কথা হলো আরবীতে বুঝলাম না। কথাটা যে আমার সম্বন্ধেই হচ্ছিল শুধু সেটা বুঝলাম 'হিন্দীস্থান', 'হিন্দীস্থান' শব্দটা শুনে। বৃদ্ধ এগিয়ে এসে আমায় গভীর আলিঙ্গন করে চলে গেলেন বাড়ির ভিতরে।

ব্যাপারটা ঠিক বুঝতে না পেরে জনকে জিজ্ঞাসা করতেই জানলাম সে আমায় নিয়ে এসেছে এক আরবী সঙ্গীতের শিক্ষকের কাছে। খানিক পরেই স্মিতহাস্তে বৃদ্ধ বেরিয়ে এলেন। হাতে

একটা বিরাট মোটা খাতা আর পেছনে ট্রে হাতে এক চাকর। ছোট ছোট কাঁচের গ্লাসে তিনজনের জন্তে ঢাললেন আরক (কড়া একরকম ইরাকী মদ)। তারপর ক'ঘণ্টা যে তাঁর কাছে বসেছি মনে নেই—মাঝে মাঝে চাকরটা এসেছে আর গ্লাসে আরক ঢেলে দিয়ে গিয়েছে। সেদিন আরবী সঙ্গীতের দরদী বৃদ্ধ যা কিছু বলেছিলেন সব মনে নেই। মনে থাকবার কথাও না, কারণ প্রথমতঃ সঙ্গীতের কিছুই বুঝি না, দ্বিতীয়তঃ তাঁর বক্তব্য আমার বুঝতে হয়েছে জনের ইংরেজীর মাধ্যমে। মাঝে মাঝে তিনি কথা বলতে বলতে এক-একটা সুর আর তান গেয়ে আমায় বোঝাচ্ছিলেন। কখনো কখনো তাঁর সেই মধুর কণ্ঠের তান এখনও কানে ভেসে আসে। ডান হাতের তর্জনী দিয়ে বাঁ হাতের তর্জনী আর অনামিকার মধ্যে মৃদু মৃদু আঘাত করে সৃষ্টি করেছিলেন তাল।

বৃদ্ধ সঙ্গীত শিক্ষকের স্মৃতি আজ মন থেকে মুছে গিয়েছে কিন্তু একটা ময়লা চিরকুট আজও আমার কাছে পড়ে রয়েছে। পেন্সিলের হিজিবিজি থেকে আরবী জানা এক বন্ধুর সাহায্যে যতটুকু উদ্ধার করতে পেরেছি নিচে দিলাম :

“স, রে, গ, ম, প, ধ, নী

ডো, রে, মী, ফ, সাল্, লা, সি

ইয়ক্ দো, সে, চার, পঞ্জ, শষ, হফত্

মীম, ফে, সাদ, লাম, সীন, দাল, রে।”

যতদূর জানতে পেরেছি শিক্ষক বোধ হয় আমায় বিভিন্ন দেশের সঙ্গীতের সপ্তক দিয়ে রাগের ক্রম বোঝাবার চেষ্টা করেছিলেন। ডিসাইফার করতে গিয়ে অনেক ভুলই হয়তো আমার হয়েছে কিন্তু সেই ময়লা চিরকুটটাকে পাঠকদের সামনে তুলে ধরার লোভ সম্বরণ করতে পারলাম না। সঙ্গীতের দরদীরা হয়তো কিছু কিছু বুঝতে পারবেন এর কি অর্থ। যতদূর মনে হয় প্রথম লাইনটা বোধহয় ভারতীয় সঙ্গীত সম্বন্ধে আর শেষের লাইনটা আরবী সঙ্গীতের সপ্তক। দ্বিতীয়টা ইউরোপীয় আর তৃতীয়টা ইরানী সঙ্গীত নিয়ে।

বৃদ্ধ সঙ্গীত শিক্ষকের আরো কয়েকটা কথাও মনে আছে। ঘণ্টার পর ঘণ্টা তিনি বলে গিয়েছেন আর জন তার যৎসামান্য ইংরেজীর জ্ঞান নিয়ে আমায় বোঝাতে চেষ্টা করেছে। তার কিছু

কিছু নোটস্ লিখে রেখেছিলাম। আরব সঙ্গীত সম্বন্ধে যা কিছু জ্ঞান তো সেই নোটস্ থেকেই।

সঙ্গীতের আরবী বৈজ্ঞানিক নাম ‘মুঝিকী’, আমার মনে হয় তার থেকেই ইংরিজী ‘মিউজিক্’ শব্দ এসেছে। অনেক আরবী শব্দই আজ ইংরিজী ভাষায় প্রচলিত। যেমন—এ্যালকেমী, কেমিস্ট্রী, এ্যালজেব্রা, এ্যালকালী, এ্যাজিমাথ, নাদির, এ্যাডমিরাল ইত্যাদি।

সঙ্গীত সম্বন্ধে আরবীতে শ’খানেকের উপর বই আছে। অল্ মসুদী (মৃত্যু ৯৫৩ খৃষ্টাব্দে) আর অল্ ইফাহানির (মৃত্যু ৯৬৭ খৃষ্টাব্দে) আরবী সঙ্গীত সম্বন্ধে প্রামাণিক গ্রন্থ লিখে অমর হয়েছেন। মসুদী সঙ্গীতের প্রারম্ভিক রূপ আর অষ্টাশ্র দেশের সঙ্গীতের ইতিহাস নিয়ে নাড়াচাড়া করেছেন। ২১টা ভল্যুম-এ ইফাহানি আরবী সঙ্গীতের এক সংগ্রহ তৈরি করেছেন। ইবন্ খালাতুন এই সংগ্রহকে আরবের ‘দিবান’ বলে অভিহিত করেন। মহম্মদ ইবন্ ইশাক অল বরুকি নামক আর একজন লেখকও আরবী সঙ্গীতের মূল সিদ্ধান্ত, ব্যবহার, আর বৈজ্ঞানিক দৃষ্টিভঙ্গী আলোচনা করেছেন তাঁর এক বইয়ে। ১২৫৮ সালে বাগদাদের পতনের পর আরব সঙ্গীত নিয়ে কোনো বই প্রকাশিত হয়নি কিন্তু গ্রীক ভাষায় লেখা সঙ্গীতের অনেক বইয়ের অনুবাদ আরবীতে হয়েছে।

আরবী সঙ্গীতে ‘কসীদা’ আর তার কিছু সূক্ষ্ম রূপ—যাকে ‘কিতা’ বলা হয়—তার প্রচলন খুব বেশি ছিল। তাছাড়া ‘গজল’ ‘মওয়াল’, ‘জলদ’ ও ‘মুবাশশাহ’-এর প্রচারও আছে। গানের সুরকে লয়ের সঙ্গে সপ্তকে বেঁধে দেওয়া হতো আর সেই প্রথার নাম ছিল ‘আইকা’। কিন্তু আজকের সঙ্গীতে স্বর আর তালের যে ঐক্য তার সঙ্গে আরব সঙ্গীতজ্ঞেরা পরিচিত ছিলেন না। চৌথী, পাঁচবী বা আঠাবী ‘টুটের’ উপর লয়কে তাঁরা দোহরাতেন আর একে বলা হতো ‘তকরীব’।

আরব বাণ্যযন্ত্রের মধ্যে ‘অলউদ’ (প্রায় সেতারের মতো), ‘তবুর’ (তবুরা), ‘কানুন’ (অনেকটা সরোদের মতো), ‘কসবা’ (বাঁশী), ‘তবল’, ‘ডফ্’ আর ‘কদীব’ প্রসিদ্ধ। এ ছাড়া আরো অনেক বাণ্যযন্ত্র আছে যা গানের আগে বা পরে বাজানো হয়।

নানারকম বাত্বযন্ত্র তৈরি করার বিদ্যাকে আরবরা প্রায় এক নতুন আর্টের মতো গড়ে তুলেছিল। ‘সবীল’ শহর বাত্বযন্ত্রের তৈরি স্থান বলে প্রসিদ্ধ ছিল এককালে।

ইরানী আর গ্রীক সঙ্গীতের কিছু প্রভাব আরবী সঙ্গীতে পাওয়া যায়, আবার আরবী সঙ্গীত ইরানী আর গ্রীক সঙ্গীতের উপরও নিজস্ব ছাপ রেখে গিয়েছে।

ইসলামের গোঁড়া ভক্তেরা সঙ্গীতকে খুব নেক-নজরে দেখেন না কিন্তু সুফী আর দরবেশ সম্প্রদায়ের লোকেরা সঙ্গীতকে আরাধনার অঙ্গ বলে মনে করেন। সঙ্গীত থেকেই ‘হাল’ (ভক্তি উন্মাদ) সৃষ্টি হয়। প্রসিদ্ধ আরব দার্শনিক অল্ গজলী বলেন ‘হাল’ মনের সেই অবস্থা, যা সঙ্গীত থেকেই সৃষ্টি হয়। সঙ্গীত থেকে যে ‘হাল’ সৃষ্টি হয়, কোরান পড়েও তা হয় না। গজলী তার সাত কারণ দেখিয়েছেন।

অল কিন্দি লিখেছেন—সঙ্গীত কারুর কাছে ‘শরাব’ আর কারুর কাছে ‘গিজা’ (পুষ্টিকর খাদ্য)। হকীম-হকন্-সীনা আবার সঙ্গীতকে অনেক রোগের ‘দাওয়াই’ মনে করেন।

তেল-বালির মরুপ্রান্তরে সঙ্গীতের রিসার্চ করার হুঃসাহস আর করবো না। ‘লিটল্ নলেজ ইজ ডেনজারস্’ কথাটা আগেই মনে হওয়া উচিত ছিল। সঙ্গীতের মাধুর্য আমি ছাই কি বুঝি? “লুৎফ ম্যায় তুমকো কয়া কহ্ জাহিদ্ হায় কাম্বকত্ তুনে তো পী হি নহী”র মতোই আমার অবস্থা।

নয়

“মেরে মোলা, আব পাস বুলালে সরকারে-মদিনা”, ছোটবেলায় দিল্লীতে এক অন্ধ মুসলমান ভিখারীকে রোজ বাড়ির সামনে দিয়ে এই লাইনটা গেয়ে যেতে দেখতাম। কালো আলখাল্লা পরা, গলায় একরাশ রঙীন পাথরের মালা ঝোলানো সেই ফকিরের চেহারাটা আজ আর ঠিক মনে পড়ে না। তাকে দেখে বাইরে বেরোতে গেলেই দিদি বলতো ঝুলির মধ্যে ভরে নিয়ে চলে যাবে। ‘যে ছেলেটা কাঁদে, তাকে ঝুলির ভিতর বাঁধে’ ছড়াটাও মনে করিয়ে দিয়ে ভয় দেখাতে ভুলতো না।

‘সরকারে মদিনা’ কী তখন জানতাম না। পরে নাম শুনতাম মক্কা-মদিনা আর এখন সাংবাদিকতা সম্বন্ধে লেকচার ঝাড়তে হলেই কপচাই : ‘Fleet street is the Mecca of all journalist’.

মক্কা-মদিনার দেশ সৌদী আরেবিয়ায় গিয়েও ফিরে আসতে হয়েছে জেড্ডা থেকে। আমি ‘নন-বিলীভার’; ‘কাবার’ দরজা আমার জন্ত বন্ধ।

কাবায় যেতে পারিনি, কিন্তু যেতে দেখেছি হাজার হাজার ধর্মপ্রাণ মুসলমানকে। কেউ যায় ভয়ে, কেউ যায় আশায় আর কিছু যায় নির্মল শ্রদ্ধা আর ভক্তি নিয়ে। বছরের পর বছর প্রায় লাখ তিনেক মুসলমান আজ ১৪০০ বছর থেকে মক্কা-মদিনায় হাজী হতে যাচ্ছে কোরানের আদেশ মাথায় নিয়ে।

মির্জা গালিব কিন্তু তাঁর নিজের অবস্থার কথা ভেবে হজযাত্রার জন্তে নিজেকে যোগ্য মনে করেননি। তাই লিখেছেন—

“হাম বঁহা হ্যায় জাঁহাসে হামকে ভী
কুছ্ হামারী খবর নেহী আতী
মরতে হ্যায় আরজু মে মরণে কি
মৌত আতী হ্যায় পর নেহী আতী
‘কাবে’ কিস মুই সে যাওগে ‘গালীব’
শরম্ তুমকো মগর নেহী আতী”

যোগ্যতা থাক না থাক, অর্থ থাকলেই আজ যে-কোনো মুসলমান হাজী হয়ে আসতে পারে। আগের দিনের সেই ভয়াবহ যাত্রাও নেই, সে কষ্টও নেই।

প্রফেট মহম্মদ ৬৩০ খৃষ্টাব্দে চিরতরের জন্ত মক্কা-মদিনার দরজা অমুসলমানদের জন্তে বন্ধ করে দিয়েছেন। অ্যাডভেঞ্চার-এর নেশায় অনেক বিদেশী বিধর্মী ‘স্মাগল’ হয়ে যাবার চেষ্টাও করেছে। কেউ কেউ আবার অনেকখানি গিয়েওছে, কিন্তু কোথায় একটা ছোট্ট আনুষ্ঠানিক উপাচারে ভুল করেছে আর নৃশংসভাবে তার হত্যা হয়েছে—ফিরে এসে আর ‘রহশ্বে ঘেরা’ মক্কা-মদিনার কথা কাউকে বলতে হয়নি। গিয়েছে অনেকেই, ফিরেছে খুব কমই।

মক্কা-মদিনার রহস্য উদ্ঘাটন করার চেষ্টা সম্বন্ধে অনেক কাহিনীই শুনেছি। সত্যি-মিথ্যা যাচাই করার কোনো উপায়ও নেই আর চেষ্টাও করিনি। বহুকাল আগে চল্লিশজন ‘নন-

বিলীভার' নাকি চেষ্টা করেছিল হজরত মহম্মদের সমাধি অপবিত্র করতে। যেই সমাধির কাছে পৌঁছেছে, এক অলৌকিক শক্তির চালনায় পায়ের তলার জমি হঠাৎ ছুঁফাঁক হয়ে গিয়ে চল্লিশ জনেরই জীবন্ত সমাধি হয়। আবার শোনা যায় দু'জন ইহুদী মাটির তলায় সুড়ঙ্গ কেটে পৌঁছবার চেষ্টা করেছিল 'কাবায়'। হজরত মহম্মদ রাতে স্বপ্নে সেই ঘটনা জানতে পেরে তাঁর ভক্তদের জানান। তারপর দুই ইহুদীর কি পরিণতি হয়েছিল তা বেশ বোঝা যায়।

আরেবিয়ান নাইটসের বিখ্যাত ইংরিজী অনুবাদক স্তার রিচার্ড বার্টন ১৮৫৩ সালে অল হজ আবদুল্লা নাম ধারণ করে ছদ্মবেশে মক্কা-মদিনায় গিয়েছিলেন বলে দাবি করেন। 'হারিমের' অস্তিম অনুষ্ঠানের পর তিনি লেখেন :

'I stood wonderstruck by the scene before me. The vast quadrangle was crowded with worshippers sitting in long rows every where facing the centre-block tower ; the showy colours of their dresses were not to be surpassed by a garden of the most brilliant flowers, and such diversity of detail would probably not be seen massed together in any other building.....I have seen the religious ceremonies of many lands, but never—nowhere—ought no solemn, so impressive as this.'

আমি নন-বিলীভার স্মরণে মক্কা-মদিনায় গিয়ে হাজী হতে কোনদিন পারবো না। তাই যা কিছু বলবো, তা সেকেণ্ডহ্যান্ড—অগ্নির মুখ থেকে শোনা বা পড়া। আমার যাওয়ার এক বছর আগে আহমদ কামাল নামে এক আমেরিকান গিয়েছিলেন মক্কা-মদিনায়। আহমদ আমেরিকান নাগরিক হলেও তার পূর্বপুরুষরা ছিলেন মুসলমান। রাশিয়ার উত্তরভাগের তুর্কীদের বংশ। আহমদ জন্মায় কালোর্যাডোর এক ক্যাটল র্যাঞ্চ-এ (Cattleranch)। ছোটবেলায় তাকে শিখতে হয় কোরান আর পরে মধ্যপ্রাচ্যে বছরের পর বছর ভ্রমণ করায় অনেক ভাষাই সে আয়ত্ত করে। ১৯৫২ সালে আহমদ যখন মক্কা-মদিনায় যাত্রা করে তার সঙ্গে ছিল জাভানিবাসী তার এক বন্ধু আমীর ইজ্জত। আমীর আগে একবার হজ করে এসেছে।

আহমদ কামাল লোকটির খোঁজ অনেক করেছি কিন্তু সন্ধান পাইনি। ফিরে এসে সে লিখেছে সুন্দর এক বৃত্তান্ত। তার সে বৃত্তান্ত আমি পড়েছি আর তার থেকেই কিছু কিছু উদ্ধৃত করে দিচ্ছি। মধ্যে মধ্যে কামালের বৃত্তান্তের ইংরিজী অনুবাদ করে তার নিজের কথাই নিচে দিলাম।

কোরানের ‘সূরা’ মুখস্ত করতে করতে আহমদ, ইজ্জতের সঙ্গে জাকার্তা থেকে প্লেনে রওয়ানা হয়। সৌদী আরেবিয়ার দহরানে যখন পৌঁছায়, টেম্পারেচার তখন ১১৫° ডিগ্রি। চোদ্দজন যাত্রী সেদিন গরমে মারা যায়। এইখান থেকেই যাত্রার প্রায় শুরু কারণ যাত্রীরা হজের শুভ্র বস্ত্র ধারণ করতে আরম্ভ করে। শুভ্র বস্ত্র ধারণের মানে হিংসা এবং দাম্পত্য জীবন বর্জন ও সুগন্ধ, গহনা ইত্যাদি শৌখিন অভ্যাসের পরিত্যাগ—সমস্ত আনুষ্ঠানিক কার্য শেষ না হওয়া পর্যন্ত।

কামাল আর তার বন্ধু যখন জেড্ডায় পৌঁছায়, তখন গরম ১২৬° ডিগ্রিতে উঠেছে। সোমালীল্যাণ্ড, ইথোপিয়া, সুদান মিশর, সিরিয়া, ইরাক, ইন্দোনেশিয়া থেকে ঝাঁকে ঝাঁকে প্লেন নিয়ে আসছে যাত্রীদের আর নানা ভাষা নানারকম বেশভূষার আর চিৎকার কলহে জেড্ডা এয়ারপোর্ট যাকে বলে একেবারে ‘বেডলাম’।

এক আরব অফিসার এগিয়ে এসে কামালের আমেরিকান পাসপোর্ট পরীক্ষা করে। অফিসার ভাবলো হয়তো কোনো নতুন অয়েল টেকনিশিয়ান। কিন্তু হজের ভিসা দেখে একটু অবাক হয়ে তাড়াতাড়ি আরো কয়েকজন অফিসারকে ডাকলো। তারপর শুরু হলো কামালের জেরা। কামাল বুঝিয়ে বলে তার জন্মের ইতিহাস। খানিকক্ষণ চুপচাপ সব। সন্দেহ দোলা দেয় অফিসারের মনে। ডাকা হলো ‘কোরানটাইন’ ডাক্তার ফাহমী মুরাতকে। ডাঃ ফাহমী, তুর্কী-টার্টার আর তুর্কী ভাষা ভালো করেই জানতেন। তিনি কামালের তুর্কী ভাষার জ্ঞান পরীক্ষা করে রায় দিলেন কামালের পক্ষে। স্বস্তির দীর্ঘ নিঃশ্বাস ফেলে কামাল আর তার বন্ধু চললো আল তায়্যাসির হোটেলে। একটা ছোট কামরায় ছ’জন আরো সহযাত্রী সব মুসলমান সাংবাদিক, মিশর, টিউনিস আর তেহরান থেকে।

জেডা, মক্কা থেকে ৪৫ মাইল দূর আর এইখানেই পাসপোর্ট জমা রেখে তার বদলে নিতে হয় নতুন একরকম পাস। মক্কা রোডের ইমপেকশন পোস্ট ফাঁকি দিয়ে এই পাস না নিয়ে যাওয়ার মানে সাক্ষাৎ মৃত্যু।

কামাল তার বৃত্তান্তে বলছে, “শুনলাম সেই দিনই ছ’জন জেরুজালেমের ‘আনবিলীভার’কে এই রাস্তায় আবিষ্কার করা হয় আর তাদের পাথরের পর পাথর মেরে হত্যা করা হয়।”

এক আরব অফিসার পরে কামালকে বলে ব্যাপারটা বড় তাড়াতাড়ি হয়ে গেল, কিছুই করা গেল না। মারা যাবার পর লোক দুটোর জামা কাপড় খুঁজে জানা গেল তাদের কাছে ঠিক পাসই ছিল। কিন্তু তখন কিছুই করা যায় না। লোক দুটোর কটা চুল আর সঙ্গের ক্যামেরা দেখে একটু ভুল হয়ে গিয়েছে। যাক শহীদ হয়ে তারা বেহস্তে যাবে।”

কামালের অবস্থা তখন সঙ্গীন। শরীরের রক্ত জমে জল হয়ে যায়।

চারদিন হয়ে গেল তবু কামালের ‘পাস’ আর এসে পৌঁছায় না। সন্ধ্যাবেলা হাঁটুর উপরে দেখা দিলো ‘হিট র্যাশ’ (Heat Rash)। এইবার এজেন্টের (আমাদের পাণ্ডুর মতো) দয়া হলো আর এক স্বর্ণমুদ্রার বদলে সে এক ঘণ্টার মধ্যে পাস যোগাড় করে আনলো।

সন্ধ্যার একটু পরে কামাল আর ইজ্জতের শুরু হলো যাত্রা। টেম্পারেচার বেড়েই চলেছে আর তার সঙ্গে বাড়তে লাগল যাত্রীদের সংখ্যা। মোটর, লরী, বাস, গাধা, উট, আর পায়ে হেঁটে হাজার হাজার যাত্রীর সে কি আগ্রহ আগে পৌঁছাবার। কিসের অদৃশ্য টানে তারা যেন চলেছে এক অনিশ্চিতের অভিমুখে। কামাল দেখলো আর অবাক হলো এইজন্মে যে, এই অসংখ্য যাত্রীর মধ্যে এমন লোকও ছিল, যারা ছ’বছর থেকে হাঁটছে—সিয়েরা লিয়ন (Sierra Leon) আর গোল্ডকোস্ট থেকে আরম্ভ হয়েছে তাদের যাত্রা।

পঁয়তাল্লিশ মাইল রাস্তায় তিনবার ‘চেক’ পোস্টে পাস পরীক্ষা করা হলো। ছ’ফুট লম্বা আরব পুলিশ গার্ডরা একবার কামালের

চেহারার দিকে চায়, তার পাসটা দেখে আর নিজেদের মধ্যে কিছু বলাবলি করে কামালকে ছেড়ে দেয়।

তারপর.....

তারপর শোনা যাক কামালের নিজের মুখে :

“Then suddenly the gates of Mecca loomed out of the dusty night. Headlight beams laced the stifling darkness and Arabs with water skins offered to quench thirst, for silver. Heat lay upon us like a vast panting beast. But the night was filled with the sound of rapturous prayer. Pilgrims neither remembered nor cared that they had been victimised every step of the way.—We crossed a pot-holed incline and descended towards the random yellow lights of Mecca. My scalp tightened. We had reached the secret city.”

কিছু দূরেই মক্কার বিরাট সমজিদের প্রাঙ্গণে দাঁড়িয়ে রয়েছে ‘কাবা’—নিকষ কালো পাথরের তৈরি নীল পাতলা কাপড়ে ঢাকা ‘কাবা’—ছনিয়ার সমস্ত মুসলমানদের সবচেয়ে পবিত্র স্থান। নমাজের সময়ে হাঁটু গেড়ে পৃথিবীর এক কোণ থেকে অন্য কোণের সব মুসলমান মুখ করে ‘কাবা’র দিকে। অনেকেই বিশ্বাস তাদের প্রার্থনা সব এক হয়ে কাবা থেকে সোজা আল্লাহর কাছে পৌঁছায়। এই অতিকায় সৌধ মুসলমানদের মতে পৃথিবীর সর্বপ্রথম ভজনাগার।

পৃথিবীর সবচেয়ে প্রাচীন ভবন ‘কাবা’—স্বর্গ থেকে তার বহিষ্কারের পরে আদম এই মন্দিরে এসে উপাসনা করতো, তার ভাঙা হৃদয় নিয়ে।

(“ the most ancient edifice on earth, the temple beside which Adam worshipped, heart-sick after his expulsion from Paradise”)

এইবার কামালকে ‘কাবার’ দরজায় অপেক্ষা করতে বলে আমরা একটু ইতিহাসের পাতা নিয়ে নাড়াচাড়া করি। খুঁজে খুঁজে বের করতে হবে হজরত মহম্মদের মক্কা অভিযান, দখল আর কাবার ভিতরে প্রবেশের সেই কাহিনী।

কুরেশদের সঙ্গে মহম্মদের সন্ধি হয়ে গিয়েছিল, কিন্তু সন্ধির শর্ত ভঙ্গ করে কুরেশ উপজাতির সর্দার খুজাহ উপজাতিদের উপর আক্রমণ করে। খুজাহ উপজাতিরা আপীল জানায় মহম্মদের

কাছে। দশ হাজার সশস্ত্র সঙ্গী নিয়ে মহম্মদ অভিযান আরম্ভ করলেন আর শুরু হলো তাঁর মক্কা যাত্রা। সন্ধ্যার কিছু পরে মহম্মদ তাঁর ফৌজ নিয়ে এসে পৌঁছলেন মক্কার বাইরে। সৈন্যদের হুকুম দেওয়া হলো, বিনা কারণে যেন কোনো রক্তপাত না হয়। কিছুক্ষণ পড়ে সৈন্যেরা তিনজন শত্রুকে ধরে নিয়ে এসে হাজির করলো মহম্মদের সামনে। এই তিনজনের মধ্যেই ছিল দুর্ধর্ষ কুরেশ সর্দার আবু সুফিয়ান।

জীবনের প্রধান শত্রু, যার জন্ত মহম্মদকে অনেক দুঃখ কষ্ট সহ্য করতে হয়েছে, তার সামনে নত মস্তকে দাঁড়িয়ে আর মহম্মদের চোখ বেয়ে জলের ধারা নেমে আসছে। সুফিয়ানের হৃদয়ের পরিবর্তন হলো মহম্মদের মহান ক্ষমায় আর কিছুক্ষণ পরেই বিনা রক্তপাতে মহম্মদ মক্কা জয় করে নিলেন। সেযুগের সামরিক ইতিহাসে এ বিরল ঘটনা। শোনা যায়, একজন ছাড়া বাকি সব বিজিত শত্রু-নেতাদের মহম্মদ ক্ষমা করেন।

আবু সুফিয়ান, ‘কাবার’ পূজারীরা আর মক্কার হাজার হাজার নরনারী ইসলাম ধর্ম এবার স্বেচ্ছায় বরণ করলো। মক্কা মুসলমানদের আর ইসলামে মূর্তি-পূজার (বুৎ-পরস্তি) স্থান নেই। একদিন ভোরে হজরত মহম্মদ গেলেন কাবার মন্দিরে, যেখানে রাখা ছিল রঙ-বেরঙের কাঠ, তামা আর পাথরের নানা আকৃতির প্রায় ৩৬০টা মূর্তি।

এক একটা মূর্তির সামনে গিয়ে দাঁড়ান আর ‘আয়ত’ বলতে থাকেন—“সত্যিই এবার হক্ক (সত্য) স্থাপিত হয়েছে—আর বাতিল (মিথ্যা) উঠে গিয়েছে।” সেই দিন ছপুরেই সব মূর্তি কাবা থেকে এবং মক্কার আরো অল্প জায়গা থেকে চিরতরে সরিয়ে ফেলা হলো আর ‘কাবা’ হলো মুসলমানদের জন্ত সবচেয়ে পবিত্র স্থান।

ইসলাম প্রত্যেক ব্যক্তির ধার্মিক স্বাধীনতাকে শ্রদ্ধা করে আর তাই যদিও ইসলামে মূর্তিপূজার কোনো স্থান নেই তবুও যতদূর পর্যন্ত অস্তুর ধার্মিক স্বাধীনতার প্রশ্ন ওঠে ইসলামে মূর্তি পূজারী আর নিরাকারের পূজারীদের মধ্যে কোনো ভেদ করা হয়নি। মহম্মদ নিজেই আদেশ দিয়েছেন যে, সব ধর্মের উপাসনা গৃহ রক্ষা করা প্রত্যেক মুসলমানের ফর্জ্জ (কর্তব্য)। কিন্তু

মক্কা বিজয়ের পর থেকে শুধু সেখানেই নয় সমস্ত আরবের লোকেরা মূর্তি পূজা বর্জন করে নিরাকার ঈশ্বরের উপাসনা শুরু করে। তাদের বিশ্বাস (কুরানেও লেখা আছে), ‘কাবার’ স্থাপনকারী ইব্রাহীম কোনো মূর্তিই সেখানে স্থাপন করেননি। তিনি নিরাকারের পূজাই করতেন। পরে ‘নাসম্বী’র দিনে কিছু মূর্তি ওখানে স্থাপন করা হয়েছিল।

‘কাবা’ থেকে মূর্তি সরানো শুধু এক জায়গা থেকে উঠিয়ে মূর্তিগুলো অগ্র জায়গায় রাখার ব্যাপার নয়। একটা বিরাট দেশের বহু শতাব্দী পুরোনো মজ্জাগত উপাসনার রীতিনীতির আমূল পরিবর্তন। তামাম আরব জাতির সেদিন ‘কায়াপলট’ হলো ; এক নূতন আরব জাতির জন্ম হলো। শত শত বছরের জমানো সংস্কার ঐতিহ্য আর জীবনযাত্রার প্রণালী কিছুদিনের মধ্যে সব বদলে গেল আর তঁা করাবার জন্ত মহম্মদ হলেন ঈশ্বরের হাতে নিমিত্ত মাত্র।

সেদিন ছপুর বেলা মহম্মদের আদেশে হাবশী-গুলাম বেলাল ‘কাবার’ সর্বোচ্চ শিখরে উঠে সারা শহরের ও আশেপাশের লোকদের নমাজের জন্ত আহ্বান জানালো। ইসলামের সর্বপ্রথম মুয়জ্জেন্ (আজানের ডাক যে দেয়) বেলাল।

আজ পৃথিবীর সব মুসলমানেরা কাবার দিকে মুখ করে নমাজ পড়ে কিন্তু হজরত মহম্মদ পয়গম্বর হবার ১৩ বছর পরে পর্যন্ত যতদিন তিনি মক্কায় ছিলেন, নমাজের সময় কোনো বিশিষ্ট দিকে ‘(কিব্লা)’ মুখ করার কোনো রীতি ছিল না বলেই জানা যায়। মদিনায় যাবার পর ১৬ মাস পর্যন্ত মহম্মদ উত্তর দিকে মুখ করে নমাজ পরিচালনা করেন আর কাবা মদিনার ঠিক দক্ষিণে। মদিনার উত্তরে, বরঞ্চ উত্তর-পশ্চিমে তো জেরুজালেম, যে দিক ফিরে ইহুদীরা উপাসনা করতো।

মদিনায় পৌঁছানোর ১৬ মাস পরে মহম্মদ আবার দক্ষিণ দিকে মুখ করে নমাজ পড়া শুরু করলেন। ইহুদীরা কারণ জিজ্ঞাসা করলো।

কুরানে জবাব আছে :

“নাসমব্ লোকে জিজ্ঞাসা করবে এরা ‘কিবলা’ (নমাজ পড়ার দিক) কেন বদলে দিলো ? তাদের জবাব দাও যে, পূর্ব আর পশ্চিম

হুই-ই আল্লার। তিনি যাকে চান তাকে ঠিক দিকেই টানেন” (কুরান—২।১৪২)।

“পূর্ব আর পশ্চিম হুই-ই আল্লার স্মরণে তুমি যে দিকেই মুখ করবে সেদিকেই আল্লার মুখ আছে। সত্যিই আল্লা সর্বব্যাপী আর সর্বজ্ঞানী” (কুরান—২।১১৫)।

কাবা যাত্রার (হজ্জ) অনেক পুরোনো কুসংস্কারে ভরা আনুষ্ঠানিক উপাচারকে হজরত মহম্মদ পরিবর্তন করেন। আগে লোকে নগ্ন হয়ে কাবার চারিদিকে চক্কর লাগাতো, মহম্মদ এই রীতি বন্ধ করে আদেশ দেন বস্ত্র ধারণ করতে।

হুপুরের নমাজের পর সেদিন মহম্মদ এক নিরাকার ঈশ্বর আর সব মানুষে ভাই-ভাই হবার সম্বন্ধে উপদেশ দেন। কুরেশের সর্দার আবু সুফিয়ান এবার নিজের সব ভুলের জন্য মহম্মদের ক্ষমা প্রার্থনা করলেন। মহম্মদ কি জবাব দেবেন? তাঁর চোখ দিয়ে জল গড়াতে লাগল। ধীরে ধীরে তিনি বললেন:

“আজ আমার দিক থেকে আপনাদের প্রতি কোনো অভিযোগ নেই। আল্লা আপনাদের ক্ষমা করবেন। আল্লা সব দয়াবানের শ্রেষ্ঠ দয়াদান (রহেমার্নেরহিম্)।”

‘তায়ফ’-এর বিদ্রোহ দমন সম্বন্ধে একটা সুন্দর ঘটনা শোনা যায়। তায়ফ-এর নিকটবর্তী কিছু উপজাতি তখনও মদিনার সরকার আর ইসলাম ধর্ম গ্রহণ করেনি। বারবার উপজাতির লোকেরা মুসলমানদের উপর আক্রমণ চালাতে থাকে। বিদ্রোহ দমন করতে মহম্মদ এলেন তাইফে শহরে। দশ বছর আগে এই শহর থেকেই মহম্মদকে অপমানিত হয়ে রক্তাক্ত দেহে পালিয়ে যেতে হয়েছিল। ‘ঔতাসের’ যুদ্ধের পর প্রায় ছয় হাজার উপজাতিকে বন্দী করে আনা হয়।

ছয় হাজার বন্দীর শাস্তির ব্যবস্থা করা হবে এমন সময় এক বৃদ্ধা হঠাৎ উঠে আসে মহম্মদ-এর সামনে। নিজের আসন থেকে উঠে এসে মহম্মদ বৃদ্ধাকে সম্মানের সঙ্গে বসান আসনে। বৃদ্ধার কথায় মহম্মদ ছয় হাজার বন্দীকেই মুক্তি দেন।

সেই বৃদ্ধা ছিল হলীমা—মহম্মদের ধাইমা।

মদিনায় হজরত মহম্মদের মৃত্যু হয়। কিন্তু সে কথা পরে। আবার শোনা যাক আহমদ কামালের কাহিনী।

কাবার দরজার সামনে একটু জায়গা পেয়ে কামাল আর তার বন্ধু দাঁড়ায়। অসংখ্য নরনারীর ভিড়ের ফাঁকের মধ্যে দিয়ে কামালের সামনে ভেসে উঠলো সেই পবিত্র কালো পাথর—কাবার এক কোণে রাখা সেই উল্কা। দেবদূত গ্যাবরিয়েল পাঠিয়েছিলেন এই পাথর আব্রাহাম আর ইশামেলের কাছে—ভয়ানক বন্যার (Deluge) পর আবাবার কাবা তৈরি করবার জন্তে।

হাজার কণ্ঠের সমবেত উপাসনায় তখন সমস্ত পরিবেশ এক অভূতপূর্ব রূপ ধারণ করেছে। রাতের আঁধার চিরে শোনা যাচ্ছে সেই গুঞ্জন—কেউ কেউ আবাবার কাঁদছে অঝোরে।

উপাসনা শেষ করে কামাল আর তার বন্ধু ইজ্জত সাতবার প্রদক্ষিণ করলো আস-সাফা আর আল-মারহওয়ার পাহাড়ের মধ্যের রাস্তাটুকু।

আব্রাহামের মেইড্ (Maid) হাগার (Hagar) এইখানেই শিশুপুত্র ইশামেলের তৃষ্ণার জলের জন্তু ছুটোছুটি করেছিল মরীচিকার পিছনে।

যে রাস্তার উপর দিয়ে ‘হাগার’ শিশুপুত্র ইশামেলের জলের জন্তু মরীচিকার পিছনে ছুটেছিল, আহমদ কাশাল আর তার বন্ধু আমীর ইজ্জতও সেই রাস্তার উপর দিয়ে ৫০০০০ লোকের সঙ্গে মূহূর্তে প্রার্থনা আওড়াতে আওড়াতে দ্রুত চলতে লাগল। আহমদের চোখের সামনেই এক বৃদ্ধ হজ-যাত্রী সেই ভিড়ের চাপে মারা গেল।

পরের দিন সকালে যখন গরম প্রায় ১১৬° ডিগ্রী (১৬০ জন যাত্রী সেই তাপে মারা যায়) কামাল ‘আরাফাতে’ রওনা হলো। হজের বেশির ভাগ ধার্মিক উপাচার হয় মরুভূমির কোলবেঁধা আরাফাতে। বিকেলের দিকে লরী বোঝাই হয়ে আসতে লাগল মৃতদেহ, সেই সব যাত্রীদের যারা অর্থের অভাবে পায়ে হেঁটেই সেই অসহ্য গরমের মধ্যে রওনা হয়েছিল।

কামাল আর তার বন্ধু চাপলো এক বাসে। বাসের সঙ্গে বাঁধা রয়েছে ছোটো বাছুর, কুরবানীর জন্তে। আরাফাতে তারা যখন পৌঁছালো প্রায় ৮০০০০ তাঁবু সেখানে পড়েছে। পাথুরে জমির উপর পাতা তাঁবুর কাতার আর তার চারধারে ঘেরা এক বিরাট পাহাড়। স্বর্গ থেকে বিতাড়িত হবার পর আদম আর ইভ

আলাদা আলাদা হয়ে গিয়ে ২০০ বছর পৃথিবীর এক কোণ থেকে আর এক কোণ পর্যন্ত খুঁজেছে একে অণ্ডকে। তাদের নিবিড় প্রেমের গভীরতা দেখে, স্বর্গের দেবতাদের হৃদয় বিগলিত হলো। আবার তারা এই পাহাড়ের কোলে পুনর্মিলিত হলো। পাহাড়ের চূড়ার উপর থেকে ইভ দেখলো আদমকে আসতে।

গরম তখন ১২৭° ডিগ্রী। আবার তিনজন লোক মারা গেল। ছপূরে সূর্য যখন ঠিক মাথার উপর তখন না এসে পৌঁছেলো হজ-যাত্রীরা। তাই এত কষ্ট সহ্য করেও হাজার হাজার ধর্মপ্রাণ মুসলমান তখনও চলেছে। নিজের সেবকদের সেদিন ঈশ্বর দর্শন দিয়েছিলেন তাই সেদিনটা ছিল সবচেয়ে পুণ্যদিন। ছপূরের সময় পাহাড়ের দিকে মুখ করে দাঁড়ালো সব যাত্রীরা। ছপূরের প্রথর রোদে মনে হতে লাগল পাহাড়টা যেন রূপোর পুকুরে ভাসছে। শুরু হলো প্রার্থনা, প্রথমে ধীরে তারপর চড়তে লাগল আওয়াজ। ঘণ্টার পর ঘণ্টা চলে যায়, প্রার্থনা শেষই হয় না। গোধূলির সময়ে সূর্য যখন ধীরে ধীরে চক্রবালের দিকে হেলে পড়লো হাজার হাজার যাত্রী তখন পালাতে শুরু করলো। এই পালানোও উপচারের একটা অঙ্গ। সবাই এবার যাবে ‘মীনা’তে, যেখানে হবে হজের শেষ কাজ। মীনাতেই আব্রাহাম তার পুত্রকে (Gensis XXII) বলিদান করতে নিয়ে এসেছিলেন, যখন ঈশ্বরীয় কৃপায় একটা ভেড়া সেখানে এসে পৌঁছয়। রাস্তার মোড়ে দাঁড়িয়ে আছে ভাঙা পাথরের তিনটে মন্ডুমেন্ট যেখানে ‘স্যাটান’ (Satan) তিনবার উপস্থিত হয়ে আব্রাহামের ছেলেকে পালাতে বলে আর তিনবার পাথর নিক্ষেপ করে। হজ-যাত্রীরা এইখানে এসে পাথরের মন্ডুমেন্টগুলোর উপর তিনদিনে তিনবার পাথর ফেলে। মীনাতে আবার বলিদানও করা হয়। কামাল বলে যে, সেদিন দেড়লাখ ভেড়া কুরবানী হয়েছিল।

পরের দিন টেম্পারেচর পৌঁছেছে ১৪২° ডিগ্রীতে। প্রায় ৪০০০ যাত্রী সেইদিন সকাল থেকে ছপূর পর্যন্ত মারা যায়। রাতে কামালের ঘুম ভাঙে একটা গোড়ানি শব্দ শুনে। ইজ্জত Heat Rash-এর যন্ত্রণায় শিশুর মতো কাঁদছে আর কাতরাচ্ছে। নাক দিয়ে তার বয়ে চলেছে রক্তের ধারা। ইজ্জতের মাথার কাছে পড়ে রয়েছে ছোটো মৃতদেহ। ‘আর না অনেক হয়েছে’ মনে

মনে ভাবলো কামাল। এইবার তার নিজের মুখেই শোনা যাক :

“...Two swollen corpses lay on a broken masonry wall ...We had had enough. Holding our robes to our nostrills we stepped over the sleeping Javanese pilgrims and hurried through the dark village, casting our remaining stones at the three pillars of Satan to fulfil the ritual”.

“Beyond the summit of the valley we bought a ride and were in Mecca within the hour. A week later I was in New York. I had witnessed the most ancient religious ritual on earth—a ritual which antedates by millenniums the faith that adopted it”...

আহমদ কামালের হজ্জ-যাত্রার কাহিনীই আমায় বলতে হলো কারণ মক্কা-মদিনার দ্বার থেকে আমি ফিরে এসেছি! ‘মেরে মোলা আব পাস্ বুলালে সরকারে-মদিনা’ বলে আমার কোনো লাভ হবে না। মোলা কখনই সরকারে-মদিনাতে আমায় ‘বুলা’বে না। যেতে পারিনি তার জন্য অনুশোচনা নেই কিন্তু মহাপুরুষ হজরত মহম্মদ-এর জন্মস্থান মক্কা আর যেখানে তাঁর মৃত্যু হয়েছিল সেই মদিনা দেখতে পেলাম না বলে চুখ চিরকাল থেকে যাবে।

ধর্মের কিছুই বুঝি না কিন্তু মহম্মদের জীবনী আমার ভালো লাগে, আর তাই বার বার পড়েছি তাঁর সম্বন্ধে আর যতবারই পড়েছি ততবারই বেশি ভালো লেগেছে এই মহাপুরুষকে। “পৃথিবীর ইতিহাসে মহম্মদের দৃষ্টান্ত বিরল কারণ তিনি একসঙ্গে তিনটে কীর্তি স্থাপন করেন—এক জাতি, এক রাজ্য, আর এক ধর্ম।”*

কিছুদিন আগে ‘Religious Leaders’ বই নিয়ে আমাদের দেশে খুব হৈ চৈ হয়ে গেল। হজরত মহম্মদের বিবাহিত জীবনের উপর নাকি এই বইয়ে কিছু মিথ্যা ইঙ্গিত করা হয়েছে। যতদূর জানি দশবার মহম্মদ বিবাহ করেন আর তাঁর প্রথম স্ত্রীর নাম খদীজা। খদীজা মহম্মদের চেয়ে ১৫ বছরের বড় ছিলেন। খদীজা যখন ৬৫ বছর বয়সে মারা

* Mohammed and Mohammadanism by Bosworth Smith P. 340.

যান তখন মহম্মদের বয়েস ৫০। খদীজার মৃত্যুর পর জীবনের বাকি ১৩ বছরে মহম্মদ আরো ৯টা বিবাহ করেন। মহম্মদের জীবনী ভালো করে পড়লে বোঝা যাবে যে, এই ৯ জনের মধ্যে প্রায় সবাই বিধবা—যাদের স্বামীরা ইসলামের যুদ্ধে প্রাণ দিয়েছিল। তাদের মৃত্যুর পর মহম্মদ নিজের কর্তব্য মনে করে সেই বিধবাদের আশ্রয় দেন নিজের কাছে।

মহম্মদের দ্বিতীয় বিবাহ হয় গরীব বৃদ্ধা সৌদাহর সঙ্গে। তৃতীয় বিবাহ হয় আবুবকরের মেয়ে আয়েশার সঙ্গে আর চতুর্থ বিবাহ হয় হজরত উমরের বিধবা মেয়ে হফসাহর সঙ্গে। মহম্মদের পঞ্চম, ষষ্ঠ, সপ্তম, অষ্টম, নবম আর দশম স্ত্রীদের নাম যথাক্রমে—হিন্দ, জেনব, জুবেরিয়হ, সাফিয়হ, উম্মী-হবিবহ সল্‌মা আর মেমুনাহ।

হজরত মহম্মদের দুই পুত্রই শিশু অবস্থায় মারা যায় আর তাঁর দুই মেয়ের মধ্যে কত্নার বিবাহ হয় হজরত আলীর সঙ্গে।

মহম্মদের মৃত্যুর সঙ্গে সঙ্গে ইসলাম ধর্মে ভাঙন ধরতে শুরু হয়। শিয়া আর সুন্নী দলের সৃষ্টি হয়। এর প্রধান কারণ মৃত্যুর সময় মহম্মদ নিজের উত্তরাধিকারী রেখে যাননি। তাঁর মারা যাবার পর ২২ বছর পর্যন্ত আরেবিয়ার উপর রাজত্ব করে তিন খলিফ্‌। সুন্নীরা পয়গম্বর মহম্মদের উত্তরাধিকারীকে নির্বাচন করার অধিকার দাবি করে আর শিয়ারা বলে হজরতের জামাই আলীই তাঁর উত্তরাধিকারী। সেই ঝগড়ার এখনও শেষ হয়নি। কিছু কিছু শিয়ারা আবার কোরানের কিছু অংশ মানতে নারাজ। তারা বলে কোরান দেবদূত গ্যাবরিয়েলকে দেওয়া হয়েছিল আলীর কাছে পৌঁছে দেবার জন্তে কিন্তু ভুলে গ্যাবরিয়েল তা পৌঁছে দেন মহম্মদের কাছে।

এবার হজরত মহম্মদের জীবনের শেষ ক’টা দিনের বৃত্তান্ত দিয়ে মক্কা-মদিনার কাছ থেকে বিদায় নিয়ে শুরু করবো আবার আমার যাত্রা।

অনেক দুঃখ কষ্ট সহ্য করে হজরত মহম্মদের শরীরের অবস্থা প্রায় কাহিল হয়ে এসেছিল। একদিন সকালে আবুবকর মহম্মদের দাড়িতে কিছু পাকা চুল দেখে মহম্মদের বার্ষিকের কথা ভেবে কাঁদতে শুরু করে দেন। হজরত হেসে জবাব দেন, “স্মরে হুদ্, স্মরে

আল্বাকায়হ, সুরে আল্ কারয়হ, (কোরানের বিভিন্ন ভাগের নাম)
আমার চুল পাকিয়ে দিয়েছে ।”

মহম্মদের বয়স তখন ৬৩। একদিন সন্ধ্যাবেলা ভীষণ জ্বর এল। মাঝরাতের মদিনা শহর তখন ঘুমে আচ্ছন্ন। একজন লোককে সঙ্গে নিয়ে মহম্মদ ধীরে ধীরে ঘুমন্ত নগরীর মধ্যে দিয়ে শহরের বাইরে ‘কবরস্থান’-এ এসে উপস্থিত হলেন। দুটো কবরের মধ্যে তিনি অনেকক্ষণ ধ্যানমগ্ন হয়ে বসে রইলেন, তারপর ধীরে ধীরে বলতে শুরু করলেন কবরের নিচে চিরনিদ্রায় শায়িত লোকদের উদ্দেশ্যে :

“তোমাদের উপর সলাম্ (শান্তি) হোক। আল্লাহ তোমাদের আর আমাদের সবাইকে মাফ করুক। সেদিনের সকাল শান্তিময় হোক যেদিন তোমরা আবার জেগে উঠবে। সেদিন তোমাদের জীবন সুখী হোক। তোমরা আমাদের আগে চলে গিয়েছো। আমরা তোমাদের পরেই আসছি।”

পরের দিন সকালে নিজের দুই খুঁড়তাড়া ভাই আলী আর ফজলকে নিয়ে, হজরত মসজিদে গিয়ে নমাজ পড়েন আর লোকদের বলেন—“যদি কখনও আমি তোমাদের কারো কোনো ক্ষতি করে থাকি, তার ক্ষতিপূরণ করতে আজ আমি ইতর। যদি কাউকে আমার কিছু দেবার থাকে, তাহলে আমার কাছে আজ যা কিছু আছে, সবই তার হবে।”

ধীরে ধীরে মহম্মদের শরীরের অবস্থা আরো খারাপ হতে লাগল। জুম্মার নমাজের জন্তু তিনি নিজে আর যেতে পারলেন না, পাঠালেন আব্বকরকে। লোকের মনে সন্দেহ হলো যখন তারা দেখলো মহম্মদ নিজে আসেননি। তিনি তখন ক্লান্ত শরীর নিয়ে পৌঁছলেন মসজিদে। ভক্তরা উৎফুল্ল হয়ে উঠলো। লোকেদের তিনি বোঝালেন যে, কারুর জীবনই স্থায়ী না। সবাইকেই একদিন যেতে হবে। ভক্তদের তিনি তখন তাঁর শেষ উপদেশ শোনালেন—“আল্লা ছুনিয়াতে তাদেরই সুখ দেবেন যারা বড় হতে চেষ্টা করে না, যারা অগ্নায় করে না।”

মসজিদের কাছেই ছিল আয়েশার ছোট্ট কুঁড়েঘর। আলী আর ফজলের কাঁধে ভর করে তিনি আয়েশার বাড়ি গেলেন। সেদিন ছিল জ্বরের চতুর্থ দিন। পরের দিন শনিবার—জ্বরের প্রকোপ বেড়েই চললো। তাঁর অস্থিরতা দেখে নবম স্ত্রী উম্মাসলমা

চিৎকার করে কেঁদে উঠতেই মহম্মদ তাঁকে ভৎসনা করে বললেন, “চূপ করো। আল্লার উপর যার ভরসা আছে সে কখনও এমন চিৎকার করে কাঁদে না।”

সমস্ত রাত তিনি কোরানের ‘সূরা’ আবৃত্তি করতে থাকেন আর আল্লার প্রশংসা করেন। রবিবারের দিন তাঁর অবস্থা খুবই খারাপ হয়। অনশনে তাঁর শরীর খুবই দুর্বল ছিল। তাঁর মুখে এক ফোঁটা ওষুধ দেওয়াতে তিনি বড় দুঃখ করে বলেন—

“আল্লার কোপ (গজব) তাদের উপর পড়বে যারা পয়গম্বরদের কবর পূজা করে। আমার কবর কেউ যেন পূজা না করে।”

আয়েশাকে কাছে ডেকে বললেন—“নিজের কাছে কখনও অর্থ রেখো না। যা আছে সব গরীব দুঃখীদের দিয়ে দাও।”

আয়েশা তার সারা জীবনের জমানো ছ’টা সোনার ‘দৌনার’ মহম্মদের হাতে তুলে দিলে তিনি হুকুম দিলেন একুনি ভিখারীদের ডেকে এই ‘দৌনার’ তাদের দিয়ে দাও। যখন তাকে জানানো হলো তাঁর হুকুম পালন হয়েছে, তিনি বললেন,—“এইবার আমি শান্তি পেলাম।”

মহম্মদ সত্যিই নিঃশ্ব হয়ে গেলেন। রাতে ঘরে প্রদীপ জ্বালাবার তেল আয়েশা প্রতিবেশীর কাছ থেকে ধার করে নিয়ে আসে।

রবিবারের রাত কাটলো। সোমবার জরুর প্রকোপ একটু কম। বাইরে মসজিদের প্রাঙ্গণে হাজার হাজার নরনারীর ভিড়। নমাজের সময় হয়েছে। আবুবকর নমাজ পড়াতে শুরু করলেন। সবে মাত্র দুটো ‘রকাত’ শেষ হয়েছে—এমন সময় আয়েশার কুঁড়েঘরের পর্দা ঠেলে, দু’জন লোকের কাঁধে ভর দিয়ে হাসতে হাসতে হজরত মহম্মদ বাইরে এলেন। নমাজ শেষ হলো। মহম্মদ আবার ফিরে গেলেন কুঁড়েঘরে। আয়েশার কাছ থেকে দাঁতন চেয়ে নিয়ে দাঁতন করলেন তারপর মুখ ধুয়ে শুয়ে পড়লেন। আয়েশার হাত মহম্মদের ডান হাতের ওপর রাখা ছিল, তিনি ইশারায় আয়েশাকে হাত সরাতে বললেন।

খানিকক্ষণ সব নিস্তব্ধ। তারপর ধীরে ধীরে হজরত মহম্মদ শেষবারের মতো বললেন—“এ আল্লাহ্, আমায় মাপ করো আর আমার সেই ছনিয়ার সব সাথীদের কাছে নিয়ে চলো।” তারপর আবার ‘চিরকালের জগৎ স্বর্গ’। ‘মাফ’। ‘হাঁ।’ ‘সেই ছনিয়ার

সাথী’। ব্যস শেষ হয়ে গেল—সোমবার ১২ রবিয়ল আউয়ল, ১১ হিজরী, ৮ জুন, ৬৩২ খৃষ্টাব্দে হজরত মহম্মদ শেষ নিঃশ্বাস ত্যাগ করলেন।

হাজার হাজার লোকের ভিড়। তারা বিশ্বাসই করতে চায় না যে, হজরত মহম্মদ আর নেই। আবুবকর ভিতরে গিয়ে চাদর উঠিয়ে মহম্মদের মুখে চুমু খেয়ে বললেন, “তুমি জীবনে সুন্দর ছিলে, মরণেও তুমি সুন্দর।”

বাইরে এসে আবুবকর কোরানের ছোটো ‘আয়ত’ লোকেদের মনে করিয়ে দিলেন। তার মধ্যে একটা ছিল মহম্মদকে দেওয়া আল্লার সেই বাণী, ‘সত্যি তুমি মরবে আর সবাই মরবে।’

আবুবকর সবাইকে বললেন, “যারা মহম্মদের উপাসনা করে তারা জানুক যে, মহম্মদ সত্যিই আর নেই। কিন্তু যারা আল্লার আরাধনা করে তারা জানুক আল্লা জীবিত আশ্বাসে অমর।”

পরের দিন মদিনায় আয়েশার সেই কুঁড়োঘরে, যেখানে তিনি শেষ নিঃশ্বাস ত্যাগ করেছিলেন, সেখানেই আলী, ওসমান, আর ফজল, মহম্মদকে মাটির নিচে চিরবিশ্রামের জঙ্ঘ শুইয়ে দেয়।

মৃত্যুর পর মহম্মদের সম্পত্তির মধ্যে ছিল একটা সাদা খচ্চর, কিছু অস্ত্র আর এক টুকরো জমি। তাঁর কথা মতো তা গরীবদের বিলিয়ে দেওয়া হয়।

মহম্মদ একটা কাঠের পেয়ালাতে করে জল খেতেন। ভেঙে যাওয়াতে তিনি লোহার পাত দিয়ে সেটাকে বাঁধিয়ে ব্যবহার করতেন। আনস্ নামে একটা লোকের কাছে সেই পেয়ালাটা পাওয়া যায়। আনস্ সেটা রূপো দিয়ে বাঁধিয়ে রেখেছিল।

কোরানে এক ঈশ্বরের ওপর জোর দেওয়া হয়েছে। ‘তোহীদ’ কোরানের সব সুরার সার। এক ঈশ্বর হওয়াতে পৃথিবীর সব মানুষকেই কোরানে এক বলা হয়েছে। ‘কানান্নাসো উম্মত্বাহিদতন্’—সব মানুষ একই জাত। ‘বমা কানান্নাসো ইল্লা উম্মত্বাহিদতন্’—সব মানুষই এক জাত ছাড়া আর কিছুই না।

এত সব নিয়ে ঘাঁটাঘাঁটি না করলেই হতো কিন্তু ধর্মের দোহাই দিয়ে পৃথিবীতে যে আজ কত অশ্রায় হচ্ছে তার কথা ভাবতে গেলে একটু ঘাঁটাঘাঁটি করতে হয় বই কি। ‘লড়কে লেঙ্গে পাকিস্তান’ আর ‘হিন্দুস্থান হিন্দুকা’ চিংকার শুনতে

শুনতেই তো এত বড় হলাম। ‘জেহাদ’ আর ‘হিন্দুরাজ’, ‘মাইনরিটি’ আর ‘মেজরিটি’ নিয়ে কত হৈ চৈ তো রাত দিন শুনছি। তীর্থ করতে জগন্নাথ-পুরী যাইনি,—মক্কা-মদিনায়ও যেতে পারিনি, কিন্তু কোন ধর্মই বুঝতে কষ্ট হয়নি। ভারতবর্ষে হিন্দু-মুসলমানের হানাহানির রক্ত-গঙ্গাও দেখেছি আবার মরুপ্রান্তরের বালির উপর ইহুদী আরবদের রক্তের ধারাও দেখেছি। অমৃতসরে স্বর্ণ-মন্দিরও দেখেছি আবার হাজার হাজার গৃহহীন শিখদের পাঞ্জাব থেকে পালাবার মিছিলও দেখেছি। মার্বেলের তৈরি মসজিদের মিনারও দেখেছি আবার মসজিদের পাশে বৃদ্ধ মুসলমান ভিথিরীকে করাচীর রাস্তার উপর মরতেও দেখেছি। লক্ষ লক্ষ প্যালেস্টাইন বিতাড়িত আরব ছিন্নমূলদের জর্ডনের কাছে দারুণ শীতে কুঁকড়ে মরতেও দেখেছি আবার বড় দিনের সময় গরীব খুষ্টান আরবদের, মুসলমান আরব প্রতিবেশীর কাছে থেকে মোমবাতি ধার চাইতেও জেরুজালেমে দেখেছি। আবার ইহুদীরা যখন তাদের স্বপ্নের দেশ ‘কানান’ (Canaan)—ইজরাইল স্থাপন করলো কাউন্ট ফোক বার্নাডেটের মৃতদেহের উপর, নসীবের এমনই বিড়ম্বনা যে, তাদের হোলি সিটি জেরুজালেম হলো বিভক্ত আর ‘প্রিন্স অব পীস’ যীশুখৃষ্টের জন্মস্থান বেথেলেহেম গেল মুসলমান-আরব জর্ডনের হাতে। আবার ইহুদীদের বিরুদ্ধে আরব-লিজনের সৈন্যাধক্ষ্য হলেন গ্রাব পাশা—জেনারেল জন্ ব্যাগট গ্রাব।

দশ

ছ’হাজার বছর আগের রাত বারোটার এক পুণ্য মুহূর্ত স্মরণ করে এই সেদিনও বেথেলেহেমের গীর্জায় গীর্জায় ঘণ্টা বেজে উঠেছিল। বছরের পর বছর জেরুজালেমের রোমান ক্যাথলিক প্যাট্রিয়ার্চ, চার্চ অব নেটিভিটির সঙ্কীর্ণ, ধ্বংসপ্রায় সিঁড়ি দিয়ে নেমে গিয়ে রূপোর তারার উপর সবত্রে রেখেছেন শিশু যীশুর মূর্তি ঠিক সেই জায়গায়, যেখানে তাঁর জন্ম হয়।

দেড় হাজার বছর পুরনো চার্চ অব নেটিভিটির ‘ডিকন’ (Deacon) প্রতিবারের মতো সেদিনও হাত বাড়িয়ে মূর্তিটা তুলে নেন। ধীরে ধীরে তিন পা এগিয়ে গেলেন, ডানদিক ঘুরে ছোটো

সিঁড়ি নেমে মূর্তিটা রাখলেন কাঠের তৈরি চৌকো একটা বাস্কে। যীশুখৃষ্টের জন্মের পুনরভিনয় প্রতি খৃষ্টমাসের মতো সেদিনও বেথেলহেমে হয়ে গেল।

দু'হাজার বছর আগে মেরী আর জোসেফ যখন ক্রান্ত শরীর নিয়ে এসে পৌঁছেছিল সরাইখানায়, তখন স্থানান্তাবে তারা আশ্রয় নিয়েছিল পিছনের নোংরা আস্তাবলে। কিন্তু আজ আর সরাইখানায় জায়গার কোন অভাব হয় না—বেথেলহেমে না, আশেপাশের অগ্নি অনেক সরাইখানাতে। বেথেলহেমের সে সরাইখানা আজ আর নেই। আশেপাশের সরাইখানা সবই প্রায় খালি। যুদ্ধের ভয়ে তীর্থযাত্রীদের ভিড় আর হয় না। বিদেশ থেকে আসা দু'শ' আর ইজরাইলের দু'হাজার খ্রীষ্টান আরব সেদিন যীশুর জন্মোৎসব দেখতে এসেছিল বেথেলহেমে। পথে প্রতি পদক্ষেপে তারা দেখতে পেয়েছে সঙ্গীনধারী বর্ডার গার্ডদের সন্ধানী দৃষ্টি।

প্রাচ্যদেশ থেকে দু'হাজার বছর আগে এসেছিল 'ওয়াইজ মেন' (wise men) জেরুজালেমে, “ফর্ উই স্ট্রাভ সীন হিজ স্টার ইন দি ইস্ট, অ্যাণ্ড আর কাম টু ওয়ারশিপ হিম”। সীজার আগস্টসের ট্যাক্সের ভয়ে জোসেফ মেরীকে নিয়ে চলে এসেছিল বেথেলহেমে। রাখাল ছেলেরা দেখেছিল তাদের আসতে। গভীর রাতে বেথেলহেমে দেখা যায় সেই অভূতপূর্ব নক্ষত্র আর জন্ম হয় যীশুখৃষ্টের।

মোজেস যখন 'ইজরাইলের' শিশুদের নিয়ে শুরু করে তাঁর যাত্রা, কল্পনায় তখন ছিল 'দুধ আর মধুতে' ভরা তাদের ভূমি 'কানান' (Canaan)। মডার্ন কানান ইজরাইলের আজ জন্ম হয়েছে কিন্তু 'হোলি ল্যান্ড' পড়ে রয়েছে কাঁটাতারের বেড়ার সীমান্তে জর্ডনে। 'হোমল্যান্ড ফর দি জুস' স্থাপন হলো কিন্তু বেথেলহেম পড়ে রইল তাদের সীমানায় যাদের সঙ্গে যুদ্ধ করে ইহুদীরা পেলো তাদের ইজরাইল।

টাওয়ার অব আন্টোনিয়ার প্রাঙ্গণে আরেকদিন পাইলেটের বিচারে যীশুকে ক্রশবিদ্ধ করা হয়, “অ্যাণ্ড ইট ওয়াজ দি থার্ড আওয়ার অ্যাণ্ড দে ক্রুসিফায়েড হিম”। Ecce Home Arch, পাইলেটের বিচারসভার—এক হাজার গজ দূরে রয়েছে সেই

মহামানবের সমাধি। কনস্টান্টাইন ৩২৬ সালে তৈরি করে দেন চার্চ অব হোলি শিপালচার। প্রাচীন, ভগ্নপ্রায় সেই চ্যাপেলের পাথর থেকে কাটা ‘টুম’ (Tomb) দেখতে বছরের পর বছর লক্ষ লক্ষ নরনারী আসে। তারা দেখে সেই খালি ‘টুম’ যা মেরী ম্যাগডালেন দেখেছিল ক্রুসিফিকেশনের তিনদিন পরে। গ্যালিলিতে দেওয়া সেই অমর ভবিষ্যদ্বাণীও তাদের মনে পড়ে, “দি সন্ অব ম্যান মাস্ট বি ডেলিভারড্ ইনটু দি হ্যাণ্ডস অব সিনফুল অ্যাণ্ড বি ক্রুসিফায়েড অ্যাণ্ড দি থার্ড ডে রাইজ এগেন”।

১৯৪৮ সালের ১৭ই সেপ্টেম্বরের সন্ধ্যায় শাস্তিদূত কার্ডিট ফোক্ বার্নাডোট নিহত হন জেরুজালেমে। ‘থার্ড ডে’তে তিনি আর ‘রাইজ’ করেননি। হোলি ল্যাণ্ডের মরুপ্রান্তরের বালুকণার সঙ্গে মিশে গিয়েছে তাঁর রক্ত আর তার উপর তৈরি হয়েছে ইহুদীদের নতুন ‘কানান’ ইজরাইল। কিন্তু মৃত্যুর তিন মাস আগে ২৮শে জুন তারিখে বার্নাডোট যে কাঁটাতারের বেড়া বসিয়ে দিয়ে গিয়েছেন ‘হোলি সিটি’ জেরুজালেমে, সে বেড়া আজও ইজরাইলের বৃকের কাঁটা হয়ে রয়েছে আর থাকবেও।

লক্ষ লক্ষ আরব আর ইহুদীর রক্তে তৈরি হয়েছে ইজরাইল। প্যালেস্টাইনের বৃকে নির্মমভাবে ছুরি বসিয়ে ছুঁটকরো করে তৈরি হলো জর্ডন আর ইজরাইল। চিরকাল সুখে শাস্তিতে বাস করেছে খৃষ্টান আর মুসলমান আরব প্যালেস্টাইনে। বিংশ শতাব্দীর রাজনীতির মার-প্যাচ তারা এখনো বোঝেনি। জর্ডনে খৃষ্টান আরব জানে না কেন সে ছিন্নমূল হয়ে শীতে, গরমে, রোগে মরছে ‘হোলি ল্যাণ্ডের’ সীমান্তে আর হাজার হাজার মুসলমান আরবও বোঝে না কেন প্যালেস্টাইন থেকে বিতাড়িত হয়ে রাস্তার ধারে ছেলে, মেয়ে, মা, বোন নিয়ে সে মরছে।

ছুঁফুট উচু কাঁটাতারের বেড়া সাপের মতো এঁকে বেঁকে চলে গিয়েছে জেরুজালেমের পাহাড়ের কোলঘেঁষা বেইত-সাফাফা (Bait Safafa) গাঁয়ের ঠিক রাস্তার মাঝ দিয়ে। বেড়ার দু’পাশে সঙ্গীন উচিয়ে ২৪ ঘণ্টা দাঁড়িয়ে থাকে ইজরাইল আর জর্ডনের বড়ার গার্ডরা—রক্ষা করে নিজেদের গভর্নমেন্টের এলাকা—১৯৪৮ সালের ২৮শে জুন কার্ডিট বার্নাডোট যা এঁকে দিয়ে গিয়েছিলেন।

২৮শে আগস্ট ১৯৫৬ সালের বিকেলে ছোট্ট বেইত সাফাফা

গ্রাম হঠাৎ যেন ঘুম থেকে জেগে উঠলো। জেরুজালেমের বেলজিয়ান কনসুলেটের মালী মুসা আয়েশার (Moussa Ayasha) সেদিন বিয়ে ফাতিমা বিন্-এর সঙ্গে। হৈ চৈ করে বাজনা বাজিয়ে মুসা চলেছে বিয়ে করতে। জর্ডন সীমান্তের ছোট ছোট ছাদ নিচু কুঁড়েঘরের দরজার কাছে দেখা যায় আরবদের কৌতূহলী চোখ। মুসা চলেছে ফতিমাকে বিয়ে করতে। ফতিমার ছোট বোন জরিফ (Zariphe) হঠাৎ কঁদে ওঠে—“আজকের দিনেও কেন আমি আমার বোনের কাছে যেতে পারবো না।” বর আর আত্মীয়-স্বজনরা ভিড় করে দাঁড়ায় কাঁটাতারের বেড়া ঘেঁষে। তারা দেখলো ফুলের সাজে সেজে, নতুন অর্গাণ্ডির সাদা গাউন পরে ফতিমা উঠলো গিয়ে ট্যাক্সিতে। সোনালী কাজ করা তাকিয়ায় হেলান দিয়ে বসে ফতিমা। ধারে ধীরে ট্যাক্সি চলতে শুরু করে—আগে বরযাত্রীর দল আর পেছনে ফতিমার বন্ধুরা। বিভক্ত গাঁয়ের দু’পাশ থেকে হাততালি বেজে ওঠে, মঙ্গলগীত শুরু হয় আর যুবক যুবতীরা আনন্দে নেচে ওঠে। “আজ আমাদের এদিকে ভোজ খেয়ে যাও তোমরা”, চিংকার করে বেড়ার ওপারে গলা বাড়িয়ে নিমন্ত্রণ জানায় জর্ডন সীমানার এক বৃদ্ধ। “না আমাদের কাছে এখন বেশি মাংস আছে আর তাছাড়া মুগীগুলোও বেশ মোটা”—উত্তর দেয় ওপার থেকে এক ইজরাইলী আরব।

হঠাৎ ইজরাইলী আরবরা চুপ করে যায়। আনন্দে তাদের বাধা পড়ে। জর্ডন সীমান্তের ভিড় তখন শুরু করেছে দুঃখের গান। মোড় ঘুরতে গিয়ে ট্যাক্সিটা হঠাৎ থমকে দাঁড়ালো। খানিকক্ষণ সব চুপচাপ। দুঃখের গানটা ধীরে ধীরে থেমে আসে। চোখের জল ঢাকতে বর্ডার গার্ডরা এবার নিজে নিজের জুতোর ফিতে বাঁধবার ভান করে নিচু হয়ে বসে, চোখ ফিরিয়ে নিয়ে। কাঁটাতারের বেড়া উপকিয়ে হঠাৎ জরিফ গিয়ে জড়িয়ে ধরলো ফতিমাকে। কাঁটাতারের ওপার থেকে আত্মীয়স্বজনরা হাত বাড়িয়ে দেয়। এবার ট্যাক্সি মোড় ঘুরলো বরের বাড়ির দিকে যাবার জন্তে। জর্ডন সীমান্তের আরবরা যতদূর দৃষ্টি যায় দেখতে লাগল—ফতিমা আর তার বর মুসা চলেছে পাহাড়ের দিকে।

বর্ডার গার্ডদের এবার সস্থিত ফিরে আসে। সোজা হয়ে দাঁড়িয়ে ওঠে তারা—শুরু করে সজীন উচিয়ে তাদের ভারী বুটের

পদচারণা, সেই কাঁটাতারের ছ'পাশে, যা প্যালেস্টাইনকে ইজরাইল আর জর্ডানে বিভক্ত করেছে।

সাধারণ লোকের কাছে এই ছোট্ট ঘটনাটার হয়তো কোনো দাম নেই। কিন্তু আমেরিকার 'টাইম' সাপ্তাহিকও এই খবরটাকে ফলাও করে ছাপিয়েছিল। ইজরাইল আমার শেষ পর্যন্ত যাওয়া হয়নি। আরব দেশগুলির মধ্য দিয়ে ভ্রমণ করে ইজরাইলে গিয়ে আর বিপদে পড়তে চাইনি। (ইজরাইলের পাসপোর্টের ব্যাপার আগেই বলেছি।) কিন্তু জর্ডান সীমান্তে দাঁড়িয়ে দেখেছি বিভক্ত 'হোলি সিটি' জেরুজালেম আর জানতে পেরেছি নতুন দেশ গড়ে তোলার জন্য ইজরাইলের কি অসম্ভব প্রচেষ্টা। মাত্র ৭ বছর আগে যে দেশ তৈরি হলো, ভাবতেও অবাক লাগে, মধ্যপ্রাচ্যে শান্তিভঙ্গ করতে সেদিন, সেই দেশ কি ভীষণ চেষ্টাই না করেছিল! সূয়েজ খালের ব্যাপার নিয়ে যে কালো মেঘ সেদিন দেখা গিয়েছিল তার সৃষ্টি তো ইজরাইলই করে।

ইজরাইলকে জানতে হলে ফিরে যেতে হবে বহুদিন আগে ১৯১৬ সালে যখন সাইকস-পিকট (Sykes-Picot) চুক্তি অনুসারে মধ্যপ্রাচ্যের তিন টুকরো করে ভাগ-বাঁটোয়ারা হয় ব্রিটিশ, ফ্রেঞ্চ আর রাশিয়ানদের মধ্যে। তারপর আসতে হবে ১৯১৭ সালের নভেম্বর মাসে যখন বেলফোর ডিক্লারেশন (Belfour Declaration) অনুযায়ী ইহুদীদের 'গ্রাশনাল হোম' প্রতিজ্ঞা করা হয়। তারপর আবার ফিরে যেতে হবে ১৯১৭ সালের ডিসেম্বর মাসে যখন লর্ড অ্যালেনবীর অধীনে ব্রিটিশ সৈন্যরা প্রবেশ করে জেরুজালেমে। এর পরের পাতাগুলো তাড়াতাড়ি পাঁটাতে হবে—১৯২৩—প্যালেস্টাইনের উপর ব্রিটিশ ম্যান্ডেট শুরু—১৯২৯—প্যালেস্টাইনে আরব বিদ্রোহ—১৯৩৬-১৯৩৯—আবার প্যালেস্টাইনে আরব বিদ্রোহ—১৯৩৭—প্যালেস্টাইনকে বিভক্ত করা সম্পর্কে রয়াল কমিশনের প্রস্তাব—১৯৩৯—প্যালেস্টাইনে ইহুদীদের আগমন (Immigration) কমানোর সিদ্ধান্ত নিয়ে হোয়াইট পেপার প্রকাশ।

এইবার আমাদের যেতে হবে লণ্ডনে ফ্লিট স্ট্রীটে, রয়টাস্-এর আপিসে। তারিখটা ২৬শে জুলাই, ১৯৪৫। রয়টাস্-এর

আপিসে সেদিন ইরাকের রিজেন্ট আমীর আবদুল্লা ছিলেন অতিথি। তিনি বসে বসে ভাবছিলেন ইংরেজগুলো কি পাগল? রয়টার্স-এর লোকগুলোর হয়েছে কি? এত ছুটাছুটি কিসের? আবদুল্লা তো জানতেন না সেই দিনটা ইংরেজের কাছে কত আশা ভরসা নিয়ে আসছিল। সেদিন লেবার পার্টি ইলেকশন জিতেছে। নূতন আশা ও উদ্দীপনার স্বপ্ন দেখলো ইংরেজ। তেল-আভিভে ইহুদী যুবক-যুবতীরা গুরু করল নাচ-গান। তারা ভাবলো, এইবার ‘লেবার’ তাদের ‘প্রমিস’ রাখবে আর ইহুদীরা পাবে তাদের ‘গ্যারান্টি হোম’। আর্নেস্ট বেভিন চললেন ফরেন আপিসে।

কিন্তু কিছুই হলো না। লেবার গভর্নমেন্ট প্রতিজ্ঞা তো রাখতেই পারলো না উপরন্তু প্যালেস্টাইনে ইহুদীদের ইমিগ্রেশন কমানোর চেষ্টা শুরু করলো। এক বছরের মধ্যেই প্যালেস্টাইনে সম্ভ্রাসবাদীরা আতঙ্কের সৃষ্টি করে আর ১৯৪৭ সালে প্যালেস্টাইন ‘সমস্যা’ ইউ.এন.ও-তে পাঠায় লেবার গভর্নমেন্ট, আর সেন্টেম্বর মাসে ইউ.এন. কমিশন পার্টিশনের প্রস্তাব করে। এবার ব্রিটিশ গভর্নমেন্ট নিজেদের দায়িত্ব অহোর ঘাড়ে চাপিয়ে ম্যাগুেট শেষ করে প্যালেস্টাইন ত্যাগ করার সঙ্কল্প জানান।

জুন মাসটা বোধ হয় ব্রিটিশ গভর্নমেন্টের অপয়া মাস। ৩রা জুন, ১৯৪৭ মাউন্টব্যাটেন প্ল্যান অনুযায়ী ছাড়তে হয় ভারতবর্ষ। ৩০শে জুন, ১৯৪৮ ছাড়তে হয় প্যালেস্টাইন আর ২৮শে জুন, ১৯৫৬ সালে ছাড়তে হয় সুয়েজ।

শুক্রবার, ১৪ই মে, ১৯৪৮ সাল সকাল। প্যালেস্টাইনের হাইফা শহরের দু’পাশে ব্রিটিশ পুলিশ আর মিলিটারী রাস্তার দু’পাশে দাঁড়িয়ে আছে। ঠিক ন’টার সময় প্যালেস্টাইনের শেষ ব্রিটিশ হাইকমিশনার জেনারেল স্মার অ্যালান ক্যানিংহাম হাওয়াই জাহাজে নামলেন হাইফা এয়ারপোর্টে। সৈন্য আর পুলিশদের সেলাম নিলেন—বিদায় জানানলেন ইহুদী আর আরবদের—বেজে উঠলো শেষবারের মতো প্যালেস্টাইনে ‘গড্ সেভ্ দি কিং’ আর ধীরে ধীরে ইউনিয়ন জ্যাক নেমে এল। ৩০শে জুন শেষ ব্রিটিশ সৈন্য প্যালেস্টাইন ছেড়ে চলে গেল।

সেইদিনই ১৪ই মে, ১৯৪৮ সাল জন্ম হয় ইজরাইলের আর ইহুদী ইতিহাসের প্রায় ১৯০০ বছরের ইতিহাসের ছেঁড়া পাতা আবার জোড়া লাগে। সন্ধ্যা ৪টার সময় ডেভিড্ বেনগুরিয়ন তাঁর সঙ্গী সাথীদের নিয়ে নীল লাউঞ্জ স্ট্রাট পরে ঢুকলেন তেল-আভিভ মিউজিয়াম হলে। তাঁর হাতে পঁয়ত্রিশজন নেতার সহি করা ‘স্টেট অব ইজরাইলস্ প্রক্লেমেশন।’ ধীরে ধীরে পড়তে লাগলেন বেনগুরিয়ন :—

“.....The Land of Israel was the birthplace of the Jewish people. Here they achieved independence and created a culture of national and universal significance. Here they wrote and gave the Bible to the world.....”

“With trust in Almighty God, we set our hand to this Declaration at this Session of the Provisional State Council in the city of the Tel-Aviv, on this Sabbath eve, the fifth day of Iyar, 5708, the fourteenth May, 1948”.

সতেরো মিনিটে পুরো ডিক্লারেশন পড়ে শোনালেন বেনগুরিয়ন আর ইজরাইলের জন্ম হলো! আর সেই সঙ্গেও বুঝিবা শুরু হলো মধ্যপ্রাচ্যে যুদ্ধের কালো মেঘের খেলা। পৃথিবীর ৭৪ দেশ থেকে ইহুদীরা এল ইজরাইলে, যখন নতুন গভর্নমেন্ট ১৯৫০ সালে ‘ল অব রিটার্ন’ পাস করে ইমিগ্রেশন করতে অনুমতি দেন। ষোল লাখ থেকে এখন ইসরাইলের জনসংখ্যা দাঁড়িয়েছে ২৩ লাখে। এর মধ্যে ৭ লাখ বাইরে থেকে এসেছে।

কিন্তু ইজরাইলের জন্মের কাহিনীর শেষ এখানেই নয়। আমাদের যেতে হবে আবার পিছনে। জুন ১৯৪৬ সালে প্যালেস্টাইনের ইহুদীদের ‘হাগ্যানা’ পার্টির লোকেরা বোমা দিয়ে কিছু ব্রিজ উড়িয়ে দেয়। ব্রিটিশ গভর্নমেন্টের প্রতিপত্তিতে এর চেয়ে বড় আঘাত আর হয়নি। মিলিটারীর হাতে এবার সব ছেড়ে দেওয়া হলো আর সঙ্গে সঙ্গে শুরু হয় দোষী নির্দোষ সব ইহুদীদের নির্ধাতন। এর পরের ঘটনা হচ্ছে জুলাই মাসের ২২শে তারিখে। ব্রিটিশ গভর্নমেন্টের প্যালেস্টাইন অ্যাডমিনিস্ট্রেশনের হেড-কোয়ার্টার ছিল জেরুজালেমের কিং ডেভিড্ হোটেলের পূর্বদিকে একই বাড়িতে। এবার ‘ইরগুন’ পার্টি অ্যাডমিনিস্ট্রেশন হেড-কোয়ার্টারকে বোমা দিয়ে উড়িয়ে দেবার সংকল্প করে। এই

অভেদ্য অট্টালিকার শত শত সশস্ত্র গ্রহরীকে কঁাকি দিয়ে যে কি করে এই প্ল্যান সফল করা হয়েছিল তা পড়লে রোমাঞ্চকারী নভেলের মতো মনে হয়।

আরবদের ছদ্মবেশে ‘ইরগুন’ দলের লোকেরা দুপুরবেলা একটা ট্রাকে করে এসে পৌঁছায় কিং ডেভিড হোটেলের পশ্চিম কোণে। তাদের সঙ্গে টিনের পর টিন দুধ। হোটেলের লোকেরা ভাবলো, এরা রোজকার দুধ যারা সাপ্লাই করে তাদেরই লোক। দুধের টিনগুলো সব নিচের বেসমেন্টে ঠেলে ফেলতে লাগল আরবের ছদ্মবেশে ইরগুন দলের লোকেরা। আশ্চর্যের বিষয় এই যে, যদিও বেসমেন্টটা প্যালেস্টাইন অ্যাডমিনিস্ট্রেশনের আপিস পর্যন্ত লম্বা ছিল, এখানে কোন পাহারা বসানো হতো না। রিভলবারের ভয় দেখিয়ে রান্নাঘরের লোকদের ঠেকিয়ে রেখে ‘আরবরা’ বেসমেন্টে পৌঁছায়। তাদের কাজ যখন প্রায় শেষ হয়ে এসেছে, হঠাৎ এক ব্রিটিশ মিলিটারী অফিসারের সঙ্গে তাদের দেখা হতেই অফিসারটিকে তারা গুলী করে। গুলীর আওয়াজে লোকজন দৌড়ে আসতেই ট্রাকে করে ‘আরব’বেশী সন্ত্রাসবাদীরা পালিয়ে যায়। কিছুক্ষণ পরেই কিং ডেভিড হোটেল আর ‘প্যালেস্টাইন পোস্ট’ খবরের কাগজের আপিসে ফোন আসে যে, এক্ষুনি বিস্ফোরণ হবে। কিন্তু কিছু করবার আগেই ভীষণ শব্দ করে বিস্ফোরণ হয় আর ৯০ জন ইংরেজ, আরব আর ইহুদী তাতে মারা যায়।

এইবার শুরু হয় মিলিটারীর অত্যাচার আর লেফটেন্যান্ট জেনারেল ই.এইচ. বার্কারের সেই কুখ্যাত অর্ডার-অব-দি-ডে বেরোয় যাতে তিনি ইহুদীদের এই ব্যাপারের জন্ত শাস্তি দেবার আদেশ দেন মিলিটারীকে। ধর-পাকড়, কাফু, অত্যাচারে ইহুদীরা অতিষ্ঠ হয়ে পড়ে আর ওদিকে সন্ত্রাসবাদীদের আতঙ্কও ছড়াত্তে থাকে। এই সময় নাকি প্যালেস্টাইনে দু’লাখ সাবালক পুরুষের জন্ত এক লাখ সৈন্য ছিল। এরপর শুরু হয় ‘অপারেশন ইগলু,’ (Operation Igloo) আর সমস্ত ‘ইল্লিগ্যাল ইমিগ্রান্টস’দের ডিপোর্ট করার ব্যবস্থা হয়। কিছুদিন পরে ব্রিটিশ সৈন্যরা একজন ইহুদী যুবককে ধরে প্রকাশ্যে রাস্তায় বেত মারে। ইরগুন এর শোধ নেয় একজন ব্রিটিশ মেজর আর পাঁচজন এন.সি.ও-কে বেত মেরে ও পরে তাদের কিডন্যাপ করে নিয়ে গিয়ে।

১৯৪৭ সালের ফেব্রুয়ারী মাসে ইহুদী আর আরব নেতারা প্যালেস্টাইনকে বিভক্ত করার প্রস্তাব অস্বীকার করেন আর তার পরেই প্যালেস্টাইনের প্রশ্ন ইউ.এন.ও-তে যায়। কিন্তু গ্যালিলির তীরে ব্রিটিশ সূর্য ডুববার আগেই শুরু হয়ে যায় ইহুদী আর আরবদের মধ্যে সঙ্ঘর্ষ। সে সঙ্ঘর্ষ আজও চলেছে আর দুই মহাযুদ্ধের ‘প্রবলেম চাইল্ড’ ইজরাইল ধীরে ধীরে আবার তৃতীয় যুদ্ধের ‘প্রবলেম’ হয়ে দাঁড়াচ্ছে।

মাত্র আটত্রিশ দিনের আরব-ইজরাইলী যুদ্ধের ক্ষয়ক্ষতির হিসেব করে আজ আর কোন লাভই হবে না, আর যুদ্ধের ব্যাপক বর্ণনা করেও কোন ফল নেই। যুদ্ধের শিশু (চাইল্ড অব ওয়ার) বলা হয় প্যালেস্টাইনকে আর বিভক্ত প্যালেস্টাইনকে নিয়েই আরব-ইজরাইলী সংঘর্ষের সূত্রপাত। এই সমস্তা চিরকালই পৃথিবীকে যুদ্ধের কাছে টেনে নিয়ে যাবে আর ইজরাইল প্রবলেম চাইল্ডই থেকে যাবে।

প্যালেস্টাইনের কাহিনীকে এক ইংরেজ সাংবাদিক বলেছেন : “story of unfulfilled promises, broken pledges and half-hearted measures !

এডমণ্ড বার্ক লিখেছেন : “Unsettled questions have no pity for the repose of nation.”

পৃথিবীর বড় বড় শক্তির যতদিন পর্যন্ত না মধ্যপ্রাচ্য থেকে নিজেদের স্বার্থসিদ্ধির স্বপ্ন ত্যাগ করেন, আরব-ইজরাইল সমস্তাও ‘আনসেটেবল’ রয়ে যাবে।

মধ্যপ্রাচ্যের আধুনিক ইতিহাস রচনার সময় যদি লরেন্স অব আরবিয়া বেঁচে থাকতেন, তাহলে কয়েকটি স্মরণীয় তারিখ তিনি তাঁর ডায়েরীর পাতা থেকে তুলে ধরতেন। আরব-লিজনের কিছু দিন আগের কম্যাণ্ডার-ইন-চীফ জেনারেল গ্লাব পাশার ডায়েরীতে নিশ্চয়ই এই তারিখগুলোয় লাল আঁচর কাটা আছে।

কাইরোর এক হোটেলে ১৯৪৫ সালের ২২শে মার্চ জন্ম হয় ‘আরব-লীগের’। দু’বছর পরে ১৯৪৭ সালের নভেম্বর মাসে, ব্রিটিশ ম্যাণ্ডেট শেষ হবার পর ইউ. এন. জেনারেল অ্যাসেম্বলী অনুমোদন করে প্যালেস্টাইন পার্টিশন প্ল্যান। পরের মাসে আরব-লীগ ঘোষণা

করে যে, আরব রাষ্ট্রেরা নতুন ইহুদী রাজ্য ইজরাইলের স্থাপনাকে বাধা দেবে। সঙ্ঘর্ষের ‘স্টার্টিং পয়েন্ট’ এইখান থেকেই। ১৯৪৮ সালের ১৪ই মে ইজরাইল রাজ্যের ঘোষণা হয়, আর সঙ্গে সঙ্গে দিনের বেলা ইহুদী সৈন্যরা দখল করে ‘একর’ (Acre) আর আরব সৈন্যরা রাতে প্যালেস্টাইন সীমান্ত অতিক্রম করে। আবার সেই দিনই ইউ. এন. অ্যাসেম্বলীতে কাউন্ট ফোক বার্নাডোটকে প্যালেস্টাইন মেডিয়েটর নিযুক্ত করা হয় আর সেই দিনই শেষ ব্রিটিশ হাইকমিশনার স্যার অ্যালান ক্যানিংহাম প্যালেস্টাইন ত্যাগ করেন।

এর পরের ঘটনাগুলো দ্রুত ঘটতে থাকে আর আমেরিকা ও রাশিয়া নতুন ইহুদী রাজ্যকে স্বীকার করে। ১১ই জুন এক মাসের জ্ঞাত যুদ্ধবিরতি ঘোষণা হয়, কিন্তু যুদ্ধের বিরতি হয় না, তাই আবার ১৮ই জুলাই দ্বিতীয় ট্রুস (Truce) হয়। ঠিক এক মাস পরে দুই পক্ষই আবার যুদ্ধের জ্ঞাত প্রস্তুত হতে থাকে আর ১৫ই সেপ্টেম্বর ইহুদীরা জানায় যে, আরবরা শীঘ্রই জেরুজালেম আক্রমণ করবে। কাউন্ট বার্নাডোট ঠিক করলেন, তিনি নিজে গিয়ে ‘সিচুয়েশন স্টাডি’ করবেন। ১৭ই সেপ্টেম্বর দুপুর বেলা জেরুজালেমে ঢোকার সঙ্গে সঙ্গে ‘স্টার্ন গ্যাজেট’ লোকেরা তাঁকে হত্যা করে নির্মমভাবে। বার্নাডোটের হত্যা সমস্ত পৃথিবীকে বিচলিত করে। এবার ইউ. এন. ও. কিছু সাহস দেখিয়ে সমস্যা সমাধানের চেষ্টা করে। ১৯৪৯ সালের ফেব্রুয়ারী মাসে ইজরাইলের সঙ্গে ইজিপ্ট, লেবানন আর সিরিয়ার সন্ধি হয়।

ফেব্রুয়ারী মাসের সেই ‘আর্মিসটিস’-এর আজ আর কোন দাম নেই। ইজরাইল তার অস্তিত্ব প্রায় অস্বীকার করতে বসেছে। সিনাই মরুভূমির বুকে আবার সেদিন রক্তের ধারা বয়ে গিয়েছে আর তীরানা, রসুনসীর, ইলিয়াত আর আকাবার মোহানা আবার কামানের গর্জনে কেঁপে উঠেছিল। নতুন জেরুজালেমে ইজরাইলী ‘নেসেট’ (Knesset)—পার্লামেন্টে—বেনগুরিয়ন, মঁশে স্মারেটের আর কাইরোতে কর্নেল নাসেরের বক্তৃতায় হাততালির ফোয়ারা ছুটেছে।

পুরনো জেরুজালেমের ‘আজহার’ হোটেলে বসে সেদিন অনেক কথাই ভাবছিলাম। একের পর এক অনেক চেনা-অচেনা মুখই

যেন চোখের সামনে দেখতে পেলাম—গ্র্যাণ্ড মুফতি অব জেরুজালেম, আমীর আবদুল্লাহ, হুসেন, জেনারেল গ্রাব পাশা, ডেভিড বেন গুরিয়ন, কাউন্ট ফোক বার্নাডোট, ডাঃ র্যালফ বৃঞ্চ, ড্যাগ হামারশীল্ড, আর্নেস্ট বেভিন, স্মার আলেক কার্কব্রাইড, জেনারেল বার্কার এবং আরো কত শত। আরব-ইজরাইলী সঙ্ঘর্ষের নাটকের ড্রামাটিস্ট পারসোনে।

মহম্মদ আমিন আল হুসেনী উঠে পড়ে লেগেছিলেন একটা আরব জনমত তৈরি করতে আর তাদের মধ্যে জাগিয়ে তুলতে রাজনৈতিক চেতনা। ১৯৪৬ সালে যখন ইহুদী ‘ইমিগ্রেশন’ শুরু হয়, হুসেনী ফ্রান্স থেকে পালিয়ে গিয়ে আশ্রয় নিলেন কাইরোতে রাজা ফারুকের কাছে। এই নিয়ে তার চতুর্থ পলায়ন হলো আর তিনি আবার রাজনৈতিক রক্তমঞ্চে অবতীর্ণ হলেন।

মহম্মদ আমিন কিছুদিন লেখাপড়া করেন অল্ আজহর বিশ্ববিদ্যালয়ে। কিন্তু পড়া শেষ না করেই চলে যান মক্কায়। তাঁর নাম হয় হজ্জ আমিন। তারপর টার্কীতে কিছুদিন সৈনিক স্কুলে শিক্ষালাভ করে ফিরে এসে চাকরি নেন কাস্টমসে। শেষে জেরুজালেমে, তাঁর জন্মস্থানে স্কুলের মাস্টার হলেন। এইখানেই হয়তো হজ্জ আমিনের বাকি জীবনটা কেটে যেতো, কিন্তু তাহলে আরব রাজনীতির গতিও অন্তরকম হতো। ১৯২০ সালে জেরুজালেমের এক ব্রিটিশ কোর্ট তাঁকে দশ বছরের জন্ম জেলে পাঠায় ইহুদীদের বিরুদ্ধে দাঙ্গা করার অভিযোগে। কিছুদিন পরেই কিন্তু আমিন জেল থেকে পালালেন ট্রান্সজর্ডনে। আশ্রয় পেলেন আমীর আবদুল্লাহর কাছে।

প্যালেস্টাইনের ইহুদী হাইকমিশনার স্মার হারবার্ট স্মামুয়েল আরব বন্ধুত্বের আশায় আমিনকে শুধু মার্জনাই করলেন না, তাঁকে জেরুজালেমের মুফতিরূপে নির্বাচিত করলেন; হজ্জ আমিন হলেন প্রথমে মুফতি, তারপর ইতিহাস প্রসিদ্ধ গ্র্যাণ্ড মুফতি অব জেরুজালেম। তিনি শুরু করলেন জার্মানীর সঙ্গে যোগাযোগ। হিটলার তখন সবে জার্মানীর রাজনীতিতে উদয় হয়েছেন। ১৯৩৬-এর আরব বিদ্রোহের জন্ম তৈরি হতে থাকলেন গ্র্যাণ্ড মুফতি। তাঁর রাজনীতি ছিল দয়ামায়াহীন। যে কেউ তাঁর বিরুদ্ধে মাথা তুলে

দাঁড়িয়েছে, তাকে আর খুঁজে পাওয়া যায়নি। প্যালেস্টাইন গভর্নমেন্ট মুফতিকে চাকরি থেকে বরখাস্ত করে তাঁর নামে গ্রেপ্তারী পরোয়ানা জারী করলেন। মুফতি আশ্রয় নিলেন 'ডোম অব দি রক'-এ।

যখন ধীরে ধীরে আরব বিদ্রোহের আগুন নিভে আসতে লাগল, মুফতি একদিন রাত্রে চূপ করে আরব রমণীর ছদ্মবেশে পালিয়ে গেলেন লেবাননে, আর সেখান থেকে ফরাসী কর্তৃপক্ষের চোখ এড়িয়ে পৌঁছলেন বাগদাদে।

যুদ্ধের সময় তাঁকে পাওয়া গেল বার্লিনে হিটলার আর হিমলারের সঙ্গে। আরব ছনিয়ায় তাঁর প্রতিপত্তি তখন বেশ বেড়ে চলেছে, আর ইরাক, সিরিয়া এবং প্যালেস্টাইনে তিনি পরে বেশ জনপ্রিয় হয়ে পড়লেন। রব উঠতে লাগল ইহুদীদের 'ইমিগ্রেশন' বন্ধ করার জন্তে। আর সেই সব আরব নেত্রীরা, যারা মুফতির সঙ্গে কোনকালেই একমত ছিলেন না, তাঁরাও বেগতিক দেখে তাঁর সুরে সুর মেলালেন। দশ নম্বর ডাউনিং স্ট্রিটের টনক নড়লো। আরবদের খুশি করতে গিয়ে আর্নেস্ট বেভিন্ আরেকটা ভুল করে 'ইমিগ্রেশন' বন্ধ করে শুরু করলেন 'ডিপোটেসন।' মিডিল-ইস্ট এক্সপার্টদের পরামর্শের উপরে নির্ভর করে মুফতিকে খোশামোদ করতে গিয়ে চটালেন ডেভিড বেনগুরিয়নকে। ট্রান্সজর্ডনে বসে আমীর আবদুল্লাহও শঙ্কিত হলেন। তাঁর 'কিং অব জেরুজালেম', 'গ্রেটার সিরিয়ান এম্পায়ার' আর আরব 'ফেডারেশনের' স্বপ্ন বৃষ্টি মাঠে মারা গেল।

জেনারেল গ্রাব পাশা আর তাঁর 'আরব-লিজন' নিয়ে আবদুল্লাহ তখন খুব হৈ-চৈ করছেন। আরবরা ইজরাইলের বিরুদ্ধে যুদ্ধে আরব-লিজনের উপর ভরসা করেই ছিল। ১৯৪৬ সালে ইংলণ্ড থেকে ফিরলেন আবদুল্লাহ স্বাধীন হাশেমী রাজত্ব ট্রান্সজর্ডনের রাজা হয়ে। ৩৭২ মাইল রাস্তা দিয়ে ঘেরা মাত্র সাড়ে তিন লাখ লোকের বসতি ট্রান্সজর্ডনের জন্তু তিনি আনলেন সঙ্গে করে ৪০ লক্ষ পাউণ্ড বাৎসরিক ব্রিটিশ সাবসিডি। কিন্তু আবদুল্লাহর আশা অনেক বেশি। মনে মনে তৈরি করতে লাগলেন অনেক প্ল্যান। কিন্তু ব্রিটিশ গভর্নমেন্ট আবদুল্লাহকে জানালেন যে, তাঁরা আবদুল্লাহ 'গ্রেটার সিরিয়া' বা 'গ্রেটার ট্রান্সজর্ডন' কিছুই পছন্দ করেন না।

আরব-লীগের বৈঠকে আবদুল্লা দাবী জানানলেন যে, ইজরাইলের বিরুদ্ধে যুদ্ধে তাঁকে সেনাপতি করা হোক। ঈজিপ্ট আর সিরিয়া ঘোর আপত্তি জানালো। যুদ্ধের ব্যাপার নিয়ে আরব-লীগের মধ্যে বেশ একটা ছোটখাট ঝগড়ার সৃষ্টি হলো। গ্র্যাণ্ড মুফতি অব জেরুজালেম আবার প্রায়ই আবদুল্লাকে খোঁচা দিতে থাকলেন, ফলে এই হলো যে, আবদুল্লার ‘আরব-লিজন’ একবার ইজরাইলের যুদ্ধে মনোযোগ দেয় তো আবার মুফতির খোঁচা ঠেকায়।

১৯৪৮ সালে ডিসেম্বর মাসে যখন প্রায় এক লাখ ছিন্নমূল আরব সিরিয়ায় এসে পৌঁছলো, তখন সিরিয়ার অবস্থা শোচনীয় হয়ে দাঁড়ালো। ব্যবসা-বাণিজ্য একেবারে নষ্ট হয়ে গিয়েছে। রাস্তায় রাস্তায় ক্রুদ্ধ জনতার চিংকার, সমস্ত রাজ্যে চরম বিশৃঙ্খলা। সিরিয়ায় যখন এই অবস্থা, তখন আবদুল্লা হঠাৎ একদিন জেরিকোতে প্যালেস হোটেলে ডেকে পাঠালেন প্যালেস্টাইনের আরব নেতাদের। নিজেই তিনি প্যালেস্টাইন আর জেরুজালেমের রাজা বলে ঘোষণা করলেন যদিও তিনি জানতেন যে ঈজিপ্ট আর অগ্ন্যাক্ষ আরব রাজা এর বিরুদ্ধে। আবদুল্লাকে আরব-লীগ ভয় দেখাতে লাগল যে, তাঁকে লীগ থেকে তাড়িয়ে দেওয়া হবে আর এর পর শুরু হলো নিজেদের মধ্যে নিন্দা আর গালাগালি।

আবদুল্লা ভাবলেন যে, তাঁর ‘গ্রেটার সিরিয়ার’ স্বপ্ন বৃষ্টি সফল হতে চলেছে—আর তিনি এক সময় নাকি ইজরাইলের সঙ্গে সন্ধি করার পক্ষেও ছিলেন। কিন্তু ১৯৫১ সালে তিনি নিহত হন আর নতুন জর্ডন রাজ্যের গদীতে আরোহণ করেন তাঁর নাতি হুসেন।

আবদুল্লার স্বপ্ন বাস্তবে পরিণত হলো না, কিন্তু ইহুদীদের স্বপ্ন রাজ্য ‘কানান’ স্থাপিত হলো। ডেভিড বেনগুরিয়ন ছিলেন নতুন ‘মেসায়্যা’—‘দি মেসায়্যা ইন ব্লু লাউঞ্জ সুট’। তেল-আভিভের কেইরেন কেমখ্ স্ট্রীটের তাঁর ছোট্ট লাইব্রেরী ঘরে বসে নতুন রাজ্যের ভাগা নির্ণয় করতে লাগলেন। পক্কেশ, বৃদ্ধ বেনগুরিয়ন আজ ইজরাইলের কর্ণধার। জারের রাশিয়ায় তাঁর জন্ম। প্যালেস্টাইনে অটোমান সুলতানদের রাজত্বকালে তাঁর প্রথম শিক্ষা, আর পরে প্রায় আবদুল্লার সঙ্গেই তিনি পড়তে যান ইস্তানবুল ইউনিভার্সিটিতে। প্রথম মহাযুদ্ধে মিত্রপক্ষের হয়ে তিনি ‘জুইশ-লিজন’ লড়াই করেন আর ইজরাইলের প্রথম বিদেশী মন্ত্রী মংশে স্ত্রারেট তাঁরই বিরুদ্ধে

টাকার সেনার হয়ে যুদ্ধ করেন। পরের জীবনে তিনি ইহুদীদের ‘হোমল্যান্ডের’ জন্য শুধু আরবদেরই না, ইংরেজদের বিরুদ্ধেও যুদ্ধ করেন। স্টার্ন গ্যাজেটের লোকেরা যখন কাউন্ট বার্নাডোটকে হত্যা করে, বেনগুরিয়ন এই নিষ্ঠুরতার জন্য তাদের ক্ষমা করেননি।

কাউন্ট বার্নাডোটকে ইহুদীরা বিশ্বাস করেনি। ১১ই জুন কাউন্ট তাঁর সহকারী ডাঃ র্যালফ বুঞ্চকে নিয়ে রোডস দ্বীপ থেকে তাঁর কাজ শুরু করেন। আরবরাও তাঁকে খুব ভালো চোখে দেখেনি। ইহুদীরা কাউন্টের তথাকথিত ‘নাৎসী’ সহানুভূতির কথা বলে বেড়াতে লাগল, আর ওদিকে আরবরা তাঁর সহকারী ডাঃ বুঞ্চকে আমেরিকার স্টেট ডিপার্টমেন্টের এজেন্ট ভেবে বসলো। মজার ব্যাপার হলো এই যে, ইহুদীরা কাউন্টকে আরবদের বন্ধু আর আরবরা ডাঃ বুঞ্চকে ইহুদীদের বন্ধু মনে করলো। জেরুজালেমকে আবহুল্লাহর শাসনে রাখবার প্রস্তাব প্রথমে করে কাউন্ট মস্ত বড় এক ভুল করে বসলেন। কাউন্ট আর বুঞ্চ দু’জনেই আগ্রাণ চেষ্টা করেছিলেন শান্তি স্থাপন করতে, আর কাউন্টকে তার দাম দিতে হয়েছিল নিজের রক্ত দিয়ে। ডাঃ বুঞ্চের প্রচেষ্টা পরে পুরস্কৃত হলো, আর তিনি পেলেন নোবেল প্রাইজ শান্তির জন্যে।

কিন্তু পশ্চিম এশিয়ার শান্তি এখনো অনেক দূরে। মরুপ্রান্তরে শান্তি-মরীচিকার পেছনে ঘুরে বেড়াচ্ছেন শান্তিদূত হয়ে এবার ড্যাগ হ্যামারশীল্ড। শান্তিপ্রিয় স্বাধীন দেশ সুইডেনের কুতী সন্তান ড্যাগ। তাঁর বাস্তু সময়ের মধ্যেও তিনি ইলিয়ট, হেরমান হেস আর উলফ পডেন আর পশ্চিম এশিয়ার শান্তির স্বপ্ন দেখেন। নেপোলিয়নের যুদ্ধের সময় থেকে সুইডেন নিরপেক্ষ রয়েছে আর সুইডেনকে প্রথম মহাযুদ্ধে নিরপেক্ষ রাখেন ড্যাগের পিতা, যিনি সে সময় প্রধানমন্ত্রী ছিলেন।

আজ ইজরাইল আর জর্ডন টুরিস্টদের ডাকছে। আরব জর্ডনে গিয়ে দেখতে হবে খৃষ্টানদের হোলি ল্যান্ড আর ইজরাইলে গিয়ে দেখতে হবে জেজার পাশার তৈরি, ‘আকার’-এর মসজিদ। ১৯১৫ থেকে ১৯৪৭—মাত্র ৩২ বছর। ‘হোয়াট ইজ থার্ট টু ইয়ার্স ইন দি

লাইফ অব নেশন।’ কিন্তু ৩২ বছরে মধ্যপ্রাচ্যের ইতিহাসের গতিই বদলে গিয়েছে।

এগারো

স্কটল্যান্ডের সেন্ট বসওয়েলসে সেদিন ২রা মার্চ (১৯৫৬) রাতে নিজের ঘরের এক কোণে বসে রেডিয়ো শুনছিলেন, ৬১ বছরের বৃদ্ধ পীক্ পাশা—কর্নেল ফ্রেডরিক পীক্। তাঁর তামাটে মুখের উপর চিস্তার রেখা ফুটে উঠলো আর প্রায় ২৬ বছর আগেকার একটা ঘটনার কথা তাঁর চোখের সামনে ভেসে ওঠে।

জীবনের শেষ ক’টা দিন ৯৫০ জন লোকের বসতি ছোট গ্রাম বসওয়েলে কর্নেল পীকের বেশ কেটে যাচ্ছিল। রেডিয়োর খবরটা শুনে তিনি একটু চঞ্চল হয়ে উঠলেন।

বি.বি. সি-র সংবাদ ঘোষক শাস্ত্রকণ্ঠে খবরটা পড়ে গেলেন, “এ রয়াল ডিক্রি ওয়াজ ইস্যুড অ্যাট আন্মান (জর্ডন) টু ডে টারমিনেটিং দি সারভিসেস অব ব্রিটেনস জেনারেল জন গ্রাব অ্যাজ চীফ অব দি জেনারেল স্টাফ অব দি আরব-লিজন”।

১৯৩০ সালের আরেকদিনের কথা মনে পড়লো কর্নেল পীকের। সেদিন তিনি ৩২ বৎসরের সুপুরুষ যুবক লেফ্টেনেন্ট জন ব্যাগট গ্রাবকে নিজের আপিসে ডেকে পাঠিয়েছিলেন। গ্রাবকে হুকুম দিলেন বেছুইনদের নিয়ে তৈরি করতে একটা ছোট ‘ডেজার্ট পেট্রোল’। স্ট্রালুট করে চলে গেলেন জন গ্রাব আর প্রশংসা-ভরা দৃষ্টি নিয়ে অনেকক্ষণ ধরে তাঁর যাওয়ার দিকে তাকিয়ে রইলেন কর্নেল পীক্। ছাব্বিশ বছর পরে তাঁর সেই ‘এন্টেক্স’র বরখাস্তের খবর শুনে চঞ্চল হয়ে পড়বারই কথা কর্নেল পীকের।

নিশ্চিন্ততা ভঙ্গ করে ঘরে ঢোকে খবরের কাগজের রিপোর্টারদের এক ঝাঁক। কর্নেল পীক্ বললেন, “এতদূর থেকে আমি কি-ই বা মন্তব্য করবো? ১৯৩৯ সালে যখন আমি আরব-লিজন ছেড়ে আসি, গ্রাব তখন আমার কাছ থেকে ‘টেক ওভার’ করে। আমাদের সময়ে অনেকদিন পর্যন্ত আমরা হু’জনই মাত্র ব্রিটিশ অফিসার ছিলাম। পরে অবশ্য কিছু কিছু আরো জুনিয়ার লেফ্টেনেন্ট

আসে। বেছুইনদের পেট্রোল তৈরি করার পর জন আমার সেকণ্ড-ইন-কমান্ড হয়।

আজ থেকে ৩৬ বছর আগে কর্নেল পীক নিজের হাতে তৈরি করেছিলেন দুর্ধর্ষ আরব-লিজন ১৯২০ সালে। তখন কতই বা তাঁর বয়েস—২৩।২৪ আর কি। লরেন্স অব আরবিয়ার বন্ধু তিনি। তাঁর সঙ্গে মরুপ্রান্তরে অনেক লড়াই করেছেন কাঁধে কাঁধ মিলিয়ে। যখন ট্রান্সজর্ডনের ম্যাণ্ডেট ব্রিটিশ গভর্নমেন্ট নিজের হাতে তুলে নেন কর্নেল পীক হলেন তার অ্যাডমিনিস্ট্রেটর। ইরাক থেকে হাইফা পর্যন্ত বিস্তৃত মরুভূমির বুকের ওপর পাতা তেলের পাইপ লাইন আর বর্ডার রক্ষা করতো কর্নেল পীকের আরব-লিজন।

সে সব অনেকদিনের কথা। ১৯৪৮ সালে ইজরাইল-আরব যুদ্ধে লিজন কমান্ড করলেন জেনারেল জন গ্রাব। হোলি সিটি জেরুজালেম পড়লো আরবদের ভাগ্যে, আর জর্ডনের গ্রীক অর্থোডক্স শ্রেণীর লোকেরা ডিসেম্বর ১৯৫৬ সালে গ্রাবকে বিভূষিত করলো ‘গ্র্যাণ্ড অর্ডার অব দি লাইটস অব দি হোলি শিপালচার’ উপাধি দিয়ে ‘ফর হিজ কারেন্ট সার্ভিসেস ইন রেস্টোরিং পীস টু দি হোলি ল্যান্ড’। রাজা হুসেনের প্রিয়পাত্র জেনারেল জন গ্রাব। তাঁর নেতৃত্বে গড়ে উঠেছিল আরব-লিজন, যার জন্তু ব্রিটিশ গভর্নমেন্ট দিতেন ৯০ লক্ষ পাউণ্ড ‘সাবসিডি’ বছরে।

গ্রাবকে ডিসমিস করলেন রাজা হুসেন। আত্মানের রাস্তায় রাস্তায় লোকেরা করলো রাজার জয়ধ্বনি আর বিলাতের খবরের কাগজওয়ালারা গেল ক্ষেপে। প্রধানমন্ত্রী ইডেন তলব করলেন মন্ত্রীসভার জরুরী বৈঠক আর পার্লামেন্টে দীর্ঘ বক্তৃতায় জর্ডনের অকৃতজ্ঞতার নিন্দা করলেন। দু’দিন পরে গ্রাব এসে পৌঁছলেন লণ্ডনে আর দশ নম্বর ডাউনিং স্ট্রীট থেকে ঘোষণা হলো “হার ম্যাজেস্টি দি কুইন ইজ প্লিজড টু অ্যাপয়েন্ট লে: জেনারেল জন গ্রাব অ্যাজ নাইট কমান্ডার অব দি বাথ”। কিছুদিন পরে তিনি আবার হলেন স্মার জন গ্রাব।

লাঞ্চ খেতে গিয়ে লণ্ডনের এক বিখ্যাত হোটেলে স্মার জন নিন্দা করলেন ব্রিটেনের পশ্চিম এশিয়ার নীতিকে। “Ideas were more powerful than weapons. The world is being stolen from us by ideas.”

গ্রাব পাশার বরখাস্তে পশ্চিম এশিয়ার ব্রিটিশ সম্মানে ভীষণ শাস্তি লাগল। পাশাও গেলেন আর তার সঙ্গে গেলেন আরব-লিজনদের ইন্টেলিজেন্স-এর বড়কর্তা কর্নেল কছিল প্যাট্রিক আর তিনজন জর্ডন অফিসার—কর্নেল সালিম কাদরশেখ, মেজর ইমিল জুমিয়ান আর মেজর আবদুল করিম সাহেব। আর গ্রাবের ডিসমিসাল এমন সময় হলো যখন ব্রিটিশ পররাষ্ট্রসচিব সেলউইন লয়েড মিডিল-ইস্ট আসছিলেন বাগদাদ প্যাক্ট বিক্রি করতে। পাশার বরখাস্তের খবর যখন পৃথিবীর চারদিকে ছড়িয়ে পড়েছে লয়েড তখন দিল্লীতে বাগদাদ প্যাক্টের গুণগান করে বক্তৃতা দিচ্ছিলেন। লয়েড সাহেব বোধ হয় বড়ই অপয়া। যেখানেই যান বা যাবার সিদ্ধান্ত করেন, কিছু না কিছু গোলমাল হয়ই। বহেরিনে গিয়েছিলেন সেখানেও মারামারি, ধরপাকড় টিয়ার গ্যাস, ক্যায়ারিং সব করিয়ে এসেছেন।

আম্মানের রাস্তায় রাস্তায় যখন বাগদাদ প্যাক্টের বিরুদ্ধে ক্রুদ্ধ জনতার রব উঠলো, রাজা হুসেনের টনক নড়লো। পর পর চারটে গভর্নমেন্ট বদলে গেল একমাসের মধ্যে। ১৪ই ডিসেম্বর প্রধানমন্ত্রী সইদ-এল-মুফতির গভর্নমেন্ট ইস্তফা দিয়ে জান্ন বাঁচালো। এলেন হাজার মাহালী, কিন্তু থাকলেন তিন দিন। ১৬ দিনের ‘উজীরি’ করলেন ইব্রাহিম হাশেম আর তারপর এলেন সামী রিফাই। জেনারেল গ্রাব পাশাকে মন্ত্রিসভার এক জরুরী বৈঠকে ডাকা হলো ১লা মার্চ। সাত ঘণ্টার জরুরী বৈঠকে তলব করা হলো রয়্যাল ক্যাবিনেটের চীফ বহাজেং তালজুনি। রাজা হুসেন নিজে গেলেন ছ’বার প্রধানমন্ত্রীর কাছে। ব্রিটিশ রাজদূত ডিউক সাহেব প্রধানমন্ত্রীর কাছে দরবার জানালেন ছ’বার, কিন্তু হলো না কিছুই। গ্রাব পাশাকে যেতে হলো ‘হোয়াইল দি গোয়িং ওয়াজ গুড’। গ্রাবের সেকণ্ড-ইন-কমান্ড ব্রিগেডিয়ার রাদি ইনাব হলেন আরব-লিজনদের প্রধান। এরোডোমে গ্রাবকে বিদায় জানালেন বহাজেং তালজুনি। ক্রুদ্ধ জনতার ভিড়ের মধ্যে দিয়ে গ্রাব চলে গেল আর সঙ্গে সঙ্গে ব্রিটিশ ইম্পিরিয়ালিজম-এর শেষ প্রতীক গেল জর্ডনের ভূমি থেকে। যুবক রাজা হুসেন জনতার জয়ধ্বনি শুনে প্রফুল্ল হলেন। জনতাকে বললেন, “আজকের দিন পবিত্র দিন। আল্লাহর দয়ায় আমরা কৃতকার্য হয়েছি।

আল্লা আমাদের হারানো সব অধিকার এবার ফিরে পাইয়ে দেবেন”।

আরব ইতিহাসের পাতা আর একবার পাটে গেল। অল্ কাহিরাতে কর্নেল নাসের ভাবলেন ‘মারহুওয়া’। ১৯৬৯ পর্যন্ত মেয়াদী অ্যাংলো-জর্ডন ট্রীটির ভবিষ্যৎ ঝুলতে লাগল স্মৃতোর আগায়। জেনারেল টেম্পলারের জর্ডনকে বাগদাদ প্যাক্টে আনবার রঙীন স্বপ্ন ছারখার হয়ে গেল। কিন্তু আশ্মানে আর মাক্রাকে রয়াল এয়ারফোর্সের ঘাঁটি আর মান (Maan) আর আকাবার ব্রিটিশ সৈন্যদের কি হবে আর ১২০ লক্ষ পাউণ্ড সাবসিডির বা কি হবে! আরেকটা পাতা উর্টে ইতিহাসই দেবে তার উত্তর।*

‘বিগ পাওয়ারস’দের শক্তির জাতাকলে পড়ে জর্ডন আজ বাঁচবার চেষ্টা করছে। হোটেলে, ক্লাবে, আর ক্যাফেতে জর্ডনের লোকে অল্ কাহিরা রেডিয়ার কর্নেল নাসেরের বক্তৃতা শোনে আর আরব একতার স্বপ্ন দেখে। ভবিষ্যতের কোশে কি আছে কেউ জানে না, কিন্তু রাজা হুসেনের হাতে ভবিষ্যতের অনেক কিছু নির্ভর করছে। লাজুক, ছোটখাটো, রাজা হুসেন। অনেকদিনের শখ নিজের প্লেনে আশ্মান থেকে লণ্ডন যাবেন আর ২৪ ঘণ্টার মধ্যে ফিরে আসবেন এবং আশ্মান থেকে বাগদাদ পর্যন্ত মোটর রেস করাবেন। বালক-সুলভ এইসব পরিকল্পনা এখন তাকে তুলে রাখতে হয়েছে। নিজের দাহুর রাজনৈতিক কুশলতার কিছু অংশ তিনিও পেয়েছেন আর তাই সিরিয়া, লেবানন আর ইজিপ্ট তাঁর কাছ থেকে অনেক কিছু আশা করছে। আবার ভয় হয় হুসেন তো দ্বিতীয় ফারুক হবেন না? সে-ক্ষেত্রে দ্বিতীয় নাসের কে হবে? লেঃ কর্নেল অলী নূয়র তো নয়? মাত্র ৩৪ বছর বয়সে অলী হন চীফ অব স্টাফ। গ্লাব পাশার বরখাস্তের ব্যাপারে তার হাত কিছু কম ছিল না। নির্ভীক এই আর্মি অফিসারটিকে গ্লাব পাশা কোনদিনই পছন্দ করেননি আর তাই নূয়রকে পাঠানো হয়েছিল প্যারিসে মিলিটারী অ্যাটাশে রূপে। কিছুদিন পরেই নূয়র ফিরে আসেন আশ্মানে রাজার এইড-ডি-ক্যাম্প হয়ে। জর্ডনের আর্মিতে তাঁর প্রতিপত্তি প্রচুর। আরব-লিজনের কমান্ডার-

* অ্যাংলো-জর্ডন ট্রীটি পরে নাকচ হয়ে যায়।

ইন-চীফ জেনারেল রাডি ইনাবেবর বয়েস হয়েছে, কিছুদিন পরেই অবকাশ গ্রহণ করবেন। তারপর? নূর? ফার্স্ট ইনক্যান্ডি ডিভিশনের কমান্ডার ব্রিগেডিয়ার আলী হায়ারী?

পাশ্চাত্য-শ্রীতি হুসেনের ছিল এবং আছে। লক্ষ লক্ষ আরব ছিন্নমূল রয়েছে জর্ডনের সীমান্তে আর ইজরাইলকে আক্রমণ করার বাসনা নিয়ে আরব-লিজন হয়েছে চঞ্চল। এইসব মিলিয়ে যদি একটা নতুন অবস্থার সৃষ্টি হয় হুসেনের সিংহাসন টলমল হতে বেশি দেরি হবে না। বাগদাদ প্যাণ্টের বাইরে সৌদী আরেবিয়া ছাড়া এক জর্ডনেই এখন ‘রাজা’ রয়েছেন। জর্ডনের সিংহাসন গেলে সিরিয়া, আর সৌদী আরেবিয়ার আশা বেড়ে যাবে। কিন্তু জর্ডনের উপর বিপদ এলে হুসেনের খুড়তুতো ভাই ইরাকের রাজা ফইজাল কি চুপ করে বসে থাকবেন? নূর কি নতুন নাসের হবেন? এইসব মিলিয়ে জর্ডনকে মনে হয় একটা বিরাট প্রশ্ন চিহ্ন।*

নতুন আর পুরাতনের মাঝে দাঁড়িয়ে আছে লেবানন। লেবাননের গিরিপথ দিয়ে এসেছে বছরের পর বছর আক্রমণকারীর দল। ইংরাজ লেখক ফারগুসন আধুনিক লেবাননকে ‘নতুন আর পুরাতনের মধ্যে এক সেতু’ বলে বর্ণনা করেছেন। আরকে-লজিস্টরা বলেন যে, খৃষ্টের ৩০০০ বছর পূর্বে ব্যাবিলস নামে একটা গ্রাম, বেরুট থেকে ২০ মাইল দূরে জেবহল-এর কাছে ছিল। রমণীয় রাজধানী বেরুট, আমেরিকান ইউনিভার্সিটি, মুসলমান আর খ্রীষ্টানদের সৌহার্দ্য, আর নতুন আর পুরাতনের ‘ককটেল’ লেবাননকে পশ্চিম এশিয়ার অগ্র আরব দেশ থেকে অনেক আলাদা মনে হয়। হঠাৎ বেরুটকে দেখলে বোঝাই দায় যে, লেবানন আরব রাষ্ট্র। বছরদিন ফরাসীরা লেবাননের ওপর রাজত্ব করে গিয়েছে তাই আজও লেবাননের উপর স্পষ্ট ফরাসী ছাপ পাওয়া যাবে। লেবাননের রাজনীতির ধারাও অগ্র আরব রাষ্ট্র থেকে আলাদা। আরব আর খ্রীষ্টানদের জনসংখ্যা প্রায় সমানই। লেবাননের প্রেসিডেন্ট খ্রীষ্টান আর প্রধানমন্ত্রী একজন মুসলী আরব।

টুরিস্টদের প্যারাডাইস লেবানন, তাই আবার কেউ কেউ লেবাননকে ‘সুইজারল্যান্ড অব দি ওরিয়েন্ট’ বলেন। বেরুট থেকে

* কিছুদিন আগে জর্ডনের রাজনীতিতে তোলপাড় হয়ে গিয়েছে। নূর হিয়ার এবং আরো অনেকে দেশ ছেড়ে পালিয়ে গিয়েছেন। হুসেনের ওয়াশিংটন শ্রীতি একটু বেড়েছে।

দামাস্কাসের পথে মোটরের যাত্রা সত্যিই অপূর্ব। বেরুট তো প্রায় ‘ইন্টারন্যাশনাল’ সিটি আর সেইজন্যই বোধহয় বেরুটে যত বিদেশীদের একসঙ্গে দেখতে পাওয়া যায় মিডিল-ইস্টে অন্য কোন দেশে তা পাওয়া যায় না। ইন্টারন্যাশনাল সিটি হওয়ার ছুর্ভোগও আছে আর তাই লেবাননের হোটেল, কাফে আর বার ইন্টারন্যাশনাল ডিপ্লোমেসী, এস্পায়ওনেজ (Espionage) আর অ্যাডভেঞ্চারের হ্যাপি হান্টিং গ্রাউণ্ড।

ইউনাইটেড নেশন-এর রিসলিউশনের দৌলতে ‘ডেজার্ট কিংডম’ লিবিয়ার জন্ম ১৯৫১ সালে। তার আগে লিবিয়ার অস্তিত্ব ছিল শুধু জার্মান, ইটালিয়ান, আর ব্রিটিশদের কাছে আর তারও আগে ফোনেশিয়ান্স (Phoenicians), গ্রীক, রোমান, আরব আর তুর্কদের কাছে। দ্বিতীয় মহাযুদ্ধের পরে মর্টগোমারীর এইট্থ আর্মি তাড়ায় ইটালিয়ান আর জার্মানদের। ১৯৫১ সালে স্বাধীনতা পেলেও লিবিয়া আজও ব্রিটিশ আর আমেরিকান গভর্নমেন্টের দয়্যায় বেঁচে আছে। ইজিপ্ট অব টুনিসিয়া, মরোক্কো আর আলজেরিয়ার মধ্যে ‘স্মাণ্ডউইচ’ হয়ে রয়েছে লিবিয়া। রাজধানী ট্রিপোলীর ঠিক মাঝখানে ওড়ে সোভিয়েট রাশিয়ার ফ্ল্যাগ, রাশিয়ান এম্বাসীর উপর—উত্তর আফ্রিকায় ‘হাতুড়ী আর কাস্তে’-র প্রথম পদার্পণের কথা স্মরণ করিয়ে দিয়ে।

প্রায় সাত লাখ বর্গমাইল-এর মধ্যে শুধু ১০০০ মাইলেই লিবিয়ার যা কিছু সব। গ্রীকো-রোমান শহর সাইরেন, ট্রিপোলী, টোক্রক, সব মনে করিয়ে দেয় দ্বিতীয় মহাযুদ্ধের কথা। টোক্রকের কাছে ‘ডেথ ইস্ এ লেভেলার’ কথা স্মরণ করিয়ে দিয়ে পর পর সাজানো রয়েছে ব্রিটিশ আর জার্মান সৈন্যদের কবর।

আর ফিল্ড মার্শাল রোমেল ? লিবিয়ার লোকেরা প্রায় তাকে ভুলতে বসেছে কিন্তু ব্রিটিশ ‘ওয়ার’ আপিস তাঁকে এখনও ভুলতে পারেনি। টোক্রক, এল-আলামিন আর বেনগাজীর লড়াই রোমেলের কথা মনে করিয়ে দেয়। মিডিল ইস্টে এখনও অনেক ইংরেজ মা বাচ্চাকে ঘুম পাড়ানোর সময় ‘লালেবী’ শোনায় ‘স্লিপ বেবী স্লিপ, রোমেল উইল কাম’। রোমেলের মারা যাওয়ার খবর শুনে এক ব্রিটিশ কর্নেল নাকি রেগে বলে উঠেছিলেন, ‘দিস্ ইজ নো টাইম ফর জোক্’।

ধীরে ধীরে শামুকের গতিতে এগিয়ে চলেছে লিবিয়া প্রগতির পথে। ১৯৫১ সালে যখন স্বাধীন হয় শুধু ৫ জন গ্রাজুয়েট ছিল লিবিয়াতে। আজ বেনগাজীতে ৩২ জন ছাত্র ইউনিভার্সিটিতে পড়ছে। প্রথম শিক্ষামন্ত্রী কিন্তু বুড়ো আঙুলের ছাপ মেরে ছ'বছর কাজ চালান। এখনও ছোট ছোট ছেলেমেয়েকে গাধার পিঠে করে স্কুলে যেতে দেখা যায়।

কিন্তু ট্রিপোলীর লোকেরা টেলিভিশন দেখেছে। হুইলাস্-এর আমেরিকান এয়ারবেস থেকে টি.ভি. প্রোগ্রাম প্রচারিত হয় আর লিবিয়ানরা 'আই লাভ লুসী' গান শুনে হাততালি দেয়।

ব্রিটিশ, আমেরিকান আর রাশিয়ান—সবাই নজর রেখেছে লিবিয়ার উপর কিন্তু যতদিন পর্যন্ত ৬৮ বছরের বৃদ্ধ রাজা ইদ্রিস বেঁচে আছেন তিনি ব্রিটিশদেরই আমল দেবেন। পুরনো বন্ধু ব্রিটিশরা, যাদের দয়ায় তিনি নিজের হাত সিংহাসন ফিরে পেয়েছেন।

প্রশ্ন কিন্তু আবার ওঠে ইদ্রিসের পরে কি হবে? ইদ্রিস নিঃসন্তান। কিছুদিন হলো তিনি দ্বিতীয়বার বিবাহ করেন ইজিপ্টের ফতিমাকে। কিন্তু ফতিমাও তাঁকে নিরাশ করেছেন। ইদ্রিসের ভাইপো সিদ্দিক-অল ফিদা আছেন কিন্তু অশ্রু এক ভাইপো তাঁর বিশিষ্ট বন্ধু ও পরামর্শদাতা ইব্রাহিম আহমদ আল সাহলীকে হত্যা করায়, ইদ্রিস সব আত্মীয়দের ওপর খাপ্পা হয়ে আছেন।

সবচেয়ে ছোট আরব দেশ ইমন। রাজধানী সানার লোকসংখ্যা মোটে ৩০০০০। পঁচাত্তর হাজার বর্গমাইলের রাজ্যের ৫ লাখ লোকের ভাগ্য নির্ণয় করেন ইমনের ইমাম। ককি, চামড়া বেচে আর অশ্রু দেশের দয়ার ওপর নির্ভর করে বেঁচে আছে ছোট ইমন। রাজধানী সানার চারিদিকে ঘেরা পাঁচিল। তার মাঝে ৪০টা মসজিদ। শেবা-র রানীর রাজ্যের প্রধান শহর ছিল সানা—'লিজ্জো' তাই বলে। কুইন অব শেবা গিয়েছিলেন রাজা সলোমনের কাছে—সেটা বাইবেল বলে। আজও উটের 'কাফিলা' নিয়ে ইমনের বণিকেরা সানা থেকে হাদিদায় যায়।

লরেন্সের 'সেভেন পিলারস অব উইসডম'-এর সব থামের চুন বালি খসে পড়েছে আর নতুন থাম আজ সে জায়গায় তৈরি

হচ্ছে—নতুন জর্ডন, নতুন সিরিয়া, নতুন ইরাক, নতুন ইরান, নতুন ইজিপ্ট, নতুন টার্কী আর নতুন সৌদী আরেবিয়া’।

বার্নো

“পার্লেন্ডু ফ্রাঁসে মঁসিয়ে?”

“নো ফ্রাঁসে।”

“উহু।”

“নো ফ্রাঁসে। আই নো ইংলিশ।”

ক্যাসিয়ান হোটেলের পোর্টারের ফ্রেঞ্চের তুবড়ির মুখে আমার সিরিয়ার সঙ্গে প্রথম পরিচয়। রকেটের মতো দুটো লোমশ হাত দিয়ে বত্রিশ পাটি দাঁতের একজ্জিবিশন দেখিয়ে এক লহমায় আমার স্মটকেশ আর টাইপরাইটারটা উঠিয়ে, পোর্টার আবছুল তিন লাফে ত্রিশটা সিঁড়ি পেরিয়ে উপরে গিয়ে উঠলো আর হাসতে হাসতে হোটেলের প্রোপাইটার মিস্টার খাব্বাজ এগিয়ে এলেন আমায় অভ্যর্থনা জানাতে।

“ওয়েলকাম্ টু দি মোস্ট এনশিয়েন্ট সিটি অব্ দি ওয়ার্ল্ড, দামাস্কাস।” হাত বাড়িয়ে দেন সৌম্যমূর্তি বৃদ্ধ মিস্টার খাব্বাজ। পোর্টার আবছুল দৌড়ে এসে তার মালিককে হাত পা নেড়ে হাসতে হাসতে জানায় যে, আমি এক অদ্বুত মানুষ, কারণ “মঁসিয়ে নো ফ্রাঁসে”। আমি ফ্রেঞ্চ জানি না বা বলতে পারি না।

খাব্বাজ সাহেব আমায় বুঝিয়ে বললেন যে, তাঁর পোর্টার আবছুলের ধারণা ছুনিয়ার সবাই ফরাসী আর আরবী জানে। জ্ঞান হবার পর থেকে সে সিরিয়ায় ফরাসী রাজত্বই দেখেছে তাই তার পক্ষে এ ধারণা হওয়া কিছু অস্বাভাবিক না।

“হোয়েন দি ফ্রেঞ্চ লেফ্ট দিস্ কান্ট্রি” খাব্বাজ সাহেব রসিকতা করে ওঠেন, “দে লেফ্ট বিহাইণ্ড দেম দি ফ্রেঞ্চ ল্যান্ডয়েজ, থাউজেন্ডস অব্ শ্যাম্পেন বটলস্ অ্যাণ্ড ডজেন্স অব্ গার্লস ইন দি ব্রথেলস্।” যাওয়ার সময় ফরাসী কর্তারা নিজেদের ভাষা, এস্তার শ্যাম্পেন বোতল, আর একরাশ মেয়ে সিরিয়ার পতিতালয়-গুলিতে ছেড়ে যান।

আমি বললাম যে, আমাদের দেশ ছেড়ে যখন ইংরেজ প্রতুরা

চলে যান তাঁরা তখন ভারতীয়দের জন্ত রেখে যান ক্রিকেট ব্যাট, ব্যালট বক্স আর জয়েন্ট স্টক কোম্পানী। তুলনা শুনে খাব্বাজ সাহেব ভীষণ খুশি। টেঁচিয়ে নিজের স্ত্রী-পুত্রদের ডাকেন। তাঁর চিংকারের আগেই হাসি শুনে সবাই এসে উপস্থিত। পরিচয় হলো সবার সঙ্গে। তাঁর স্ত্রী স্ত্রীলীর সঙ্গে—“মাই স্নুইটহার্ট ইভেন অ্যাট ফিফটি ফোর”, ছেলে টোনী, কন্যা নোমা আর পুত্রবধূ—কেরী। খাব্বাজ সাহেবের মতে এঁরা সব তাঁর হোটেলের ‘বোর্ড অব ম্যানেজমেন্ট’।

ক্রান্ত শরীর নিয়ে হাসপাতাল থেকে ছাড়া পেয়ে পৌঁছেছিলাম ক্যাসিয়ান হোটеле। খাব্বাজ-দম্পতীর আদর-আপ্যায়নে আর কিছু কড়া ছইস্কীর দৌলতে কখন যে ঘুমিয়ে পড়েছি জানতেই পারিনি। ঘুম যখন ভাঙলো তখন দেখি, চায়ের ট্রে হাতে নিয়ে বিছানার সামনে দাঁড়িয়ে আছে পোটার আবদুল। আমায় উঠতে দেখেই আবার তার বত্রিশ পাটি দাঁত বার করা হাসি—“বঁ জুর মঁসিয়ে—পার্দন, পার্দন, গুট মনিং, গুট মনিং।”

ঝাড়া কয়েক ঘণ্টা ঘুমের পর শরীর আর মেজাজটা ভালোই ছিল কিন্তু মাঝে মাঝে হাঁটুর ব্যথাটা চাড়া দিয়ে উঠে সেই ভয়াবহ এ্যাক্সিডেন্টের কথাটাকে মনে করিয়ে দিচ্ছিল। দু’মিনিটের মধ্যে কি যে হলো কিছুই বুঝতে পারিনি। যখন বুঝতে পারলাম তখন দামাস্কাসের হাসপাতালের বেডে শুয়ে আছি। তিনদিন পরে যখন ছাড়া পেলাম হাসপাতাল থেকে, তখন সিরিয়ায় থাকার আমার মেয়াদ প্রায় ফুরিয়ে এসেছে। ট্রান্সিট ভিসার দয়ায় মোট তিনদিন আরো থাকতে পারি।

খোঁড়াতে খোঁড়াতে ট্যাক্সিতে চড়ে, আধ ঘণ্টাটেক এখানে ওখানে ফালতু ঘুরে পৌঁছেছিলাম খাব্বাজ সাহেবের ক্যাসিয়ান হোটেল। আমার এই অবস্থার জন্তে কাকে যে দায়ী করবো ঠিক বুঝতে পারছিলাম না। রাগ হচ্ছিল সুরিন্দর চোপরার উপর। ইস্তানবুলে ইণ্ডিয়ান এম্বাসীর প্রেসঅ্যাটাশে সুরিন্দর চোপরা। ‘বাই রোড’ সিরিয়া যাবার এমন ‘রোড’ই তিনি দেখালেন যে, প্রায় পরপারেই পৌঁছে গিয়েছিলাম।

ইচ্ছে ছিল ফেরার পথে সোজা সিরিয়ান ডেজার্ট পার হয়ে বাগদাদ যাবো কিন্তু চোপরা সাহেব এমন শর্ট কাট রুট বাতলে

দিলেন যে, চিরদিন মনে থাকবে। চোপরাকে কোনদিন হয়তো ভুলে যাবো কিন্তু যখনই হাঁটুতে ব্যথা পাই তাঁর কথা ভালোভাবেই মনে পড়ে।

চোপরাকে গিয়ে বললাম সিরিয়া যাবার ‘বাই রোড’ রাস্তাটা আমায় জানাতে। অনেকদিন কাটিয়েছে টার্কীতে সুতরাং সব তার নখদর্পণে। এম্বাসীর ‘ফ্রেণ্ড ফিলসফার, গাইড’ বে নিয়াজীকে ডেকে পাঠালেন চোপরা সাহেব। খানিকক্ষণ ছু’জনে মিলে তুর্কীতে তুবাড়ি ফোটালেন। তারপর আমায় বোঝালেন, ‘বাই রোড’ সিরিয়া যাবার রাস্তা অতি সহজ। বেলা এগারোটার ট্রেন ধরলে বিকেলের মধ্যে পৌঁছে যাবো তুর্কীর সীমানায় ইস্কন্দরু স্টেশনে। ইস্কন্দরু থেকে বাস ধরে ৮ ঘণ্টার মধ্যে পৌঁছে যাবো সিরিয়ার দামাস্কাসে। এক মিনিটের মধ্যে ম্যাপ এঁকে সুরিন্দর চোপরা সব জলের মতো পরিষ্কার করে দিলেন।

বেশ খুশি মনে এম্বাসীর এক অর্ডালির সঙ্গে গেলাম হাইদারপাশা স্টেশনে (ইস্তানবুলের স্টেশনের নাম হাইদারপাশা। হাইদারপাশা থেকে স্টীমারে করে যেতে হয় ইস্তানবুল শহরে)। মারামারি ধ্বস্তাধ্বস্তি করে টিকিট কিনে আনলো এম্বাসীর অর্ডালি ইমরান বে। ছম্‌দাম্ করে চলন্ত গাড়িতে আমার স্লটকেস আর টাইপরাইটারটা ছুঁড়ে ফেলে দিয়ে আমায় প্রায় পাঁজাকোলা করে তুলে নিয়ে কামরায় ঢুকিয়ে দিয়েই ইমরান বে গায়েব। ইমরান বে তো গায়েব হলেন কিন্তু কামরার মধ্যে ভিড় দেখে আমারও প্রায় ছ’শ গায়েব হবার দশা। ভাবলাম, যাকগে, বিকেলেই তো পৌঁছে যাবো, দাঁড়িয়েই মেরে দেবো রাস্তাটুকু। ছোট ছ’জন বসার কামরায় প্রায় দশজন লোক ঠেসে বসে আছে। এক স্থলকায়া বৃদ্ধা সেই গরমের মধ্যে ঘেমে নেয়ে একাকার। একটা বিরাট থলেতে আপেল ভরতি আর তাই সামলাতেই বুড়ীর প্রাণান্ত। হঠাৎ বিমানো অবস্থায় থলিটা বেসামাল হওয়ায় আপেলগুলো মেঝেতে গড়িয়ে পড়তেই কামরাগুদ্ধ লোক হো হো করে হেসে ওঠে। ধড়মড় করে জেগে উঠে বুড়ী তাঁর আপেলের অবস্থা দেখে হৈ হৈ রৈ রৈ শুরু করে দিলো। জায়গাটা খোয়াবার ভয়ে উঠতেও পারছে না আর তার চোখের সামনে শখের আপেলগুলো কামরার মেঝের উপর

গড়াগড়ি খাচ্ছে। আপেলগুলো তুলে দেবার উৎসাহ কারুর নেই কারণ সবারই ভয়, উঠলেই জায়গাটা অস্থির কেউ হয় দখল করে নেবে, নয় পাশের যাত্রীটি নিজের স্থানের পরিধিটা একটু বাড়িয়ে নেবে। সিচুয়েশনটা দেখবার মতো। চলন্ত ট্রেনের ঝাঁকুনিতে আপেলগুলো গড়াগড় করে একবার মেঝের ওদিকে আরেকবার অস্থিরদিকে চলে যাচ্ছে আর বুড়ী হায় হায় করে ‘এল্মা’, ‘এল্মা’ (তুর্কীতে আপেলের নাম এল্মা) বলে চোঁচাচ্ছে, আর বাকী যাত্রীরা হো হো করে সমানে হেসে যাচ্ছে।

মিনিট পাঁচেক ধরে আপেলের গড়াগড়ি বুড়ীর হায় হায় আর যাত্রীদের হো হো হাসি চললো। হঠাৎ বাস্তবের কোণায় ধাক্কা খেয়ে একটা বেশ বড় গোছের আপেল খেঁতলে গেল। বুড়ীর চোখ ছটো এবার সজল হয়ে উঠলো আর কাঁদো কাঁদো মুখে সে আমার দিকে চেয়ে রইল। উপরের বাস্তবের চেনটা ধরে দাঁড়িয়ে চলন্ত গাড়ির টাল সামলাচ্ছিলাম আর ভরসা ছিল ওমনিভাবেই কাটিয়ে দেবো রাস্তাটা। চেনটা ছাড়লেই অস্থির কেউ জায়গাটা দখল করে নেবে, কিন্তু বুড়ীর কাতর চাউনি, যা একবার আমার দিকে একবার খেঁতলা আপেলটার দিকে যাচ্ছিল, একটু বিচলিত করে দিলো। চেনের মায়া ত্যাগ করে হঠাৎ নিচু হয়ে বসে আপেলগুলোর গড়াগড়ি বন্ধ করার চেষ্টা করলাম। অনেক কষ্টে সবক’টাকে তুলে বুড়ীর হাতে দিলাম। ছলছল চোখে খেঁতলা আপেলটার দিকে একবার চেয়ে জানলা দিয়ে বুড়ী সেটাকে ফেলে দিলো। কৃতজ্ঞতায় বুড়ীর মুখ দিয়ে শুধু একটা কথাই বেরোয়—‘তশক্কুর, তশক্কুর’ (ধন্যবাদ, অনেক ধন্যবাদ)। কামরার মধ্যে এবার একটু মৃদু গুঞ্জন শুনতে পাই। হাসির ফোয়ারা আর নেই। অস্থানীয় যাত্রীরা লজ্জা পেয়েছে কিনা বলতে পারলাম না, কিন্তু বেশ বুঝতে পারলাম, সবারই মনে একটু ‘কেমন কেমন’ ভাব দেখা দিয়েছে। একটা বিশ্রী নিস্তব্ধতা কামরার মধ্যে ঘোরাফিরা করছে আর সেই চাপা নিস্তব্ধতা ভঙ্গ করে শুধু শোনা যাচ্ছে ট্রেনের চাকার ঘট্-ঘট্-ঘটাং—ঘট্-ঘট্-ঘটাং।

সাহস দেখিয়ে নিস্তব্ধতাটাকে ভঙ্গ করলো বাঁদিকের সীটে বসা একটা তরুণী। এতক্ষণ নজরটা সেদিকে যায়নি, হঠাৎ তার গলার আওয়াজ শুনে দেখতে পেলাম। চোখাচোখি হওয়াতেই মেয়েটি

আবার বলে উঠলো, “চোক্ সূচক, চোক্ সূচক” (ভীষণ গরম, ভীষণ গরম)।

“ইয়েভেং, চোক্ সূচক”।

“এফান্নাম, চোক্ সূচক”।

এবার বাকী যাত্রীরা মাথা নেড়ে সায় দেয় ‘ই্যা, ভীষণ গরম’। এক মিনিটের মধ্যে কামরার ভিতরের আবহাওয়াটা সহজ হয়ে ওঠে আর বুড়ীর পাশে বসা একটি যুবক আমার হাত ধরে টেনে নিজের জায়গার অর্ধেক ছেড়ে দিলো। ‘তশকুর আদারাম’ (আপনাকে ধন্যবাদ) বলে বসলাম। খানিকক্ষণ আবার সবাই চুপচাপ। ট্রেনের গতিও কমে আসে আর বুড়ী হাসিমুখে পরের স্টেশনে নামবার জন্তে তৈরি হয়। গাড়ি স্টেশনে এসে দাঁড়ালো আর বুড়ী নিজের আপেলের থলিটা বুকে জড়িয়ে নেমে গেল। জানলা দিয়ে দেখতে লাগলাম, বুড়ী প্ল্যাটফর্মের এদিক ওদিক দেখছে। হঠাৎ কোথা থেকে ছ’ফুট লম্বা একটা ছেলে এসে বুড়ীকে প্রায় কোলে তুলে নিলো। বুড়ী একবার ছেলের চেহারার দিকে দেখে আর একবার তার গালে হাত বোলায়। অনেকক্ষণ ধরে মা-ছেলের পুনর্মিলনের দৃশ্য দেখতে লাগলাম। বুড়ীর হঠাৎ কি মনে পড়ায় থলির ভেতর থেকে ছোটো আপেল ছেলের হাতে গুঁজে দিলো আর থলিটার মুখ ফাঁক করে বাকি আপেলগুলো ছেলেটাকে দেখাতে লাগল। আবার বুড়ীর যেন কিছু মনে পড়লো আর কামরার জানলায় আমার দিকে তার নজর গেল। খানিকক্ষণ ছেলেকে হাত পা নেড়ে কেঁদে চৈঁচিয়ে কি বোঝালো। আর থলি থেকে আরো ছোটো আপেল ছেলের হাতে তুলে দিলো।

ছেলেটা এবার আপেল ছোটো নিয়ে আমার কামরার জানলার কাছে দাঁড়ালো। দূর থেকে বুড়ী ইশারা করে আমায় দেখালো আর ছেলেটা আপেল ছোটো আমার হাতের কাছে ধরলো। যতই না বলি ততই ছেলেটা তর্ক করে আর বুড়ী দূর থেকে মাথা নেড়ে নেড়ে আমায় নিতে বলে। হঠাৎ হুস্ করে ট্রেনটা ছেড়ে দেয় আর ছেলেটা কি করবে বুঝতে না পেরে আপেল ছোটো ছুঁড়ে কামরার মধ্যে ফেলে দেয়। ছেলের কাণ্ড দেখে বুড়ীর সে কি হাসি। ছোট শিশুর মত হাততালি দিচ্ছে আর হেসে গড়িয়ে পড়ছে। ট্রেন চলতে শুরু করেছে, আপেলটা তুলে নিয়ে জানলা দিয়ে হাত

শাম্-এ। ঘণ্টা চারেক পরে ইস্কন্দরু নেমে বাস ধরে সোজা শাম্-এ পৌঁছে যাবো কাল সকালের মধ্যে।

খিল খিল করে মেয়েটা এবার হেসে উঠলো আর তার সঙ্গে যোগ দিলো কামরার বাকি যাত্রীরাও। সেই এক কথা “মা মা মিয়া—শাম্ ? হাউ ?” মাগো, দামাস্কাস ? কি করে ?

নিজে একটু বোকা বনে গেলেও এদের বুদ্ধিরও ঠিক তারিফ করতে পারছিলাম না। তুর্কী ভাষার সমস্ত জ্ঞান উজাড় করে বললাম, “আকসাম্ (সন্ধ্যাবেলা) ইস্কন্দরু। চেঞ্জ, টেক দোলমুস (ট্যাক্সি), গো শাম্ ইয়ারান সুবহ (কাল সকালে)।”

আমার অজ্ঞানতার পরিচয় পেয়ে মেয়েটা এবার সহানুভূতি দেখিয়ে আমায় বোঝাতে চেষ্টা করে যে, আমি যা জেনেছি তা সবই ভুল। সুরিন্দর চোপরা, বে নিয়াজী আর ইমরান বে আমাকে একেবারে সঠিক ভুল রাস্তা বাতলে দিয়েছেন। যে ট্রেনে আমি চড়েছি তাতে করে আমি আজকে আকসাম্ স্টো দূরে থাক, ইয়ারান আকসাম্ও না ইয়ারান রাত দশটার আগে দামাস্কাস পৌঁছবার স্বপ্নও যেন না দেখি।

বলে কি ? আমার মাথায় তো বজ্রাঘাত। তবু মনে সাহস সঞ্চয় করে বলি, “নো, নো, ইউ আর রঙ।”

“ইয়োক ইয়োক। মি রাইট”,—না না আমি ঠিক—মেয়েটি প্রতিবাদ জানায়।

আমাদের তর্কের চেষ্টামেচিতে ততক্ষণে পাশের কামরা থেকে করিডর বেয়ে আরো কয়েকজন যাত্রী এসে দরজায় ভিড় জমিয়েছে। মেয়েটিকে আমার যথাসাধ্য ইংরিজী আর তুর্কীর সাহায্যে বোঝাবার চেষ্টা আর মেয়েটির তুর্কীতে আমায় বোঝাবার ব্যর্থ প্রয়াস ক্রমেই একটা অসহনীয় পরিস্থিতির সৃষ্টি করে তুললো। কামরার বাকি যাত্রীরা অসহায়, কারণ তাঁরা কেউই ইংরিজী জানেন না। জীবনে শুধু একবারই মনে হয়েছিল—হায় ভগবান, যদি বছরের পর বছর ইংরিজী না শিখে তুর্কী শিখতাম তাহলে কত কাজেই না আসতো !

কামরার দরজার সামনের কৌতূহলী ভিড় ঠেলে এবার ঢুকলো আরেকটি তরুণী। পরিষ্কার ইংরিজীতে বললো, “শী ইজ কারেন্ট অ্যাণ্ড ইউ আর রঙলী ইনফরম্‌ড্‌।”

হাতে স্বর্গ পেয়েছি মনে হলো। তাড়াতাড়ি উঠে গিয়ে অভ্যর্থনা করে তাকে কামরার ভিতরে নিয়ে এসে সব বোঝাতে সে বললো যে, আমি রাত তিনটেয় পৌঁছবো ইস্কন্দর স্টেশনে আর সেখানে গাড়ি বদল করে চড়তে হবে আরেকটা ট্রেনে। সেই ট্রেন পরের দিন বেলা আটটায় আমায় পৌঁছে দেবে ছোট্ট একটা স্টেশনে যার নাম টোপরাকালে। টোপরাকালেতে পাবো ট্যান্ডি আর ট্যান্ডি আমায় নিয়ে যাবে বর্ডার টাউন আস্তাকিয়াতে। আস্তাকিয়া থেকে অল্প ট্যান্ডিতে করে যেতে হবে সিরিয়ার হালেপ্ এ্যালেক্সো শহরে। আবার হালেপ্ থেকে অল্প ট্যান্ডি করে যেতে হবে শাম্-এ (দামাস্কাস)। আমার অবস্থাটা ভেবে দেখবার মতো। কোথায় ভাবছি, কাল সকালে পৌঁছে যাবো দামাস্কাসে তা না এখন ইস্কন্দর আর টোপরাকালেই দূর অস্ত্।

“দেয়ার ইজ নাথিং টু ওরী” তরুণীটি জানায়। তার কামরায় কয়েকজন লোক আছে যারা যাবে টোপরাকালে পর্যন্ত। তারা সানন্দে আমায় সাহায্য করবে। আরো আশ্বাস দিলো, তার সহযাত্রীরা প্রায় সকলেই ইংরিজী জানে। “ইউ সীম টু বি হ্যাংরী। কাম, আই উইল গিভ্ ইউ সাম শ্রাওউইচেস্”—নিমন্ত্রণ জানালো আমার ত্রাণকর্ত্রী। এতক্ষণ ক্ষিদের কথা মনে ছিল না। হাঁটি হাঁটি পা পা করে তাঁর সঙ্গে পাশের কামরায় গিয়ে পৌঁছলাম।

কামরায় গিয়ে দেখি, হৈ হৈ ব্যাপার আর হৈ হৈটা করছে অলিভ-গ্রীন ইউনিফর্ম পরা গোটা চারেক সেপাই। বিয়ারের বোতল, শ্রাওউইচ, তাস, বাঁশি, ব্যাঞ্জো, গীটার আর মাউথ অর্গান মিলে একেবারে এলাহি কারবার। একটু অবাক হয়ে ব্যাপারটা বুঝবার চেষ্টা করছি। বুঝতে আমার হলো না, কারণ ইংরিজী জানা তরুণীটিই সব ব্যাপারটা জলের মতো পরিষ্কার করে দিলো। আমরা সবাই ‘সেলিব্রেশন’ করছি, সে বললো।

কিসের সেলিব্রেশন?

“এই চারজন ছোকরাকে দেখছেন, তারা হু’বছর পর বাড়ি ফিরছে।”

“সেপাই মানুষ হু’বছর পর বাড়ি ফিরছে তাতে সেলিব্রেশনের কি আছে?”

“আছে। দে আর কামিং ব্যাক ফ্রম্ দি কোরিয়ান ওয়ার।”

কোরিয়ান ওয়ার? ছ্যাং করে উঠলো বুকটা। জেনারেল ম্যাকআর্থার, সিগম্যান রী, ইয়ালু রিভার, থার্টি এইট প্যারালেল, পান-মুন-জুন সব চোখের সামনে এক নিমেষে ভেসে ওঠে। ইউনাইটেড নেশন ফোর্সের হয়ে কোরিয়ান ওয়ারে গিয়েছিল তুর্কীর যুবকেরা। অনেকে ফিরেছে, অনেকে ফিরেনি। এই চারজন চলেছে ফিরে। বুকে আঁটা অনেক তকমা আর রিবন। ঘরের ছেলে ঘরে ফিরছে তাই এত উৎসব।

ইন্টোডাকশন হলো সবাই-এর সঙ্গে। প্যাকেটের পর প্যাকেট চিউইং গাম্ আমার সামনে পেশ হয়। তরুণীটি বুঝিয়ে বললো যে, এরা সবাই যাবে টোপরাকালে, সুতরাং আমার আর কোনো চিন্তা নেই। ছোকরারা হৈ হৈ করে আমার লাগেজ পাশের কামরা থেকে উঠিয়ে আনলো। পকেটে হাত ঢোকাবার আগেই চারজন চার প্যাকেট সিগারেট আমার সামনে তুলে ধরে। আমার ‘সেভিয়ার’ তরুণীটি মনে মনে খুব খুশি আমার সাহায্য করতে পেরেছে বলে। নিজের লাগেজ এবার সে গোঁছগাছ করতে লাগল —আডানা স্টেশনে সে নামবে।

হু’জনেই করিডরে বেরিয়ে এলাম।

আমতা আমতা করে তাকে অনেক ‘তশকুর আদারাম’ জানালাম। “নট অ্যাট অল, ডোর্ট মেনশন প্লিজ”, বলে সে বিনয় দেখালো। “ইট ইজ এ প্লেজার”, হেসে বলে।

“হোয়াট ইজ এ প্লেজার?” জিজ্ঞাসা করি।

“টু হেল্প ইউ”, আবার হাসি।

করিডরের জানলা দিয়ে ঝির ঝির করে ঠাণ্ডা হাওয়া ভিতরে এসে ঢুকেছ! হু’জনেই খানিকক্ষণ চুপচাপ। স্তব্ধতা ভঙ্গ আমিই করলাম। জানতে চাইলাম তার নাম, ধাম, পেশা। খিল খিল করে হেসে তরুণীটি জবাব দেয়, “আশ্চর্য ব্যাপার, এতক্ষণ পর্যন্ত আমরা নিজেদের পরিচয়ের পর্বটাই শেষ করিনি।”

কিণ্ডার গার্টেন স্কুলের শিক্ষয়িত্রী মিস্ মেসেরেং। ছুটীতে চলেছে বাড়ি আডানাতে। হেসে নিমন্ত্রণ জানায় আডানাতে আসবার জন্তে। আবার হু’জনেই চুপচাপ। “দি টার্কীশ চিলড্রেন আর ওয়াগারস্কুল”। মেসেরেং এবার ‘টেনশন্’টা কাটে।

“চিলড্রেন ছাট হ্যাভ সাচ এ ওয়াণ্ডারফুল টিচার মাস্ট বি ওয়াণ্ডারফুল ইনডীড” বলি।

“মের্সি। তশকুর। থ্যাংকস্ এ লট।”

ট্রেনের ঘট্ ঘট্ ঘটাং কখন থেমে গিয়েছে জানতেই পারিনি। অন্ধকারে হুঁজুনেই দাঁড়িয়ে আছি। জানলার কাছে ফেরিওয়ালার চিংকারে সম্বিত ফিরে আসে। ইন্ডেসির্ স্টেশন। পরের স্টেশনে নেমে যাবে মেসেরেং আর ফুরিয়ে যাবে কয়েক ঘণ্টার এই মিষ্টি আলাপের মেয়াদ। মেসেরেং ফিরে যাবে তার বাড়ির শান্ত, নির্মল পরিবেশে আর তার ওয়াণ্ডারফুল ‘চিলড্রেন’দের মাঝে। আর আমি? আবার একা শুরু করবো আমার যাত্রা মরুপ্রান্তরের বৃকে। ভিসা, পাসপোর্ট, কাস্টমস আর চেক-পোস্টের ভিড়ে হয়তো আর খুঁজে পাবো না মেসেরেংকে।

হাতির দাঁতের একটা টাই-পিন ফেরিওয়ালার কাছ থেকে কিনে মেসেরেং আমার কাছে ফিরে এল। “ফর রিমেমব্রান্স—এ স্মল মেমেন্টো ফ্রম ইয়োর টারকিশ ফ্রেন্ড, মেসেরেং”, টাই-এর কোণটা ধরে মেসেরেং লাগিয়ে দিলো পিনটা। একটা বক উড়ে যাচ্ছে, সাদা ডানা দুটো আমার নীল টাইটার উপর ছেয়ে রয়েছে। ‘তশকুর মেসেরেং’—ছোট একটা ধনুবাদ ছাড়া আর কিছুই বলতে পারলাম না। ট্রেনের ঘট্-ঘট্-ঘটাং-এর মধ্যে মেসেরেং হয়তো আমার ‘তশকুর’ শুনতেও পায়নি।

“কতদূর আর আডানা?”

“ঐ তো” শহরের নিয়ন-লাইটস-এর দিকে আঙুল দিয়ে দেখায় মেসেরেং।

এতো তাড়াতাড়ি এসে গেল আডানা। মেসেরেং চলে যাবে। বৃকের মধ্যে একটু মোচড় দিয়ে উঠলো। কতটুকুই বা জানি ওকে আর ওই বা আমাকে কতটুকু জানে, কিন্তু কেন এই বিদায় বেদনা? প্রেম? ভালোবাসা? মন-দেওয়া-নেওয়ার লুকোচুরি? নারীকে পাবার পুরুষের চিরন্তন স্পৃহা? না কোনোটাই না। আজ পর্যন্ত এর কোনো উত্তর খুঁজে পাইনি। হাতির দাঁতের, ডানা মেলা বৃকের টাই-পিনটা আজ আর আমার কাছে নেই। সেকথা পরে, কিন্তু মেসেরেং আমায় ভোলেনি। আমিও হয়তো তাকে ভুলিনি।

জোরে হাতটা চেপে ধরলাম মেসেরেং-এর। ওর নীল চোখের

কোণে একটু জল চিক্ চিক্ করে উঠলো। “গুড্ বাই, গড্ স্পীড্ অ্যাণ্ড্ হ্যাপি জার্নি” বলে নেমে গেল মেসেরেং আমার উত্তর দেবার আগেই।

কামরায় কখন ফিরে গিয়েছি আর কখন যে ঘুমিয়ে পড়েছি মনেও নেই। ঘুম ভাঙলো যখন, ইস্কন্দর স্টেশন এসে গিয়েছে। সঙ্গে অলিভ-গ্রীন ইউনিফর্ম পরা সেপাই-এর দল নিজেদের ল্যাগেজের সঙ্গে আমার লাগেজও কাঁধে নিয়ে আমাকে প্রায় টেনে হিঁচড়েই নামিয়ে নিয়ে চললো।

‘কানেক্টিং’ ট্রেন দাঁড়ায় খুব কম সময়ের জন্য আর টোপরাকালের গাড়িতে বসতেই গাড়ি ছেড়ে দিলো। ভোরের আলো স্বল্প পরিসর কামরাটার মধ্যে এসে পড়েছে। ছোকরা চারটের উৎসাহের আর সীমা নেই। ছ’বছর পর তারা ফিরে যাচ্ছে আত্মীয়-স্বজন, বন্ধুবান্ধব আর পরিচিতদের মধ্যে। ফিরে যাচ্ছে স্নেহময়ী মা’র কোলে।

সকাল ৯টায় গাড়ি পৌঁছে গেল টোপরাকালে স্টেশনে। বৃকের উপর আঁটা তকমা আর রিবন সাজিয়ে, নিজেদের টুপি একটু তেরচা করে বসিয়ে এবার কোরিয়ান-ওয়াঁর-ফেরতা সেপাইরা হুড়মুড় করে নামলো প্ল্যাটফর্মে। ছোট স্টেশন টোপরাকালে আর আরো ছোট তার প্ল্যাটফর্ম, লোকে লোকারণ্য। বীর ছেলেরা ফিরে আসছে। অভ্যর্থনা জানাতে সারা শহর উজাড় হয়ে এসেছে। চৈচামেচি, ব্যাণ্ডের বাজনা, ফল, মিষ্টি আর ফুলের তোড়ায় স্টেশনের প্ল্যাটফর্ম ভরে গিয়েছে। নিমেষের মধ্যে ছেলে চারটেকে সেই জনতা কাঁধে তুলে নিলো। এ কাঁধ থেকে ও কাঁধ, ওরা ভিড়ের মধ্যে হারিয়ে গেল। ভাইয়ের আলিঙ্গন, বাপের আশীর্বাদ আর দৌড়ে এসে মায়ের বুকে কাঁপিয়ে পড়ায় সেই দৃশ্য আমি জীবনে কখনো ভুলবো না। তার বর্ণনা আমি দিতে পারবো না কারণ হঠাৎ সেই জনতার উল্লাস আর জয়ধ্বনি থেমে গেল আরেক মায়ের বুক-কাটা কান্নার চিৎকারে। কোথা থেকে কি হয়ে গেল! হাসি, উৎসব আর পুনর্মিলনের আনন্দে সমস্ত প্ল্যাটফর্ম মুখর ছিল, হঠাৎ ভিড় ছিঁড়ে দৌড়ে এল এক বৃদ্ধা আর ডু করে কেঁদে উঠলো। সব চুপচাপ। সেই নিস্তব্ধতার বুক চিরে শুধু ভেসে আসতে লাগল বৃদ্ধার চিৎকার।

পাঁচজন যুবককে কোরিয়ার যুদ্ধে পাঠিয়েছিল টাকীর ছোট শহর টোপরাকালে। চারজন ফিরেছে, একজন ফেরেনি। যুদ্ধের সেই সনাতন রীতি। পৃথিবীর অনেক জায়গায় অনেকবারই এরকম অনেক ঘটনাই ঘটেছে। শুনেছি অনেক দেখিনি কখনো। ধীরে ধীরে স্টেশন থেকে বেরিয়ে এলাম। দূরে দাঁড়ানো ট্যাক্সির সঙ্গে দরদস্তুর করে চললাম আস্তাকিয়ার পথে। আস্তাকিয়ায় খানিক থেমে আবার চড়লাম অস্থ ট্যাক্সিতে আলেপ্পো যাবার জন্তে। আলেপ্পো থেকে আরেকটা ট্যাক্সি করে হয়তো সোজাই পৌঁছে যেতাম সিরিয়ার রাজধানী দামাস্কাসে—ওয়ার্ল্ডস মোস্ট এনশিয়েন্ট সিটি। কিন্তু তাহলে তো আর আমায় আজো হাঁটুর ব্যথার যন্ত্রণায় মাঝে মাঝে চিৎকার করতে হতো না আর সুরিন্দর চোপরা আর বে নিয়াজীর ‘বাই রোড’ যাবার পথের হিসাবের জন্ত তাদের দায়ীও মাঝে মাঝে করতে পারতাম না।

মেসেরেৎ বিদায় নেবার সময় বলেছিল, ‘গড্ স্পীড্’। আল্লার নামেই স্পীড্ ছেড়ে দিয়ে গাড়ি চালাচ্ছিল ট্যাক্সির ড্রাইভার। তীরবেগে ছুটে চলেছে নতুন গাড়িটা দামাস্কাসের দিকে। আঁকা বাঁকা পিচ-ঢালা পথের মাইলের পর মাইল পার হয়ে যাচ্ছে। হঠাৎ কোথা থেকে কি যে হয়ে গেল। সব কিছু মনে নেই। রাস্তার একটা বাইফার্কেশন, আরেকটা মোটর, একটা গাছ, একটা ঝাঁকুনি আর কয়েকটা ভয়ানক চিৎকার ছাড়া আজ আর কিছুই মনে পড়ে না সেই আক্সিডেন্টের।

মৃত্যুর মুখোমুখি দাঁড়িয়ে তার কাছ থেকে ফিরে আসার কার কি অভিজ্ঞতা আছে আমি জানি না, কিন্তু সেদিন আমার যে অভিজ্ঞতা হয়েছিল, সারা জীবন তা ভুলতে পারবো না। ‘কাশ্মীর প্রিন্সেস’ প্লেনের কো-পাইলট আমার বন্ধু ক্যাপ্টেন মহেশ দীক্ষিতও মৃত্যুর মুখোমুখি দাঁড়িয়েছিল। আমিও দাঁড়িয়েছিলাম। তফাত শুধু এই যে, তার অলস্ট প্লেন যখন সমুদ্রের মধ্যে পড়ছে, মহেশ হেসে কম্যাণ্ডার ক্যাপ্টেন জাটারকে বলেছিল, “গুড লাক অ্যাণ্ড গুড বাই ক্যাপ্টেন”, আর আমার ট্যাক্সি যখন নিশ্চিত মৃত্যুর গহ্বরে ছুটে চলেছে, আমার মুখ দিয়ে শুধু “মা মাগো” এই কথাটাই বেরিয়েছিল।

কয়েক সেকেন্ডের মধ্যে বোধহয় সবকিছু হয়ে গিয়েছিল। সেই কয়েক সেকেন্ডের কথা মাঝে মাঝে স্মৃতির কোণে ভেসে ওঠে। কি হয়েছিল ঠিক জানি না, শুধু মনে হয়েছিল আমি যেন অতল তলে তলিয়ে যাচ্ছি। আবার মনে হয়েছিল, আমি ছুটেছি মরুভূমির তপ্ত বালুর উপর দিয়ে। পায়ে দগদগে ফোঁস পড়েছে। আমার পিছনে একটা বিরাট দানব ছুটেছে। তৃষ্ণায় আমার ছাতি ফেটে যাচ্ছে। ঐ তো সামনে মরুতান। ছুটছি তো ছুটছি। কোথায় জল? শুধু মরীচিকা। ঐ তো সামনে দৌড়ছে মেসেরেং, অলিভ গ্রীন ইউনিফর্ম-পরা সেপাইরা, আপেল বুকে বুড়ী, গুলশন বহেন, ইরশাদ...

তারপরে যখন জ্ঞান হলো আমি দামাস্কাসের হাসপাতালে সাদা বিছানায় শুয়ে।

কি করে যে হাসপাতালে পৌঁছেছি বা কে যে আমাকে নিয়ে এসেছিল কিছুই মনে করতে পারছিলাম না। ড্রাইভারটার কি হলো? আর বাকি যাত্রীরা, তারা কোথায়? সব রকম চিন্তা মাথার মধ্যে এসে ভিড় করতে লাগল। সব থেকে আশ্চর্য লাগছিল এই ভেবে যে, আমি কি করে বেঁচে আছি। সারা শরীরের উপর হাত বুলিয়ে দেখলাম। হাড়-টাড় সব গুঁড়িয়ে পাউডার হয়ে যায়নি তো? না, সব ঠিকই তো আছে মনে হচ্ছে। কিন্তু হাঁটুটা এমন ব্যথা করে ওঠে কেন?

হাসপাতাল থেকে যেদিন ছাড়া পেলাম, সেদিন সব কিছু জানতে পারলাম ডাক্তারের কাছে। বললেন, আমার যে কিছু হয়নি তা স্রেফ ‘মিরাক্যাল’! ট্যাক্সির ড্রাইভার আল্লাহর নামে গাড়ি চালিয়ে সোজা আল্লাহর কাছেই পৌঁছে গিয়েছে আর বাকি হাজন যাত্রী—‘প্রিকারিয়স’ অবস্থায় হাসপাতালে রয়েছে। দুর্ঘটনার সময় দরজা খুলে যাওয়াতে আমি নাকি ছিটকে পড়ি অনেক দূরে আর জ্ঞান হারিয়ে হাঁটুতে চোট খেয়ে গোড়াচ্ছিলাম। বরাত জোর সেই সময় মোটরে করে সিরিয়ান ক্রটিয়ার পুলিশের এক অফিসার রাস্তা দিয়ে দামাস্কাস যাচ্ছিলেন আর তিনিই আমাদের পৌঁছে দিয়ে যান হাসপাতালে।

ডাক্তারটি হেসে বললেন যে, মিরাক্যাল ছাড়া আমার বাঁচার

কোনো কারণই তিনি খুঁজে পাচ্ছেন না। তিন দিন আমি অজ্ঞান হয়ে পড়েছিলাম হাসপাতালে। প্রথমে তিনি ভাবেন আমার বুদ্ধি ব্রেন কনকশন্স হয়েছে কিন্তু ভাগ্যের জোরে এক হাঁটুর জখম ছাড়া আমার কিছুই হয়নি—“বার্ট ইয়োর নী উইল গিভ ইউ ট্রাবল”। ট্রাবল? এখনও মাঝে মাঝে যন্ত্রণায় চিৎকার করে উঠতে হয়।

হাসপাতালের আপিসে গিয়ে দেখি টাইপরাইটারের অবস্থা শোচনীয়! স্টকেসটাও একটু টোল খেয়েছে। আর...?

“আর কিছু হারিয়েছে?” ডাক্তার ব্যগ্রতার সঙ্গে জিজ্ঞাসা করেন।

“আমি একটা নীল টাই পরে ছিলাম, তাতে...”

সঙ্গে সঙ্গে আমার কোটটা আর নীল টাইটা এনে হাজির করেন ডাক্তার পাশের ঘর থেকে। “ইজ ছাট অল্?”

“ইয়েস, বাট বাট হোয়ার ইজ দি আইভরি টাই-পিন?” প্রায় চিৎকার করে উঠি। মেসেরেং-এর দেওয়া এক্সেশির স্টেশনের “ফর রিমেমব্রান্স অ্যাণ্ড এ মেমেন্টো ফ্রম ইয়োর টার্কীশ ফ্রেন্ড মেসেরেং” টাই-পিনটা আর নেই। সাদা ছোটো ডানা মেলে আছে একটা বক। হাঁটুর ব্যথা ভুলে গেলাম। বাথাটা অনুভব করলাম হৃদয়ের নিভৃত এক কোণে।

“ওয়াজ ইট এ ভেরি কস্ট্‌লী থিং?”

“ইয়েস ডক্টর ইট ওয়াজ। ইট ওয়াজ ইনভ্যালুয়েবল।”

“ইউ মে ট্রাই অ্যাণ্ড বাই ইট হিয়ার”, ডাক্তারের কথায় সমবেদনার সুর।

বিড় বিড় করে উত্তর দি “নো ডক্টর, ইট কুড নট বি হ্যাড্‌ ফর মানী।”

ডাক্তার এবার নিজের খুশিমতো একটা মানে করে নিয়ে আশ্বাস দেন “আই অ্যাম শিওর শী উইল গিভ ইউ আনাদার ওয়ান”। আমার কাছ থেকে কোনো জবাব না পেয়ে ডাক্তার প্রশ্ন করেন আমি আমার কোনো আত্মীয়-স্বজনকে খবর দিতে চাই কি না? হাসপাতালের খরচায় তা পাঠানো যেতে পারে। ডাক্তারকে ধন্যবাদ জানিয়ে বললাম, না তার দরকার নেই। একটু আমতা আমতা করে ডাক্তার আমায় স্বরণ করিয়ে দেন যে, অজ্ঞান অবস্থায় আমি কয়েকটা নাম করে চিৎকার করেছি আর তিনি তাই

মনে করেছিলেন যে, তারা আমার ‘নিয়ার অ্যাণ্ড ডিয়ার ওয়ানস্’। নামগুলো ডাক্তারের মনে নেই, কিন্তু আমায় জিজ্ঞাসা করলে আমি ঠিক বলতে পারতাম, আমি ডেকেছি গুল্শন্ বহেনকে, ইরশাদ ভাইকে, হঠাৎ-পাওয়া মেসেরেংকে, ইস্তানবুলের রিয়াকে, জন খমাসকে, আর মা-মা—মাগো বলে কেঁদেছি।

কি ভাবায় ডাক্তারকে আর তার স্টাফকে ধন্যবাদ জানানাবো ভেবে পাচ্ছিলাম না। শুধু সজোরে তার হাত দুটো চেপে ধরেছিলাম। হাসপাতাল থেকে বের হবো, হঠাৎ একটা কথা মনে হওয়ায় আবার ফিরে যাই ডাক্তারের কাছে। জিজ্ঞাসা করলাম সিরিয়ান ক্রটিয়ার পুলিশের অফিসারটি কে, যিনি আমায় হাসপাতালে পৌঁছে দেন আর সামান্য একটা ধন্যবাদের অবকাশ আমায় না দিয়েই চলে যান? ডাক্তার বলতে পারলেন না। অনেক খোঁজ পরে করেছি, কিন্তু খোঁজ পাইনি। সিরিয়া ছাড়বার সময় শুধু পুলিশের বড় সাহেবকে তাঁর এক নাম-না-জানা কর্মচারীর সাহায্যের জন্য ধন্যবাদ আর কৃতজ্ঞতা জানিয়ে আসি।

সেই দিন সন্ধ্যাবেলা চলে যাই খাবাজ লাহেবের ‘ক্যাসিয়ান হোটেলে’। প্রাতরাশ সেরে লাউঞ্জে আসতেই টোনীকে জিজ্ঞাসা করলাম আমাদের দেশের কনসুলেটটা কোথায়। ঠিকানা নিয়ে পৌঁছলাম কনসুলেটে আর আধ ঘণ্টাটেক অপেক্ষা করার পর ডাক পড়লো শার্জ-দ-আফায়ার সাহেবের খাস কামরায়। সময় না নষ্ট করে তাঁকে জানালাম আমার অবস্থাটা। বললাম যে, আমার কাছে সাত দিনের ট্রান্সিট ভিসা ছিল এবং তার তিন দিন হাসপাতালেই কেটে গিয়েছে। আমার ট্রাভেলার্স চেক সিরিয়ার জন্য ‘ভ্যালিড’ (Valid) নয়। আর যা কিছু সিরিয়ান কারেন্সী আমার কাছে ছিল তা হারিয়ে গিয়েছে। সুতরাং আমায় কিছু নগদ সিরিয়ান কারেন্সী ধার দিতে হবে, আর আজই। কারণ তিন দিন পরে আমি ‘বাই রোড’ বাগদাদে ফিরে যাবো আর সময়মতো না ফিরতে পারলে বসরায় জাহাজ ধরা আমার মুশকিল হবে। অবশ্য একটা অপ্রিয় কথা তাঁকে আর বললাম না। সেটা হচ্ছে হাসপাতাল থেকে ক্রমাগত তিন দিন ফোন করা হয়েছিল আমাদের কনসুলেটে, কিন্তু সেখান থেকে কোন সাহায্য তো

দূরে থাক, কোনো উত্তরই হাসপাতালের কর্তৃপক্ষ পাননি। এই লজ্জার আর অকর্মণ্যতার কথা তাঁকে মনে করিয়ে দিলে আমার কাজ হবার কোনো সম্ভাবনাই ছিল না।

অনেকক্ষণ চিন্তা করে আর গোটা দুয়েক সিগারেট ধূস করে শার্জ-দ-আফায়ারস গম্ভীরভাবে জানালেন যে, তাঁর পক্ষে এটা করা সম্ভব না।

পাসপোর্টে লেখা প্রেসিডেন্ট অব্ ইণ্ডিয়ান রিপাবলিকের আদেশ,—

“These are to request and require in the name of the President of the Republic of India all those whom it may concern to allow the bearer to pass freely without let or hindrance, and to afford him or her every assistance and protection of which he or she may stand in need”.

নিজের অধিকার সম্বন্ধে এবার সচেতন হয়ে জিজ্ঞাসা করলাম, “কেন না?”

“দেখুন, অনুবিধাটা হচ্ছে আমি একজন শার্জ-দ-আফায়ারস, অর্থ সাহায্য করার ক্ষমতা আমার সব ক্ষেত্রে নেই।”

“সব ক্ষেত্রে না থাকুক, আমার ক্ষেত্রে অন্তত করুন।”

“একটু মুশকিল হবে।”

ঠিক আছে, আমি এখানে বিনা ভিসায় পড়ে থাকবো, কারণ আমার ভিসা ফুরিয়ে যাবে। সিরিয়ান কারেক্সী আমার কাছে নেই, সুতরাং হোটেলের বিল বা বাগদাদ যাবার মোটরের ভাড়াও আমার নেই। এই সব মিলে একটা গোলমালের সৃষ্টি হলে কি ভালো হবে?

আফায়ারস মশাই এবার আমার কথা শুনে একটু ভড়কে গেলেন। “আপনি দু’মিনিট অপেক্ষা করুন” বলে আপিসের ভিতরে চলে গেলেন অস্ফাফ কর্মচারীদের সঙ্গে পরামর্শ করতে। মোটা একটা বই হাতে খানিক পরে প্রায় ‘ইউরেকা, ইউরেকা’ মনোভাব নিয়ে শার্জ-দ-আফায়ারস সাহেব বেরিয়ে এসেই ঘোষণা করলেন, পেয়েছি। “দি ডিক্লারান্টি ইজ সলভড্।”

যে ‘ডিক্লারান্টি’ এখন সলভ্ হয়নি তা হঠাৎ কিভাবে সলভ্ হয়ে গেল ঠিক বুঝে উঠতে পারছিলাম না। কি করে হলো তা

দিয়ে আমার দরকার কি? আমার কাজ হলেই আমি খুশি।

“আপনাকে আমরা ডেস্টিটিউট ডিক্লেয়ার করে ভারতবর্ষে রিপ্যাট্রিয়েট করে দেবো—” আফায়ারস মশাই বেশ খানিকটা উৎসাহের সঙ্গে জানানেন।

“অ্যা? ডেস্টিটিউট।”—আকাশ থেকে পড়লাম।

“দেখুন স্যার, প্রথম কথা আমি ডেস্টিটিউট মোটেই না। আমার ট্রাভেলারস চেকে এখনও বেশ কিছু টাকা আছে আর ‘রিপ্যাট্রিয়েট’ হয়ে দেশে ফেরত যাবার অর্থ আমি খুব ভালোভাবেই জানি। দ্বিতীয়ত আমার এখনো আরো বেশ কিছুদিন ঘোরা বাকি আছে।” রাগে আমার গা জ্বালা করতে লাগল।

“তাহলে আমরা আর কি করতে পারি বলুন?” স্যার বিনয় দেখান।

“আপনারা অনেক কিছু করতে পারেন। আমায় আপনারা কিছু টাকা ধার দিন। আমি বাগদাদে পৌঁছে আমার চেক ক্যাশ করে বাগদাদে এম্বাসীতে জমা করে দেবো।”

আবার পরামর্শ।

ব্যাপারটা বেশ একটু ঘোরালো হয়ে উঠছিল আর অপ্রিয়ও। তাই দেখে স্টাফের একজন বললেন যে, তিনি ব্যক্তিগতভাবে আমায় টাকা ধার দিতে পারেন। ব্যক্তিগতভাবে আর সরকারী-ভাবে যেভাবেই হউক আমার টাকা নিয়ে কথা! আমি রাজী। কিন্তু এবার আফায়ারস সাহেবের আত্মসম্মানে একটু আঘাত লাগল আর তিনি হেসে ঘোষণা করলেন যে, তাঁর বিশেষ অধিকারের প্রয়োগ করে টাকা তিনি আমায় দেবেন, কিন্তু টাকা যেন আমি বাগদাদে গিয়েই জমা করে দিই।

টাকা পেলাম। গোটা ছয়েক সহই করলাম আমার যা কিছু আছে সব প্রায় বন্ধক রেখে, অস্তুত কাগজে। ব্যাপারটা হয়তো এখানেই শেষ হতো, কিন্তু তা হলে আমাদের ‘ফরেন আফায়ারস’ দপ্তরের কর্মক্ষমতার পরিচয় তো পেতাম না।

টাকা জমা করে দিয়েছিলাম বাগদাদে পৌঁছেই। তার মাস ছয়েক পরে যখন দেশে ফিরেছি একদিন মধ্যপ্রদেশ গভর্নমেন্টের আশুতার-সেক্রেটারী কৃষ্ণ সাহেব আমায় ডেকে পাঠান। তিনি

জানালেন যে, আমি ধার-করা টাকা না ফেরত দেওয়াতে একটা বিশ্রী অবস্থায় সৃষ্টি হয়েছে।

পা থেকে মাথা পর্যন্ত জ্বলে উঠলো। কৃষ্ণ সাহেবকে বললাম টাকা আমি ফেরত দিয়েছি আর তার রসিদ আমার কাছে আছে। পরে হিসাব করে দেখতে এই পাওয়া গেল যে, কারেন্সী এক্সচেঞ্জের দৌলতে আমি প্রায় টাকা দশেক বেশিই দিয়েছি।

আমার রিটার্ন জার্নির সময় আমি সিরিয়ায় এসেছিলাম। প্ল্যান ছিল, না থেমে সোজা সিরিয়ান মরুভূমি পাড়ি দিয়ে আবার যাবো বাগদাদে আর সেখান থেকে আবার শুরু করবো আমার বাকি যাত্রাটুকু। হাঁটু আমার জখম হয়েছে ক্ষতি নেই। হাঁটুর ব্যথা যখন মাঝে মাঝে ওঠে দামাস্কাসের স্মরণীয় তিন দিনের কথাও আমার মনে হয়। আরো মনে হয় টোনীকে, নোর্মাকে, ক্যারীকে, খাব্বাজ সাহেব আর তাঁর ‘সুইট হার্ট ইভেন অ্যাট ফিফটি ফোর,’ স্থালীকে আর ‘ফ্রাঁসে মশেঁয়’ পোর্টার আবদুলকে। দামাস্কাসে আমি জীবনের যৎসামান্য রমণীয় মুহূর্তের মধ্যে কিছু মুহূর্ত কাটিয়েছি। অনূর্বর, তপ্ত, শুষ্ক মরুপ্রান্তরের বুকে দামাস্কাস আমার ভালো লেগেছিল আর ভালো লেগেছিল সিরিয়ার আরবদের, তাদের ইতিহাসকে, তাদের ঐতিহ্য, শিল্প আর সভ্যতাকে। মরুপ্রান্তরের বালুরাশি ঠেলে উঠছে নতুন সিরিয়া—নতুন সিরিয়া, যেখানে আরবরা বুক ফুলিয়ে গাইবে সিরিয়ার জয়গান। ফ্রেঞ্চ বেয়নটের সামনে মুখ নিচু করে দাঁড়িয়ে আর ‘লা মারসাইয়ে’ শুনতে হবে না দামাস্কাসের রাজপথে। নতুন সিরিয়ার বুকে আবার উঠছে নতুন দামাস্কাস—‘দি ওয়ার্লডস মোস্ট অ্যানশিয়েন্ট সিটি।’

মিডিল ইস্টের অগ্ন্যাগ্ন দেশের মতো সিরিয়ার ইতিহাসও রক্তে রঞ্জিত। একের পর এক আক্রমণকারীরা সিরিয়ার উপর অভিযান চালিয়েছে—ইউরোপের ক্রুসেডারস, আলেকজান্ডার, তৈমুরলঙ, অটোমান সুলতান, রোমান সৈন্য, আরো অনেকে। তারপর ১৯২০ সালে এসেছে ফরাসীরা আর রাজত্ব করেছে দীর্ঘ ছাব্বিশ বছর। ছাব্বিশ বছরের সেই সময়কে সিরিয়ানরা ‘কালো ইতিহাস’ বলে। জেনারেল বেয়নতের দামাস্কাসের উপর বোমা বর্ষণ সিরিয়ানরা আজও মনে রেখেছে। পশ্চিম এশিয়ার রাজনীতির সঙ্গে সিরিয়ার রাজনীতিও জড়ানো আর তাই বাকি আরব দেশের মতোই

সিরিয়াতেও শান্তি এসেছে রক্তের বন্যার মধ্যে দিয়ে। গভর্নমেন্টের পর গভর্নমেন্ট বদলেছে আর তাদের সঙ্গে এসেছে নতুন নতুন আইনকানুন, খেয়াল আর নিয়ম। সিরিয়ান জনতা কখনো সহ্য করেছে কখনো করেনি। যখন সহ্য করবার সীমা ছাড়িয়ে গিয়েছে ক্রুদ্ধ জনতার রোষে গভর্নমেন্টের পর গভর্নমেন্ট বদলে গিয়েছে। বিংশ শতাব্দীর পরিবর্তনশীল পৃথিবীতে মিডিল ইস্টেও পরিবর্তন হচ্ছে আর তার সঙ্গে বদলাচ্ছে সিরিয়া। ‘মোস্ট অ্যানশিয়েন্ট’ সিটি দামাস্কাস সেই সব পরিবর্তনের মধ্যে আজও দাঁড়িয়ে আছে। সিটি অব পামস্, বাইবেলের টাডমোর আজও দাঁড়িয়ে আছে ধ্বংসস্তূপের মাঝে পামিরা গ্রামের কিছু দূরেই। আলেক্সোয়ার সিটাডেল, নিউ টেম্‌স্টামেন্টের স্টেট স্ট্রীট, স্বর্ণ-নদী বরোদা, ওমরাদের মসজিদ, যা অতীতকালে হাদাদ আর জুপীটারের মন্দির ছিল, সেন্ট পলের গবাক্স, বার্জ আর স্কুনের পাহাড় আজো মনে করিয়ে দেয় অতীতের সিরিয়াকে। আজকের দামাস্কাস আর আলেক্সো তার ঝকঝকে রাস্তা, কফে, ব্লাইট ক্লাব, উচু-উচু অট্টালিকা, স্ট্রিমলাইণ্ড মোটর, পাশ্চাত্য সত্যতার ছোঁয়াচ-লাগা নরনারী—সব মিলিয়ে চিরপুরাতনের মাঝে দাঁড়ানো নতুন সিরিয়াকে ভালো লাগে।

সাতষট্টি বছরের বৃদ্ধ সিরিয়ান প্রেসিডেন্ট শুকরী-অল্-কোয়াটলী আজ আরব জাগৃতির প্রতীক। জীবনের বহু বছর তিনি কাটিয়েছেন কারাগৃহে আর ছ’বার তাঁর হয়েছিল মৃত্যুদণ্ড। ইস্তানবুলে যখন তিনি পড়তেন পুলিশের খাতায় তাঁর নাম ছিল ‘ডেঞ্জারাস অ্যাজিটেটর’। সিরিয়ার রাজনীতিতে বিপর্যয় অনেকবার এসেছে আর প্রতিবারই শুকরী-অল্-কোয়াটলীর ডাক পড়েছে সিরিয়াকে বাঁচাবার জন্তে। কর্নেল হুসনী জয়িমের Coup. d’etat-এর পর কোয়াটলীকে পালাতে হয় দেশ ছেড়ে। আবার কিছুদিন পরে কর্নেল হিনায়ি আর তাঁর দলের হাতে মৃত্যু হয় জয়িমের। কিন্তু হিনায়িও থাকলেন না বেশি দিন, এলেন কর্নেল শিশকলী। ১৯৪৯ থেকে ১৯৫৫ পর্যন্ত তিনবার গভর্নমেন্ট বদলে গেল আর শেষে জনতা তাদের প্রিয় নেতা শুকরী-অল্-কোয়াটলীকে আবার ফিরে পেলো দেশের কর্ণধাররূপে। কোয়াটলী সিরিয়ার

প্রেসিডেন্ট না হলে সিরিয়া যে আজ কোন্ শিবিরে যোগ দিতো তা বলা কঠিন।

আমি যখন সিরিয়ায় তখন সিরিয়ার প্রেসিডেন্ট কর্নেল শিশক্লী। সেদিন সকালে বসে যখন টোনির সঙ্গে আলাপ হচ্ছিল, বেশ অমুভব করছিলাম টোনি বলতে চায় অনেক কিছু, কিন্তু বলতে পারছে না কিছুই। কিসের একটা ভয় ওকে চেপে ধরেছে। ইতিহাসের ছাত্র টোনি, নিজেকে বলে সোস্যালিস্ট। স্বাধীনতার স্বাদ পেয়েছে, কিন্তু সে ব্যথা পায় যখন ভাবে স্বাধীনভাবে সব কিছু বলতে গেলে বিপদকে ডেকে আনবে। টোনি কিন্তু জানতো শিশক্লী বেশিদিন টিকবেন না। ও ঠিকই জানতো আর টোনির মতোই আরো অনেক সিরিয়ানরাই তাই ভাবতো।

সিরিয়ান গভর্নমেন্টের এক মন্ত্রীসঙ্গে সাক্ষাতের অভিপ্রায় জানাতে একজন সরকারী কর্মচারী বললেন যে, ছ’দিন পরে দেখা হতে পারে। “ছ’দিন? একটু দেরি হয়ে যাবে না?” তাঁকে জিজ্ঞাসা করলাম।

“হোয়াই? ডু ইউ ফিয়ার হি ওন্ট বি ইন পাওয়ার টিল দেন?” বলে কর্মচারিটি হেসে ওঠেন। টোনি ঠিকই ভেবেছিল। শিশক্লীর সিংহাসন কিছুদিন পরেই ওণ্টায়। টোনি হয়তো সেদিন প্রাণ খুলে কথা বলেছিল।

টোনির সঙ্গে অনেক কথাই হলো। নতুন বিয়ে করেছে টোনি, তাই রঙীন স্বপ্নে বিভোর। যতবারই ওর স্ত্রী আমাদের সামনে দিয়ে যায়, টোনি আমায় জিজ্ঞাসা করে, “ইজন্ট শী বিউটিফুল?” টোনিদের ক্যাসিয়ান হোটেলটাও একটু অল্প ধরনের। মিঃ খাব্বাজ বৃদ্ধ বয়েসে কিছু একটা করতে হবে তাই হোটেল খুলে বসেছেন। এমন কিছু বেশি লোকও থাকে না আর খাব্বাজ সাহেবের তার জন্তু কোনো চিন্তাও নেই। বেশি ভিড় তিনি অপছন্দ করেন। টোনি বললো, “আমরা তো থাকিই। কিছু ঘর খালি পড়ে আছে তাই কখনও কখনও টুরিস্টরা আসে।” একটু মস্করা করে টোনি—“আওয়ারস ইজন্ট দি ইউনুয়াল টুরিস্ট হোটেল।”

“হাউ?” ওকে জিজ্ঞাসা করি।

“উই আর নট দি লেগ্‌স-পেগ্‌স অ্যাণ্ড এগ্‌স টাইপ।”

“নট ইভেন পেগ্‌স অ্যাণ্ড এগ্‌স্‌!”

“এগ্‌স্‌ উই উইল গিভ ইউ অ্যাণ্ড পেগ্‌স্‌ ইউ ক্যান হ্যাভ উইথ মি।”

বেশ লেগেছিল টোনীকে, ক্যারীকে আর নোর্মাকে। ওদের সঙ্গে তিনদিন কেটে গিয়েছিল তিন মিনিটের মতো। যেদিন চলে যাবো সেদিন কেবলই মনে হয়েছে আরও কিছুদিন থাকলে ভালো হতো। ‘হিন্দিস্তান’ সম্পর্কে অফুরন্ত প্রশ্নের ঝুলি ‘সুইটহার্ট ইভেন অ্যাট ফিফটি-ফোর’ মিসেস স্থালী খাব্বাজের কাছে। আমাদের শহরের বড় রাস্তার উপর দিয়ে রাতদিন বাঘ যাতায়াত করে কিনা, মাথার বালিশের নিচে সাপ নিয়ে আমি শুই কি না, যাছ দিয়ে মেয়েদের বশ করা হয় কি না, এই রকম এস্তার মার্কিনী প্রশ্নের উত্তর আমায় তাঁকে দিতে হয়েছে। একদিন সকালে এসে জানানেন যে, তিনি আজ আমায় ‘টিপিক্যাল’ আরব ‘ডীশ’ খাওয়াবেন। জিজ্ঞাসা করলাম ডীশটি কী? জবাব পেলাম ‘সাওয়ার মিক্ক’। খাওয়ার সময় দেখি ওমা, এতো দই! সুষ্মাতি করে বললাম, আমরাও দই খাই। শুনে তো মিসেস খাব্বাজ অবাক। সবাইকে ডেকে জানান, “হিন্দিস্তানে এরাও সাওয়ার মিক্ক খায়।” আগে মিসেস খাব্বাজ আমায় একটু কমই আমল দিতেন, কিন্তু সাওয়ার মিক্কের দৌলতে তাঁর সঙ্গে ঘনিষ্ঠতা বেশ বেড়ে উঠলো আর সকাল সন্ধ্যা সাওয়ার মিক্ক খেতে খেতে আমার প্রাণান্ত।

আর টোনী। ইতিহাসের ছাত্র, এবার পড়বে আইন। এতদিন হয়তো টোনী আইন পড়ে দামাস্কাসের কোর্টে কোর্টে ঘুরে বেড়াচ্ছে ব্রীফ নিয়ে। টোনীর আইন পড়ার শখ, তাই উকিলদের সম্বন্ধে একটা অতি পুরনো রসিকতা ওকে শুনিয়েছিলাম। শুনে ওর বোন নোর্মা খিলখিল করে হেসে উঠেছিল। সন্ধ্যাবেলা সেদিন সবাই আমরা হোটেলের লাউঞ্জে বসেছিলাম। বৃদ্ধ খাব্বাজ সাহেব ছিলেন খুশ মেজাজে। স্থান কাল পাত্র ভুলে গিয়ে নিজের জীবনের অনেক কথাই শোনাচ্ছিলেন। মাঝে মাঝে স্থালী উঠছিল ক্লেপে আর লজ্জায় ক্যারী আর নোর্মা পোর্ট-এর গ্লাশের মধ্যে মুখ লুকোচ্ছিল।

খাব্বাজ সাহেব আমায় জিজ্ঞাসা করলেন টোনীর আইনজীবী হবার ইচ্ছা সম্বন্ধে আমার কি মত? টোনী আমায় আগেই বলেছিল খাব্বাজ সাহেব চান সে আর্মিতে যোগ দেয়। কি উত্তর

দেবো ভাবছি, এমন সময় টোনী বলে উঠলো যে, আইনজীবীর কাজ অনেক সহজ।

একটা ‘মোকা’ পেয়ে বললাম—“হ্যাঁ, সত্যি। আইনজীবীর কাজ অনেক সহজ। ইফ ইউ হ্যাভ ল অন ইওর সাইড হ্যামার ইট ইনটু দি ব্রেন অব দি জাজ। ইফ ফ্যাক্টস আর্ উইথ ইউ হ্যামার ইট ইনটু দি ব্রেন অব দি আদার কাউন্সেল।”

“বাট সাপোজ ইউ ডোন্ট হ্যাভ আইদার”, খাব্বাজ সাহেব হেসে জিজ্ঞাসা করেন।

“দেন, হ্যামার দি টেবল।”

খিলখিল করে হেসে উঠলো নোর্মা “মঁ দিউ, মঁ দিউ। টোনী, ইফ ইট ইজ অ্যাজ ইজি অ্যাজ অল ছাট্, ইউ শুড্ ডু ইট্।”

“লেট আস্ হ্যাভ এ ড্যান্স্” ব্যাপারটাকে ঘোরাবার জ্ঞান প্রস্তাব করে ক্যারী আর টোনী রেডিওগ্রামটা খুলে দিয়ে।

ধীরে ধীরে ওয়ালটজ্ বেজে ওঠে। নোর্মাকে ড্যান্স প্রপোজ করাতে সে একটু আশ্চর্য হয়ে জিজ্ঞাসা করে, “ডু ইউ রিয়েলী ড্যান্স্ ইন ইণ্ডিয়া” ? আমি আর নোর্মা, টোনী আর ক্যারী, খাব্বাজ আর স্মালী। হোটেলের বড় হলের মোসেক ফ্লোরের উপর আমরা ছোট ছোট পদক্ষেপে ঘুরে বেড়াচ্ছি। নোর্মার মুখের উপর এসে পড়েছে নিয়নের সবুজ আলোটা, আরো সুন্দর দেখাচ্ছে ওকে। আলগোছভাবে বাঁ হাতটা রেখেছে আমার কাঁধের উপর, ডান হাতের আঙুলগুলো ছুঁয়ে রয়েছে আমার বাঁ হাতের কয়েকটা আঙুলে। “ইউ ড্যান্স্ সো ওয়েল” নোর্মা আস্তে আস্তে বলে। ধন্যবাদ জানিয়ে গতিটা একটু বাড়িয়ে দি। টোনী আর ক্যারী এক কোণে ‘ক্লোজ’ ড্যান্স্ করছে আর হলের মধ্যে বৃদ্ধ খাব্বাজ আর ‘সুইটহার্ট ইভেন অ্যাট ফিফটি-ফোর’ স্মালী স্টেপ গুণে গুণে মন্তরগতিতে চলেছেন...ওয়ান টু, ওয়ান টু, ওয়ান...।

রেকর্ড বদলায়। শুরু হয় ট্যাক্সো...“দেয়ার ওয়ার স্টারস ইন ইওর আইজ, স্টারস ছাট প্লেড দি ফ্লেমিঙ্গো”।

টোনী আর ক্যারী আরো ক্লোজ। “আই লুকড্ ফর ইয়োর চার্মস বাট ইউ টুক মী ইন ইওর আর্মস।” টোনী আর ক্যারী আরো কোনে সরে যায় আর ক্যারী টোনীর আর্মসের মধ্যে চলে আসে। একদৃষ্টে নোর্মা দেখছিল ওদের। হঠাৎ আমার সঙ্গে

চোখাচোখি হতেই গালটা লাল হয়ে পড়ে। আলগোছা বাঁ হাতটা আমার কাঁধের উপর আরেকটু নিবিড় হয়ে আসে, আমার বাঁ হাতে ছোঁয়া ওর ডান হাতের আঙুলগুলো আরেকটু চেপে বসে।

দ্রুত চলেছে সঙ্গীত আর আরো দ্রুত নেচে চলেছি আমরা। হঠাৎ হাঁটুটা চাড়া দিয়ে উঠলো। বেশ বুঝতে পারলাম আমার স্টেপ ভুল হচ্ছে। হাঁটুর যন্ত্রণায় আমার কপালে ঘাম দেখা দিলো। “এক্সকিউজ মি” বলে ঝটকা মেরে নোর্মাকে ছেড়ে অদূরেই রাখা একটা সোফায় গা এলিয়ে দিলাম। নোর্মা দাঁড়িয়ে আছে ফ্লোরের মধ্যে একা, কোণে টোনী আর ক্যারী। খাবাজ আর শ্রালী পাশের ঘরে চলে গিয়েছেন। নোর্মা দৌড়ে এল জলের একটা গ্লাস নিয়ে। রেকর্ডের গানটা তখনও কানে আসছে আবছা, আবছা, হাঙ্কা শুরে :—

“হোয়াই গুড আই গো হোম
হোয়েন ইউ আর নট প্রিপেয়ার্ড টু কিস্
মি গুড-বাই,
সো ডোন্ট মাই মাইণ্ড হ্যাঙ্গিং অ্যারাইণ্ড
ইফ আই ডোন্ট গো হোম...”

পরের দিন সকালে উঠে বেশ একটু লজ্জা পেলাম। মিসেস খাবাজ এসে শুধালেন শরীর কেমন আর জানিয়ে গেলেন যে, নোর্মা রাতে অনেকক্ষণ আমার জন্তো জেগে বসেছিল। হাসিমুখে নোর্মা এসে জানালো “বঁ জুর”। পোর্টার আবদেল জানায় ট্যাক্সি তৈরি। সিরিয়া আজ আমায় ছেড়ে যেতে হবে।

সিঁড়ি দিয়ে নেমে এল নোর্মা, টোনী আর ক্যারী। বিদায় জানালো সবাই আন্তরিকতার সঙ্গে। আবদেলকে বলি “অরভায়র আবদেল?” হেসে গড়িয়ে আবার বত্রিশ পাটি দাঁতের এগজিভিশন দেখিয়ে আবদেল হাততালি দেয় “মর্শেয় ফ্রাঁশে”।

টোনী হ্যাণ্ডব্যাগে গুঁজে দেয় এক বোতল বিয়ার “আই টোল্ড ইউ পেগস অন মি”।

“গুডবাই টোনী, গুডবাই নোর্মা, গুডবাই ক্যারী” আবেগের সঙ্গে ওদের হাতে ঝাঁকুনি দিয়ে উঠে পড়ি ট্যাক্সিতে। সজল চোখে দাঁড়িয়ে আছে ওরা তিনজন। ট্যাক্সি চললো নৈরান ট্রান্সপোর্ট কোম্পানীর ডিপোতে। তিন দিনের চেনা দামাস্কাস,

ক্যাসিয়ান হোটেল, নোর্ম, টোঁনী, ক্যারী, স্ত্রালী, খাবাজ আর আবদেল সব পড়ে রইলো পিছনে। আমি চললাম মরুপ্রান্তরের বৃকের উপর দিয়ে দামাস্কাস থেকে বাগদাদ।

ভেরো

সিরিয়ান মরুভূমির বৃক চিরে গোঙাতে গোঙাতে চলেছে নৈরান ট্রান্সপোর্ট কোম্পানীর ওভারল্যাণ্ড ডেজার্ট মেল। মাইলের পর মাইল শুধু বালি আর বালি। মাঝে মাঝে অতিকায় দানবের মতো বালির এক একটা স্তম্ভ ঘূর্ণি হয়ে আকাশে ওঠে আর বাসের সামনে আছড়ে পড়ে। সামনে, পাশে, পিছনে যেকোনো তাকাও শুধু বালি আর বালি। ক্রুদ্ধ আক্রোশে গৌঁ গৌঁ করে কাঁচের জানলার উপর ধাক্কা মারে আগুন-বাতাস। সিগারেটের টুকরো ফেলবার জন্তে জানলার শার্সি খুলতেই হাজার হাজার তপ্ত লৌহশলাকা চোখে এসে বেঁধে আর বাকি যাত্রীরা হৈ হৈ করে ওঠে। চক্রবালের কোল ঘেঁষে দেখতে পাই, রূপোর মতো চিক্ চিক্ করছে ঝিল্। বাস এগোয় আর দূরে বহুদূরে চলে যায় রূপোর ঝিল্। মরুভূমির বৃকে মরীচিকার লুকোচুরির খেলা চলে সমানে। ‘বাগদাদ হুজু দূর অন্ত।’ বাগদাদ এখনো অনেক দূরে।

প্রথম মহাযুদ্ধের সময় মেজর নৈরান অনেক ঘোরাফেরা করেন সিরিয়া আর ইরাকের আশে পাশে। চারশ’ মাইল বিস্তৃত সিরিয়ান মরুভূমি দিয়ে যখনই মিলিটারী কনভয় নিয়ে তিনি গিয়েছেন, কেবলই মনে হয়েছে, অল্-শাম্ (দামাস্কাস) আর বাগদাদের মধ্যে ট্রান্সপোর্ট সার্ভিস-এর সম্ভাবনার কথা। বছরের পর বছর কাটিয়েছেন সার্ভেতে আর যুদ্ধের পর মিলিটারী থেকে অবকাশ নিয়ে তাঁর স্বপ্ন বাস্তবে পরিণত করলেন—‘নৈরান ট্রান্সপোর্ট কোম্পানী লিমিটেড ওভারল্যাণ্ড ডেজার্ট মেল।’ এয়ার-কন্ডিশন পুলম্যান, সেকেন্ড ক্লাস এক্সপ্রেস, আর টুরিস্ট ক্লাশ সার্ভিস চলে মরুভূমির বৃকের উপর দিয়ে। স্পেশাল ডিজাইনের বাস, প্রায় ছোটোখাটো একটা ট্রেনের মতোই। দামাস্কাস থেকে চড়ো বাসে ছপ্পর ১১টায়, পরের দিন প্রায় ছপ্পর বারোটায় পৌঁছে যাবে বাগদাদ। লাঞ্চ আর ডিনারের বন্দোবস্ত বাসেই।

ছোট ছোট কাগজের বাস্ত্রে রাখা আছে ডাই লাঞ্চ আর ডিনার। বাসের সঙ্গে লাগানো ট্যাঙ্ক থেকে যাত্রীদের জন্ত জল সাপ্লাই-এর বন্দোবস্ত আছে। বালির বুক ভেঙে চলে বাস। রাস্তা ঘাটের বালাই নেই, অভ্যাসের উপর নির্ভর করে গাড়ি চালায় সাহসী ড্রাইভার। রাস্তা থাকবে কোথা থেকে? বাস চলার দরুন যদি বা তৈরি হয় বালির ঝড়ে হু'মিনিটের মধ্যেই তা চাপা পড়ে বালির স্তূপের নিচে। কোথাও রাখা একটা কালো ডাম বা পোঁতা একটা পোল—রাস্তা চিনে নেবার পক্ষে ড্রাইভারদের জন্তে এই যথেষ্ট।

দামাস্কাস ছেড়ে অনেকদূর চলে এসেছি কিন্তু সঙ্গে নিয়ে চলেছি অনেক স্মৃতি। শেষ 'চেক পোস্টে' পাসপোর্ট দেখা হয়ে গেল। ধীরে ধীরে চলেছিল বাগদাদের দিকে—হারুন-অল-রশীদ আর আরেবিয়ান নাইটস্-এর বাগদাদ। আলাউদ্দিনের চিরাগ আর বোতলের ভূত (জিন)-এর বাগদাদ। হলিউডের চিত্র নির্মাতাদের কাহিনীর অফুরন্ত ভাণ্ডার—বাগদাদ। "রাজা হিরাক্লিউস (Heraclius) যখন আরবদের আক্রমণে সিরিয়া ছেড়ে পালান, সীমাস্তুর কাছে এসে একবার ঘুরে দাঁড়িয়ে দেখেন ছেড়ে-আসা অল্ শাম্-এর দিকে আর বলেন, "ফেয়ারওয়েল সিরিয়া। হোয়াট অ্যান এক্সপ্লেন্ট কান্ট্রি দিস্ ইজ ফর দি এনেমী।"

আমি মনে মনে শুধু বললাম, "ফেয়ারওয়েল সিরিয়া। সী ইউ এগেন।"

চল্লিশজন যাত্রী আমরা বাসে, বেশির ভাগই আরব। আমার পাশে বসে এক পাত্রী—ফাদার জোনাথান দামাস্কাস থেকে চলেছেন বাগদাদে মিশনারী কাজে। জীবনের অধিকের বেশি কাটিয়েছেন মিডল-ইস্টে। সুন্দর আরবী বলেন। বাসের বেশির ভাগ যাত্রীই দেখলাম তাঁকে চেনে আর বেশ খাতিরও করে। মাথার উপর সূর্যদেব উঠেছেন আর বাসের ভিতরটাকে মনে হচ্ছে আগুনের বয়লার। সব যাত্রীরা যখন গরমে ত্রাহি ত্রাহি করছে আর গেলাশের পর গেলাশ জল খাচ্ছে ফাদার জোনাথান নির্বিকারভাবে বসে আছেন। মাঝে মাঝে এদিক ওদিক তাকান আর মুহূ হেসে পকেট থেকে বাইবেল বের করে পড়তে শুরু করেন। বেলা প্রায় দেড়টার সময় ফাদার জোনাথান তাঁর লাঞ্চ প্যাকেটটা

নিয়ে কোলের উপর রাখলেন। তাঁর দেখাদেখি আমিও শুরু করলাম লাঞ্চ। খেতে খেতেই আলাপ হলো ফাদার জোনাথানের সঙ্গে। “ইউ স্পাক ইংলিশ ছাট ইজ ভেরী ফাইন।” কথায় কথায় আলাপ হয় গভীরতর। বেশ ভালো লাগল ফাদারকে। নিজের ধর্মের, লর্ড আর জিসাস্ ক্রাইস্ট-এর কথা অনবরতই বলেন অগ্ন্যন্ত যে কোনো মিশনারীর মতো। কিন্তু তফাত, ফাদার জোনাথান অগ্ন্য ধর্মের উপর আঘাত করেন না।

স্মাণ্ডউইচে কামড় দিতে দিতে ফাদার জোনাথান প্রশ্ন করেন ভারতবর্ষের নানা সমস্যা সম্বন্ধে। অস্পৃশ্যতা, গান্ধী, নেহরু, নন-ভায়েলেন্স, কম্যুনিজম, মাইনরিটি ইত্যাদি, ইত্যাদি।

“টেল মি, ডু ইউ নো এনিথিং আবাবুট দিস্ আগা খান?” হঠাৎ জিজ্ঞাসা করেন ফাদার জোনাথান।

যৎসামান্য বা কিছু জানতাম বললাম, কিন্তু জোনাথান সন্তুষ্ট হন না। একটা প্রশ্ন শেষ না হতেই আরেকটা প্রশ্ন তৈরি। যতই বুঝিয়ে বলি আমি আগা খাঁ বা তাঁর ছেলে আলী খাঁ’র অনুযাত্রী নই, ফাদার জোনাথান ততই জিজ্ঞাসা করেন, “বাট হাউ ডু দে ওয়ারশিপ হিম অ্যাজ এ গড্?”

“ইট ইজ অল এ ম্যাটার অব ফেথ ফাদার” জবাব দিই।

“বাট হি গ্যান্ডলস, ম্যারিজ এনি নাস্বার অব টাইমস অ্যাণ্ড রানস রেস হর্সেস।”

ফাদার জোনাথানকে এবার একটা পুরানো ঘটনার কথা বলি। অনেক দিন আগে এক ফরাসী সাংবাদিকের সঙ্গে আগা খাঁ’র প্রাইভেট সেক্রেটারীর এই ব্যাপার নিয়ে অনেকক্ষণ তর্কাতর্কি হয়। শেষে জার্নালিস্ট মহোদয় ফাদার জোনাথানের মতো তাঁর শেষ অস্ত্র ছাড়েন “গ্যান্ডলিং, টু মেনী ম্যারেজেস অ্যাণ্ড হর্স রেসিং।”

কিন্তু সে অস্ত্রও বুথাই গেল। প্রাইভেট সেক্রেটারী ছাড়লেন অ্যাটম বোমা,—

“But if God wants to gamble, marry and go horse-racing, why shouldn't he and why should you object?”

“ছাট ইজ এ ফাইন ওয়ান, বাট ইট ডাজ্জন্ট কনভিন্স মি” ফাদার জোনাথান মাথা নাড়েন।

ফাদারকে বললাম যে, এর পরে এক স্বয়ং আগা খাঁই তাকে ‘কনভিন্স’ করতে পারেন।

জন মাস্টার্স-এর ‘ভাওয়ানী জংশন’ পড়েছেন ফাদার জোনাথান আর যদিও তাঁর মতে “ইট ইজ ইমমর্যাল অ্যাণ্ড ভাল্লার”, তবুও অ্যাংলো-ইণ্ডিয়ানদের সম্বন্ধে অশেষ কৌতূহল। জানালাম যে, অ্যাংলো-ইণ্ডিয়ানদের অনেক দিন আগে এক নেতা বলেছিলেন, “দে আর লিভিং মমুমেন্ট অব ব্রিটিশ ডিবচরী ইন ইণ্ডিয়া।”

“থাত ইজ এ লাই” ফাদার জোনাথান এবার রেগে উঠলেন। তাঁর ধমনীতে যে আভিজাতিক ইংরেজ রক্ত প্রবহমান, তা প্রতিবাদ জানায়, কিন্তু পরক্ষণেই আবার মিশনারী মন চারা দিয়ে ওঠে। কথার মোড়টা ঘুরিয়ে ফাদারকে বললাম যে, জন মাস্টার্স আর যা কিছু লিখুন না লিখুন, অন্তত অ্যাংলো-ইণ্ডিয়ানদের রেলের চাকরিতে আধিপত্য সম্বন্ধে যা বলেছেন, তা সত্যিই।

“এখনো কি অ্যাংলো-ইণ্ডিয়ানরা রেলে চাকরি করে?” ফাদার আবার প্রশ্ন করেন। তাঁকে জানাতে হলো যে, অনেক অ্যাংলো-ইণ্ডিয়ানই চলে গিয়েছে। যারা আছে, ধীরে ধীরে তারা বাকি ভারতীয়দের সঙ্গে নিজেদের খাপ খাইয়ে চলার চেষ্টা করছে। হ্যাঁ, এককালে রেলের চাকরিতে অ্যাংলো-ইণ্ডিয়ানদের আধিপত্য ছিল। জুনিয়র কেমব্রিজ পাশ হলেই রেলের চাকরি বাঁধা। এক ইউরোপীয়ান প্রিন্সিপাল রসিকতা করতেন, “ওহ্, দি অ্যাংলো ইণ্ডিয়ানস্? ফাস্ট ফর্ম, সেকেন্ড ফর্ম, থার্ড ফর্ম অ্যাণ্ড দেন প্ল্যাটফর্ম।” হো হো করে হেসে ওঠেন ফাদার জোনাথান।

ফাদার জোনাথানের সঙ্গে গল্প-গুজবে আর যাত্রীদের কলহে ধীরে ধীরে দিনটা কেটে যায়। মরুভূমির উপর নেমে আসে সন্ধ্যা। দিগন্তে আগুনের ভাঁটার মতো সূর্য অস্ত গেল, আর আমাদের ওভারল্যাণ্ড ডেজার্ট মেল থামে। গাড়ির ব্রেক টানতে না টানতে যাত্রীর দল ছড়মুড় করে নামে বালির উপর। কেউ পা ছড়িয়ে শুয়ে পড়ে, আর কেউ মুঠো মুঠো বালি ওড়ায় আকাশের দিকে। যে বালুরাশি এতক্ষণ ভেঁতে যাত্রীদের ত্রাহি ত্রাহি রব ছাড়িয়ে তবে রেহাই দিয়েছিল, সেই বিস্তৃত বালুরাশিই এবার তার শীতল কোলে আশ্রয় দেয় ক্লান্ত-শ্রান্ত যাত্রীদের। আকাশের দিকে চেয়ে শুয়ে রইলাম

অনেকক্ষণ। মাঝে মাঝে সেই শাস্ত্র পরিবেশ ভঙ্গ করে কানে আসে রাইফেলের গুলীর আওয়াজ অনেক দূর থেকে, আর বেতুইনদের হু'-একটা উটের কাফিলা চলে যায় পাশ দিয়ে। খানিকদূর গিয়ে থামবে ওদের কাফিলা, আবার চলবে ভোর হবার আগেই। এদিক-ওদিক ছড়িয়ে বিজ্রাম নিচ্ছে আমাদের বাসের যাত্রীদল। অবোধ্য আরবী ভাষায় তাদের প্রেমালাপ, কলহ আর তর্কাতর্কির ঐকতানের মধ্যে কখন যে ঘুমিয়ে পড়েছি জানতেই পারিনি। ঘুম ভাঙলো ফাদার জোনাথানের ডাকে। আবার শুরু হয় যাত্রা। ফাদার নিজের ক্লাস্ক থেকে ঢেলে দেন গরম চা।

বেলা এগারোটায় বাস থামে। এবার ইরাকের বর্ডার পোস্ট রুতবাতে। পাসপোর্ট, ভিসা, কাস্টমস ক্রিয়ার করে আবার যাত্রা শুরু। আর ঘণ্টা খানেকের মধ্যেই পৌঁছাই বাগদাদে। হারুন-অল-রশীদের বাগদাদ, আরেবিয়ান নাইটস আর থাউজাও অ্যাণ্ড ওয়ান নাইটসের শহর বাগদাদ। “ওয়েল বেস্ট অব লাক”—ফাদার জোনাথান বাড়িয়ে দিলেন তাঁর হাত।

“থ্যাক্স ইউ ফাদার।”

“গড ব্রেস ইউ মাই সন”, গভীর আলিঙ্গন করে বিদায় নিলেন ফাদার জোনাথান আর উঠলেন অপেক্ষমান মিশনের গাড়িতে। আমি এদিক-ওদিক দেখছি জন থমাস এসেছে কি না, হঠাৎ “আহ্লীনওয়া স্তাহ্লীন, আহ্লীনওয়া স্তাহ্লীন” চিৎকার করতে করতে হু’হাত তুলে জন এগিয়ে এসে আমায় জড়িয়ে ধরলো।

জন থমাস বসরার বিরাট ব্রিটিশ ফার্ম-এ চীফ অ্যাকাউন্ট্যান্ট। ওর সঙ্গে আলাপ হয়েছিল ‘টরাস এক্সপ্রেস’-এ যখন আমি বাগদাদ থেকে যাচ্ছিলাম ইস্তানবুলে। টার্কীতে সব সময় আমার সঙ্গেই ছিল জন। টার্কী থেকে ও ফিরে আসে ইরাকে আর আমি চলে যাই ইউরোপ। ফেরার পথে আবার এসেছি আমি ইরাকে আর জন ছুটি নিয়ে বাগদাদে এসেছে অভ্যর্থনা জানাতে।

চারদিন ওর সঙ্গে সারা বাগদাদ শহর চষে ফেলছি। সকাল থেকে আমাদের শুরু হতো টো-টো কোম্পানী আর যখন বাড়ি ফিরতাম তখন বাগদাদ গভীর নিদ্রার কোলে। জন বলতো, “লেট আস্ বীট আপ দি টাউন”। অফুরন্ত ওর শক্তি, ঘুরছে তো ঘুরছেই। হেঁটে, বাসে, ট্যাক্সিতে আমায় বাগদাদ শহরের

অলি-গলি দেখিয়ে তবে দম নেবে। বলে, তোমার সঙ্গে আমিও বাগদাদকে আবার দেখছি।

হাজার হাজার বছর আগের Cradle of Civilisation আর Garden of Eden-এর দেশ প্রাচীন মেসোপটেমিয়ার সঙ্গে আজকের ইরাকের অনেক তফাত। ছ'হাজার বছর আগের হারুন-অল-রশীদেব বাগদাদের সঙ্গে আজকের রাজা ফৈজালের রাজধানী বাগদাদের অনেক তফাত। মেসোপটেমিয়ার বুকে রাজত্ব করেছে একের পর এক সুমেরিয়ান, ব্যাবিলনিয়ান, আসেরিয়ান আর বৈজাণ্টাইন সম্রাটরা। সুমেরিয়ানরা দিয়েছে হস্তলিপি, সময় নির্ধারণের ১২ প্রহর আর জ্যোতিষ বিজ্ঞান, ব্যাবিলনিয়ানরা দিয়েছে সপ্তাশ্চর্যের এক আশ্চর্য ঝোলানো বাগান আর সত্যি মিথ্যে জড়ানো অনেক কাহিনী। আসেরিয়ানরা দিয়েছে পৃথিবীর প্রথম নগরী নিনেভ (Nineveh) শাভীল আরবের তীরে। নিনেভ ধ্বংস হয়েছে আবার গড়ে উঠেছে নেবুচাদনেজরের হাতে (Nebuchadnazar)। ইস্তার (Istar)-এর ফটকের অদূরে মাদ্রুক (Madruk)-এর মন্দির সাগিলার (E-Sagila) কাছের টাওয়ার অব ব্যাবেল আজ হয়েছে নির্বাক। মেডিস (Medes) নৃপতি সাইরাস রয়েছে বাইবেলের পাতায় আর সিকন্দর শাহ্ (Alexandar the great) রয়েছে ইতিহাসের পাতায়। দামাস্কাস থেকে রাজধানী উঠিয়ে নিয়ে এসেছিলেন বাগদাদে খলিফা মনসুর। তারপরে হারুন-অল-রশীদেব কালে বাগদাদ গড়ে উঠেছে ঐশ্বর্যে, বৈভবে আর ঐতিহ্যে। হারুন-অল-রশীদেব রাজপ্রাসাদে ঘোরাফেরা করেছে ৮০ হাজার ভৃত্য আর প্রকাশ্য দরবারে স্বর্ণবৃক্ষের ডালের ওপর বসেছে মণি-মুক্তাখচিত স্বর্ণপক্ষী। ছদ্মবেশে রাতের পর রাত হারুন-অল-রশীদ ঘুরে বেড়িয়েছেন প্রজাদের সুখ-দুঃখের সংবাদ জানতে।

তারপর হারুন-অল-রশীদও গিয়াছেন আর তুর্কীরা রাজত্ব করেছে প্রথম মহাযুদ্ধের সময় পর্যন্ত। ইরাক হয়েছে স্বাধীন। Changeless East-এ অনেক পরিবর্তন হয়েছে। আজ ইরাকে এসেছে বাগদাদ প্যাঙ্ক, এসেছে মাইলের পর মাইল তেলের পাইপ। আরো অনেক কিছু, কিন্তু তবুও বাগদাদের অলি-গলিতে আর

টাইগ্রিস আর ইউফ্রেটিস-এর বালুভীরে প্রাচীন মেসোপটেমিয়া উকি মারে। সামারার স্বর্ণ মসজিদ, কুর্ণার কাছে এজরার নীল গম্বুজের Tomb, হারুন-অল-রশীদে প্রিয়তমা জুবেদার সমাধি, Ctesiphon-এর arch স্মরণ করিয়ে দেয় পুরানো ইরাককে। নেনেভের কোলে রয়েছে আলীর সমাধি আর এখনো হাজার হাজার ধর্মপ্রাণ শিয়া মুসলমান কারবালায় গিয়ে ‘হাসান-হুসেন’ বলে ছাতি চাপড়ায় হুসেনের হত্যার দুঃখে। প্রাচীন আর নতুনের মাঝে সাক্ষী হয়ে দাঁড়িয়ে আছে ইরাক আর তার রাজধানী বাগদাদ।

টাইগ্রিস নদীর উপর রয়েছে দুটো ব্রীজ—নতুন আর পুরানো বাগদাদের মাঝে সেতুর মতো। এপারে ধ্বংসপ্রায় পুরানো বাগদাদ, আর ওপারে সিমেন্ট, অ্যাসফল্ট আর কনক্রিটের তৈরি নতুন বাগদাদ। কিছু দূরেই রয়েছে বিরাট ফটক আর রাজা ফৈজালের প্রাসাদ—রাস্তার নাম ‘নতুন রাস্তা’ (New Street)। পুরানো বাগদাদে হারুন-অল-রশীদে সময় নাকি একটা লম্বা রাস্তা রূপে দিয়ে মোড়া ছিল। আরো আগে গিয়ে পড়তে হবে বাগদাদের বাজারে। খোলা হাওয়ায় সাজানো কফির অটেল দোকান। মাঝে মাঝে বাজারের দিন দূর দূর গাঁ থেকে এখনো উটের পিঠে বা গাধায় চড়ে সওদাগররা আসে বাগদাদের বাজারে ব্যবসা করতে। এছাড়া ভিখারী, হাতুড়ে ডাক্তার, জ্যোতিষী, আর letter writer-দের ভিড় তো আছেই।

ইংরেজ লেখক ই.এস.ফারগুসন বাগদাদের বাজারের হাতুড়ে ডাক্তারদের নিয়ে বেশ একটা মজার ঘটনা বর্ণনা করেছেন। একদিন বাজারে ঘুরতে ঘুরতে তিনি এক হাতুড়ের দোকানের সামনে ভিড় দেখে সেখানে দাঁড়িয়ে পড়েন। হাতুড়েকে দেখে তাঁর মনে হয়, কোথাও না কোথাও একে তিনি দেখেছেন। হঠাৎ খেয়াল হলো কিছুদিন আগে এই লোকটাই তাঁর বাড়িতে চাকর ছিল। হাতুড়ের কোনদিকে জ্রঞ্জেপ নেই, একের পর এক রোগী দেখে যায় আর একটা বই খুলে এ-পাতা ও-পাতা নেড়ে আলমারি থেকে ওষুধ বের করে। ফারগুসন সাহেব বইটার দিকে ভালো করে নজর দিয়ে আবিষ্কার করেন যে,

সেটা একটা ইংরিজী নভেল, যা তাঁর লাইব্রেরীতে কিছুদিন আগে ছিল।

ইরাকে ব্রিটিশ ম্যাণ্ডেট শুরু হয় ১৯২০ সালে আর শেষ হয় ১৯৩২ সালে। অগ্ন্যাগ্নি আরব দেশের তুলনায় ইরাকে বিদেশী রাজত্ব কম দিনই ছিল, কিন্তু যত ইংরেজ-বিদ্বেষ ইরাকে পুঞ্জীভূত হয়েছিল, অগ্নি জ্বালায় তা হয়নি। ১৯৪১ সালের রশীদ আলীর Pro-axis coup, আর হাক্কানায় ব্রিটিশ এয়ার-বেস দখল ইংরেজ-বিদ্বেষেরই প্রতিক্রিয়া। বাগদাদে ব্রিটিশবিরোধী হাক্কামা আর ১৯৪৮ সালে পোর্টসমাথ চুক্তি সই করার পর সালেহ-জবার গভর্নমেন্টের ‘ব্যাটল অব ব্রিজ’-এ পতনও সেই একই কারণের নিদর্শন দেয়। রশীদ আলী আর তাঁর ‘Golden Square’ দলের পতনও শীঘ্রই হয়, কিন্তু ইরাকে শান্তি তো দূরে থাক, স্থায়ী কোনো গভর্নমেন্টেরও পাত্তা ছিল না। ছ’বছর পর যখন জেনারেল নূরী-এ-সইদ প্রধান মন্ত্রী হন, তিনি কিছুটা স্বাভাবিক অবস্থা ফিরিয়ে আনেন। ১৯২২ থেকে ১৯৪৯—এই ২৭ বছর ইরাকে ৩৫টা গভর্নমেন্টের পতন হয়েছে।

শিয়া, সুন্নী, কুর্দীশ, অতাসিরিয়ানদের নিজেদের মধ্যে ঝগড়া, টাইগ্রীসের বন্যা, ধনী শেখদের অত্যাচার আর নানাপ্রকার রাজনৈতিক কুচক্র পড়ে ইরাকের আভ্যন্তরীণ অবস্থাও সঙ্গীন ছিল অনেকদিন। এখনো যে খুব ভালো আছে, তা বলা যায় না, তবু আগের চেয়ে অনেক ভালো। বাইশ বছরের যুবক রাজা ফৈজাল দ্বিতীয়, নয়া জমানার লোক, বিদেশে শিক্ষিত আর জনপ্রিয়। পয়গম্বর মহম্মদের বংশধর বলে দাবী করে ইরাকের হাশেমী রাজবংশ আর তাই রাজবংশের প্রতিপত্তি অগাধ।

মিডিল ইস্টের রাজনীতিতে অনেক পরিবর্তন হয়েছে, কিন্তু ইরাকের প্রধান মন্ত্রী নূরীপাশার প্রভাব কম হয়নি। আজ প্রায় ৩০ বছর হতে চললো নূরীপাশা ইরাকের রাজনীতিকে পরিচালনা করছেন প্রায় নিজের ইচ্ছামতো। মাঝে মাঝে হয়তো তাঁকে কিছু দিনের জন্য রাজনীতি থেকে দূরে থাকতে হয়েছে—কিন্তু যখনই আবার ফিরে এসেছেন তাঁর শক্তি বেড়েই গিয়েছে। আজকের ইরাকে ডেমোক্রেসীর পাত্তা পাওয়া যাবে না কারণ নূরীপাশা রাজ্য চালনা করেন ‘আয়রন হ্যাণ্ডে’। কিন্তু মিশর, সিরিয়া আর

অন্তান্ত দেশে যা হয়েছে বা হচ্ছে বেশি দিন হয়তো ইরাক সেই প্রবাহ থেকে দূরে থাকতে পারবে না।*

জন থমাস রাজনীতির ধার ধারে না। খায়-দায় আপিস যায়, মেয়েদের ‘ডেট’ (Date) করে, নাইট ক্লাব আর ‘বার’ ঘুরে বেড়ায় আর মাঝে মাঝে গর্ব করে নিজেকে আরব বলে। ছুই ছেলের নাম রেখেছে গালীব আর জাফর। গালীব উচ্চারণ করে ‘ঘালিব’। যখন ওকে জানাই যে, গালীব আর জাফর হিন্দুস্তানের ছুই বিখ্যাত কবি, ও ভীষণ খুশি। ওর জ্বী টার্কীর মেয়ে, লুইসা।

সেদিন জনের সঙ্গে গেলাম মিসেস মিলারের বাড়ি। অ্যান মিলারের সঙ্গেও আলাপ হয়েছিল ‘টরাস এক্সপ্রেসে’। রাত ছটোয় আমার কম্পার্টমেন্টে এসেছিলেন সিন্ধের নাইটগাউন পরে, “for a game of bridge and a round of drinks”। জন প্রথম থেকেই মিসেস মিলারকে দেখতে পারে না। কেন জানি না ভীষণ রাগ ওর উপর। মিসেস মিলারের নাইট-গাউন পরা ফিগার দেখে যখন বলেছিলাম, “শী লুকস্ কিউট উইথ ছাট ড্রেস” জন জবাব দিয়েছিল, “শী উইল লুক কিউটার উইদাউট ওয়ান।”

বাগদাদে ব্রিটিশ এম্বাসীর এক বড় কর্তার জ্বী মিসেস মিলার। আমাকে আর জনকে নিমন্ত্রণ জানিয়েছিলেন ডিনারে। একে ইংরেজ তায় এম্বাসীর বড় কর্তার জ্বী। আমি আর জন ডিনার জ্যাকেট পরে সভ্য হয়ে তাঁর বাড়িতে গেলাম। খবর পাঠাতে চাকর এসে অপেক্ষা করতে বললো। প্রায় ১৫ মিনিট অপেক্ষা করছি মিসেস মিলারের পাস্তা নেই। জনকে জিজ্ঞাসা করলাম, “ব্যাপার কি হে?”

গম্ভীরভাবে জন জবাব দিলো “শী মাস্ট বি স্ট্রিপিং ফর ডিনার” (She must be stripping for dinner)। অনায়াসে কথাটা বলে জন তার ব্যাখ্যা শুরু করলো “আজকালকার দিনে ডিনারের সময় পুরুষরা এস্টার কাপড়জামা পরে আর মেয়েরা করে মিতব্যয়িতা। তাই “মেন ড্রেস ফর ডিনার অ্যান্ড উইমেন স্ট্রিপ ফর ডিনার।”

হাসতে হাসতে বেরিয়ে এলেন মিসেস মিলার। “কাম, লেট

* নূরীপাশা কিছুদিন আগে পদত্যাগ করেছেন। নূতন প্রধানমন্ত্রী এসেছেন ইরাকে। শোনা যাচ্ছে নূরীপাশা আবার শীঘ্রই প্রধানমন্ত্রী হবেন।

আস হ্যাভ এ গেম অব ব্রিজ অ্যাণ্ড এ রাউণ্ড অব ড্রিক্‌স্‌।”

“আই উইল স্কীপ ওভার দী ব্রীজ অ্যাণ্ড হ্যাভ দী ড্রিক্‌ ইনস্টেড” জন নির্বিকারভাবে বলে।

হাসিখুশিতে সেদিন রাত বারোটা পর্যন্ত মিসেস মিলারের ডিনারে সময়টা কেটে গিয়েছিল। বাগদাদে আমার সেই শেষ রাত। পরদিন সকালে শুরু করবো আবার যাত্রা। জন কেবলই উঠি-উঠি করছে কিন্তু মিসেস মিলারের আগ্রহে ‘অ্যানাদার রাউণ্ড’ করতে করতে দেরি হয়ে যাচ্ছে। বাগদাদের ‘নাইট-লাইফ’ দেখাবার লোভ দেখাচ্ছে জন—“ওহ্ ওয়াণ্ডারফুল মিউজিক্‌, ওয়াণ্ডারফুল গার্লস অ্যাণ্ড ওয়াণ্ডারফুল ড্যান্সেস।” কিন্তু মিসেস মিলার আর গুড-নাইট করতে দিচ্ছেন না।

জন আর শেষ পর্যন্ত থাকতে না পেরে উঠে পরলো। “অল রাইট, হ্যাভ ওয়ান ফর দি রোড” আবার আগ্রহ জানান মিসেস মিলার।

“নো থ্যাঙ্ক্‌স্‌। দিস টাইম ইট উইল বি ওয়ান ফর দি ডীচ”, বলে আমাকে প্রায় টানতে টানতে নিয়ে এল জন। বাগদাদ ছাড়ার আগে বাগদাদের ‘নাইট-লাইফ’ দেখাবে আমায়। “ওয়াণ্ডারফুল মিউজিক্‌, ওয়াণ্ডারফুল গার্লস আর ওয়াণ্ডারফুল ড্যান্সেস” দেখতে তুকলাম নাইট ক্লাবে। থাউজাণ্ড অ্যাণ্ড ওয়ান নাইটস্‌-এর বাগদাদে আমার ফোর্থ অ্যাণ্ড লাস্ট নাইট।

চৌদ্দ

১০৯, খৈবান্ কাখ্‌ স্ট্রীট।

তেহ্রানের ‘অ্যারিস্টোক্রেটিক’ পাড়ার ছ’পাশে গাছের সারি দেওয়া রাস্তার এক প্রান্তে দোতলা একটা বিরাট বাড়ি। সামনে সবুজ রং-এর লোহার ‘গ্রিল’ ফটক। ফটকের ডানদিকে ছোট্ট একটা নেম-প্লেট—‘ডক্টর মহম্মদ মোসাদেক’। কিছু দূরেই ‘গুলিস্তান’—হিজ ইম্পিরিয়াল ম্যাজেস্টি মহম্মদ রেজা শাহ পহলভীর প্রাসাদ।

অনেকবার কাখ্‌ স্ট্রীট দিয়ে হেঁটে বেড়িয়েছি। ১০৯ নম্বরের

সামনে মাঝে মাঝে ধমকে দাঁড়িয়েছি। দোতলার ডানদিকের একটা স্বল্পপরিসর ঘরের জানলার পাতলা সবুজ পর্দার মধ্যে দিয়ে অনেক রাত পর্যন্ত আলোর প্রকাশও দেখতে পেয়েছি।

একদিন সে কামরায় ঢোকবার আমারও সৌভাগ্য হয়েছিল। ছোট্ট কামরা বারো বাই চৌদ্দ। দেয়াল ঘেঁষে তিনটে আলমারি। অদূরে জানলার কাছে লোহার স্প্রিং-এর একটা খাট। খাটের ডানদিকে কাঁচ দেওয়া কালো টেবিলের উপর ৪টা টেলিফোন, তিনটে ওষুধের শিশি আর প্লেটের উপর রাখা কিছু বাদাম। খাটের উপর নীল চাদর দিয়ে ঢাকা পাতলা তোশক। বাদামী রং-এর নাইট পাজামা আর স্পোর্টস-জ্যাকেট পরে আধা-শোওয়া আধা-বসা অবস্থায় ডাঃ মহম্মদ মোসাদেক। কোলের কাছে নতুন ফুলের মতো তিন বছরের নাতনী মাসোমা। মৃত্ত হেসে আমাদের অভ্যর্থনা জানিয়েছিলেন। সন্দের একদল মার্কিনী আর ইংরেজ খবরের কাগজওয়ালারা নিজেদের মধ্যে চোখ টেপাটেপি করে ফিস্ ফিস্ করে বললো ‘ঢং’।

১০৯, খৈবান্ কাখ্ স্ট্রীটের দোতলা বাড়ির আজ অস্তিত্ব নেই বললেই চলে। ইম্পিরিয়াল বডি গার্ডস-এর কর্নেল নাসিরী জীপ দিয়ে ধাক্কা মেরে ফটকের থাম ভেঙে দিয়েছেন। ‘ডাঃ মহম্মদ মোসাদেক’ লেখা ছোট্ট নেম-প্লেটটা জীপের টায়ারের তলায় গুঁড়ো হয়ে গিয়েছে। দোতলার ডানদিকের স্বল্পপরিসর ঘরের জানলার পাতলা সবুজ পর্দার ভিতর দিয়ে আর আলোর প্রকাশ রাস্তায় এসে পড়ে না। বিরানী বছরের বৃদ্ধ মোসাদেক আজ তেহরান থেকে অনেক দূরে আরেকটা ছোট্ট বাড়িতে বসে পিছনে ফেলে আসা কর্মবহুল জীবনের কথা ভাবেন। মাঝে মাঝে যেতে চান সুইজারল্যান্ডে কিন্তু আবার দেশ ছেড়ে যাবার কথা ভেবে কেঁদে ছ’চোখ ভাসিয়ে দেন। এর আগে দীর্ঘ তিন বছরের উপর কেটে গিয়েছে তেহরানের এক অভেদ্য দুর্গে।

পনেরো মিনিট পরে খবরের কাগজের রিপোর্টারের দল ফিরে এসেছে। মাসোমার সোনালী চুল নিয়ে খেলা করতে করতে বৃদ্ধ মোসাদেক কখনও কখনও চোঁচিয়ে উঠেছেন উদ্বেজনায়—“হাউ মেনী টাইমস উইল ইউ আসক্ দি সেম কোন্সেন। দেয়ার ইজ

নো গোয়িং ব্যাক অন দি কোশ্চেন অব গ্রাশনালাইজেশন”—
ইংরেজ সাংবাদিককে ভৎসনা করে ওঠেন।

“বাট মিস্টার প্রাইম মিনিস্টার, রিসেন্টলী ইন দি হাউস অব
কমন্স...”

“আই অ্যাম নট ইণ্টারেস্টেড ইন হোয়াট হ্যাপেন্স ইন ইণ্ডর
হাউস অব কমন্স।”

কালো টেবিলের কাঁচের উপর শীর্ণ হাতটা চাপড়ান মোসাদেক
—“ইরান উইল গো ডাউন ফাইটিং ইফ নীড বী”। ছেলে
ডাঃ গুলাম মোসাদেক এবার ঘড়ির দিকে তাকিয়ে আমাদের
বাইরে যেতে বলেন। গজ গজ করতে করতে বেরিয়ে আসে
সবাই। পিছনে ফিরে একবার তাকালাম। মুহূ হাসলেন বৃদ্ধ,
“ইউ ডিড নট আসক্ মী এনি কোশ্চেন?”

“আই হ্যাভ গট মাই রিপ্লাইজ অল দি সেম”।

ছোট শিশুর মতো হেসে উঠলেন বৃদ্ধ। সেই হাসি এখনও
মাঝে মাঝে কানের কাছে ভাসে। প্রথম আর বোধহয় শেষবারের
মতো ডাঃ মোসাদেকের সঙ্গে সেই সাক্ষাৎকার আমার স্মৃতিপটে
চিরকাল উজ্জ্বল হয়ে থাকবে।

খবরের কাগজের হেডিং-এ প্রায়ই থাকে ‘হেল লেট লুজ’
(Hell let loose)। কিছুদিন পরে তেহরানে ‘হেল লেট লুজ’
হয়েছিল। একটা ছঃস্বপ্নের মতো মনে হয় সে ক’দিন। তিনদিনের
মধ্যে হুঁকোটি লোকের ভাগ্য নির্ণয় যে এমনভাবে হয়ে যাবে কেউ
কল্পনাও করতে পারেনি। ঝামু ব্রিটিশ আর আমেরিকান
সাংবাদিকরা মাথা চুলকোয়। প্যাট আমাকে বললো যে, সে
আশাও করেনি এমনটা হতে পারে। আমেরিকার বিখ্যাত
সংবাদপত্রের প্রতিনিধি প্যাট। অনেক কিছুই দেখেছে আর
শুনেছে। কিন্তু হঠাৎ এমন ব্যাপার হবে—“নো! নো! আই
কার্ট থিংক অব ইট”। প্যাট কমিউনিষ্ট না, জোসেফ ম্যাকার্থীও
আন-আমেরিকান কমিটিতে বসে প্যাটকে এই সার্টিফিকেট দিতে
পারতেন। কিন্তু আমার মতো প্যাটও মোসাদেককে
ভালোবেসেছিলো। ইরানের অনেক লোকের মতো প্যাটও
ডাঃ মোসাদেককে পিঙ্গার-ই-মিল্লাৎ (জাতির জনক) বলে ডাকতো।

“আই টেল ইউ ওল্ড্ বয় ইফ সামথিং হ্যাপেন্স টু দি

পিদ্দার-ই-মিল্লাৎ, ওয়েল নেমেসিস অ্যাণ্ড ডিলুজ উইল ডিসেণ্ড
অন দিস ল্যাণ্ড অব খৈয়াম অ্যাণ্ড সাদী।”

(I tell you old boy if something happens to the
Pidder-i-Mallat, well nemesis and deluge will descend
on this land of Khayyam and Saddi).

পার্ক হোটেলের লাউঞ্জে জইস্কি সিপ্ করতে করতে প্যাট
সেদিন আমায় বলেছিল। প্যাটের কথা এখনও ফলেনি।
অর্থাৎ ইরানে ডিলুজ আর নেমেসিস আসেনি। কিন্তু পিদ্দার-
ই-মিল্লাৎকে ফাঁসি কাঠে চড়াতেও হিজ ইম্পিরিয়াল ম্যাজেস্টি
মহম্মদ রেজা শাহ পছন্দভীর সাহস হয়নি।

গভীর রাতে সেদিন সেই গোলমালের মধ্যে প্যাট আমাকে
বর্ডারে পৌঁছে দিয়ে এসেছে মোটরে করে। তেহরানের রাস্তায়
রাস্তায় তাণ্ডব নৃত্য হচ্ছিল। পচা একরাশ মৃতদেহের পাশ
কাটিয়ে আসবার সময় স্টীয়ারিং জইল ছেড়ে প্যাট নাক ঢেকেছিল
রুমাল দিয়ে। আমাকে পৌঁছানোর দায়িত্ব ছিল প্যাটের উপর।
আমাকে নিয়েও এসেছিল প্যাট। সব কিছু আজ খুলে বলতে
পারবোনা, কারণ তাতে ব্যাপারটা একটু ঘুলিয়ে উঠবে।
এইটুকু বললেই যথেষ্ট হবে যে, আমার ভিসার গোলমাল ছিল
আর তা থেকে আমায় উদ্ধার করে প্যাট। হয়তো তেহরানে
বিপদের মধ্যে পড়তাম কিন্তু তেহরানের বৃকে যখন ‘হেল লেট লুজ’
হলো তখন কার মাথাব্যথা ছিল যে কোন লোকের ভিসা
আছে বা নেই। যাক সেসব কথা। ছ’দিন পরেই আমি
রোমে।

তেহরানের রাস্তায় রাস্তায় সে রাতে আগুন জ্বলেছিল।
শাহেনশাহ্ মহম্মদ রেজা শাহর পিতা রিজা শাহর কবর খুঁড়ে উপড়ে
ফেলেছিল জনতা। শাহেনশাহর বিরাট ব্রোঞ্জ স্ট্যাচু গড়াচ্ছিল।
তেহরানের রাজপথের ধুলোর উপর। জেনারেল ফতেমীর সঙ্গে
ক্রুদ্ধ জনতা তখনও চেষ্টাচ্ছিল ‘টু দি গ্যালোজ উইথ দি ইয়ং শাহ্’
(শাহকে ফাঁসি দাও)। পরের দিন সকালে শাহেনশাহ্ মহম্মদ
রেজা শাহ পছন্দভী, মালকা-য়ে-আলম রাণী সোরাযাকে নিয়ে
নিজের প্লেনে পালালেন বাগদাদ আর বাগদাদ থেকে রোম। মাঝ
রাস্তায় রাণী ফুঁপিয়ে কেঁদে উঠলেন—“আমার লাল গোলাপ?”

“লক্ষ্মীটি কেঁদো না, তোমার গোলাপ তোমায় আমি এনে দেবো”, সান্ত্বনা দিলেন শাহ।

“শোল ওয়া শোমা—শাস্তিময় হও তুমি—” জেনারেল ফজলোল্লা জহেদীর থ্রানাইট পাথরেব মতো মুখের এক কোণে একটু হাসির ঝিলিক খেলে গেল। “ইউ সি দি টেবলস আর টার্নড”।

বহুকাল পরে মুখোমুখি হলেন সেদিন ডাঃ মহম্মদ মোসাদেক আর জহেদী। প্লথ পদে, ক্রান্ত, শ্রান্ত মোসাদেক এগিয়ে গেলেন। মুহূর্তের জন্তু ছ’জনের দৃষ্টি বিনিময় হলো। ছ’পাশে সঙ্গীন নিয়ে দাঁড়িয়ে আছে মিলিটারীর লোকেরা। তেহরান অফিসারস্ ক্লাবের বিরাট আপিস কামরায় মোসাদেকের অস্পষ্ট কথাগুলো শোনা গেল না। জহেদী ইশারা করলেন আর পরক্ষণেই সশস্ত্র সৈনিকরা মোসাদেককে নিয়ে গেল তেহরান থেকে অনেক দূরে এক অভেদ্য ছুর্গে—বন্দী হলেন পিদ্দার-ই-মিল্লাৎ দেশদ্রোহিতার অভিযোগে।

মাত্র সাতদিনের মধ্যে ইরানের ইতিহাসের গতি ঘুরে গেল। ইতিহাসের গতি ইরানে আগেও অনেকবার ঘুরেছে কিন্তু এমন নাটকীয় পরিস্থিতির সামনে ইতিহাসকে আগে আর দাঁড়াতে হয়নি।

মোসাদেক আর শাহর সংঘর্ষ শুরু হয় অনেক আগেই যখন মোসাদেক শক্তিশালী অ্যাংলো-ইরানিয়ান অয়েল কোম্পানীর আবাদান রিফাইনারীর জাতীয়করণ ঘোষণা করেন। ছোটোখাটো বিরোধ থেকে ব্যাপারটা দাঁড়ায় ঘোড়ালো হয়ে। শাহ হঠাৎ একদিন চাল চাললেন যে, তিনি শরীর সারাতে ইউরোপ যাবেন। ইরানের মজলিসের স্পীকার মুল্লা আতাউল্লা কাশানী ভাবলেন, এই সুযোগ। মোসাদেককে না জানিয়ে মজলিসের গুপ্ত সভায় পাশ করালেন প্রস্তাব “আমাদের প্রিয় নৃপতি যেন এই সময় রাজ্য ছেড়ে না যান”। এর পরে পাঠালেন ক্রুদ্ধ জনতাকে শাহর প্রাসাদে। জনতা ‘মোসাদেক মর্দাবাদ’ চিৎকার করতে করতে দাঁড়ালো ফটকের সামনে। মহম্মদ রেজা শাহ এলেন ব্যালকনীতে। জনতাকে বললেন, তারা যদি না চায় তিনি রাজধানী ছেড়ে যাবেন না। এবার জনতা ছুটলো মোসাদেকের বাড়ির দিকে। মোসাদেক পিছনের দরজা দিয়ে পালিয়ে আশ্রয় নিলেন মজলিসে আর ২৪

ঘণ্টার মধ্যে দাবী জানানালেন তাঁর প্রতি আস্থা প্রস্তাব। কাশানীকে বরখাস্ত করে মজলিস ভেঙে দিয়ে চাইলেন শাহর হস্তাক্ষর। শাহ বললেন, “না”। “বহৎ আচ্ছা। জনতা স্বাক্ষর করবে” বলে মোসাদেক বেরিয়ে গেলেন। ছকুম দিলেন প্লেবিসাইটের। ফল ঘোষণা হলো—মোসাদেকের পক্ষে ১৭ লাখ আর তাঁর বিরুদ্ধে ৯০০ ভোট। সে রাতে ইম্পিরিয়াল গার্ডসের কমান্ডেণ্ট কর্নেল নাসিরী আক্রমণ করলেন ১০৯ নম্বর খৈবান্ কাখ্ স্ট্রীট। জীপের ধাক্কায় ভেঙে দিলেন লোহার গেট। মোসাদেকের অনুরক্ত সৈন্যেরা পরাজিত করলো নাসিরীকে। পরের দিন সকালে শাহ পালালেন রোমে। পালাবার আগে পদচ্যুত করলেন মোসাদেককে আর ফার্মান জারী করে প্রধানমন্ত্রী নিযুক্ত হলেন জেনারেল ফজলোল্লা জহেদী। এবার জহেদী নিজে আক্রমণ করলেন ১০৯, খৈবান্ কাখ্ স্ট্রীট। Coup সার্থক হলো। মোসাদেক আবার পালালেন, পিছনের দরজা দিয়ে। চারদিন পরে অনিদ্রায় অনাহারে ক্লান্ত মোসাদেক তেহরান অফিসার্স ক্লাবে আত্মসমর্পণ করলেন তাঁর জীবনের সবচেয়ে বড় শত্রু জহেদীর কাছে। হেসে জহেদী বললেন, “শোল ওয়া শোমা”। দু’দিন পরে ২০ জন জার্নালিস্ট সঙ্গে নিয়ে শাহ ফিরে এলেন তেহরানে। এরোড্রমে জেনারেল জহেদী তাঁর অনুরক্তি দেখালেন মাটিতে লুটিয়ে শাহ’র পদচুম্বন করে। ১৪ই আগস্ট ১৯৫৩ থেকে ২১শে আগস্ট ১৯৫৩। ৭ দিনের মধ্যে ২ কোটি লোকের ভাগ্যের লেখা অন্তরকম হয়ে গেল।

ইরানের এই সাতদিনের ওলট-পালটকে আমি নাটক বলি। নাটকের মতোই এতে রয়েছে ঘটনার ঘাত-প্রতিঘাত, সাসপেন্স, ব্যাকড্রপ, নাটকীয় পরিস্থিতি আর মুহূর্ত। এই নাটকের ‘ড্রামাটিস পারসনে’ অনেকে। কিন্তু তাঁদের মধ্যে যাঁরা প্রধান তাঁরা হচ্ছেন—ডাঃ মোসাদেক, হিজ ইম্পিরিয়াল ম্যাজেস্টি মহম্মদ রেজা শাহ পহলভী, হার ইম্পিরিয়াল ম্যাজেস্টি রাণী সোরায়া পহলভী, জেনারেল ফজলোল্লা জহেদী, মুল্লা আতাউল্লা কাশানী, জেনারেল হুসেন ফতেমী আর শাহেনশাহর অনুজা আশরফ। কিছু বিদেশী রাজদূতাবাসেরও দান আছে এই নাটকে, কিন্তু তা নেপথ্যে।

ক্রান্তে কানুন পড়তে গিয়েছিলেন যুবক মোসাদেক কিন্তু ফিরে

এলেন শ্বইস ইউনিভার্সিটি থেকে রাজনীতিতে ডক্টরেট নিয়ে। চাকরি পেলেন ইরানের অর্থনীতি বিভাগে আর তারপর মজলিসের ইকনমিক এক্সপার্ট কমিটির মেম্বর হলেন। ফারাসের গভর্নর থাকার পর মোসাদেক হলেন ইরানের বিদেশী মন্ত্রী কিন্তু কিছুদিন পরেই ইস্তফা দিলেন। রেজা শাহর হুকুমে তাঁকে বন্দী করা হলো। ছাড়া পাবার সঙ্গে সঙ্গেই আবার ১২ বছরের জন্ম নির্বাসিত হলেন। রেজা শাহকে যখন ‘ডিপোজ’ করা হয় মোসাদেক ফিরে এলেন তেহরানে। তখন থেকেই শুরু হয় তাঁর রাজনৈতিক জীবনের ইতিহাস আর নতুন শাহর সঙ্গে সঙ্ঘর্ষ। শাহর নামে মজলিসে শপথ গ্রহণ করতে অস্বীকার করলেন। “জনতার নামে আমি শপথ গ্রহণ করবো” বললেন মোসাদেক। রাশিয়াকে যখন প্রধানমন্ত্রী গোভাম শুলতানাহ্ ‘অয়েল কনশেশন’ দেন মোসাদেক ইরানী মজলিসকে ‘ডেন অব ক্রুকস’ (Den of Crooks) বলে অভিহিত করলেন।

ইরানের উপর বিপদ ঘনিয়ে এল ১৯৫১ সালে। সেদিন শুক্রবার। তেহরানের শাহী মসজিদে মমাজের সময় অতিক্রান্ত হয়ে যাচ্ছে। প্রধানমন্ত্রী জেনারেল আলী রাজমারার অপেক্ষায় সবাই বসে রয়েছে। রাজমারার মোটর থামলো মসজিদের সামনে। দেরী হয়ে গিয়েছে ভেবে জেনারেল তরতর করে সিঁড়ি বেয়ে উঠতে লাগলেন। জনতার ভিড়ের মধ্যে থেকে একটা লোক সামনে এসে দাঁড়ালো। রাজমারা হাত বাড়িয়ে দিলেন অভিবাদনের অভিপ্রায়ে।

গুডুম—গুডুম—গুডুম—

প্রার্থনা গৃহের নিস্তব্ধতা বিদীর্ণ করে পিস্তলের তিনটে আওয়াজ—জেনারেল আলী রাজমারা লুটিয়ে পড়লেন। শাহী মসজিদের শুভ্র মার্বেলের সিঁড়ির উপর গড়িয়ে পড়লো লাল রক্ত। মুন্না আতাউল্লা কাশানীর প্রেরণায় গড়া ‘ফাদাইল-ইসলাম’ দলের সদস্য কামলিল্ তানাসভেবীর উপর ঝাঁপিয়ে পড়লো ক্রুদ্ধ জনতা। পুলিশ এসে বাঁচালো হত্যাকারীকে। পরে মজলিস তাকে ছেড়ে দিলো আর রাস্তায় রাস্তায় কাশানীর ভক্তেরা অভ্যর্থনা জানালো কামলিল্কে। (পরে ১৯৫৬ সালের ১৮ই জানুয়ারী কামলিলের মৃত্যু হয় তেহরানের ফায়ারিং স্কোয়াডের সামনে।)

হোসেন আলী হলেন নতুন প্রধানমন্ত্রী। তাঁর উপরেও হত্যার প্রচেষ্টা হলো। বিশৃঙ্খলা আর অরাজকতা ছেয়ে গেল ইরানে। এমন সময় জনতার দাবী উঠলো ডাঃ মোসাদেকে প্রধানমন্ত্রী নিযুক্ত করার জন্তে।

শাহ ভয় পেলেন। তিনি ইতস্ততঃ করতে লাগলেন। একজন ব্রিটিশ সাংবাদিককে বললেন, “মোসাদেক ? হি ইজ এ লুনাটিক”। তেহ্রানের রাজপথে আবার শুরু হলো জনতার বিক্ষোভ। শাহ হার মানলেন আর মোসাদেক হলেন প্রধানমন্ত্রী—২৯শে এপ্রিল, ১৯৫১।

কিছুদিন পরেই পৃথিবীকে স্তম্ভিত করে মোসাদেক আবাদানের অ্যাংলো-ইরানিয়ান অয়েল কোম্পানীর অবসান ঘটালেন। অর্ধ শতাব্দী আগে উইলিয়াম নক্স ড'আর্চি (William Knox D'Arcy) পেয়েছিলেন আবাদান রিফাইনারীর মনোপলী, ‘জাস্ট ফর এ সঙ্গ’ ? ব্রিটিশ সাম্রাজ্যের পায়া টলতে লাগল। শাহ আবার ভয় পেলেন। মজলিসের ১৩৬ জন সভ্যের মধ্যে মোসাদেকের সমর্থনকারীদের সংখ্যা মোটে সাতজন কিন্তু মজলিসে মোসাদেকের জয় হলো। কম্পিত হস্তে শাহ দস্তখত করলেন ‘এ. আই. ও. সি’র ডেথ ওয়ারেন্ট। তেহ্রানের রাস্তায় রাস্তায় জনতার জয়ধ্বনি উঠলো। মজলিসে শাহর স্বাক্ষরিত ডিক্রি নিয়ে ঢুকলেন মোসাদেক। ধীরে ধীরে পড়তে লাগলেন ডিক্রি। চোখের জলে ভেসে গেল ডিক্রির লেখা। আনন্দের আতিশয্যে শিশুর মতো কাঁদতে লাগলেন মোসাদেক। প্রেস গ্যালারী থেকে বিদেশী সাংবাদিকরা মন্তব্য করলো, “এ টুক অব ওল্ড মসি টু এক্সাইট দি পিপল”।

ব্রিটিশ গভর্নমেন্ট জানালেন, আপোস-মীমাংসার প্রস্তাব। ‘নো’ মোসাদেক বললেন। আন্তর্জাতিক কোর্টে ছুটলেন ব্রিটিশ সরকার কিন্তু লাভ কিছুই হলো না। আবাদান থেকে ইংরেজ পরিবারদের সরানো হলো। পারস্য উপসাগরে এবার ব্রিটিশ গভর্নমেন্ট পাঠালেন যুদ্ধ জাহাজ, সাইপ্রাসে নামলো অসংখ্য প্যারারট্রপারস।

১০৯ খৈবান কাখ্ স্ট্রীটের দোতলার ছোট্ট ঘরে মোসাদেক ডাকলেন সাংবাদিকদের “if a single bullet is fired from

the British Rifle the third war will start.” হারী টম্যানের প্রিয়পাত্র অভ্যারেল হারীমান লগুন থেকে লর্ড প্রিভীসীল সার রিচার্ড স্টোকসকে নিয়ে ছুটলেন তেহ্রানে। “Accept nationalisation and then I will talk” বললেন মোসাদেক। আবার ১০৯ খৈবান কাখ্ স্ট্রীটে বৈঠক বসলো।

‘এ.আই.ও. সি’র অন্তত ম্যানেজিং এজেন্সী থাক’—স্টোকস দাবী জানালেন।

“না”—মোসাদেক টেবিল চাপড়ালেন।

“অন্ততপক্ষে ব্রিটিশ জেনারেল ম্যানেজার”—স্টোকস মিনতি করলেন।

“না”—মোসাদেকের দৃঢ়স্বর ছোট্ট দোতলার ঘরে গর্জে উঠলো। “অল্ ব্রিটিশ টেকনিশিয়ানস্ মাস্ট কুইট উইদইন ফোর ডেজ।” (All British technicians must quit within four days).

হতাশ হয়ে ব্রিটিশ গভর্নমেন্ট ছুটলেন ইউ. এন. ও-তে। বৃদ্ধ মোসাদেক চললেন নিজের দেশের পক্ষ সমর্থন করতে। স্তম্ভিত হয়ে সারা পৃথিবী শুনলো মোসাদেকের সেই তিন ঘণ্টার অপূর্ব ভাষণ।

দেশে ফিরে মোসাদেক এশিয়ার সমস্ত দেশকে আবেদন জানালেন ইরানের তেল নেবার জগ্রে। শুরু হলো বিদেশী রাজদূতাবাসগুলিতে চক্রান্ত। সবাই জানালো, তেল নিতে তো রাজী আছি কিন্তু ট্যাঙ্কার কোথায়। আবাদানে লক্ষ লক্ষ টন তেল পড়ে রইলো। হাজার হাজার ইরানী কর্মচারী হলো বেকার। ট্রেড ব্যালান্স-এর অবস্থা শোচনীয়। এককোটি কুড়ি লক্ষ পাউণ্ড রপ্তানির আয় আর চার কোটি পাউণ্ড আমদানীর ব্যয়। ধীরে ধীরে নিশ্চিত দেউলিয়া হবার অভিমুখে চললো ইরান।

মোসাদেকের তখন নেশা ধরেছে, ইরানকে রিপাবলিক করবেনই। রাতে স্বপ্ন দেখেন শাহ’র রাজত্বের অবসান, খবর নেন মিশরে জেনারেল নগীব কি করছেন। শাহকে বললেন, যুদ্ধ-মন্ত্রী নিযুক্ত করার ক্ষমতা থাকবে “আমার আর মজলিসের”। শাহ বললেন, “না”। মোসাদেক করলেন পদত্যাগ আর ফিরে এলেন আবার তিনদিন পরে। সেই তিনদিন আবার তেহ্রানের বুকে ‘হেল লেট লুজ’ হয়েছিল। ‘শাহ মূর্দাবাদ’ আর ‘মোসাদেক জিন্দাবাদ’ স্লোগানে মুখরিত হলো সারা রাজধানী। জনতার ভিড়

ছুটলো মোসাদেকের বাড়ি “পিদার-ই-মিল্লাৎকে আমরা ফিরে পেতে চাই”।

নাতনী মাসোমাকে বুকে চেপে মোসাদেক আবার শিশুর মতো ফুঁপিয়ে কেঁদে উঠলেন। চোখের জলে ভেসে গেল তাঁর বাদামী রং-এর স্পোর্টস জ্যাকেট।

‘গুলিস্তান’ রাজপ্রাসাদে শুরু হলো মন্তব্য—শাহ, আতাউল্লা কাশানী, জেনারেল ফজলোল্লা জহেদী, কর্নেল নাসিরী, শাহ’র অনুজা আশরফ আর রাজমাতা। মোসাদেক শাহকে বললেন, দেশ থেকে তাড়াতে হবে আশরফকে আর রাজমাতাকে। তারপরের ইতিহাস সুবিদিত—শাহ’র ইউরোপ যাবার ঘোষণা’ কাশানীর মজলিসের গুপ্তসভার বৈঠক, মোসাদেকের প্লেবিসাইট, কর্নেল নাসিরীর Coup-এর প্রচেষ্টা, শাহ আর সোরাযার পলায়ন, জেনারেল জহেদীর Coup, মোসাদেকের পলায়ন, তিনদিন পরে তেহরান অফিসার্স ক্লাবে জহেদীর সামনে আত্মসমর্পণ, শাহ’র প্রত্যাবর্তন, মোসাদেকের ট্রায়াল আর তিন বছরের কারাবাস।

মিলিটারী কোর্টের সামনে চিৎকার করে উঠলেন মোসাদেক, “দয়া আমি চাই না। দয়া আমি চাইনি। কোনো অন্তায় আমি করিনি। আমি দয়া চাই না, আমি ক্ষমা চাই।”

গভর্নমেন্ট প্রসিকিউটার দাবী জানালেন মৃত্যুদণ্ড দেওয়া হোক ‘দেশদ্রোহী মোসাদেককে’। কারণ ইরানের বিধানে দেশদ্রোহিতার জ্ঞা আর কোনো শাস্তি নেই। একমাত্র শাহ ক্ষমা করতে পারেন তাঁকে।

“আমি ডাঃ মহম্মদ মোসাদেককে ক্ষমা করলাম, প্রধানমন্ত্রিস্বের প্রথম বছর তিনি যে দেশসেবা করেছেন তার বদলে। তাঁকে খুব কড়া শাস্তি যেন না দেওয়া হয়”—শাহ লিখে পাঠালেন কোর্টকে। “আমি চাই না দয়া।” মোসাদেক প্রতিবাদ করেন অযাচিত এই অনুকম্পায়।

পরের দিন সকালে ঘোষণা করা হবে বিচারের ফলাফল। গ্রে ফ্র্যানেলের পাজামা, স্পোর্টস্ আর ড্রেসিং গাউন চড়িয়ে মোসাদেক এলেন বিচারকক্ষে। ড্রেসিং গাউনের ‘কর্ড’ নিয়ে খেলা করতে করতে ওষুধ খেতে লাগলেন। কোর্টের সভাপতি পড়ছিলেন দীর্ঘ রায়। কোনো অক্সেস নেই মোসাদেকের। এক ঘণ্টা পরে

সভাপতি কম্পিত গলায় ঘোষণা করলেন, “রাজজ্যোহিতার ঘৃণ্য অপরাধের জন্ত আমরা ডাঃ মোসাদেককে, শাহ’র ক্ষমার কথা মনে করিয়ে দিয়ে মাত্র তিন বছরের কারাবাসের জুকুম দিলাম”।

সারা কোর্টরুম স্তব্ধ। প্রায় ৫০ জন বিদেশী সাংবাদিক ছুটে বেরিয়ে গেল তাদের ‘স্টোরী’ ফাইল করতে। মোসাদেক একবার মুখ তুলে চাইলেন। তাঁর শরীরটা একটু কঁপে উঠলো। একটা অবলম্বন পাবার জন্ত তিনি রেলিংটা চেপে ধরলেন। চোখ দিয়ে তাঁর জল গড়িয়ে পড়লো—“আমি, আমি তিনদিনের মধ্যেই মরে যাবো”। অজ্ঞান হয়ে পড়লেন তিনি কোর্টের মধ্যে।

‘আনাদার চার্লি চ্যাপলিন’, প্রসিকিউটার টিপ্পনী কাটলেন। কোর্টের ভিড়ের গুঞ্জনর মধ্যে থেকে কে যেন বলে উঠলো, ‘মাশাআল্লাহ’। ১৯৫৩ সালের ডিসেম্বর মাসের ২০ তারিখ।

১৯৫৬ সালের আগস্ট মাসের ৪ তারিখ। সকাল। তেহরান থেকে খানিক দূরে মিলিটারী ফোর্টের গেটের সামনে দাঁড়ালো একটা কালো রং-এর মোটরগাড়ি। বাদাশী রং-এর স্পোর্টস জ্যাকেট, নাইট পাজামা আর ড্রেসিং গাউন পরে ফটক থেকে ধীরে ধীরে বেরিয়ে এলেন ৮২ বছরের বৃদ্ধ ডাঃ মহম্মদ মোসাদেক। দীর্ঘ ছ’বছর আট মাস পনেরো দিন কারাবাসের পর মুক্তি পেলেন তিনি। লাঠি ঠুকঠুক করে এগিয়ে এলেন। টাক পড়া মাথার চুলগুলোও সব সাদা হয়ে গিয়েছে—চোখের নিচে রয়েছে অনিদ্ভার গভীর কালো ছাপ। গাড়ি-থেকে নামলো ছেলে ডাঃ গুলাম মোসাদেক, পুত্রবধূ আর নাতনী মাসোমা। মাসোমা কত বড় হয়েছে! সেই দেখেছিলেন চার বছরের ছোট্ট একটা টুকটুকে মেয়েকে। এখন মাসোমার বয়েস সাত বছর। ছুটে গিয়ে বৃদ্ধ কোলে তুলে নিলেন মাসোমাকে। ছ’চোখ দিয়ে জল গড়াতে লাগল। একজন মিলিটারী অফিসার এসে হাতে নতুন অর্ডার দেয়, “তিনি যেন তেহরান শহরে না থাকেন আর রাজনীতিতে যোগ না দেন।” গাড়ি করে চলে গেলেন মোসাদেক তেহরান থেকে অনেক দূরে।

বাড়ি গিয়ে আরেকবার কঁদে উঠেছিলেন মোসাদেক যখন জানতে পারেন যে, কর্নেল নাসের সুয়েজ ক্যানাল শ্রাশনালাইজ

করেছেন। ‘সাবাস নাসের’ হয়তো বলেছিলেন। খবরের কাগজের রিপোর্টে ছিল যে, যখন মোসাদেক জানতে পারেন, স্যুয়েজ ক্রাশনালাইজেশনের কথা, তাঁর ছ’চোখ দিয়ে জল গড়িয়ে পড়তে থাকে। ‘মাশাআল্লাহ’—বিড়বিড় করে বলেন। নগীব তাঁকে প্রেরণা দিয়েছিল, স্বপ্ন দেখেছিলেন ইরানকে ‘রিপাবলিক’ করার। কিন্তু নাসের তাঁর স্বপ্নকে বাস্তবে পরিণত করলো স্যুয়েজকে ক্রাশনালাইজ করে। কারাগৃহ থেকে মুক্তি পেয়ে এর চেয়ে বড় সুখবর মোসাদেক কল্লনাও করতে পারেননি।

প্যাট আমাকে বলেছিল, “মোসাদেক—হি ওয়ার্কস লাইক এ হর্স অ্যাণ্ড লিভস লাইক এ সেন্ট” (He works like a horse and lives like a Saint)। সেদিন রাতে তার সঙ্গে মোটরে যেতে যেতে মোসাদেক সম্বন্ধে অনেক কথাই প্যাট আমাকে বলেছিল। সেসব প্রায় রূপকথার কাহিনীর মতো। “মোসাদেক ইরানের ধনীদেব মধ্যে একজন” প্যাট বলেছিল, “তাঁর নিজের প্রাসাদোপম অট্টালিকায় রয়েছে পয়েন্ট-ফোর অ্যাডমিনিসট্রেশনের আপিস। মোসাদেকের প্রধান মন্ত্রিস্বের ২০০০ টাকা মাইনে আর বাড়ি ভাড়া সব তিনি দান করতেন যক্ষ্মা হাসপাতালে। তাঁর সম্পত্তির বেশির ভাগই তিনি দান করে দিয়েছিলেন এখানে ওখানে।”

“লোকে বলে” প্যাট হাসতে হাসতে জানায়, “মোসাদেকের কাছে মোটে একটা স্যুট ছিল। তিনি ওভারকোট দেখলেই চটে উঠতেন, কিন্তু দুটো ওভারকোট তাঁর কাছে ছিল। শীতের সময় তার মধ্যে থেকে একটা তিনি পরতেন, আর একটা পরতো তাঁর ড্রাইভার। মাঝে মাঝে আবার ওভারকোট দুটো বদলাবদলি হয়ে যেতো।” “সিগারেট মদ তিনি ছুঁতেন না আর খেতেন বাদাম আর ফল। শুক্রবার নিতেন বিশ্রাম আর খেলা করতেন নাত্নী মাসোমার সঙ্গে।”

রঙীন চশমা পরে ইরানকে আর মোসাদেককে দেখিনি প্যাট তাই তার সঙ্গে বিদেশী সাংবাদিকদের অনেক তফাত ছিল। আমেরিকান রাজদূত লয় হেগারসনও খুব প্রীত ছিলেন না প্যাটের উপর। আমেরিকানরা মোসাদেককে বলতো ‘ওল্ড মসী’। ইরানের টুডে পার্টি তাঁর নাম দিয়েছিল :

“Aspirin tablet which removes the pain but not the disease” !

সুয়েজের পারে মিশরীরা বলতো “ব্রিটিশ টেরর”। মুন্সী কাশানী শাপ দিতেন “enemy of the constitution who deserves only death punishment”। আর ব্রিটিশ সাংবাদিকরা নিজেদের মধ্যে কানাঘুসা করতো :

“A cunning fox who can be charming to the point of captivation, what with all his simplicity, idiosyncracies and occasional spells of fainting !”

প্যাট্ বলতো “Greatest wonder of 20th century politics.”

“আচ্ছা, প্যাট্ মোসাদেক কি কমিউনিস্ট ? তোমার কি মনে হয়।” জিজ্ঞাসা করলাম প্যাট্কে।

“ইফ হি ইজ, দেন পোপ পায়াস টুয়েন্ট ইজ অলসো এ কমিউনিস্ট” প্যাট্ জবাব দেয়। মোসাদেকটুক জিজ্ঞাসা করলে তিনি বলতেন,

“I have’nt selected any name for my particular philosophy”.

বর্ডারের কাছে এসে প্যাটের কাছ থেকে বিদায় নিয়েছি। প্যাটের বন্ধু, বর্ডার পুলিশের অফিসার মুহু হেসে অভ্যর্থনা জানিয়েছেন আর আগে যাবার যাত্রার বন্দোবস্ত করে দিয়েছেন।

ভোরের আধো আলো, আধো ছায়ায় স্টীয়ারিং হুইলে বসা প্যাটের চেহারাটা এখনও মাঝে মাঝে মনে পড়ে। সুয়েজ ক্যানেল শ্রাশনালাইজেশন আর মোসাদেকের মুক্তির পর একটা চিঠির উত্তরে আমেরিকা থেকে প্যাট্ লিখেছিল :

“Dear Taroon—Is’nt it a strange coincidence of the 20th Century Middle East politics that the Suez Nationalisation by Nasser and the release of Dr. Mossadeq should come about at almost the same time.”

সত্যি আশ্চর্য সংযোগ।

রোমের ‘এক্সসেলশিয়ার’ হোটেলের ডাইনিং হল। কোণের দিকে টেবিলে বসে হিজ ইম্পিরিয়াল ম্যাজেস্টি মহম্মদ রেজা শাহ পছন্দী আর হার ইম্পিরিয়াল ম্যাজেস্টি সোরায়া পছন্দী। শাহনশাহ’র চোখের কোণে জল, চেহারা মলিন, গালে চারদিনের দাড়ি। ধীরে ধীরে কফির পেয়ালাটা তুলে ধরলেন মুখের কাছে।

“মোসাদেক হ্যাজ বিন্ ওভারথোন ইয়োর ম্যাজেস্টি” ঝড়ের মতো ঘরে ঢুকলো অ্যাসোসিয়েটেড প্রেসের করেস্পন্ডেন্ট রিচার্ড এরম্যান।

শাহনশাহ’র হাতটা একটু কঁপে ওঠে। কফির পেয়ালাটা মাঝপথে থেমে যায়। কম্পিতহস্তে তিনি সোনার কেস থেকে সিগারেট বের করে ধরাবার ব্য্থা চেষ্টা করেন। এরম্যান এসে লাইটার এগিয়ে দেয়। শাহ উত্তেজনায় থর থর করে কাঁপছেন। সোরায়া তার হাতটা রাখে শাহ’র হাতের উপর।

“ক্যান ইট বি ট্রু? ক্যান ইট বি”—শাহ’র মুখ থেকে শুধু এই কথাটাই শোনা যায়। ‘হাউ একসাইটিং’ শিশুর সরলতায় সোরায়া বলে ওঠে। এরম্যানকে গভীর আলিঙ্গন করেন শাহ। পাঁচ মিনিটের মধ্যে শাহ’র লোকেরা ছুটলো কে.এল.এম. বিমান কোম্পানীর দপ্তরে ‘প্লেন সিডিউল’ খুঁজতে।

চারদিনের নির্বাসনের অবসান হলো। শাহ ফিরে চললেন তেহ্রানে, সঙ্গে ২০ জন বিদেশী সাংবাদিক। ফারুকের ভবিষ্যৎ-বাণী ভুল হলো। রেজা শাহ পছন্দী যখন তেহ্রান ছেড়ে পালালেন, ফারুক তখন কাপ্তীতে নাইট ক্লাবে বসে। তাঁকে যখন শাহর নির্বাসনের খবর দেওয়া হয়, ফারুক নাকি বিকট জোরে হেসে বলেছিলেন—“I tell you ultimately only five Kings will remain in this world—King of Heart, King of Clubs, King of Diamonds, King of Spades and the King of England.”

(ইংল্যান্ডের কিং কিন্তু ‘ট্রাম্প’ হয়ে গিয়েছেন, রয়েছেন ‘কুইন অব ইংল্যান্ড’।)

রাণী সোরায়াকে শাহ রেখে গেলেন রোমে আর বলে গেলেন,

“তোমাকে আমি রোজ ১০০টা গোলাপ পাঠাবো।” তেহ্রানে পৌঁছে তিনি তাঁর প্রতিজ্ঞা পালন করেছিলেন। কে.এল.এম. কোম্পানীর চার্টার্ড প্লেনে রাণী সোরায়ার জন্তে রোজ আসতো গোলাপ তেহ্রান থেকে রোম।

নিজের সঙ্গী-সাথী আর খবরের কাগজের রেস্পন্সেণ্টদের নিয়ে শাহ গেলেন রোম এয়ারপোর্টে। কে.এল.এম. কোম্পানী জানালো যে, বিনা ভিসায় তারা খবরের কাগজের লোকদের নিয়ে যেতে নারাজ। রিচার্ড এরম্যানকে ছেকে ধরলো সাংবাদিকদের দল—“কিছু একটা করতেই হবে”। খানিক পরে শাহ’র এ.ডি.সি. কোম্পানীর ম্যানেজারকে ডেকে শুধু বললেন—

“Keep on like this—and you may find your airline into Teheran shut down.”

বানিয়া ডাচ কোম্পানী। অল রাইট, জার্নালিস্টস ক্যান গো অন দেয়ার ওন রেস্পন্সিবিলিটি—ঘোষণা হলো কোম্পানী থেকে।

“দে গো অন মাই রেস্পন্সিবিলিটি। দে আর মাই গেস্ট”— শাহ’র গম্ভীর জবাব শোনা যায় এবার।

বাগদাদে পৌঁছে শাহ চললেন নিজের প্লেনে, সঙ্গে ইরানিয়ান এয়ার ফোর্সের ২০টা ফাইটার বিমান। তেহ্রান এয়ার পোর্টে জেনারেল ফজলোল্লাহ জহেদী আর তাঁর সাক্ষোপাক্ষরা মাটিতে লুটিয়ে পড়ে অভ্যর্থনা জানালেন শাহকে। বাছা বাছা এক হাজার লোক এয়ারপোর্টে উপস্থিত। তারা এবার কঁদতে শুরু করলো। ‘শাহনশাহ, শাহনশাহ’ রবে এয়ারপোর্ট মুখরিত। গার্ড অব অনার নিরীক্ষণ করে জহেদীর পাশে বসে শাহ চললেন শহরে। রাস্তার দু’পাশে অগুনতি সশস্ত্র সৈনিক। রাজপথের অলিগলিতে তখনও পচছে অনেক মৃতদেহ। শাহর আগমনের জন্ত উৎসব হলো আর হাজার হাজার ভেড়ার কুরবানী করা হলো। “দি রেভলিউশন, হ্যাজ বিন ক্রাশড্” যু্হ হেসে জহেদী শাহকে বললেন, আর শাহ উত্তর দিলেন—“I must admit that I haven’t had a very important part in the revolution.”

খবরের কাগজের রিপোর্টাররা ‘ভার্বাটিম’ টুকে নেয় কথাগুলো, আর ডজনখানেক ক্যামেরার ক্ল্যাশ জ্বলে ক্লিক ক্লিক। ইরানের নাটকের দ্বিতীয় অঙ্কের উপর যবনিকা পতন হলো আর

রিজা শাহ পহ্লভীর স্থাপিত পহ্লভী বংশের ধারা থাকলো অব্যাহত।

পারশিয়ান কসাক্ বিগ্রেডের সাধারণ এক সৈনিক ছিলেন শাহ'র পিতা রিজা শাহ। সাধারণ সৈনিক থাকলে কি হবে, রিজা শাহ'র ক্ষমতা ছিল প্রচুর, আর তার চেয়ে বেশি ছিল আকাঙ্ক্ষা আর উচ্চাশা। শাহ আহমদের গদী উণ্টে দিয়ে পারশিয়ার ময়ূর-সিংহাসনে আরোহণ করেন তিনি। লৌহহস্তে ১৬ বছর রাজত্ব করেছেন পারশিয়ায়। যুদ্ধের সময় মিত্রপক্ষের প্ররোচনায় তাঁকে ডিপোজ করা হয় শত্রুপক্ষকে সাহায্য করার অভিযোগে আর গদীতে বসেন পঁচিশ বছরের যুবক মহম্মদ রেজা শাহ পহ্লভী।

রিজা শাহ ছিলেন দুর্ধর্ষ নৃপতি। অবাধ্য মন্ত্রীদেবর তিনি শাস্তি দিতেন জানলা থেকে ছুঁড়ে ফেলে দিয়ে। তার ঘুমের ব্যাঘাত হবে বলে রাস্তার সব কুকুর গুলী করে মারা হতো। রিজা শাহ'র দুঃখ ছিল তাঁর পুত্র মহম্মদ রেজা শাহ তাঁর মতো তৈরি হয়নি, বড় কোমল হৃদয় ছিল পুত্রের। তাই মাঝে মাঝে সভাসদদের ডেকে বলতেন, “হায়, আশরফ যদি ছেলে হতো, আমি কি স্থগীই না হতাম।” আশরফ আর মহম্মদ রেজা শাহ, যমজ ভাই-বোন। আশরফ দু'মিনিটের বড়। ভাইয়ের উপর প্রতিপত্তি এত বেশি যে, ডাঃ মোসাদেক চেয়েছিলেন আশরফকে ইরান থেকে তাড়াতে। রাজপ্রাসাদের উদ্যানে বসে একদিন বালক মহম্মদ রেজা শাহ ভাবছিলেন ভবিষ্যতের কথা। পিতা যে কখন পিছনে এসে দাঁড়িয়েছেন, তার খেয়ালই নেই।

“কি হচ্ছে এখানে বসে বসে?” পিতা জিজ্ঞাসা করলেন।

“কিছু না, এই একটু ভাবছি”, বালক উত্তর দেয়।

“কি ? ভাবছো ?” গালের উপর এক চড় বসিয়ে দিলেন পিতা।

কাঁদতে কাঁদতে উঠে গেল বালক। “এদিকে শোনো,” পিতা মাঝপথে ডাকেন—“আমি চাই না, আমার ছেলে ভেবে ভেবে সময় নষ্ট করে। না ভেবে কিছু কাজ করো।”

অগাধ ঐর্ষ্যের মধ্যে হারেমে বাড়তে লাগলেন মহম্মদ রেজা শাহ। পাঠানো হলো সুইজারল্যান্ডে—“হোয়ার হি প্লেড উইথ ফার্স্ট কারস, ফার্স্ট প্লেনস, অ্যান্ড ফার্স্ট উইমেন”। যখন একবার এপেণ্ডিসাইটিস অপারেশন হয়, পিতা নাকি দুঃখ করে বলেছিলেন,

“নাউ হি হ্যাজ নো গাটস্ অ্যাট অল”। কিন্তু শাহনশাহ রিজা শাহও একটু ভুল করেছিলেন। কারণ পরে ময়ূরসিংহাসনে উঠে মহম্মদ রেজা শাহ অনেক ‘গাটস্’ দেখিয়েছেন।

জাঁকজমক করে, ধুমধামের মধ্যে বিয়ে হলো ফারুকের বোন ফোজিয়ার সঙ্গে। ছ’বছর পরেই একদিন সকালে উঠে মহম্মদ রেজা শাহ জানতে পারলেন তিনি হয়েছেন ইরানের শাহনশাহ। এদিকে রাজপ্রাসাদে বোন আশরফ কেবলই বলতে লাগলেন ফোজিয়াকে ডাইভোর্স করো, কারণ তার কোন পুত্রসন্তান নেই। আর পুত্র না থাকলে পহলভী বংশ যে লোপ পাবে। শাহ’র মা জানালেন তাঁরও সম্মতি আছে এই বিবাহ-বিচ্ছেদে। ডাইভোর্স হয়ে গেল। কন্যা শাহনাজ রয়ে গেল রাজপ্রাসাদে। (শাহনাজের সম্প্রতি বিবাহ হয়েছে ফজলোল্লা জহেদীর পুত্র আর্দেশীর জহেদীর সঙ্গে)। খোঁজ শুরু হলো নতুন মেয়ের। সারা ইউরোপ তন্ন তন্ন করে খোঁজা হলো। হাজার হাজার ফটো জমা হলো। একদিন সকালে আশরফ সোরায়া ইফান্দ্রীর ফটো দেখালো শাহকে। “যদি সে এতই সুন্দরী আমি ওকে বিয়ে করবো।” কিছুদিন পরে প্যারিসে দেখা হলো শাহ’র সঙ্গে সোরায়া ইফান্দ্রীর। শক্তিশালী বখতিয়ারী জাতের নেতা ডাঃ ইফান্দ্রীর কন্যা সোরায়া। মা জার্মান আর ছোটবেলায় কাটিয়েছিলেন জার্মানীতে। (ডাঃ ইফান্দ্রী অনেকদিন জার্মানীতে ইরানের রাজদূত ছিলেন।) আবার ধুমধাম আর জাঁকজমক করে শাহ’র সঙ্গে বিয়ে হলো সোরায়ার। বিলাতী খবরের কাগজের রিপোর্টাররা লিখলো “the world’s most beautiful Queen.” “One of the most gorgeous marriages ever held in the annals of monarchy for its sheer lavishness, pomp and grandeur.”

সোরায়ার প্রতি শাহ’র প্রেম অগাধ। শাহ’র প্রত্যেক কাজে সোরায়া সাহায্য করেন। সাঁতার, স্কী, টেনিস, সবেতেই শাহর পার্টনার। কিন্তু ইরানের মোল্লারা আবার গোলমাল শুরু করে দিয়েছে, কারণ সোরায়াও নিঃসন্তান। পহলভী বংশ রক্ষা কি করে হবে, তাঁদের ভাবনা। বিদেশী সাংবাদিকরা তাই সোরায়াকে বলে—স্টাড সোরায়া—ছঃখিনী সোরায়া।

‘ছুঃখিনী’ সোরায়াকে নিয়ে শাহ পালালেন তেহরান ছেড়ে মোসাদেকের ভয়ে। সঙ্গে চললো শাহ’র চারটে টেনিস র‍্যাকেট, সোরায়ার ছুটো হ্যাণ্ড ব্যাগ আর ১২টা ক্রক। শাহ’র কাছে মোটে একটা স্মুট, পাশে বসে তাঁর নিজস্ব পাইলট মেজর মহম্মদ খাটামী। প্লেনের সীটে বসে ফুঁপিয়ে কাঁদতে লাগলেন সোরায়া। বললেন, “আমার গোলাপ ?”

“লক্ষ্মীটি কেঁদো না। তোমার গোলাপ আমি পাঠিয়ে দেবো।” শাহ সান্ত্বনা দেন সোরায়াকে।

রোমের দৈনিক ৫০ পাউণ্ড ভাড়ার ‘এক্সেলশিয়র’ হোটেলের ‘সুইট’-এ গিয়ে উঠলেন শাহ আর সোরায়া। সারারাত ছুঁজনে বারান্দায় পায়চারী করেন, কারুর চোখে ঘুম নেই। পরের দিন সকালে মেজর খাটামী শাহকে বললেন, “আমি আপনার বোঝা হয়ে আর থাকতে চাই না। আমায় আপনি ছুটি দিন।”

কান্নায় ভেঙে পড়লেন শাহ, “খাটামী, তুমিও যদি আমাকে ছেড়ে যাও, আমার সঙ্গে টেনিস কে খেলবে ?”

যেদিন থেকে শাহ আর সোরায়া রোমে এসেছিলেন, অ্যাসোসিয়েটেড প্রেস-এর রিচার্ড এরম্যান অনবরত ঘোরাফেরা করেছে হোটেলের আশেপাশে। শাহ’র সম্বন্ধে অনেক খবর ‘স্কুপ’ করে খবরের কাগজের ছুনিয়ায় ছু’দিনের মধ্যে এরম্যান নাম কিনে ফেললো। শাহ’র সঙ্গে রিচার্ডের এতো ফটো কাগজে বেরিয়েছে যে, অনেকে তাকে শাহ’র দলের লোক ভেবেছে। “মোসাদেক হ্যাজ বিন ওভারথ্রোন ইওর ম্যাজেস্টি” বলে রিচার্ড ই প্রথম সূসংবাদ দিয়েছে শাহকে। তাঁর ছুঃখের দিনের সাথী বলে রিচার্ড আজ শাহ’র অন্তরঙ্গ বন্ধুদের মধ্যে একজন।

নাটকে ভিলেন না থাকলে নাটক নাকি অসম্পূর্ণ থেকে যায়। ইরানের নাটকের ‘ভিলেন অব দি পিস্’ জেনারেল ফজলোল্লা জহেদীকে এবার একটু দেখা যাক। কে এই জহেদী যিনি বিংশ শতাব্দীতেও ‘কাউন্টার রিভলিউশন’ করে দেখালেন ? প্যাট্ জহেদী সম্বন্ধে বিস্তর খবরাখবব জানতো। মাত্র পঁচিশ বছর বয়সে জহেদী ত্রিগেডিয়ার হয়েছিলেন। ‘আর্থেরাইটিস’ রোগে কাতর হলেও ইরানের রাজনৈতিক আকাশে দুইগ্রহের মতো জহেদী সাহেব জ্বল জ্বল করেছেন অনেকদিন। ডাঃ মোসাদেক ছিলেন জহেদীর

পুরোনো শত্রু। যতবারই মোসাদেক জহেদীকে বিপদে ফেলবার চেষ্টা করেছেন, শাহ এগিয়ে এসেছেন তাঁকে বাঁচাতে। গত মহাযুদ্ধের সময় জেনারেল জহেদী ইম্পাহানে পার্শিয়ান ফোর্সের কমান্ডার ছিলেন। তাঁর কার্যকলাপে মিত্রপক্ষের সন্দেহ হয় যে, তিনি জার্মানীর সঙ্গে জোট পাকাচ্ছেন। এই সময় জেনারেল জহেদীর জীবনে এক রোমাঞ্চকারী ঘটনা ঘটে।

‘ক্লোক অ্যাণ্ড ড্যাগার’ এজেন্ট ফিটজেরয় ম্যাকলিন জহেদীকে মিত্রপক্ষের হুকুমে ‘কিডন্যাপ’ করেন। তারপর যুদ্ধের শেষ পর্যন্ত জহেদী প্যালেস্টাইনে বন্দী ছিলেন। যে জহেদী ব্রিটিশ গভর্নমেন্টের এত বড় শত্রু ছিলেন, তিনি মোসাদেকের পতনের পর ব্রিটিশদের বন্ধু কি করে যে হয়ে গেলেন, বোঝা মুশকিল। ‘কাজের সময় কাজী, কাজ ফুরলেই পাজী’ কথাটা ইংরেজদের জন্তেই বোধ হয় তৈরি হয়েছিল। যাক সে কথা। এবার জহেদী সাহেবকে একটু দেখা স্বাক। মোসাদেকের পতনের পর জহেদী যখন ইরানের প্রধানমন্ত্রী হন ‘ক্লোক অ্যাণ্ড ড্যাগার’ এজেন্ট ফিটজেরয় ম্যাকলিন এক বিলিষ্ঠী খবরের কাগজে, জহেদীকে কিডন্যাপ করার সেই ঘটনাটা বর্ণনা করেন। (ম্যাকলিন অবশ্য আর ক্লোক অ্যাণ্ড ড্যাগার-এর এজেন্ট নেই। তিনি এখন কলারভেটিভ এম. পি.)।

ম্যাকলিন লেখেন—

“It is just over 10 years since I pressed a pistol into the ribs of the present Prime Minister of Persia and invited him to put his hands up.”

.....“I had nothing against him personally. But I had been told to kidnap him. And so I kidnapped him as neatly and as expeditiously as I could.....I was told that I could shoot him if it was necessary.....”

তারপর ম্যাকলিন সাহেব কি করে জহেদীকে কিডন্যাপ করেন, তার চাঞ্চল্যকর বিবরণ দিয়েছেন। যুদ্ধের সময় প্রত্যেক কাজেরই একটা করে গুপ্ত-নাম থাকে। জহেদীকে কিডন্যাপ করার এই কাজটির নাম দেওয়া হয় ‘অপারেশন পঙ্কো’।

ম্যাকলিনের বর্ণনার শেষে একটা চমকপ্রদ আবিষ্কার আছে। জহেদী গ্রেপ্তার হবার পর তাঁর বেডরুম সার্চ করে অনেক

জিনিসই বেয়োয়। বিছানার বালিশের তলা থেকে যা যা বেয়োয়, তার একটা ফর্দ ম্যাকলিন সাহেব দিয়েছেন :

“A collection of German automatic weapons, some opium, a large supply of silk underwears, letters from German parachutist agents operating in the hills and an illustrated register of the city’s prostitutes.....”

মোসাদেকের পতনের পর জহেদী পুলিশ আর মিলিটারীকে হুকুম দেন, বিদেশী মন্ত্রী জেনারেল ফতেমীকে গ্রেপ্তার করতে। ফতেমী নিখোঁজ আর জহেদী মোসাদেকের চেয়েও ফতেমীকে বেশি ভয় করতেন। মাঝে মাঝে জহেদী রাতে দুঃস্বপ্ন দেখে ঘুম থেকে জেগে উঠতেন, আর বালিশের নিচে লুকানো তাঁর জার্মান ‘কোর্ট’ পিস্তল খুঁজতেন আর বিড় বিড় করে বলতেন— “ফতেমী, ফতেমী। ইয়া আল্লাহ” (পরে ফতেমী ধরা পড়েন বা ধরা দেন আর তাঁকে ফায়ারিং স্কোয়াডের সামনে প্রাণ দিতে হয়)।

ইরানের নাটকের ড্রামাটিস পারসনের শেষ পাত্র মুন্না আতাউল্লা কাশানী। প্যাট ওর নাম দিয়েছিল ‘ঈগল-আইড’ ‘শকুনী-চোখো’ কাশানী। কাশানী যখন হাসতেন তখন নাকি ছোট শিশুরা কেঁদে উঠতো। অবশ্য এটা শোনা কথা। আশ্চর্য কিছুই না, কারণ এই রকম হিংস্র কুটিল আর প্রতিহিংসা পরায়ণ ধর্মাত্মক লোক বিংশ শতাব্দীর রাজনীতিতে খুব কমই দেখতে পাওয়া যাবে। কাশানীর সঙ্গে মোসাদেকের কোনো মিলই ছিল না কিন্তু দু’জনে এক হন শুধু ইংরেজদের তাড়াতে। কারণ, প্রথম মহাযুদ্ধে কাশানীর পিতা নিহত হন ইংরেজদের হাতে আর দ্বিতীয় মহাযুদ্ধে কাশানীকে বন্দী করে ইংরেজরা। মোসাদেক কাশানীকে মজলিশের স্পীকার করেন, কিন্তু পরে কাশানী কি করে শাহ’র সঙ্গে যোগ দিয়ে মোসাদেকের বিরুদ্ধাচরণ করেন সে কথা আগেই বলেছি।

কিন্তু ওমর খৈয়াম, শেখ সাদী, হাফিজ, নিজামী, ফিরদৌসী, জামী, দিখুদা, আর আলী হুসেন ইবন সিনার দেশ ইরানে গিয়ে ফিরে এসে শুধু যদি শুধু রাজনীতিই চর্চা করি তাহলে বিদগ্ধ পাঠকেরা আমায় নেহাতই বেরসিক বলে ঠাওরাবেন। পার্শ্বায়

(ইরান নাম হয় ১৯৩৫ সালে) একটা পুরনো প্রবাদ আছে যে, কোনো মানুষ যদি জীবনে সুখী হতে চায় তাহলে তাকে ইয়েজদীরের রুটি খেতে হবে, শিরাজের মত্ত পান করতে হবে, আর ইয়েজদের মেয়ে বিয়ে করতে হবে। আমি কিছুই করিনি। শিরাজে গিয়ে শিরাজী পান করিনি কিন্তু আড়াই হাজার বছর পুরনো ‘পেসাঁপোলিস’-এর ধ্বংসাবশেষ দেখেছি আর নতমস্তকে দূর থেকে প্রণাম জানিয়েছি অমর কবি হাফিজ আর সাদীকে। শিরাজের বুকে চিরনিদ্রায় ঘুমচ্ছেন এই দুই মহাকবি। বিংশ শতাব্দীর হানাহানি, মারামারি, অত্যাচার আর হিংসা থেকে বহু দূরে তাঁরা। তেহরানের কোলাহল, আবাদানের যন্ত্রদানবের নিষ্পেষণ থেকে অনেক দূরে। হাফিজ বোধ হয় বিংশ শতাব্দীর ইরানের কথা চিন্তা করেই লিখেছিলেন :

“ইচেহ্ শোরীস্ত কেহ দর দোরে কমর মী বীনম্

হামা আফাক পুর আজ ফিতনা ব সর মী বীনম্”

ঝগড়া আর মারামারিতে জর্জরিত কোলাহলপূর্ণ পৃথিবীর এ কী রূপ আমি দেখছি।

“আবলই রা হামা সরবৎ যে গুলাব বো কান্দস্ত্

কুতে দানা হামা আজ খুনে জীগর মী বীনম্”

বোকারা গোলাপ আর মধুর সরবৎ পান করে আনন্দ করছে, আর বুদ্ধিমান জ্ঞানীরা হৃদয়ের রক্ত পান করছে।

কোথায় যেন একটা এই রকম ধারা উঠে কবিতা পড়েছিলাম—

“পিতে হাঁয় লোগ রোজ শব-মুসরৎ-কে ময়

এক ম্যা হুঁ কি খুনে-জীগর মায়নে পিয়া হায়”...

নৈশাপুরে মহান কবি ওমর খৈয়ামের সমাধি। তেহরান, ইস্পাহান, আর ক্যাম্পিয়ান কোর্টের জাঁকজমকে নৈশাপুর আজ অবহেলিত। ধু-ধু করছে মাঠ, জনবিরল নৈশাপুর। না আছে সাকী, না আছে সুরা, না আছে কুঞ্জবন আর ‘বুক অব ভার্স’।

“আজ্ খাক বরাম্‌দেম্ ব বরবাদ্ গুদেম্”। ধুলো থেকে ধুলোয়—ফ্রম ডাস্ট ইনটু ডাস্ট। কোথায় সেই বুদ্ধ পুরুষ অমর কবি? নৈশাপুরের সমাধির তলে অনন্ত নিদ্রায় নিদ্রিত? না। পৃথিবীর এ-কোণ থেকে অশ্রু কোণ পর্যন্ত সাহিত্য-অমররাণী লক্ষ লক্ষ নরনারীর হৃদয়ে জ্বল জ্বল করছে সেই মহাকবির স্মৃতি॥

“গর দত্ত দহদ জে মগজ গন্দুম নানে
 বো জে ময় কছুএ যে গোস্ত পন্দে রানে,
 বা লালাকুখে নসিন্তা দর বিরানে
 এয়সে আস্ত কে নীন্ত হদে হর সুলতানে।”

যদি আমার হাতে থাকতো গমের রুটি, এক পেয়ালা সুরা, কিছু মাংস আর প্রিয়া সজ্জ পেতাম নির্জনে! এ সুখ সুলতানের ভাগ্যেও থাকতো না।

নৈশাপুরে ওমর খৈয়ামের সমাধির পাশে তাঁর এক ভক্ত নাকি ছোট একটা গোলাপচারা রোপণ করেছিলেন। কালের ঝড়ে সে গোলাপচারা আজ শুকিয়ে ঝরে পড়েছে। কোন এক ইংরেজ শিল্পী সেই গোলাপের কলম নিয়ে যান বিলেতে আর রোপণ করেন ওমর খৈয়ামের রুবাই অনুবাদকারী এডওয়ার্ড ফিটজারেল্ড-এর সমাধির উপর। সাফোক-এ উডব্রিজের কাছে Boulge চার্চ ইয়ার্ডে ফিটজারেল্ড-এর সমাধির উপর সেই গোলাপচারাকে রক্ষা করেছে ছোট একটা তারের বেড়া। বেড়ার উপর ঝোলানো ফলকে লেখা আছে—

“This rose tree raised in Kew Gardens from seed brought by William Simpson, artist and traveller from the grave of Omar Khayyam at Nashipur, was planted by a few admirers of Edward Fitzgerald in the name of Omar Khayyam Club, 7th October, 1893.”

গোলাপ দিয়ে অমর কবির স্মৃতিরক্ষার অপূর্ব চেষ্টা। বাংলায় কার যেন অনুবাদ পড়েছি সেই বিখ্যাত পংক্তির :

“বর চেহারা-এ গুল নাসিম-ই-নওরোজ-খুশ অন্ত
 দর জের-এ চমন বু-এ-দিল ফারোজ খুশ-অন্ত”

“গোলাপের মুখে বসন্ত সমাগমের বার্তা, মধুরের আগমনীর বাণী। কুঞ্জ ছায়ায় কত মধু, আর কত মধু প্রেয়সীর অধরে।”

আর...“মারা চু বুখ খেশ ম্যায় গুলগুন দহ”। “দাও মদিরা গোলাপ গালের আভায় ভরানো”...

কিন্তু ইংরেজ বানিয়ার জাত। কোন বেচারী উইলিয়াম সিম্পসন নৈশাপুর থেকে ভক্তি ভরে আনলো গোলাপচারা আর এখন ইংরেজ বেমালুম ‘ওমর খৈয়াম রোজ’ নাম দিয়ে গোলাপচারা বিক্রি করছে!

—“Light Pink loosely formed blooms with typical centre petals and strongly scented. A highly interesting rose which was rescued and propagated in 1947 from a very old plant, nearly dead on the grave of Edward Fitzgerald. New plants have been raised and are now available.” (বার্টরাম পার্ক-এর ‘কলিন্স গাইড টু রোজেজ’ দ্রষ্টব্য)।

দেশে ফিরে আসবার পর নাগপুরে এক সভায় আমায় ‘ইণ্ডো-ইরানিয়ান’ কালচার সম্বন্ধে বক্তৃতা দিতে বলা হয়। সোসাইটির সেক্রেটারীমশাই, যিনি আমায় আমন্ত্রণ জানাতে এসেছিলেন, তাঁকে আমি বললাম যে, আজকালকার এগ্রিকালচার আর হার্টিকালচারের যুগে কালচার আর রইলো কোথায়? সেক্রেটারীমশাই আমার কথাটাকে রসিকতার পর্যায়ে ফেলতে রাজী হলেন না। শেষে আমাকে তাঁর আমন্ত্রণ প্রত্যাখ্যান করতে হয়। কারণ ‘ইণ্ডো-ইরানিয়ান’ কালচার সম্বন্ধে বক্তৃতা দেওয়ার নতো পাণ্ডিত্যও আমার নেই, আর ছুঃসাহসও নেই। তাঁকে বুঝিয়ে বললাম যে, ওসব শক্ত ব্যাপারের মধ্যে আমি নেই। সেক্রেটারী নাছোড়বান্দা আর তাঁর ধারণা যে, তেহরান থেকে ঘুরে এলেই ‘ইণ্ডো-ইরানিয়ান’ কালচার আর ওমর খৈয়াম সম্বন্ধে এক্সপার্ট হওয়া যায়। তাঁকে বললাম, দেখুন আমি কিছুই জানি না। তবে আপনাকে একটা গল্প বলতে পারি ‘ইণ্ডো-ইরানিয়ান’ কালচার সম্বন্ধে।

সেক্রেটারী উৎসাহের সঙ্গে বললেন, “তাতেই হবে।”

“বহুকাল পূর্বে ইরান থেকে এক পর্যটক এসেছিলেন ভারতবর্ষে বেড়াতে। অনেক বছর পরে তিনি যখন নিজের দেশে ফিরে যান ইরানের বাদশা ডাকলেন রাজ দরবারের পাত্র-মিত্র সভাসদদের ‘সিন্ধুদেশের’ গল্প শোনবার অভিপ্রায়ে। ইরানীরা নাকি ‘স’ বলতে পারতো না তাই সিন্ধু নদীর দেশের ‘সিন্ধুর’ ‘সি’কে তারা উচ্চারণ করলো ‘হি’ আর আমরা হয়ে গেলাম ‘হিন্দু’।”

সেক্রেটারী প্রতিবাদ জানান। তিনি আবার একটু ভারতীয় আর হিন্দু কালচার নিয়ে মাথা ঘামান। তাই বললেন, “এটা

ভুল। হিন্দু কথাটা আমাদের ধর্মে, ইতিহাসে, হাজার হাজার বছর আগে যখন আমাদের ঋষি মুনিরা ইত্যাদি ইত্যাদি...”

আমি বাধা দিলাম—“আগেই বলেছি আমি ইণ্ডো-ইরানিয়ান কালচার সম্বন্ধে কিছুই জানি না। আপনি শুনতে চাইলেন গল্প তাই আপনাকে গল্প শোনাচ্ছি। তবে ওই ‘সি’ থেকে ‘হি’ হওয়ার ব্যাপারে আমার ‘অথরিটি’ ডাঃ রাধাকুমুদ মুখার্জি।”

বড়গোছের নামটা শুনে সেক্রেটারীমশাই একটু ঘাবড়ে গেলেন, কিন্তু দমলেন না। বললেন, তিনিও ‘অথরিটি’ খুঁজেপেতে আমায় পরে জবাব দেবেন। ‘ইন দি মিনটাইম’ আমার গল্পটা চলুক।

“বাদশাহ ডাকলেন রাজদরবারের পাত্র-মিত্র সভাসদদের। পর্যটক শুরু করলো তার কাহিনী। বর্ণনা করলো হিন্দুস্তানের নদনদী, পাহাড়, পর্বত, শহর, গ্রাম। অসহিষ্ণু বাদশা বললেন, “থামো। আমাকে বলো হিন্দুস্তানের সব চেয়ে শ্রেষ্ঠ বস্তু কি?”

“শাহনশাহ, হিন্দুস্তানের সর্বশ্রেষ্ঠ বস্তু আমি।”

“আমি?” সভায় সবাই চকিত।

“হ্যাঁ। শাহনশাহ, আমি। হিন্দুস্তানের অপূর্ব এই ফল। বেহেশ্তের ফল এই আমি। এর স্বাদের বর্ণনা ছুনিয়ার কোনো ভাষাই দিতে পারে না।”

“তবু কেউ যদি তোমায় জিজ্ঞেস করে আমার স্বাদ কি রকম তাহলে তুমি কি বলবে?”

বাদশাহ পর্যটককে সওয়াল করেন।

খানিকক্ষণ ভেবে পর্যটকমশাই রাজাকে বললেন, “শাহনশাহ, আমায় কিছু মধু আনিয়ে দিন।” মধু আনা হলো। দরবারের সবচেয়ে বৃদ্ধ সভাসদকে টেনে এনে রাজার সামনে দাঁড় করালেন পর্যটক। সভার সবাই অবাক। হঠাৎ পাত্র থেকে এক খাবলা মধু তুলে নিয়ে, বৃদ্ধ সভাসদের তুবার-শুভ্র দাড়িতে মাখিয়ে দিলেন পর্যটক। হুঁ হুঁ পড়ে গেল দরবারে। ‘ইয়া আল্লাহ, ইয়া আল্লাহ’ রব উঠলো।

বাদশাহ ক্ষিপ্ত হয়ে উঠলেন, “তোমায় কোতল করবো আমি। এ কি বেআদবী।”

“গুস্তাকী মাক হোক শাহনশাহ। আমি আপনাকে আগেই

বলেছি, আমের স্বাদ বর্ণনা করা আমার সাধের বাইরে, তবুও আপনি জানতে চাইলেন। যদি আমের স্বাদ আপনি জানতে চান এ মধু-মাখানো দাড়ি চাটুন। তাহলেই হিন্দুস্তানের সুস্বাদু, রেশমের সূতার মতো আঁশওয়ালা আমের সত্যি স্বাদ আপনি পাবেন।”

মাশাআল্লাহ, মাশাআল্লাহ বলে উঠলেন বাদশাহ।

“হয়ে গেল আপনার গল্প?” সোসাইটির সেক্রেটারী সাহেব নিরাশ হয়ে জিজ্ঞাসা করলেন।

“দেখুন স্মার, এই গল্পের মধ্যে যদি আপনি ইণ্ডো-ইরানিয়ান কালচার দেখতে না পান দোষ আমার না। কিন্তু একবার বিবেচনা করে দেখুন কালচারের দৌড় কতদূর পর্যন্ত। কোথায় বনারাস কা ল্যাঙড়া আম আর কোথায় সুদূর পারস্যের দাড়ি।”

সেক্রেটারী সাহেব ততক্ষণে বেশ চটে উঠছেন। কিন্তু সে ভাব চেপে রেখে আবার জেদাজেদি শুরু করলেন, “না, আপনাকে বলতেই হবে আমাদের সোসাইটির সভায়।”

“তাহলে আরেকটা গল্প শুুনুন...”

“আচ্ছা স্মার, আসি তাহলে আপনাকে অনেক বিরক্ত করলাম”, বলে সেক্রেটারীমশাই দ্বিতীয় গল্পের অপেক্ষা না করেই পৌঁছলেন আমার গেটের বাইরে। গল্পটা তাকে শোনানো হলো না বলে ছুঃখ থেকে গেল।

ইণ্ডো-ইরানিয়ান কালচার নিয়ে আমি ঘাঁটাঘাঁটি করিনি। ওসব বড় বড় পণ্ডিতদের কাজ। তবে হ্যাঁ, শুনেছি ইরানের শাহনশাহকে ভারত সরকার টেঙুলকারের লেখা মহাত্মা গান্ধীর জীবনী উপহার দিয়েছেন আর ইরানের শাহনশাহ আমাদের পাঠিয়েছেন কিছু কারুকার্যখচিত দোয়াতদানি ইত্যাদি। ভারতবর্ষের প্রতিনিধিত্ব বিদেশে আজকাল হচ্ছে নানা রকম ভাবে। রাজদূত ইত্যাদি তো রয়েছেই তারপর ঘন ঘন কালচারাল, এথ্রিকালচারাল ডেলিগেশনের রপ্তানি তো আছেই। কিন্তু ভারতবর্ষের হাতির যত চাহিদা তত চাহিদা অথ কোনো বস্তুরই নেই। তাই পণ্ডিত নেহরু প্রায়ই হাতি পাঠাচ্ছেন বাইরে। মহা ঘটা করে তাদের আবার নামকরণ হচ্ছে। অ্যাটোমিক প্ল্যান্টের নাম যদি ‘অপ্সরা’ হয় হাতির নামই বা ‘ইন্দিরা’ বা ‘ভারত’

হবে না কেন! পণ্ডিত নেহরুর পাঠানো হাতি ‘ভারত’ ইরানের শাহনশাহ আর মালিকে-য়-আলমের খুবই প্রিয় পাত্র। ‘ভারত’ যে সে হাতি না—‘ইণ্ডো-ইরানিয়ান’ কালচারের প্রতীক। তেহরান স্টেশনে নেমেই ইরানীদের ভারতবর্ষের তরফ থেকে ‘স্মালুট’ জানায়। ইরানীরা হাতি খুব কমই দেখেছে। এর আগে অনেক বছর হলো রানী ভিক্টোরিয়া এক জোড়া হাতি তখনকার শাহনশাহ নাজীরুদ্দিনকে উপহার দেন।

একমিনিয়ান (Achaemenians), সসানিয়ান (Sasanians) গ্রীক, আরব, তুর্ক, মঙ্গোল, তাতার, সভাভী (Safawi) আর কাজার, সফারিদ, সমানিদ, গজনভী, বুভাইদ, খোরাজমশাহী আর পহলভী বংশের মিলন ক্ষেত্র ইরান। কাব্যে, শিল্পে, সাহিত্যে আর সঙ্গীতের ঐতিহ্যে পরিপূর্ণ ইরান। জোরাস্টের (Zoraster) হুখত্, হুভারস্ত, আর সুমৎ (ভালো কথা, ভালো কাজ, ভালো চিন্তা) ; হেরদুত কথিত “to ride, to draw the bow and to speak the truth” আর ছায়েের প্রতীক নোশীরওয়ানের ইরান। সাদি, খৈয়াম আর হাফিজের ইরান।

নোশীরওয়ানের রাজপ্রাসাদের সামনে ‘স্কোয়ার’ তৈরি করার সময় যখন এক গরীব বিধবার জমি কেড়ে নেবার প্রস্তাব ওঠে, নোশীরওয়ান হুকুম দেন “স্কোয়ার তৈরি যেন না হয়”। তাঁর এট ছায়ে প্রীতির কথা শুনে রোমান রাজদূত বলেন : “This irregularity is more beautiful than the most perfect square.” আর তাঁর ‘হল্ অব জাস্টিস’-এর ধ্বংসস্থপ দেখে খাকানৌ বলেন, “What will be the fate of the Hall of Oppression, when this has been the fate of the Hall of Justice.”

শতাব্দীর পর শতাব্দী ভারতবর্ষে এসেছে ইরান থেকে শিল্পী, কবি আর আরো অনেক গুণীরা। সৈদা, আমুলি, খুদসী, আর কালিম-এর ‘মোগল দরবারে অভ্যর্থনা’ হয়েছে রাজোচিত। খৈয়ামের ‘রুবাই’, আবু আলী হুসেনের ‘তিকা-ই-ইউনানী’, ফিরদৌসীর ‘শাহনামা’, রুমীর ‘মাথনাওয়ী,’ সাদীর ‘গুলিস্তান’ আমাদের কাছে এসেছে অনেক আগে। ইরানী শিল্পী সৈদাই

কল্পনা করেছিল ময়ূর-সিংহাসন যার উপর বসে রাজত্ব করেছে
মোগল বাদশাহরা। মোগল রাজ-দরবারে সম্মান পেয়েছে
পারস্যের অপূর্ব ভাষা। সেই ভাষাতেই না সম্রাট শাহজাহান নীল
যমুনার দিকে চেয়ে তাঁর প্রিয়তমা মমতাজকে বলেছিলেন, “তোমার
আননের স্বর্গীয় আভা দেখতেই না এতদূর চলে এসেছে যমুনা”।

“আর তোমার ভয়েই না যমুনা মাথা খুঁড়ে মরছে প্রাসাদের
পাথরের ওপর” জবাব দিয়েছিলেন মমতাজ মহল।

ষোল

আড়াইশ’ পাউণ্ডের একটা মাংসপিণ্ডকে যদি সান-গগলস্
আর সুইমিং-ট্রাক পরে রোমের আনজিও (Anzio) বীচে,
ফ্রেঞ্চ রিভিয়েরা অথবা ক্যাপ্রীর তীরে ডজনখানেক ‘বিকিনী’
পরিহিতা মেয়ের সঙ্গে বালির উপর গড়াগড়ি করতে দেখা যায়,
যে কেউ নিঃসন্দেহে বলে দিতে পারবে ঋতুটি কে। কিন্তু
কাউকে যদি বলা হয় যে, ঐ কিলুতকিমাণার মেদরাশির তুপ
মাত্র ২০ বছর আগেও এক সুন্দর যুবা ছিল, তাহলে হয়তো
কেউই বিশ্বাস করবে না। বিশ্বাস না করবারই কথা কারণ
এককালে সত্যিই ফারুক সুপুরুষ ছিলেন। শেলী যখন মিশরের
রামেসিস্ আর তাঁর কীর্তির গুণগান করে ‘Ozymandias’
সনেট লেখেন, তখন তিনি হয়তো কল্পনাও করতে পারেননি যে,
বিংশ শতাব্দীতে মিশরে এক ফারুকও জন্মগ্রহণ করবেন। ফারুক
আর তাঁর কীর্তি দেখে শেলী কি লিখতেন বলা মুশকিল।

“My name is Ozymandias, King of Kings.

Look on my works, ye Mighty and despair,”
লিখেছিলেন শেলী রামেসিস্ সম্বন্ধে।

প্যারিসে এক ক্যাফেতে বসে আমি আর আমার এক বন্ধু
মিলে ফারুক সম্বন্ধে কয়েকটা লাইন লিখি :

“My name is Farouk, King of Kings

I love the world's all good things ;

250-pound of this magnificent heap of ugliness

In my sun-glasses, Swimming trunks minus all shyness ;

As every day passes I become more ugly and fat
 And in the dead of night I prowls about girls like a cat ;
 My queens Farida and Nariman I have divorced
 I was happy and gay till to an exile I was forced ;
 With millions I gamble
 In wholesale fashion I dabble ;
 Who cares if there is a tomorrow
 So long as I plough my lonely furrow.....”

সারা কন্টিনেন্ট-এ রাজা ফারুকের নাম আর তাঁর কীর্তি বা অপকীর্তির চর্চা। নাইট-ক্লাব, কাবারে আর মণ্টিকার্লোর ক্যাসিনোতে তাঁর প্রচুর প্রতিপত্তি। বড় হোটেলের লাউঞ্জে বা ডাইনিং হলে ফারুক ঢুকলে বুড়ী মায়েরা তাদের যুবতী মেয়েদের আড়াল করে রাখে। ডজনের পর ডজন শ্যাম্পেন বোতল অর্ডার দেন ফারুক তাঁর সঙ্গোপাঙ্গদের জন্তে (নিজে নাকি মদ্যপান করেন না)। সঙ্গীসাথীরা যখন শ্যাম্পেনের রঙীন নেশায় ফারুকের সুখ্যাতি শুরু করে, তিনি তখন তাঁর দারিদ্র্যের জন্তে হুঃখ করেন আর অভিশাপ দেন নাসের আর নগীবকে। মিশর থেকে পালাবার সময় তাঁর সঙ্গে মোটে ২০৪টি স্কটকেস্ ছিল আর প্যারিসের এক ব্যাঙ্কেই জমা ছিল মোটে ২৫০ মিলিয়ন ডলার। ফারুকের হুঃখ পৃথিবীর অবশিষ্ট পাঁচ নৃপতি—কিং অব ক্লাবস, হার্টস, স্পেড, ডায়মণ্ড আর কিং অব ইংল্যান্ডের মধ্যে তার গণনা নেই। অনেক প্রার্থনা, মানত ও মেহনতের ফল শিশু ফুয়াদ আর মিশরের সিংহাসনে বসবে না। কিন্তু ফারুকের সাস্থনা তিনিই মিশরের শেষ নৃপতি। তাই মাঝে মাঝে বান্ধবী ইরমাকে (Irma Copece Minutolo) হেসে বললেন—“Whatever he might be Nasser will not be the King of Egypt. I have deprived him of that honour”.

কিছুদিন আগে হলিউড ফারুককে ব্যঙ্গ করে একটা ছবি তৈরি করেছিল, ‘Abdullah The Great’। ছবির এক দৃশ্যে আছে আবদুল্লা তাঁর এ. ডি. সি-কে নিয়ে তাস খেলছেন। ‘শো’ করার সময় এ. ডি. সি. বললো তার কাছে তিনটে টেকা (Ace) আর একটা বাদশা (King) আছে। আবদুল্লা বললেন, তাঁর কাছে চারটে বাদশা আছে। এ. ডি. সি. তো অবাক। চারটে বাদশার

মধ্যে তার কাছে একটা থাকলে হিজ ম্যাজেস্টির কাছে চারটে থাকে কি করে? “—হাউ ইজ ছাট পসিবল ইয়োর ম্যাজেস্টি?”

“ওয়েল ইউ হ্যাভ দি কিং অব ক্রাবস। আই হ্যাভ উইথ মি দি কিংস অব স্পেড, ডায়মণ্ড, হার্ট—অ্যাণ্ড এ রিয়েল কিং—কিং আবছল্লা দি গ্রেট।”

আরো অনেক হলিউড ফিল্মের মতো ‘আবছল্লা দি গ্রেট’ ছবিটিতেও এশিয়াকে হীন প্রমাণ করার চেষ্টা করা হয়েছে, কিন্তু রাজা ফারুকের জীবনের কিছু সত্যি-মিথ্যে জড়ানো তথ্য এই ফিল্মে পাওয়া যায়।

আগেই বলেছি, ফারুক এককালে সুপুরুষ ছিলেন। শুধু সুপুরুষই না, তিনি ছিলেন ধর্মভীরু, দয়ালু আর চরিত্রবান। তাহলে তাঁর এই অবনতির সূত্রপাত কি করে হলো? সে কথা পরে। এখন একটু ফারুকের ফেলে-আসা জীবনের কিছু খোঁজ নেওয়া যাক। মাত্র ১৬ বছর বয়সে ফারুক মিশরের রাজগদিতে আরোহণ করেন আর পরের বছর তাঁর বিবাহ হয় শশী জুলফিকার (পরে ফরিদা)-এর সঙ্গে। কিন্তু ফরিদার নশীব খারাপ। পুত্র-সন্তানের ভাগ্য থেকে তিনি বঞ্চিত থাকলেন আর মিশরের গদিতে যখন কেউ উত্তরাধিকারীই থাকবে না, তখন তিন কন্যার জননী ফরিদাও থাকতে পারেন না। অগত্যা তাঁকে যেতে হলো। কারো কারো মতে এই বিবাহ-বিচ্ছেদের পর থেকেই ফারুকের অবনতি শুরু হয়। কিন্তু নিন্দুকেরা বলে, দ্বিতীয় মহাযুদ্ধের সময় বেনিটো মুসোলিনী নাকি ফারুককে মাথাটা খারাপ করে দেন। তখন মিশরকে পকেটে রাখবার প্রচেষ্টা চলছিল দুই ক্যাম্পেই। মিডল-ইস্টের চাবিকাঠি ছিল মিশরে। মিত্রপক্ষ আর অ্যাকসিস্‌ডু’-তরফই সেই ‘ওপেন সিসেমী’ জানবার জগ্গে ফারুককে ‘উ’ (Woo) করছিল। কিন্তু হার মানালেন মুসোলিনী সবাইকে। অত্যাচার যখন ফারুককে ‘খুশ’ রাখার চেষ্টা ‘ডিপ্লোমেটিক হাই লেভেলে’ করছিল, মুসোলিনী শুধু একটা স্পেশাল প্লেনে ডজন দুয়েক সিনরিটা পাঠালেন ফারুককে আর ওয়াকিবহাল মহলের খবর নজরানা পেয়ে ফারুক বেশ প্রীতই হয়েছিলেন। সেই নেশার আজও শেষ হয়নি। নেশার খোঁরাক খুঁজতে তিনি সারা কন্টিনেন্ট তোলপাড় করেছেন।

কিন্তু ফারুক যখন রাজগদিতে আরোহণ করেন, তিনি ছিলেন

সুপুরুষ যুবক। কোরানে তাঁর ছিল প্রচুর শ্রদ্ধা। যখন তাঁকে বাদশাহী মণিমুক্তাখচিত রাজমুকুট পরতে বলা হয়, তিনি দৃঢ়স্বরে অস্বীকার করে বলেন, “যার দেশ এত গরীব সে রাজমুকুট কি করে পরবে।” একবার মসজিদে এক ভিখারীর পাশে বসে তিনি নমাজ পড়েছিলেন। আর তাঁর প্রতি প্রেম নিদর্শন করতে গিয়ে যখন শ’খানেক লোক ভিড়ের চাপে মারা যায়, প্রত্যেক পরিবারকে ফারুক ৫০০ পাউণ্ড করে ক্ষতিপূরণ দিয়েছিলেন। সেই মানুষের এত অধঃপতন কি করে হলো সত্যিই ভাবনার কথা। কাইরোর আবিদিন প্যালেসে যখন যুদ্ধের সময় ফারুক বিলাসের শ্রোতে গা ভাসিয়ে দিয়েছেন, তখন জীবনের প্রথম ‘শক’ তাঁকে পেতে হয়। ‘ভীচি’ (Vichy) গভর্নমেন্টের সঙ্গে সহস্র ছিন্ন করায় ফারুক মন্ত্রি-মণ্ডল বরখাস্ত করেন, কিন্তু নতুন প্রধান মন্ত্রী নিযুক্ত করার আগেই তাঁকে ‘শক’ খেতে হয় ছ’দিন পরে। তখনকার খবরের কাগজের রিপোর্ট থেকে কিছু অংশ তুলে দিলেই ব্যাপারটা পরিষ্কার হয়ে যাবে।

“..... at 9 p.m. on February 4th, 1942, the British tanks with guns trained surrounded Abidin Palace and thousands of troops, fully armed patrolled the neighbourhood. One tank forced the palace gate, and was followed by the British Ambassador (Lord Kilbarn) who had the G.O.C. British Troops in Egypt with him. The royal body guard was overpowered.....the palace telephone wires were cut...The Ambassador demanded the appointment of Nahas Pasha as Prime Minister.”

বাইশ বছর আগে কাইরোতে তৎকালীন ব্রিটিশ কমান্ডার স্যার লি স্ট্যাকের (সর্দার) হত্যার প্রতিশোধ নিলেন ব্রিটিশ গভর্নমেন্ট। দশ বছর পরে ১৯৫২ সালের ২৩শে জুলাই আবিদিন প্যালেসে আবার একদল সশস্ত্র লোক ঢুকেছিল। এবারও ফারুককে হার মানতে হয়েছিল, কিন্তু ব্রিটিশের কাছে না, নাসের-নগীবের কাছে। সে কথা পরে। ১৯৪২ সালের ফেব্রুয়ারী মাসের সেই রাতের ঘটনার পরে ফারুকের হঠাৎ মনে হলো তাই তো যুদ্ধ চলেছে।

আরেক দিনের কথা। ফারুক ‘শপিং’ করে বেড়াচ্ছিলেন কাইরোতে। গিয়ে ঢুকলেন এক গহনার দোকানে। চোখ

পড়লো নারীমান সাদেকের উপর। পরের সপ্তাহে নারীমান সাদেক এলেন আবিদিন প্যাালেসে। নারীমানের ফিয়াসে—সুপুরুষ যুবক সেই ডিপ্লোম্যাটের কি হলো মিশরের ইতিহাসে তার কোন মূল্য নেই। নারীমানের ভাগ্য ফরিদার মতো এত খারাপ ছিল না। অন্তত ফরিদার তুলনায় ‘ডমিনাট হরমোন’ মেল (male) থাকায় জন্ম হলো শিশু-পুত্র ফুয়াদের। কিন্তু ছ’মাস যেতে না যেতেই আবিদিন প্যাালেসে এলেন নাসের আর নগীব। রয়াল ইয়ার্ট-এ করে ২০৪টি স্টকেস, নারীমান আর ফুয়াদকে নিয়ে ফারুক পালালেন দেশ ছেড়ে। কিছুদিন পরে অবশ্য নারীমানকেও ছাড়লেন। আবার শুরু হলো ‘dabbling in wholesale fashion’। কর্নেল নাসেরের দলের কিছু লোক চেয়েছিলেন ফারুককে শেষ করতে, কিন্তু নগীব বাধা দেন। ফারুককে জিজ্ঞাসা করা হয়, তিনি কাঁধের উপর মাথাটা নিয়ে যাবেন, না সেটা রেখে যাবেন। ফারুক অবশ্য প্রথমটাই বেছে নিলেন। ক্যাথ্রী পৌঁছে শুরু করলেন কান্নাকাটি “আমার সব লুটে নিয়েছে দুর্বৃত্তেরা। আমি আজ নিঃস্বা।” বিশ্বাস কেউই করলো না। কারণ ইউরোপের ব্যাঙ্কে ব্যাঙ্কে তাঁর মোটা অঙ্কের টাকার কথা অনেকেই জানতো। শুরু হলো আবার বিলাসিতার বশ্য। বার্লেস্ক (burlesque) ‘শো’র সিজন টিকেট কেনেন, সকালে দশটা ডিম দিয়ে ব্রেকফাস্ট করেন আর সন্ধ্যাবেলায় ‘বিকিনী’ পরা দশটা মেয়ে তাঁর চাই। দিনগুলো এইভাবেই কেটে যাচ্ছে। সামিয়া গামেল, এইমী বেরিয়ার, ইরমা মেমুটোলো, একের পর এক কত এল গেল ফারুকের এই ৩৮ বছরের জীবনে।

আমার প্যারিসের বন্ধু আমায় বলেছিল—

“This most despised top-drawar personality is more a case for Freudian analysis than mere journalistic curiosity.

তাই ফারুককে অ্যানজিও বীচ, ফ্রেঞ্চ রিভিয়ারা, মন্টিকার্লো আর ক্যাথ্রীতেই ছেড়ে এবার একটু ‘সিরিয়াস বিজিনেস’ আলোচনা করা যাক। সিরিয়াস বিজিনেস মানে নাসের আর নগীব।

অজানা, অচেনা এক সৈনিক একদিন পৃথিবীর সব খবরের কাগজে হেড লাইন সৃষ্টি করলো। ‘নতুন আতাতুর্ক’, ‘নতুন

আশা', 'জাতির ত্রাণকর্তা' নানা রকম নামে হঠাৎ অভিহিত হলো এই সৈনিক। ১৯৫২ সালের ২৩ জুলাই-এর মাঝ-রাতের সেই ঘটনার আগে কেই বা জানতো জেনারেল মহম্মদ নগীবকে। মিশরের কুখ্যাত আর্মির মুষ্টিমেয় দেশপ্রেমিক অফিসারদের মধ্যে একজন ছিলেন নগীব। নগীবকে বলা হতো 'স্ট্রং ম্যান', কিন্তু তাঁর মতো কোমলহৃদয় নেতা বোধ হয় বিরল। তিনি কোমলহৃদয় না হলে ফারুককে কাঁধের উপর মাথা নিয়ে যেতে হতো না। কাইরোর সাবার্বনে ছোট বাড়িতে স্ত্রী আর তিন ছেলেকে নিয়ে তিনি থাকতেন। যেদিন তিনি মিশরের প্রেসিডেন্ট হন, তখনও তাঁর মোটরের দেনা শোধ হয়নি। কথা বলতেন কম, শুনতেন বেশি। কি করে তাঁর পক্ষে এই রিভলিউশন সম্ভব হলো ভাবলেও অবাক লাগে। ইজরাইলী-আরব যুদ্ধে নেভেগ মরুভূমির লড়াইয়ে মিশরের শোচনীয় পরাজয়, আর্মস স্ক্যাণ্ডেল, ফারুকের শোষণ আর অত্যাচারে সারা দেশ তখন জর্জরিত। সেনাবাহিনীতে তৈরি হলো গুপ্ত এক সমিতি 'ফ্রি অফিসারস'। ধীরে ধীরে, অতি গোপনে চলতে লাগল প্ল্যান—আর সেই প্ল্যান সফল হলো ২৩শে জুলাই মাঝরাতে নগীবের নেতৃত্বে।

সুদানের মাটির দেয়াল-ঘেরা ওয়াদমেদানী গ্রামে জন্ম মহম্মদ নগীবের। মা-বাপের ইচ্ছে ছেলে হয় উকিল, নয় স্কুলের মাস্টার হোক। গভীর রাতে যুবক মহম্মদ বাড়ি ছেলে পালিয়ে গেল। শ্রান্ত, ক্লান্ত, মহম্মদ ১০০০ মাইল দূর এসে পৌঁছলো কাইরোর রয়াল মিলিটারী আকাডেমীতে। আবেদন জানালো সেনাবাহিনীতে প্রবেশের জন্মে, কিন্তু গোলমাল বাঁধলো তাঁর উচ্চতা নিয়ে। নগীব পাঁচ ফুট ছ' ইঞ্চি, কিন্তু নিয়ম পাঁচ ফুট সাত ইঞ্চি। ফিরে চললো নগীব আর শুরু হলো কঠিন ব্যায়ামের পরিশ্রম, উচ্চতা বাড়াতেই হবে। এক বছর পরে আবার হাজির আকাডেমীতে, কিন্তু এবারে আধ ইঞ্চি কম। তার অধ্যবসায় আর আকাঙ্ক্ষা দেখে কর্তারা খুশি হয়ে নগীবকে প্রবেশের অনুমতি দিলেন। মহম্মদ নগীব মাত্র ১৯ বছর বয়সে হলেন সেকেন্ড লেফটেনেন্ট মহম্মদ নগীব। রাজার প্রিয়পাত্রদের হয় প্রমোশন। বন্ধুরা পরামর্শ দেয় প্রাসাদে একটু ঘোরাকেরা করতে, কিন্তু নগীবের এক উত্তর, 'আমার দ্বারা ওসব হবে না'। এর পরে

এল প্যালেস্টাইনের যুদ্ধ। নগীব তখন ব্রিগেডিয়ার। সিনাই মরুভূমির লড়াইয়ে আহত হলেন। প্যালেস্টাইনের যুদ্ধের সে পরাজয়ের কথা নগীব কখনো ভোলেননি আর ভোলেননি তাদের যারা তাঁর পাশে দাঁড়িয়ে যুদ্ধ করছিল। মিশরের প্রেসিডেন্ট হবার পর একবার যখন তিনি মিলিটারী ব্যারাক নিরীক্ষণ করছিলেন, এক সুদানী সৈনিককে হঠাৎ চিনতে পেয়ে তাকে জড়িয়ে ধরে চিৎকার করে ওঠেন, “দিস ইজ ওয়ান অব মাই বয়েজ”।

কিন্তু মিশরের ক্ষণভঙ্গুর রাজনীতিতে নগীবও থাকলেন না বেশি দিন। তাঁকেও যেতে হলো। রক্তমঞ্চে অবতীর্ণ হলেন কর্নেল আবদেল গামেল নাসের। নগীবের মতো নাসেরও ছিলেন এক নাম-না-জানা অচেনা সৈনিক। মিশরের ১৯৫২ সালের জুলাই মাসের ‘কুপ’-এ নাসের ছিলেন অগ্রগণ্য। কিন্তু নগীবের সঙ্গে তাঁর বেশি দিন বনিবনা হলো না। নগীব নিজেই তাঁর লেখা ‘ইজিপ্টস্ ডেস্টিনি’ বইয়ে তাঁদের ছ’জনের মধ্যে মতের অমিল সম্বন্ধে লিখেছেন :

“Abdel Nasser believed with all the bravado of a man of 36 that we could afford to alienate every segment of Egyptain public opinion, if necessary, in order to achieve our goal. I believed with all the prudence of a man of 53 that we would need as much popular suport as we could possibly retain.”

নাসের ভাবতেন নগীব ইজ টু শ্লো আর নগীব ভাবতেন নাসের ইজ টু ফাস্ট। নগীব চেয়েছিলেন ব্রিটিশের সঙ্গে মিত্রতা রাখতে, কিন্তু নাসের চেয়েছিলেন “টু গেট টাক উইথ দি ব্রিটিশ”। পোস্ট আপিসের কেরানীর ছেলে নাসের। জন্ম উত্তর মিশরের বেনীমের গ্রামে। কুড়ি বছর বয়সে আকাডামী থেকে কমিশন পান। তার পরের ইতিহাস সুবিখ্যাত। কেউ কেউ প্রশ্ন করেন, “নাসের কি ডিক্টেটর ?” উত্তর নাসের নিজেই দেন। “I have asked myself that same question many times and always pray to God that those who call me a dictator may never prove to be correct.”

ডাঃ রফিক জাকারিয়া নাম-করা সাংবাদিক। তিনি বলেন,—Nasser loves his people too much to be

ruthless ; he is too honest and sincere to be corrupt ; he is too God-fearing and religious to be cruel ; he is too fond of his wife and five young children to be heartless, he is too simple and austere in his habits to be pompous. He can not therefore be a dictator.”

কাইরোর বিখ্যাত ‘আখের সা’ পত্রিকায় নাসের তিনটি প্রবন্ধ লেখেন। তাতে তাঁর জীবনের অনেক খুঁটিনাটি খবরই পাওয়া যায়। সেই প্রবন্ধ এখন ‘ফিলসফি অব দি রিভলিউশন’ নামে পুস্তকাকারে বেরিয়েছে। নাসেরকে একবার এক সাংবাদিক জিজ্ঞাসা করে ২৩শে জুলাই মাঝরাতে আপনারা যখন ফারুকের ঘরে প্রবেশ করেন, তখন কী দেখেন। নাসেরের একজন সঙ্গী জবাব দেন, “the most staggering collection of pornography turned up.” অতি অশ্লীল সব ফটো ফারুকের ঘর থেকে বেরোয়।

“যদি ভবিষ্যৎ প্রমাণ করে যে, আমি ভুল আর নাসের ঠিক, আর যদি আমি বেঁচে থাকি, তাহলে আমিই নাসেরকে অভিনন্দন জানাবো”—কথাটা বলেছিলেন জেনারেল নগীব। ইতিহাস হয়তো নাসেরকেই ঠিক ঠাওরাবে, কিন্তু সেদিন নগীব হয়তো নাসেরকে অভিনন্দন জানাতে বেঁচে থাকবেন না।

প্রত্যেক দেশ আর জাতির জীবনে কয়েকটা তারিখ অবিস্মরণীয় হয়ে থাকে। সেই তারিখগুলো রচনা করে ইতিহাস। মিশরের ইতিহাসেও কয়েকটা তারিখ মিশরীদের চিরকাল স্মরণ করিয়ে দেবে অনেক হাসি-কান্না বিজড়িত ঘটনা। ইতিহাসের পুনরাবৃত্তি হয় অদ্ভুতভাবে আর মিশরেও তার ব্যতিক্রম হয়নি। ১৮৮১ সালের ২ই সেপ্টেম্বরের এক সন্ধ্যায় সেনাদলের নেতা ওরাবী আক্রমণ করেছিলেন আবিদিন প্যাালেস খদীভ ভৌফিককে পদচ্যুত করতে। শতাব্দী শেষ হবার আগেই ২৩শে জুলাই ১৯৫২ সালে নগীব আর নাসের মাঝরাতে আবার যান আবিদিন প্যাালেসে রাজা ফারুককে তাঁর ঘনিয়ে আসা দিনের কথা স্মরণ করিয়ে দিতে। ফারুক পালিয়ে যান রস-এল-তীন প্রাসাদে কিন্তু তিন দিন পর

মিশর ছেড়ে পালাতে হয়। এক বছর ঘুরতে না ঘুরতে মিশরকে রিপাবলিক ঘোষণা করা হয় ১৯শে জুন, ১৯৫৩ সালে। কালের চাকা ঘুরে আবার থমকে দাঁড়ালো ১৮ই জুন ১৯৫৬ সালে। সেদিন পোর্ট সৈয়দের ফ্লাগস্টাফে উড়লো মিশরের পতাকা। শেষবারের মতো বেজে উঠলো ‘গড সেভ দি কুইন’ আর শেষ ইংরেজ সৈন্য ছেড়ে চললো মিশর। ফ্লাগস্টাফের কাছে দাঁড়িয়ে কর্নেল নাসের আনন্দের অশ্রুতে অভিভূত হয়ে পড়লেন। ২৩শে জুলাই মিশরের নতুন ‘কনস্টিটিউশন’-এর ঘোষণা হলো আর ২৬শে জুলাই (এইদিন চার বছর আগে ফারুক সিংহাসন ত্যাগ করে দেশ ছেড়ে পালিয়েছিলেন) নাসের হলেন মিশরের প্রথম প্রেসিডেন্ট। সেই রাতে এক স্তম্ভিত পৃথিবী শুনলো প্রায় একশ’ বছর আগে তৈরি “কম্পানী ইউনিভার্স ডু কানালা মারিতিম্ ডু সুয়েজ” (Compagnie Universelle due Canal Maritime de Suez)-এর জাতীয়করণ। এর পরের ঘটনা আজ আর সবিস্তারে বলার কোনো প্রয়োজন নেই কারণ পৃথিবীতে এমন কোনো লোক বোধহয় নেই যে বিংশ শতাব্দীর ইতিহাসের কলঙ্কনয় সেই দিনটার কথা মনে করে কেঁপে ওঠেনি। কাইরো, আলেকজান্দ্রিয়া, পোর্ট সৈয়দ, সুয়েজ বন্দরে আর শহরে সেদিন হাহাকার উঠেছিল। ১০নং ডাউনিং স্ট্রীটে অ্যান্থনী ইডেন তখন নরউইজান প্রধানমন্ত্রীর সঙ্গে ডিনার খাচ্ছিলেন। ‘ফিশ কোর্স’ সার্ভ হবার সময় শুনলেন মিশরের উপর আক্রমণ শুরু হয়ে গিয়েছে—৩১শে অক্টোবর, ১৯৫৬।

সুয়েজ ক্যানাল ন্যাশনলাইজেশন আর তার পরের ঘটনাবলী সম্বন্ধে এত লেখা হয়েছে যে, আমি যদি আবার আলোচনা শুরু করি তাহলে নিউ ক্যাসেলে কয়লা নিয়ে যাবার মতো অবস্থা হবে। কাইরো শহরে বোমা বর্ষণের সেই বর্ষর আক্রমণের বিস্তারিত বিবরণ যদি কেউ জানতে চান তাঁদের আমি বিখ্যাত সাংবাদিক শিবদাস বন্দ্যোপাধ্যায়ের কাইরো থেকে লেখা ‘দি ফার্স্ট টেস্ট অব বম্বিং ইন কাইরো’ পড়তে অনুরোধ করছি। ‘ময়দানে তহরীর’-এর অদূরে বসে অল্-কাহিরার বুকের উপর সে রাতে যে তাণ্ডব নৃত্যের বর্ণনা তিনি লিখেছেন তা অপূর্ব। সেদিন ব্রিটিশ আর ফ্রাঙ্ক আক্রমণকারীরা শুধু মিশরের উপরই আক্রমণ করেনি, তারা সেদিন মানবতার হত্যা করেছিল মিশরের শহরে শহরে। আর যারা

আরো বেশি জানতে চান তাঁরা যেন সুইডিশ প্রেস-কন্ট্রোলার পের-লো অ্যাণ্ডারসনের (Per-Olow Anderson) বৃত্তান্ত পড়েন আর তাঁর তোলা ছবিগুলো দেখেন। সুরাবর্দি সাহেবের 'ডাইরেক্ট অ্যাকশনের' সময় কলকাতার বর্ণনা দিয়ে কে যেন লিখেছিল, "Smashed jaws, burst eyes, fractured limbs ripped-open stomachs, crippled men, women and children are a kind of political argument that the 20th Century does not expect".

কিন্তু বিংশ শতাব্দীতে সভ্য ইংরেজ আর ফরাসীর মিশরে এই 'পলিটিক্যাল অ্যাকশন'ই করেছিল 'ইন দি নেম অব্ পীস'। অ্যাণ্ডারসনের বিবরণ সবটা এখানে দেওয়া সম্ভবপর নয়। কিছু-কিছু লাইন উদ্ধৃত করার লোভ সত্ত্বরণ করতে পারলাম না:—

".....My eye witness story would not be a very nice story to tell children of the world. If it can be called a "police action" what the French and British troops have done to the Egyptians, then there is no place for the word humanity in their dictionaries...I found Port Said a burning smoking inferno...I met children in the bombed out-houses and among the ruins searching for their parents. I saw parents, they too were searching with bleeding hands in the wreckage that were left of their homes, to find their killed children. I saw thousands of dead bodies in smoldering smoking ruins, in the backyards of the few hospitals that were still left...two hospitals where 900 patients were blown up. I call it terror and murder... It is a shame for England and a black-spot which can never be cleaned off. I have been a war photographer since the civil war in Spain and it is hard for me to find any comparison to Port-Said, horror and terror against civilians... I had seen the corpses of the civilians, children as well as women with the holes in their backs as they had been shot whilst running away. I counted 270 dead carried away in the two hours I was there...There is not much more to say...it could never be put into words

but my pictures of the father over his dead little daughter and the wounded mother holding her dead little daughter are documents that will never be forgotten”...

৩১শে অক্টোবর আর তারপরের ক’টা দিনের কাহিনী আজ পড়তে পেলে সুয়েজ নির্মাতা ফার্দিনান্দ মারী ডু লেসেপস (Ferdinand Marie de Lesseps) কি করতেন বলা যায় না। মিশরের ওয়ালী মহম্মদ সৈয়দ বা খদীভ ইসমাইল অথবা ডিজেরাইলীরও মনের অবস্থা কি হতো এখন তা বলা কঠিন।

১৪ লক্ষ পাউণ্ড খরচ করে ১৮৬৯ সালে ১৭ই নভেম্বর সুয়েজ ক্যানাল উদ্বাটনের উৎসব হয়। গিসেপ ভার্দী (Guiseppe Verdi) সেই উৎসবের জন্য তৈরি করেন তাঁর বিখ্যাত সঙ্গীত ‘আইদা’ (Aida)। ‘আইদা’র সুমধুর সঙ্গীত চাপা পড়েছে কাইরো, আলেকজান্দ্রিয়া, পোর্ট সৈয়দ আর সুয়েজের ধ্বংসস্থাপে। মৃত্যুর ক্রন্দনরোল উঠেছিল সেদিন ৩১শে অক্টোবর মা-হারা শিশু, শিশু-হারা মা, পুত্র-হারা জননী, স্বামী-হারা স্ত্রী আর ভাই-হারা শত শত বোনের বুক থেকে।

কিন্তু প্যাট্রি আবার আমায় আমেরিকা থেকে লিখলো,—

“Dear Taroon—from the ruins of Cairo, Port Said, Alexandria and Suez—on the ashes and dead bodies of the Egyptians—is rising a new Egypt”...

কাইরো, পোর্ট সৈয়দ, আলেকজান্দ্রিয়া, সুয়েজের ধ্বংসস্থাপের উপর আর শত শত মিশরীদের মৃতদেহের উপর নতুন মিশর তৈরি হচ্ছে। ওয়ালী, ফারাও, খদীভ, ক্লিওপেট্রা, টুটেনখামেন, রামেসিস্ আর ফারুকের মিশর না, নাসের নগীব আর লক্ষ লক্ষ ‘ফেলাহিন’-এর মিশর। সাহারা আর সিনাই মরুপ্রান্তরের চক্রবালের কোল ঘেঁষে নতুন রক্ত-রাঙা সূর্যের উদয় হচ্ছে। প্যাট্রির কথাই যদি সত্যি তাহলে বালুরাশীর উপর যে মিশরী রক্তের ধারা ঝরে পড়েছে তা তো বৃথা হবে না।

প্যাট্রিকে জবাব দিয়েছিলাম—“ডায়ার প্যাট্রি—আই প্রে টু গড্, ইফ্ দেয়ার ইজ ওয়ান, ডাট ইউ প্রভ টু। দি প্রাইস্ পেড্ উইল বি ওয়ার্থ অল দিস্ ব্রাড্ টায়ারস্ অ্যাণ্ড টয়েল”।

সাক্কারার অভিশপ্ত পিরামিডের কাহিনী শোনাচ্ছিল কামাল সালেহ ।

পাঁচ হাজার বছর আগে ঐশ্বর্যশালী মেমফিস নগরী দাঁড়িয়েছিল সাক্কারার পিরামিডের কাছে । একের পর এক ছুনিয়ার যত ইজিপ্টোলজিস্ট, আর্কেলজিস্ট এবং আরও অনেক কৌতূহলী লোক এসেছে এই পিরামিডের রহস্য উদ্ঘাটন করতে, কিন্তু ফারাও-এর অভিশাপ থেকে কেউ বাঁচতে পারেনি । এই তো কিছুদিন আগে রাজা শেনখেত-এর সমাধি খোঁজা হচ্ছিল সাক্কারার পিরামিডে, হঠাৎ পাথরের স্তূপ ধ্বসে পড়ে জীবন্ত সমাধি হয় অনেকেরই । কেউ এসেছে ঐশ্বৰ্যের লোভে, কেউ এসেছে নিছক কৌতূহল নিবারণ করতে আর কিছু এসেছে বৈজ্ঞানিক সত্য আবিষ্কার করতে, কিন্তু কতটুকু রহস্যই বা তারা ভেদ করতে পেরেছে ?

কামাল সালেহ্ শিক্ষিত, ইউনিভার্সিটির ছাত্র, অনেক দেশ ঘুরেছে আর অনেক জিনিসই দেখেছে । তার কাছ থেকে এইরকম একটা দৃষ্টিভঙ্গি আমি ঠিক আশা করিনি, তাই জিজ্ঞাসা করলাম, “কিন্তু তুমি সত্যিই এ কার্স অব দি ফারাও বিশ্বাস করো !”

“না বিশ্বাস করেও তো উপায় নেই । বিংশ শতাব্দীর যুবক আমি, এইসব কথা অন্ধ বিশ্বাস বলে আমার হেসে উড়িয়ে দেওয়া উচিত, তাই না ? কিন্তু হাজার হাজার বছর পুরনো এই পিরামিড আর ফিগুয়ান যখন দেখি, তখন কেন জানি না সত্য-মিথ্যা জড়ানো কাহিনীগুলো বিশ্বাস করতে ইচ্ছে করে ।”

“লর্ড কার্নাভন আর হাওয়ার্ড কার্টারের কাহিনী জানো ?” কামাল আমায় জিজ্ঞাসা করে । বললাম, “লর্ড কার্নাভনকে আমি শুধু লুন্ডনে ‘ভ্যালী অব দি কিংস’-এ যুবক ফারাও টুটেনখামেনের সমাধির আবিষ্কর্তা হিসেবেই জানি ।”

“তাহলে তুমি কিছুই জানো না” অম্লান বদনে কামাল জবাব দেয় । “তুমি কি জানো লর্ড কার্নাভন শেষ পর্যন্ত টুটেনখামেনের ‘মামি’ দেখতে পাননি । তিনি শুধু দেখেছিলেন টুটেনখামেনের সিংহাসন আর অফুরন্ত মণিমুক্তা । সোনার কফিনের গোলাপী-রং-এর গ্রানাইটের সেই ডালা খুলবার অনেক আগেই তাঁর মৃত্যু হয় ।”

“আশ্চর্য!”

“হ্যাঁ সত্যিই আশ্চর্য। তুমি জার্নালিস্ট। সত্য প্রমাণিত না হওয়া পর্যন্ত তোমরা সব জিনিসকেই মিথ্যা মনে করো। কিন্তু লর্ড কার্নাভন ফারাওদের অভিশাপ থেকে বাঁচতে পারেননি। টুটেনখামেনের সমাধিতে লেখা ছিল যারা এই ঘুমন্ত ফারাওদের ঘুম ভাঙাবে নিশ্চিত মৃত্যু তাদের ভাগ্যে। কার্নাভন গিয়েছিলেন ঘুম ভাঙাতে আর তাই মৃত্যু তাঁকে রেহাই দেয়নি।”

“কামাল, তুমি নিজে বিশ্বাস করো এই সব?” আবার প্রশ্ন করি।

“আবার তোমার সেই এক প্রশ্ন। আমার বিশ্বাস করা-না-করাতে কিছু এসে যায় না। কিন্তু ফ্যাক্টস্ আর ফ্যাক্টস্। তাহলে শোনো। লর্ড কার্নাভন তখন টুটেনখামেনের সমাধি নিয়ে উঠে পড়ে লেগেছেন। একদিন বিষাক্ত একটা মাছি তাঁকে কামড়ায়। সেই তাঁর কাল হলো। সমস্ত মুখ চোখ ফুলে গেল, কথা বন্ধ। কার্নাভনকে নিয়ে যাওয়া হলো কাইরোতে। মৃত্যুর সময় তাঁর বন্ধু হাওয়ার্ড কার্টারকে বললেন,

“The wing of death will overtake all those who disturb the pharaoh's tomb and when the angel of death comes he kills a baby and a tired old man.”

“ভালী অব কিংস-এ একটা ‘টুমস্টোনে’ এই ভয়ঙ্কর ভবিষ্যদ্বাণী লেখা ছিল। শুধু আমি না লর্ড কার্নাভনও ফারাওদের অভিশাপের কথা বিশ্বাস করতেন। একবারের জন্তেও কার্নাভন টুটেনখামেনের ‘মামি’ স্পর্শ করতে পারেননি। স্বামীর কফিনে সযত্নে কিছু ফুল রেখেছিলেন রাজমহিষী আঞ্চেসন-আমেন। লর্ড কার্নাভন তাও দেখতে পাননি আর টুটেনখামেনের সেই সোনার ‘অ্যামুলেট’ দেখার সৌভাগ্যও তাঁর হয়নি।”

“কিন্তু তুমি কি প্রমাণ করতে চাইছো কামাল?”

“আমি কিছুই প্রমাণ করতে চাইছি না। আমার কথা আগে শোনো, তারপর নিজেই চেষ্টা করো বুঝতে। হাওয়ার্ড কার্টার, কার্নাভন মারা যাবার পর টুটেনখামেনের রহস্য ভেদ করেন। কার্টার অভিশাপে মারা যাননি কিন্তু কফিন খোলার সময় তিনি হঠাৎ মাথা ঘুরে পড়ে যান আর সেই আঘাতের যন্ত্রণায় তাঁকে ভুগতে হয় অনেক দিন।”

“তারপর ?”

“তারপর শুনবে ? কার্নাভন যখন মৃত্যু যন্ত্রণায় কাতরাচ্ছেন, এক্সরে স্পেশালিস্ট ডাঃ রীড যিনি টুটেনখামেনের ‘মামি’ পরীক্ষা করেছিলেন হঠাৎ লগুনে আগুনে পুড়ে মারা যান। আরো শুনতে চাও ? কার্নাভন সাহেবের দলের আরেকজন সদস্য ইভলীন হোয়াইট কিছুদিন পরে বন্দুকের গুলীতে আত্মহত্যা করেন আর দলের আর্কেলজিস্ট ডাঃ মেস আর লর্ড কার্নাভনের প্রাইভেট সেক্রেটারীও কয়েকদিনের মধ্যে মারা যান। তারপর কার্নাভনের ভাই অরবী হার্বাট আর আর্থার উইগল। আরো আছে। বৃদ্ধ লর্ড ওয়েস্টবারী (কার্নাভনের সেক্রেটারীর পিতা) লগুনে হোটেলের জানলার উপর থেকে নিচে কঠিন পাথরের উপর ঝাঁপিয়ে পড়ে আত্মহত্যা করেন। পাঁচ বছর পরে লেডী কার্নাভনও মারা যান। আশ্চর্য যোগাযোগ, তাঁর মৃত্যু হয় বিষাক্ত মাছির কামড়ে। আরো জানতে চাও ? পঁচিশ বছর পরে আবার সাক্কারার পিরামিডে একটা ছর্ঘটনা ঘটে। তুমি বিশ্বাস করবে কিনা জানি না কিন্তু প্রাচীন ফারাওদের অভিশপ্ত সাক্কারার পিরামিডের কাহিনী আমি বিশ্বাস করি আর শুধু আমিই না আমার মতো অনেক শিক্ষিত মিশরীও মনে মনে বিশ্বাস করে।”

কামাল সালেহ্ আমার বিশিষ্ট বন্ধু। তার বিশ্বাস আমি ভাঙতে চাইনি আর তা ভাঙাবার মতো তর্ক যা যুক্তিও আমার কাছে ছিল না। বিংশ শতাব্দীর বৈজ্ঞানিক যুগে অনেক পুরনো কথাই আমরা অলীক বলে উড়িয়ে দিই। কিন্তু কামালের কাহিনী শোনার পর পিরামিডে ঢোকার সাহস আমার হয়নি। অনেকেই আমার এ কথা শুনে হয়তো হাসবেন। না হাসাটাই আশ্চর্য। দলে দলে টুরিস্টরা যায় পিরামিড আর ফিউজ দেখতে, তাদের তো ভয় হয় না, আমারই বা কেন হলো ? কি উত্তর দেবো ? সব টুরিস্টদের হয়তো কামাল সালেহর সঙ্গে দেখা হয় না। মিশরে গিয়ে সেই অন্ধকারময় কুঠুরির ভিতরে কেন যে আমি ঢুকিনি তা ভেবে আমার নিজেরই মাঝে মাঝে অবাক লাগে। কেন যাইনি তা বোঝানো আজ কঠিন, কিন্তু শুধু এইটুকু বলতে পারবো গিজের সেই অতিকায় পিরামিডের সামনে দাঁড়িয়ে কেমন যেন একটা অজানা ভয় আর আতঙ্ক আমায় জড়িয়ে ধরেছিল।

“ভিতরে যাবে না ?” কামাল জিজ্ঞাসা করেছিল।

“না।”

“তোমার কি ভয় লাগছে ?”

“বোধহয়।”

অভিশপ্ত কাহিনী শোনবার পর হেসে কথাটা উড়িয়ে দেবার ছলে কামাল বলে, “আমি তো তোমায় সাক্ষারার পিরামিডের কথা বলেছি, গিজের পিরামিডের কথা তো বলিনি।”

“না, এই তো বাইরে থেকেই বেশ লাগছে।”

উত্তর দিয়েছিলাম কামালকে। কিন্তু বেশ বুঝতে পারছিলাম আমার পা ছটো কে যেন চেপে ধরে আছে। এক দৃষ্টে তাকিয়ে আছি সেই অতিকায় পিরামিডের দিকে। ধীরে ধীরে একলাখ মজুরের মেহনতে কুড়ি বছরে গড়ে ওঠা সেই বিরাট পাথরের ভূপ যে কতক্ষণ পর্যন্ত দেখেছি খেয়াল ছিল না। সম্মিত ফিরে এল কামালের ডাকে।

দেশে ফিরে এসে সেদিনের কথা মনে করে নিজেকে ধিক্কার দিয়েছি অনেকবার কিন্তু কেন যে সেদিন এইরকম অভিজ্ঞত হয়ে পড়েছিলাম তার সঠিক কারণ আজও খুঁজে পাইনি। ‘সুপারস্টিশন’ বা অন্ধ বিশ্বাস আমার নেই কিন্তু কয়েক মুহূর্তের জ্ঞান আসা এক অদ্ভুত ভয় আমাকে পিরামিড দেখার সৌভাগ্য থেকে বঞ্চিত করে, আর ‘টু প্যারিস উইথ ইওর ওয়াইফ?’ (স্ত্রীকে নিয়ে প্যারিসে?) বলে অনেকে যেমন অবাক হন, তেমনি আমাকেও বছবার ‘টু ইজিপ্ত অ্যাণ্ড ডিডন্ট সি পিরামিড?’ (মিশরে গেলে আর পিরামিড দেখলে না?) শুনে চুপ করে থাকতে হয়েছে।

মিশরের প্রায় সত্তরটা পিরামিডের সম্বন্ধেই সত্যি-মিথ্যে জড়ানো অনেক কাহিনী শোনা যায়। গ্রীক পর্যটক হেরদট (Herodotus) মিশর ঘুরে আসার পর অনেক গল্পই পিরামিড আর ফিউক্স নিয়ে শোনা গিয়েছে। ফিউক্সকে বলা হয়েছে রূপকথার সেই দানব যে লোকদের কঠিন কঠিন ধাঁধা জিজ্ঞাসা করতো আর উত্তর দিতে না পারলে টু’টি চেপে মেরে ফেলতো। তারপর খুফুর পিরামিড নিয়েতো এস্তার কিংবদন্তী প্রচলিত আছেই।

ইজিপ্টোলজির বিখ্যাত প্রফেসর ডাঃ সেলিম হুসেন কিছুদিন আগে এইসব কিংবদন্তীর উত্তর দিয়ে হলিউড নির্মিত ‘ল্যাণ্ড অব দি ফারাওস’ ফিল্মের তীব্র সমালোচনা করেন। কামাল সালেহকে নিয়ে সেই সব কাহিনী শুনতে শুনতে কত যে ঘুরেছি তার ইয়ত্তা নেই। নীল নদের দিকে মুখ করে সজাগ প্রহরীর মতো শাস্তু ফিঙস্‌স্‌ও দেখেছি আর আকাশছোঁয়া পিরামিডের সামনেও অভিভূত হয়ে প্রণাম জানিয়েছি তাঁদের, যারা হাজার হাজার বছর আগে বাস্তবে পরিণত করেছেন যা আজও আমাদের কল্পনার বাইরে!

আঠারো

“ও গ্যানদী, হি ওয়াজ অ্যাজ্‌ গ্রেট্‌ অ্যাজ্‌ আতাতুর্ক্‌”—‘দী’র উপর অনাবশ্যক আর অস্বাভাবিক জোর দিয়ে অতি সহজভাবেই আমার প্রশ্নের উত্তর দেয় গুলর। আতাতুর্ক্‌ ‘গ্রেট্‌’ আমি জানি, কিন্তু ‘গ্যানদী’কে ‘অ্যাজ্‌ গ্রেট্‌ অ্যাজ্‌ আতাতুর্ক্‌’ উত্তরটা আমার ঠিক মনঃপূত হয় না। কিন্তু এটাও বেশ জানতাম যে, ইউনিভার্সিটির সাইকোলজির ছাত্রী গুলর যে উত্তরটা আমায় দিলো, টার্কীর আবালবৃদ্ধ, শিক্ষিত, অশিক্ষিত, সবাইকার কাছ থেকে আমি এ ছাড়া অণু কোনো জবাবই পেতাম না। যখন গুলর গান্ধীজিকে ‘অ্যাজ্‌ গ্রেট্‌ অ্যাজ্‌ আতাতুর্ক্‌’ বলেছে তখন সে একজন তুর্কীর পক্ষে অণু যে কোনো মহান ব্যক্তিকে তার প্রাপ্য শ্রেষ্ঠ সম্মানই দিয়েছে, কারণ তার কাছে আতাতুর্ক্‌-এর মহানতা বা ‘গ্রেটনেস’ ‘লাস্ট ওয়ার্ড’ বা শেষ কথা। গান্ধীজি যখন আতাতুর্ক্‌র মতোই মহান, সুতরাং তিনি জগতের একজন শ্রেষ্ঠ ব্যক্তি।

‘কামাল আতাতুর্ক্‌’—কি অদ্ভুত এক যাত্রা এই নামটার, সারা টার্কীতে! হোটেল, রেস্টোরাঁতে, আপিসে, ট্রামে, বাসে যেখানে যাও আতাতুর্ক্‌র ছবি। নতুন টার্কীর জন্মদাতা আতাতুর্ক্‌র স্মৃতি নিয়েই টার্কী আজ বেঁচে আছে। তা নাহলে কবে ছারখার হয়ে যেতো। অন্ধের মতন পশ্চিমের অনুকরণ করে চলেছে টার্কী, কোথায় যে এর পরিণতি বলা কঠিন। কিন্তু ঐ একটা লোকের নামের দৌলতে সারা দেশটা এখনো এক সূত্রে বাঁধা আছে।

ডেমোক্রেটিক পার্টির গভর্নমেন্টই হোক আর বিরোধী রিপাবলিকান পার্টিই হোক দু'দলই আতাতুর্কের নামে শপথ করে। অথচ মজার ব্যাপার এই যে, আতাতুর্কের হাতে গড়ে ওঠা রিপাবলিকান পার্টি আজ টার্কীর পার্লামেন্টে বিরোধী পক্ষ।

আতাতুর্ক টার্কীর জন্মে অনেক কিছুই করেছেন কিন্তু তার মধ্যে একটা বিরাট কাজ হলো তিনি তুর্কী ভাষাটাকে ভেঙেচুরে, ছমড়ে মুচড়ে অতি সহজ করে দিয়েছেন। ফার্সী আর আরবী লিপি জলাঞ্জলি দিয়ে তিনি শুরু করলেন ল্যাটিন লিপি। কিন্তু বড় স্বাভিমानी দেশ টার্কী তাই ল্যাটিন লিপি থাকা সত্ত্বেও প্রত্যেকটা জিনিসের জন্মে একটা করে তুর্কী নাম দেওয়া আছে যাতে কেউ না বলতে পারে যে, অমুক নামটা বিদেশী শব্দ। স্ফালুনকে স্ফালুনী, হোটেলকে ওটেলি, ব্যাংককে ব্যাংকাসী, আর সিগারেটকে সিগারা বলে তুর্কীরা বলবে এগুলো তুর্কী শব্দ। আসল ব্যাপার এই যে, আতাতুর্ক চেয়েছিলেন ভাষা এমন হওয়া উচিত যা রাস্তার লোক মানে 'ম্যান অন দি স্ট্রীট'ও সহজে বুঝতে পারে। এমন এস্তার শব্দ আছে যা বিদেশী প্রচলিত শব্দটাকে একটু বদলে দিয়ে তুর্কী বলে চালিয়ে দেওয়া হয়েছে।

আমাদের দেশে কিন্তু ঠিক উল্টো ব্যাপার। বিদেশী শব্দ বর্জন করার জন্মে কয়েকজন হিন্দীওয়ালা এমন অদ্ভুত শব্দ তৈরি করতে লাগলেন যে, তার উচ্চারণ করাই শক্ত। 'নেক-টাই'-কে কণ্ঠ-ল্যাঙাটি'; 'পিন-ড্রপ-সাইলেন্স'কে 'সুঁইপটক্-সন্নাটা'; 'রেলওয়ে সিগন্যাল'কে 'অগ্নিরথ-আবাগমন-লৌহদর্শক-দিকদর্শিকা'; 'রেলওয়ে ইঞ্জিন'কে 'লৌহ-পথ-পটরী-পর-চলনেওয়ালী-বাস্পকরথ' আর সিগারেটকে 'স্বেত-ধূত্রদণ্ডিকা' করার মতো পাগলামি টার্কীতে হয়নি।

কিন্তু টার্কীর কয়েকটা শব্দের উৎপত্তি বা মানে আমি আজও বুঝে উঠতে পারিনি। যেমন টার্কীতে ওরা লিখবে 'সি' (C), কিন্তু উচ্চারণ করবে 'জে' (J)। টার্কীর প্রেসিডেন্টের নাম জালাল বেয়ার, কিন্তু ওরা লিখবে 'সেলাল বেয়ার' (Celal Bayer)। আবার T. C. দেখে বুঝতে হবে 'তুর্কীয়ে জমহুরিয়েত' (Turkish Republic) বা ইস্তানবুলের বিখ্যাত সংবাদপত্রের নাম যদিও জমহুরিয়েত, কিন্তু লেখা হয় 'কামুহিরিয়েত' (Cumhuriyet)।

আমাদের দেশে ‘কুমারী’, ফরাসীতে ‘মাদমোয়াজেল’, ইংরেজিতে ‘মিস’, জার্মানিতে ‘ফ্রলিন’, স্প্যানিশ আর ইটালিয়ানে ‘সিনোরিটা,’ কিন্তু টার্কীতে ‘বুয়ন’। এই কথাটা যে কোথা থেকে এসেছে বলতে পারলাম না। কুমারী মেয়ে হলে নামের আগে লিখবে ‘বুয়ন’, যেমন (Bn) Gular—কুমারী গুলর।

‘তামাম’ কথাটা টার্কীতে হরদম ব্যবহার হয়। সাধারণতঃ ‘তামাম’ কথাটার ছুঁরকম মানе হয়। এক হচ্ছে ‘শেষ’—যেমন কাম-তামাম হোগয়া—কাজ শেষ হয়ে গিয়েছে। আরেকটা অর্থ ‘সব’—‘তামাম লোগোকো ইতলা দি যাতী’—সবাইকে জানানো হচ্ছে ইত্যাদি। কিন্তু টার্কীতে এ-কথাটা প্রায় গ্রাশনাল মুজাদদোষে দাঁড়িয়েছে। বারে গিয়ে বিয়ারই চাও বা ট্যান্সিওয়ালাকে ‘আয়া সোফিয়া’ই পৌছে দিতে বলো ঐ একবুলি—তামাম আর তামাম।

এই ভাষার ব্যাপার নিয়ে একদিন পড়ে গেলাম ভীষণ গোল-মালে। হোটেলে গিয়ে চাইলাম ‘রাইস’—ভাত। কাকশু-পরিবেদনা। বেয়ারা হাঁ করে চেয়ে রইলো। ছবি এঁকে, নানা-রকম অঙ্গভঙ্গি করে বোঝাতে চেষ্টা করি—‘রাইস’ কাকে বলে, কিন্তু বেয়ারা একেবারে ‘স্পীকটি-নট’। কিছুতেই সে বোঝে না। ছুঁচোখে আঙুল দিয়ে বললাম, আমাকে রান্নাঘরে নিয়ে চলো। রান্নাঘরে গিয়ে দেখালাম ‘রাইস’। একগাল হেসে এবার বেয়ারা বলে, ‘তামাম, তামাম, পিলাও’। হরি হে, ভাতকে যে এরা পিলাও বলে তা কে জানতো। পোলাওকে কি বলে, তা জানতে গিয়ে আরেকটা বিভ্রাটের সৃষ্টি করতে অবশ্য আর সাহস হয়নি।

ইস্তানবুলের কোনাক্ হোটেলে ছিল ছুনিয়ার একরাশ ভাষার জগাখিচুড়ি। আমার পাশের ঘরে গ্রীক, বাঁ পাশে ফ্রেঞ্চ, সামনে তুর্কী আর পেছনে খাস বাগদাদী আরবী। সমস্ত দিন এথেন্সের হেলেন অফ্যানোসের ‘গ্রারো’ (Naro), বাগদাদের রশীদ আহমদের ‘মায়ি বারিদ,’ প্যারিসের ডাঃ অ্যারী সুবলের ‘ভ্যারছো’ আর আনকারার আহমৎ ডিনগারের ‘সু’ শুনতে শুনতে আমার অবস্থা কাহিল। কিছুদিনের মধ্যেই কিন্তু জানতে পারলাম, হেলেনের ‘গ্রারো’ আর আহমদের ‘সু’ মানে জল, রশীদের ‘মায়ি বারিদ’ মানে ঠাণ্ডা জল আর ডাঃ অ্যারীর ‘ভ্যারছো’ মানে জলের গ্লাস।

হেলেন অফ্যানোস ইস্তানবুলে এসেছে ‘গ্রীক ইনফ্লুয়েন্স অন টার্কীশ কালচার’—তুর্কী সংস্কৃতির উপর গ্রীক প্রভাব সম্বন্ধে গবেষণা করতে। মোটা ফ্রেমের চশমা-পরা, রোগা, এই তরুণীটিকে আমার বেশ লাগতো। সকাল-বিকেল যখনই দেখা হয়, হেলেনের হাতে বিরাট মোটা এক বই। একটু হাঙ্কা হেসে করিডরে পায়-চারি করতে করতে আবার তার পড়া শুরু হতো। ঘণ্টার পর ঘণ্টা চলতো সেই পদচারণা। নিজের ঘরে বসে শুনতে পেতাম হেলেনের পায়ের ঢিলে স্লীপারের অবিশ্রান্ত একটানা শব্দ—‘সুস—সুস—সুস’। একদিন তার রাতদিন পড়া নিয়ে সাহস করে মন্তব্য করতে গিয়ে টার্কীর উপর গ্রীসের প্রভাব সম্বন্ধে এমন এক লেকচার খেয়েছি যে, হেলেনকে আর ঘাটাতে সাহস হয়নি।

আর মঁশিয়ে অ্যারী স্যুবল হীরে-জহরতের ব্যবসাদার। কিসের যে ডাক্তার তা জানি না, কিন্তু নামের আগে ডাক্তার লেখা তাঁর কার্ড দেখেছি। বেশ গোলগাল চেহারা, প্রায় সময়ই হোটেলের বারে বসে থাকতেন। গুডমর্নিং বললেই ফরাসী ভাষায় জবাব দিতেন, ‘ব্যাঁ জুর’। যখনই দেখা হয় ‘হোয়াত আবাউত এ জিংক ?’ জিজ্ঞাসা করেন। ‘আই তেল ইউ মঁশিয়ে দিস জুর্নল ওয়ার্ক নো গুত্। ত্রেদ্ অ্যাণ্ড কোমার্স ভেরি গুত্। লত্ অব মানি’। যতদিন হোটেলে ছিলাম ডাঃ অ্যারী আমায় খবরের কাগজের কাজ ছেড়ে ব্যবসা করতে উপদেশ দিয়েছেন। তাই তাঁকে দেখলেই একটু পাশ কাটাবার চেষ্টা করতাম। আহমৎ ডিনগার আর রশীদ আহমদ দু’জনেই একটু আলাদা রকমের তাই ওদের দু’জনের সঙ্গে আলাপ-আলোচনা শুধু ‘হ্যালো, হ্যালোর’ মধ্যেই সীমিত ছিল। ডাইনিং টেবিলে বসে প্রথমেই আহমৎ অর্ডার দিতো ‘বীর বীরা’ (এক বোতল বিয়ার)। চুপচাপ খেয়ে-দেয়ে আবার চলে যেতো নিজের ঘরে। প্রায়ই দেখতাম, লাউঞ্জে বসে হাতের কর গুনে টাকার হিসেব করতো—‘বীর, ইকি, উচ্, ইকি-বুচক, অন, ইল্লি’—এক, দুই, তিন, আড়াই, দশ, পঞ্চাশ। রশীদ আহমদ যে কেন ইস্তানবুলে এসেছিল বা সকাল থেকে রাত্রি পর্যন্ত কোথায় যে থাকতো, তা কোনো দিনই জানতে পারিনি। একটু রহস্যময় মনে হতো ওকে।

সেদিন সকালে সবে চায়ের কাপে মুখ দিয়েছি—এমন সময়

দরজায় য়ুহু টোকা। এখানে আবার আমার কাছে কে আসবে ? জন থমাস্ তো বউকে নিয়ে বুরসা (টার্কীর হিল স্টেশনে) গিয়েছে। তবে কি এম্বাসীর সুরিন্দর্ চোপরা ? কিন্তু দরজা খুলতেই ঝাঁর প্রবেশ হলো, তাঁকে দেখে আমার না আশ্চর্য হওয়াই আশ্চর্য হতো। দরজার সামনে দাঁড়িয়ে মোটা বই হাতে হেলেন অফ্যানোস। হেলেনকে আমার ঘরে দেখবো আমি আশা করিনি। কারণ তার সঙ্গে আমার পরিচয় শুধু ঐ একটু হাসি আর স্লীপারের ‘সুস্—সুস্—সুস্’। কিন্তু হেলেনের মূর্তি দেখে মনে হলো সে বেজায় চটেছে। টিকোলো নাকটা রাগের আবেশে লাল হয়ে উঠেছে, হাত-পা থরথর করে কাঁপছে, ঘন ঘন চশমার কাঁচটা মুহূবার ভান করে, রাগ ঢাকবার চেষ্টা করছে হেলেন। শাস্ত, গম্ভীর, ‘স্কলারলি’ হেলেনের এরূপ আমার কাছে স্বপ্নের অতীত।

“একটা সিগারেট দিতে পারেন আমাকে।” হেলেনের স্বর জুকুমের মতোই শোনায।

“সিগারেট ?”—আমি অবাক।

“ইয়েস, ইয়েস”—হাঁ-হাঁ সিগারেট।

আমার দেবার অপেক্ষা না করেই হেলেন কেস থেকে একটা সিগারেট বের করে আবার জিজ্ঞাসা করে, “হোয়ার ইজ স্পির্তা”—দেশলাইটা কোথায় ? সিগারেটটা ধরিয়ে দেবার পর মিনিট খানেক ধরে ঘন ঘন কয়েকটা টান মেরে একরাশ ধোঁয়া ঘরের মধ্যে ছড়িয়ে হেলেন থপ্ করে চেয়ারে বসে পড়ে।

ভয়ে ভয়ে জিজ্ঞাসা করি, “হোয়াট ইজ দি ম্যাটার ?”—কি হয়েছে কি ?

“পারাকেলো—প্লিজ—দয়া করে চুপ করে একটু বসতে দিন আমাকে”—হেলেন এবার কাতরস্বরে মিনতি করে। নিরুপায় হয়ে চুপ করে বসে রইলাম। খানিকক্ষণ পরে নিজেই স্তব্ধতা ভঙ্গ করলো হেলেন, “হাউ ডেয়ার হি, ছোট বুলি অব এ টার্ক—এত সাহস ঐ তুর্কিটার”।

কিছুই বুঝতে না পেরে আবার চুপ করে রইলাম। “হি কলস্ মি এ ম্যাড উওম্যান”।

একটু বুঝিয়ে বলতে ব্যাপারটা জলের মতো পরিষ্কার হয়ে

গেল। খানিকক্ষণ আগে নাকি আহমৎ ডিনগারের সঙ্গে হেলেনের ভীষণ তর্ক বাধে। আহমৎ ডিনগার অগ্নানবদনে বলেছে যে, তুর্কী সংস্কৃতির উপর গ্রীসের কোন প্রভাবই নেই। যুক্তিতর্কে যখন পেরে উঠেনি, আহমৎ তখন নাকি হেলেনকে ‘ম্যাড উওম্যান’, মানে পাগলী বলেছে। হেলেনকে বোঝালাম যে, আহমৎ অতি নির্বোধ, সে কিছুই বোঝে না। সুতরাং তাকে ‘সিরিয়াসলি’ নেবার কোনো মানে হয় না। (হেলেনের ব্যাপার দেখে তখন আমারও যে তাকে ম্যাড উওম্যান বলার ইচ্ছে হচ্ছিল, তা আর বললাম না।)

একটু চটাবার জন্য প্রশ্ন করলাম, “ডাজ্জ হি অলসো সে ছাট সাইপ্রাস ইজ টার্কীশ—সে কি সাইপ্রাসকেও তুর্কীদের বলে দাবি করেছে নাকি?”

হেলেন এমন মুখভঙ্গি করলো, যার মানে এই যে, ‘একবার করে দেখুক না’। মুখে শুধু বললো, ‘সাইপ্রাস যে গ্রীকদের, সে সম্বন্ধে কোনো প্রশ্নই উঠতে পারে না।’

এই ঘটনার পরে কোনাক্ হোটেলে আমিই একমাত্র হেলেনের বন্ধু হয়ে দাঁড়লাম। ঘণ্টার পর ঘণ্টা হেলেন আমাকে শুনিয়েছে গ্রীসের আর টার্কীর ইতিহাস। নিজের পয়সা খরচ করে ‘দোলমুস’ (ট্যান্সি) ডেকে আমায় ঘুরিয়েছে সারা ইস্তানবুল। ফতিহা মসজিদ, বেয়জিদ মসজিদ, সুলেমানিয়ে মসজিদ, ইয়েনী মসজিদ, সুলতান আহমদ মসজিদ, সেলিমিয়া মসজিদ, শাহজাদে মসজিদ, আয়া সোফিয়া আরো কতশত জায়গায় ঘুরে বেড়িয়েছি হেলেনের সঙ্গে। প্রত্যেক জায়গায় গিয়েছি আর হেলেন বর্ণনা করেছে তার ইতিহাস। সব সময় গ্রীক প্রভাব সম্বন্ধে ওর সঙ্গে একমত না হতে পারলেও হেলেনের জ্ঞান সম্বন্ধে আমার কোনো সন্দেহই ছিল না।

তকসীম স্কোয়ারের কাছেই পার্কের বেষ্টিতে বসে হেলেন বলছিল টার্কীর ইতিহাস। মাত্র চার হাজার লোক সঙ্গে নিয়ে মধ্যএশিয়ায় নিজের দেশ থেকে বিতাড়িত হয়ে অথোমান এসে আশ্রয় চায় সেলজুক রাজার কাছে। সেলজুক রাজা তাদের আশ্রয় দেন আঙ্গারার (আনকারা) কাছে। ধীরে ধীরে অথোমান সমস্ত রাজ্যটাই নিজের দখলে করে নেয়। কিন্তু বাধা পায় পশ্চিমে গ্রীক রাজ্যের কাছে।

“কিন্তু অতো বড় গ্রীক রাজ্য আর অভেদ কনস্টান্টিনেপল নবুল) শেষ পর্যন্ত তারা দখল করলো কি করে ?”

“থামো। কনস্টান্টিনেপল দখলের চেষ্টা তাদের বছবার ব্যর্থ হয়। কিন্তু শেষে যখন তুর্কীরা কনস্টান্টিনেপল দখল করে, তারা এক রাতের মধ্যে সব কাজ শেষ করে। হাজার হাজার তেল-মাখানো কাঠের গুঁড়ি রাস্তায় পেতে নিঃশব্দে তার উপর দিয়ে নৌকো গড়িয়ে তারা বসফরাসের তীরে ‘গোল্ডেনহর্নের’ মধ্যে দিয়ে নেমে শহর আক্রমণ করে। সুলতান মহম্মদের তুর্কীয় সৈন্যেরা কনস্টান্টিনেপলের সেই গেট ভেঙে শহরে ঢুকে খ্রীষ্টানদের ক্রশ যেখানে শত শত বছর থেকে ছিল, সেখানে স্থাপন করে ইসলামের সবুজ পতাকা। সেই থেকে শুরু হয় অথোমান রাজত্ব।”

“তার আগে ?”

“কার্ট ইউ কীপ কোয়ায়েট ফর সাম টাইম ?” ধমকানি দেয় হেলেন। করার কিছুই নেই। একবার যখন ‘ম্যাড উওম্যান’-এর খপ্পরে পড়েছি, টার্কীর ইতিহাস না শুনিয়ে ছাড়বে না। তবু বেশ লাগছিল, তাই বললাম, “কারী অন, আই অ্যাম সারী।”

“এখন নাম হয়েছে ইস্তানবুল, তার আগে ছিল কনস্টান্টিনেপল। তারও আগে ছিল বাইজান্টিয়াম। বাইজাস আর গ্রীক কলোনিষ্টরা এসেছিল খৃষ্টাব্দ ৬৫৭ সালে। সেই থেকে নাম বাইজান্টিয়াম। বাইজাস ভেবেছিল ডেলফীর অরাক্যাল (Oracle of Delphi) প্রতিশ্রুত সাফল্য এখানেই পাওয়া যাবে। কিন্তু তাদের রাজত্বও টিকলো না বেশিদিন, এল রোমানরা। পুরনো বাইজান্টিয়াম ছাড়িয়ে রাজা কনস্টান্টাইন তৈরি করলেন নতুন রাজধানী বসফরাসের কাছে। সাতটা পাহাড়ের উপর তৈরি রোম, তাই কনস্টান্টাইনও রাজধানী বসালেন সাতটা পাহাড়ের উপর, আর নাম দিলেন ‘নোভা রোমা’—নতুন রোম। কিন্তু ধীরে ধীরে নাম হয়ে গেল কনস্টান্টিনেপল। তারপর এল অথোমান সাম্রাজ্য, তার কথা তোমায় আগেই বলেছি।”

“কিন্তু হোয়াট আবাইট মডার্ন টার্কী”—আধুনিক টার্কীর ইতিহাস ? হোটেলে ফিরে এসে, ডিনারের সময় জিজ্ঞাসা করি।

হেলেন এবার রীতিমতো রেগে যায়। “হোয়াট ইজ দেয়ার ইন মডার্ন টার্কী—আধুনিক টার্কীতে আছে কি ? “হোয়াট হ্যাজ হ্যাপেন্ড

ইন টোয়েন্টিয়েথ সেঞ্চুরী টার্কী ইজ নট এ ম্যাটার অব হিষ্ট্রী বাট পলিটিজ্জ”—বিংশ শতাব্দীর টার্কীতে যা হয়েছে, তার সঙ্গে ইতিহাসের কোনোই সম্পর্ক নেই, যা কিছু আছে তা রাজনীতিতে।

হঠাৎ বিনামেবে বজ্রপাত। ঝড়ের মতো প্রবেশ করে আহমৎ ডিনগার। “হোয়াট ডু ইউ নো অব মডার্ন টার্কী”—আধুনিক টার্কী সম্বন্ধে তুমি কি জানো? এফুনি একটা অপ্রিয় ব্যাপার হবে আশঙ্কা করে আলোচনায় মোড় ঘোরাবার চেষ্টায় আহমৎকে বললাম, “নো, উই ওয়ার জাস্ট ডিস্কাসিং”—না আমরা এই আলোচনা করছিলাম।

“আমি জানি, তোমরা কি আলোচনা করছিলে। কি করে আপনি এই পাগলীটাকে সহ্য করেন। হাউ ডু ইউ স্ট্যাণ্ড দিস ম্যাড উওম্যান?” ব্যাপার বেগতিক বুঝে হেলেনকে বললাম, “চলো ঘরে গিয়ে বসা যাক।” কিন্তু হেলেনের পরিবর্তন দেখে আশ্চর্য লাগল। কিছুমাত্র না রেগে অতি সহজভাবে বললো, “লেট আস হিয়ার হোয়াট হি হ্যাজ টু সে।” ওর কি বলার আছে শোনা যাক।

“আই হ্যাভ লট টু সে।” আমার অনেক কিছু বলার আছে, বলে আহমৎ এবার শুরু করলো তার লেকচার। গ্রীক আর রোমানদের চূড়ান্ত গালাগালি দিয়ে, কামাল আতাতুর্কের ভূরি ভূরি প্রশংসা করে, আহমৎ মডার্ন টার্কীর কথা বলে। টার্কীশ সংস্কৃতির উপর গ্রীকের কোনো রকম প্রভাবই সে স্বীকার করতে চায় না, উপরন্তু আতাতুর্কের জন্মস্থান থেস্যালোনিকি (Salonica) টার্কীকে ফিরিয়ে দেওয়ার দাবি জানায়।

“মে বী ইউ আর রাইট”—হয়তো আপনার কথাই সত্য। আনমনাভাবে কথা ক’টা বলে হেলেন উঠে চলে যায়। এই ঘটনার পর হেলেন আর ‘গ্রীক ইনফ্লুয়েন্স অন টার্কীশ কালচার’ সম্বন্ধে তর্ক করেনি। আগের মতো সে আবার চুপচাপ হয়ে যায়। পুরু ফ্রেমের চশমা পরে, হাতে মোটা বই নিয়ে ঢিলে স্লীপার পরে আবার শুরু হয় তার করিডরে পদচারণা—সুস্—সুস্—সুস্।

পরের দিন সকালে শুনলাম, হেলেন চলে গিয়েছে হোটেল ছেড়ে। লাঞ্চ টেবিলে বেয়ারা এসে কাগজে মোড়া একটা বই

দিয়ে বললো, আমার পাশের ঘরের ইউনানীস্তানের (গ্রীস) লেডী এটা আমার জন্তু রেখে গিয়েছেন। সামনে-বসা আহমৎ ডিনগারের দৃষ্টি বাঁচিয়ে হলদে কাগজের মোড়কটা খুললাম।

সুন্দর একটা বই। “গ্রীক ইনফ্লুয়েন্স অন টার্কীশ কালচার থু দি এজেন্স”। হেসে বইটা রেখে দিচ্ছিলাম, হঠাৎ লেখকের নামটা নজরে পড়লো ‘হেলেন অফ্যানোস’। পরের পাতায় সবুজ কালি দিয়ে ছোট্ট ছ’লাইন লেখা “টু মাই ইণ্ডিয়ান ফ্রেণ্ড উইথ রিগার্ডস, জ্রম হেলেন অফ্যানোস, থ্রাস্কি স্কোয়ার, এলিমিকো ; এথেনিকি ; গ্রীস।”

অগ্নমনস্কভাবে বইটা উন্টেপাল্টে দেখছিলাম, হঠাৎ আহমৎ ডিনগারের কথায় সন্ধি ফিরে আসে। টার্কীর ইতিহাস শোনাবার পালা এবার ওর। রঙ চড়িয়ে, ফলাও করে আহমৎ বলে যায় আর আমি চুপচাপ শুনি। নতুন কিছুই বলে না আহমৎ। সবই তো শুনেছি, হেলেনের কাছে। আহমতের বৃত্তান্তে শুধু একটা কথা জানতে পারি, যা আগে আমি জানতাম না। সেটা হচ্ছে কনস্টান্টিনোপলের উপর আরব আক্রমণের সময় শহরের প্রাকারের কাছে নিহত আবু আয়ুব হালিদ ইবন-ই-জয়েদ-এর কাহিনী। মক্কা থেকে মদিনা পালাবার সময় হজরত মহম্মদ আয়ুবের গৃহে নাকি আতিথ্য স্বীকার করেন কিছুদিন।

পরের দিন আহমৎ ডিনগারও চলে গিয়েছে আর আমি একা একা ঘুরে বেড়িয়েছি নতুন আর পুরানো টার্কী দেখতে। সেন্ট সোফিয়া চার্চের আয়া সোফিয়া মসজিদ হবার রূপ আর তারপর এখনকার ‘সোফিয়া মুজিয়াম’ হবার রূপও দেখলাম, আর উস্কদর থেকে লিগার টাওয়ারও দেখলাম। টোপকাপি প্রাসাদের প্রাক্রণ, শাহ ইসমাইলের সিংহাসন, সুলতান মুরাতের শয়নকক্ষ আর অথোমান সুলতান সেলিমের ‘হামাম’ আর বিশ্রামাগারও দেখলাম আর দেখলাম ইয়েদীকুলের ভাঙা বৈজাণ্টাইন প্রাচীর আর বসফরাসের তীরের ক্রমেলী হিসেরী দুর্গ।

খোঁড়াতে খোঁড়াতে বৃদ্ধ গাইড অনর্গল বলে যাচ্ছিল ‘আয়া-সোফিয়ার’ ইতিহাস। কনস্টান্টাইনের তৈরি চার্চ অব ডিভাইন উইজডম—সেন্ট সোফিয়া, জাস্টিনিয়ানের সময় ধ্বংস হয় আগুনে। “রোম ওয়াজ বার্নিং হোয়েন নীরো ওয়াজ ফিডলিং”—এর মতনই অবস্থা কারণ যখন আগুনের লেলিহান শিখা সেন্ট সোফিয়াকে

গ্রাস করছিল জার্সিটনিয়ান নাকি ‘স্লেভ এম্প্রেস’ (Slave Empress) থিওডরার সঙ্গে প্রেম করছিলেন। সকালে উঠে খবর শুনে তাঁর হলো দুঃখ আর গুরু করলেন পুনর্নির্মাণ। রাজমিস্ত্রীদের ডেকে বললেন সলোমনের মন্দিরের চেয়েও সুন্দর তৈরি করো সেন্ট সোফিয়া। পৃথিবীর সমস্ত দেশ থেকে বাছা বাছা মিস্ত্রী এল। আবার তৈরি হলো সেন্ট সোফিয়া। রাজমিস্ত্রীদের দেওয়া হলো রাশি রাশি স্বর্ণমুদ্রা আর সেই সঙ্গে মৃত্যুদণ্ড। স্বর্ণমুদ্রা দেওয়া হলো তাদের পারিশ্রমিক হিসাবে আর মৃত্যুদণ্ড হলো এই জন্তে যে, তারা যেন ঐ রকম কোনো সৌধ আর তৈরি করতে না পারে। সুলতান মহম্মদ এসে সেন্ট সোফিয়াকে পরিবর্তন করলেন মসজিদে। রোমান স্থাপত্যের চিহ্ন মেটাবার জন্তে প্লাস্টারের নতুন প্রলেপ দেওয়া হলো। বিংশ শতাব্দীতে আতাতুর্ক আবার সেন্ট সোফিয়াকে পরিণত করলেন ‘মুজিয়াম অব বৈজাণ্টাইন আর্ট’-এ। প্লাস্টার তুলে ফেলা হলো। আবার দেখা গেল মার্বেলের অগূর্ব কারুকার্যখচিত স্তম্ভ, —ল্যাকোনিয়ার সবুজ মার্বেল, লিবিয়ার নীল মার্বেল, আর কতশত নাম-না-জানা দেশের লাল, কালো, সাদা, গোলাপী মার্বেল।

আতাতুর্ক মুজিয়ামে গিয়ে দেখতে লাগলাম মডার্ন টাকীর জন্মদাতা কামাল আতাতুর্কের স্মৃতি-জড়ানো কত শত ছোটখাটো জিনিস। গুলরের ‘আজ গ্রেট অ্যাজ আতাতুর্ক’ কথাটা কেবলই মনে পড়তে লাগল। ঐ তো এক কোণে রাখা তাঁর ‘টিউনিক’, কালো ফারের ‘কালপাক্’, কালি কলম, আর কত ফটো—কিশোর আতাতুর্ক, বালক আতাতুর্ক, যুবক আতাতুর্ক, মায়ের কোলে আতাতুর্ক আর প্রেসিডেন্ট আতাতুর্ক।

গাইড বলে চলে, “ঐ তো ওখানে তিনি পড়তেন, ওখানে শুতেন, ওখানে খেতেন। ঐ তো ব্ল্যাকবোর্ডের সামনে দাঁড়িয়ে তিনি টাকীর জনতাকে ল্যাটিন অ্যালফাবেট শেখাচ্ছেন। ঐ তো কমাণ্ডারের বেশে তাঁর ছবি। আর ঐ যে ছোট্ট মেয়েটাকে কোলে নিয়ে তিনি বসে আছেন, ঐ মেয়েটার নাম ইউলকিউ। নিজের ছোট বোনের মতো ভালোবাসতেন ওকে। তাঁর আত্মাখান টুপী, হাতির দাঁতের ছুরি, কালো টাই, সিগারেট কেস, চামড়ার জুতো। আর ঐ যে বিরাট অয়েল পেন্টিং দেখছেন, ওর জন্তে ঘন্টার পর ঘন্টা

তিনি বসেছেন শিল্পী জলিল ইব্রাহিমের স্টুডিওতে। মহম্মদ জালাল বেয়ারকে উপহার দেওয়া তাঁর গলার স্বরের রেকর্ড, থেস্তালোনিকার তাঁর বাড়ির ছবি, তাঁর বার্থ সার্টিফিকেট, আতাতুর্ক নাম নেবার সার্টিফিকেট। আর ঐ ফটোটা তখন নেওয়া হয় যখন তিনি ‘জ্যানিসারী’ (Janissary)—মিলিটারী বডিগার্ডের পোশাক পরে এক বল-ডান্ডে গিয়ে সবাইকে তাক লাগিয়ে দেন।”

গাইডের সঙ্গে ম্যুজিয়ামের বাইরে বেরিয়ে আসি। তার অনর্গল বক্তৃতা শেষ হয়ে গিয়েছে। পকেটে হাত ঢুকিয়ে একমুঠো চেঞ্জ বের করে ওর হাতে দেই। রাস্তায় দাঁড়িয়ে ভাবছি—এবার কোথায় যাবো এমন সময় গাইড আবার ফিরে আসে “বিদাকা, বিদাকা, মঁশিয়ে—এক মিনিট, এক মিনিট মঁশিয়ে।”

“হোয়াট ইজ ইট ? সামথিং মোর টু টেল”—কি ব্যাপার, আরো কিছু—বলার বাকি আছে না কি ? জিজ্ঞাসা করি গাইডকে।

“ইয়েভেং, একেল্লাম—হ্যাঁ, হ্যাঁ। সব চেয়ে দরকারী কথা। দি মোস্ট ইম্পোর্ট্যান্ট থিং। যখন আতাতুর্ক তাঁর রিভলিউশনের জন্তে তৈরি হন, গভীর রাতে ঠিক এই দরজা দিয়ে তিনি শেষবারের মতো তাঁর মা-বোনের কাছে বিদায় নিয়ে আনাতোলিয়ায় চলে যান।”

“কোন দরজা দিয়ে ?”

“বুর্দা, বুর্দা—এইখান দিয়ে” গাইড দরজার চৌকাঠের উপর নিজের লাঠিটা ঠোকে। অনেকক্ষণ ধরে দেখতে লাগলাম ছোট্ট সেই দরজাটাকে। গাইড তখনও তার লাঠি দিয়ে চৌকাঠ ঠুকছে, যেন কামাল আতাতুর্কের পদচিহ্ন খুঁজে আমায় দেখাবে। সেই মা-বোনের কাছ থেকে শেষ বিদায় নেবার দৃশ্যটা চোখের সামনে ভেসে ওঠে। উপরের ঘরে রোগশয্যায় শুয়ে কামালের মা, ছেলের হাত দুটো শক্ত করে ধরে আছেন, ছেলেকে অনিশ্চিতের পথ থেকে ফিরিয়ে আনবেন।

“আমায় ছেড়ে দাও মা। গভীর রাতের অন্ধকারে আমি মিশে যাবো। একটা মহৎ আদর্শের উদ্দেশ্যে আমি যাচ্ছি আনাতোলিয়ায়। যদি আমি অকৃতকার্য হই, আমাদের এই বাড়ির অবস্থা থেস্তালোনিকির আমাদের বাড়ির মতোই হবে। সব কিছু ওরা ভেঙেচুরে শেষ করে দেবে। আমার জন্তে তুমি প্রার্থনা করো এই বাড়ি কখনো ছেড়ে না। যদি অর্থ ফুরিয়ে যায়, সব কার্পেট

বেচে দিয়ে। যদি আমার কোনো খবর না পাও আর তোমার কাছে একটা পয়সাও না থাকে সব কিছু বিক্রি করে তুমি আমার জন্তে অপেক্ষা করো। আমি আবার আসবো মা।”

ধীরে ধীরে মায়ের হাতটা ছাড়িয়ে কামাল বেরিয়ে এল। দরজার কাছে মোটর এসে দাঁড়িয়েছে অতি নিঃশব্দে। গাড়িতে বসে তার বন্ধু ডাক্তার রসীম ফরীদ। বোন এসে দাঁড়ায় কাছে। এক গ্লাস জল নিয়ে আসে চাকর আর ট্রের উপর একটা ছোট্ট কাপে তাঁর প্রিয় কফি। এক নিঃশ্বাসে জল আর কফি শেষ করে কামাল দরজার চৌকাঠের বাইরে আসে। ছোট বোন ফুঁপিয়ে কঁদে ওঠে।

“কাঁদছিস কেন পাগলী। আমি কতবার তো বাইরে গিয়েছি তখন তো কোনোদিন কাঁদিসনি তবে আজ কেন কঁদে আমার যাত্রার পথ দীর্ঘ করে দিচ্ছিস”, বোনের সোনালী চুল ঝাঁকি দিয়ে কান্না ঢাকবার বৃথা চেষ্টা করে কামাল।

“আমি জানি তুমি অনেকবারই গিয়েছ। কিন্তু কেন জানি না এবার আমার ভয় করছে। আগে যতবার তুমি গিয়েছ, আমি জানতাম তুমি কোথায় গিয়েছ আর কবে ফিরবে, কিন্তু এবার—কোথায় তুমি যাচ্ছ আর কবে ফিরবে কিছুই তো জানি না আমি”—ফুঁপিয়ে কঁদে ওঠে ছোট বোন।

“আমার যাবার সময় হয়ে গিয়েছে। আমি যাই।” ডাক্তার ফরীদেদের মোটরের ইঞ্জিনের ঘড়ঘড়ানিতে বোনের কান্না আর শোনা যায় না।

তারপরে দিনের পর দিন দীর্ঘ প্রতীক্ষায় কেটে গিয়েছে মা আর বোনের। সীসলী (Sisli) রাস্তার উপরে কামালের ঘরের জানলার কাছে ঘণ্টার পর ঘণ্টা মা আর বোন বসেছে। মা’র হাতে কোরান, বোনের চোখে জল। অনেকদিন পরে সুখবর এসেছে সামসুন থেকে। আনন্দের আতিশয্যে বোন কঁদে ভাসিয়ে দিয়েছে আর বৃদ্ধা মা আল্লাহ-পরবরদিগারকে লাখ-লাখ শুকরিয়া জানিয়ে ছুটেছে—রাগাঘরে, ‘হালভা’ তৈরি করতে—ইয়ারন সুবহ—কাল সকালে যে কামাল আসবে আর এসে ‘হালভা’ না পেলে সে যে দুঃখ পাবে।

পরের দিন সকালে জনের চাঁচামেচিতে ঘুম ভেঙে যায়।

চিৎকার করে আমায় বিছানা থেকে টেনে তোলে। “উই হ্যাভ টু সেলিব্রেট।” উৎসব করতে হবে। ছোট্ট শিশুর মতো খুশিতে নৃত্য করতে লাগল জন থমাস্। কি ব্যাপার? কিসের এত হৈ চৈ? কবেই বা ও বুরসা থেকে ফিরলো, কিছুই বুঝতে না পেরে বোকার মতো ওর দিকে চেয়ে রইলাম।

“কাম অন গেট আপ ম্যান” জন ড্রেসিং গাউনটা জোর করে আমার উপর চাপিয়ে দিয়ে চিৎকার করে “কুইক উই হ্যাভ টু সেলিব্রেট।”

“সেলিব্রেট হোয়াট?” আমি তখনও বোকার মতো ওর দিকে চেয়ে রইলাম।

“আই হ্যাভ গট্ এ সন।”

“হু হ্যাভ গট্ এ সন? ইউ? ফ্রম হোয়ার?” এতক্ষণে বুঝতে পারি। কাল বুরসা থেকে ফেরার পরেই চোজুক হস্তানেশী—মানে শিশুদের হাসপাতালে, জনের স্ত্রী—লুইসা...।

আনন্দে জন আমায় জড়িয়ে ধরে। “আই উইল কল হিম্ ঘালীব।” ছেলের নাম জন রেখেছে গালীব। ও উচ্চারণ করে ঘালীব। বড় ছেলের নাম জাফর। ইরাকের আরবী-খৃশ্চান জন থমাসের, টার্কীশ-আর্মেনিয়ান স্ত্রী লুইসা—ছেলেদের নাম ঘালীব আর জাফর।

গেডিক্‌পাশা হামাম জদেসী এলাকায় জনের শ্বশুরবাড়ি গেলাম। জনের বৃদ্ধা শাশুড়ী আনন্দে সারা বাড়িটা মাথায় তুলেছে। আশী বছরের বৃদ্ধ শ্বশুর দিক্রান ছুয়ুরান নাভী হবার উৎসব করতে গলির মোড়ে ‘ময়খানায়’ (মদের দোকান) এস্তার ‘আরক’ খেয়ে তখন গড়াগড়ি খাচ্ছে।

কানের কাছে চুপি চুপি জন বলে—“মিট মি এগেন অ্যাট টেন টু-নাইট। আই উইল শো ইউ ইস্তানবুলস নাইট লাইফ”—ইস্তানবুলের নাইট লাইফ দেখাবে জন। রাত দশটায় অ্যাপার্টমেন্টে।

“সো অ্যাট টেন নিয়ার দি ইয়র্ডন হোটেল”, যাবার সময় জন বলে।

“ইয়েস অ্যাট টেন নিয়ার দি ইয়র্ডন হোটেল।”

পিটার দিমিত্রিয়াদিস—আমার ট্যাক্সি ড্রাইভার। অনর্গল তুর্কী বলে। যখন বাইশ বছরের যুবা, পিটার তখন গ্রীস ছেড়ে চলে এসেছে ইস্তানবুলে। আজ ২০ বছর ইস্তানবুলের রাস্তায় ট্যাক্সি চালাচ্ছে। তার আগে অনেক ধান্দায় ঘুরে বেড়িয়েছে পিটার। পিছনে বসা যাত্রীর দিকে না চেয়ে বছরের পর বছর মাসের পর মাস আর দিনের পর দিন গাড়ির স্টীয়ারিং হুইল শক্ত করে ধরে গাড়ি চালিয়েছে। মাঝে মাঝে হাতের তালুর কড়াগুলোর দিকে চেয়ে দেখেছে। কত হাজার হাজার যাত্রী এখান থেকে গুথানে নিয়ে গিয়েছে, মিটার দেখে ভাড়া গুনেছে আর যারা টিপ্স দিয়েছে, সীট থেকে নেমে সেলাম ঠুকে তাদের বলেছে ‘তশক্কুর আদারাম’, ‘থ্যাঙ্ক ইউ’ ‘মেসিবুকু’। পিছনের সীটে বসে কেউ গিয়েছে এরোড্রোমে, দৌড়ে এথেন্সের প্লেন ধরেছে আর পিটার আকাশের দিকে চেয়ে দেখেছে প্লেন যাচ্ছে তার জন্মভূমি এথেনিকাতে। আবার কেউ রাতের আধারে লোকচকুর আড়ালে তার গাড়ির পেছনের সীটে লুকিয়ে বসে বেয়গুনু স্ট্রীটের মাঝে দাঁড়ানো ‘জামে’র (মসজিদ) পাশ-ঘেঁষা মোংরা বেশা পল্লীর গলিতে ঢুকেছে। আবার নতুন দম্পতিকে মধুযামিনীর নিরিবিলিতে পৌঁছে দিয়ে এসেছে বসফরাসের তীরে কোনো ক্যাসিনো বা হোটেলে। তখন পিটারের মনে পড়েছে আরেকটি সুন্দর মুখের কথা। মুসোলিনীর সৈন্যরা যেদিন তার গ্রামে ঢুকেছিল, সেদিন পিটার অনেকক্ষণ কঁদেছিল। কারণ তার গ্রাম আর তার ছোট্ট বাড়ির অস্তিত্ব তারা রাখেনি আর সেই সুন্দর মুখ,—তারও কোনো খোঁজ পায়নি পিটার।

আরো অনেক অনেক যাত্রীর কথা মনে পড়ে পিটারের। কেউ মাতাল, কেউ গুণ্ডা, কেউ লক্ষপতি, কেউ যুবা, কেউ বৃদ্ধ, রোগা, মোটা, লম্বা, বেঁটে আরো কত শত—ইস্তানবুলের রাস্তার ভিড়ে আর সময়ের গলিতে তারা সব হারিয়ে গিয়েছে। টুরিস্টদের ভালো লাগে না পিটারের, যত সব অবাস্তুর প্রশ্ন করে তাকে বিব্রত করে। সে তো আর গাইড না। এই তো সেদিন এক আমেরিকান টুরিস্ট দম্পতির প্রশ্নের উত্তর দিতে গিয়ে একটু অমনোযোগী হয়ে ভুল

বাঁক ঘুরতেই পুলিশ তার গাড়ির নম্বর টুকে নিয়েছে আর খামকা তাকে পাঁচ লিরা জরিমানা দিতে হয়েছে।

আমার প্রশ্নেরও উত্তর পিটার ভাঙা ভাঙা ইংরেজিতে অগ্ৰমনস্কভাবে দিচ্ছিল। “ইউ ফ্রম কনসুলেট” ? পিটার অনেকক্ষণ পরে আমায় জিজ্ঞাসা করে। ভেবেছিল আমি বুঝি দূতাবাসে চাকরি করি।

পিটারকে একটু অবাক করে দেবার উদ্দেশ্যে গ্রীক ভাষায় উত্তর দিলাম, “ওহি” (না)।

পিটার হঠাৎ গাড়ির ব্রেক কষে দাঁড়ায়। য়ূহু হেসে আমার দিকে মুখ ফিরিয়ে আবার জিজ্ঞাসা করে “ইউ বিজিনেস আফ্রিকা ?” রং শ্যামবর্ণ হলেও পিটার আমাকে আফ্রিকার ব্যবসাদার কি করে ভাবলো চিন্তা করতে করতে ওকেই জিজ্ঞাসা করাতে পিটার আমার চুলের দিকে দেখায়। ওর দৃঢ় বিশ্বাস কৌকড়া চুল মানেই আফ্রিকাবাসী।

আবার পিটারকে গ্রীকে বলি, “ওহি, ইন্ডস দমসিয়োগ্রাফ”— অর্থাৎ না, আমি ভারতীয় সাংবাদিক। আফ্রিকা সম্বন্ধে তার একটা ভুল ভেঙে যাওয়াতে পিটারের একটু হুঁখ হয়। ও হয়তো ভেবেছিল রাতে ‘বারে’ গিয়ে সবাইকে এক আফ্রিকাবাসী ব্যবসাদার সম্বন্ধে ফলাও করে গল্প বলবে। ‘গলাতা ব্রিজে’র উপর দিয়ে তখন চলেছিলাম আমরা। পিটারকে বললাম, “তোমার আর তোমার দেশের রাজার নাম একই।” ভেবেছিলাম পিটার হয়তো আমার এই তুলনায় ক্ষুব্ধ হবে, কিন্তু না, নিজের রসিকতায় নিজেই বিকট জোরে হেসে পিটার উত্তর দিলো, “ইয়েস মাই নেম পিটার, কিংস নেম পিটার, বাট হি কিং, আই তাকসি ড্রাইভার”। নাম দু’জনেরই পিটার, কিন্তু একজন রাজা আর আরেকজন ট্যাক্সি ড্রাইভার !

ইস্তানবুলের উঁচু-নিচু রাস্তা আর অলি গলি দিয়ে চলেছি আমি আর পিটার। , এখানে আর কি কি দেখার আছে, জিজ্ঞাসা করতে পিটার নির্বিকারভাবে উত্তর দেয় ‘নাথিং’ কিচ্ছু না। “ইস্তানবুল ফুল অব ক্যাটস, উইমেন অ্যাণ্ড কারস”—বেড়াল, মেয়েমানুষ আর ট্যাক্সিতে ভরা এই শহর। তারপর বেশ গর্বের সঙ্গে আবার বলে ওঠে, “বাট ইফ ইউ ড্রাইভ এ কার হিয়ার, ইউ ক্লাইম এভারেস্ট

অলসো”—যদি এই শহরে কেউ গাড়ি চালাতে পারে সে অনায়াসে মাউন্ট এভারেস্টও চড়তে পারে।

পিটারকে খুশি করবার জন্তে বলি, “কিন্তু এথেন্স খুব ভালো জায়গা, কি সুন্দর শহর আর কত ভালো তোমাদের এক্রোপোলিস, ওমোনিয়া, পাইরস”।

হঠাৎ আবার ব্রেক কষে গাড়ি দাঁড় করায় পিটার, “লুক মিস্টার, ডোন্ট টক এথেনিকা। মেকস মি হোমসিক্।” এথেন্সের কথা বলায় পিটারের মন ঘরের জন্তে কেঁদে উঠেছে। ‘সরি পিটার’ বলে আবার ওকে গাড়ি চালাতে বলেছি, কিন্তু তারপর সারা রাস্তা ও যেন কেমন আনমনা হয়ে গাড়ি চালাতে লাগল। কোনাক্ হোটেলের আমায় নামিয়ে দিয়ে ভাড়া আর টিপস্ নিয়ে সামনের সীট থেকে নেমে সেলাম করে “তশকুর আদারাম, থ্যাঙ্ক ইউ, মের্সিবুকু” বলে পিটার চলে গিয়েছে। টুইস্টদের ওর ভালো লাগে না—বড় অবাস্তুর প্রশ্ন করে তারা !

সন্ধ্যা সাতটার পর ইস্তানবুল নাকি পাগল হয়ে যায়। সেই পাগলামি দেখবার জন্তে বেরিয়েছি আমি আর জন। ইয়র্ডন হোটেলের সামনের অ্যাপয়েন্টমেন্ট কাঁটায় কাঁটায় ঠিক রেখে জন এসেছে। আমার দেরি দেখে অস্থিরভাবে পায়চারি করছিল। যখন ইয়র্ডন হোটেলের সামনে পৌঁছলাম, জন ভীষণ ক্লান্ত। বলে, “তোমার কোনো বুদ্ধি-শুদ্ধি নেই। এত সময় নষ্ট করতে আছে ? খানিক পরেই যে সব ঠাণ্ডা হয়ে যাবে। দিস ম্যাডনেস লাস্টস অনলি আপটু টু ইন দি মর্নিং।” ভোর ছুটোর মধ্যে এ পাগলামি শেষ হয়ে যাবে তখন ইস্তানবুল আবার ছরস্তু ছেলের মতো ক্লান্ত হয়ে ঘুমিয়ে পড়বে।

প্যারিসের সেন্ট-লাজার (Saint Lazare) কারাগারের দরজায় বড় বড় হরফে খোদাই করা আছে—লিবার্টি ইকুয়ালিটি আর ফ্র্যাটার্নিটি—Liberte, Egalite, Fraternite—স্বাধীনতা, সাম্য আর মৈত্রী। জেলের দরজায় খোদাই করবার মতোই কথা বটে। এই দরজা দিয়েই নাকি মাতাহারীকে নিয়ে যাওয়া হয়েছিল ফাঁসির মঞ্চে। আবার এখনো প্যারিসের পুলিশ দ্য মুরস (Police des Moeurs)—নৈতিক পুলিশ, রাতে বিনা কারণে রাস্তায় রাস্তায় ঘুরে বেড়াবার অপরাধে মেয়েদের ধরে এখানেই

বন্ধ করে,—অবশ্য তার আগে নিজেদের ‘পাউণ্ড অব ফ্রেশ’
নেবার পর।

ইস্তানবুলে জেলের দরজায় অবশ্য ইকুয়ালিটি, লিবার্টি আর
ফ্র্যাটর্নিটি খোদাই করা নেই, কিন্তু যেখানে বেথোপল্লী শুরু
আর যেখানে শেষ হয়েছে, দু’দিকেই দুটো বিরাট বড় ‘জামে’
(মসজিদ) পাহারাদারের মতো দাঁড়িয়ে আছে। মানুষের পাপের
নগ্নরূপ আর দেহ কেনাবেচার বাজার দেখে নিস্তব্ধ, নিশ্চল হয়ে
দাঁড়িয়ে আছে মসজিদ দুটো। গলিতে ঢুকেই প্রথম মসজিদটা
দেখে এক করাসী লেখকের লেখা মনে পড়ে “Quand la morale
triomphe il se passe des choses tres villaines” (যখন
নৈতিকতার জয় হয়, তখন কিছু শয়তানিও হয়)। সারি সারি
ছোটো ছোটো ঘরের দরজায় দোকান সাজিয়ে বসেছে দোকানীরা।
দর-দস্তুর, কথা-কাটাকাটির পর দেহের মূল্য ঠিক হয়, খরিদারের
অর্থ আর দোকানীর দেহ বিনিময় হয়। তারপর এক খরিদার
চলে যায়, দোকানী আবার বসে নতুন খরিদারের আশায়। ঘড়ির
কাঁটা এগিয়ে যাচ্ছে, ছোটোর আগে সব বিক্রি শেষ করতে হবে,
কারণ অগ্নি সব জিনিসের নিয়ন্ত্রণের মতো দেহ-বিক্রয়ের উপরেও
গভর্নমেন্ট সময়ের কন্ট্রোল করে দিয়েছে। একটার পর একটা
ঘর পেরিয়ে যাচ্ছি আর জন বলে যাচ্ছে এটা তুর্কী, এটা
গ্রীক, ওটা ফ্রেঞ্চ, এটা আরবী, এটা যুগোস্লাভ, এটা আলবানিয়ান”
আন্তর্জাতিক মেলা বসেছে ইস্তানবুলের বেয়গলু স্ট্রিটের মাঝে
দাঁড়ানো ‘জামের’ পাশে-ঘেঁষা নোংরা গলিতে।

হঠাৎ কিছু বলবার আগেই আমার হাত ধরে টানতে টানতে
জন একটা ঘরে ঢুকে পড়লো। ভিতরে গিয়ে নিজেকে একটু
সামলাবার চেষ্টা করছি, জন কোটে একটা টান দিয়ে দেওয়ালে
টাঙানো একটা বোর্ডের দিকে আমায় দেখতে ইশারা করে।
“Come again if you like it but not more than once
for 20 Liras. Dogs not allowed here so don’t
bite”. আস্তে আস্তে রাস্তায় বেরিয়ে এলাম। পিছনে ঘরের
ভিতর থেকে কানে আসতে লাগল ডজনখানেক মেয়ের হাসি।

ম্যাকসিম, পিগলস্, লিডো এবং আরো অনেক প্যারিসের নাইট
ক্লাব আর কাবারের নাম নকল করে ইস্তানবুলেও রয়েছে এস্তার

‘বার’, নাইট ক্লাব আর কাবারে। অনেক ভেবে চিন্তে ঘুরে ফিরে আমি আর জন ঢুকলাম ‘পিগলস্’-এ। নিয়ন লাইটের নীল আলো পিগলস্-এর ছোটো ঘরময় ছড়িয়ে রয়েছে। মোজেক ফ্লোরের উপর চলেছে নাচ। স্প্যানিশ ব্যাণ্ড, নিয়নের নীল আলো, সিগারেটের ধোঁয়া আর স্ম্যাপেনের ট্রে নিয়ে বেয়ারাদের নিঃশব্দ পদচারণায় একটা স্বপ্নময় আবেশের সৃষ্টি হয়েছে। কোণের একটা টেবিলে আমায় বসিয়ে দিয়ে জন চলে গেল ড্যান্সিং ‘ফ্লোরে’। অনেক নাইট ক্লাব আর কাবারে দেখেছি, কিন্তু পিগলস্-এর শাস্ত নিঃশব্দ পরিবেশটা যেন কেমন একটু অদ্ভুত মনে হলো।

কতক্ষণ যে একা বসেছিলাম মনে নেই, খেয়াল হলো যখন একটা কালো ছায়া টেবিলের সামনে এসে দাঁড়ায়। নিয়নের নীল আলোয় আবছা আবছা দেখতে পাই কালো স্মাটিনে জড়ানো একটা মার্বেলের স্ট্যাচু। পায়ে জড়ানো ছোটো সোনালী ‘স্ট্র্যাপ’-এর উপর গড়িয়ে পড়েছে ভারি কালো স্মাটিনের গাউন, আর সেখান থেকে আস্তে আস্তে লতার মতো সাদা মার্বেলের তনু বেয়ে জড়িয়ে জড়িয়ে উপরে উঠেছে, কোমরের কাছে এসে একটু বাঁক ঘুরে আবার খানিকটা উপরে উঠে থমকে দাঁড়িয়েছে কালো স্মাটিন।

“পারমতে মোয়া লা প্লেজির” হঠাৎ মার্বেলের স্ট্যাচু কথা বলে ওঠে। উপরে তাকাতেই এক জোড়া নীল চোখের সঙ্গে মুহূর্তের জন্য দৃষ্টি বিনিময় হয়।

“মে আই?” বলে অসুস্থতির অপেক্ষা না করে স্ট্যাচু সামনের চেয়ারটায় বসে পড়ে। “মাই নেম ফাহারিয়া, মে আই হ্যাভ এ ড্রিংক”? আমার উত্তরের জগ্নো বিন্দুমাত্র অপেক্ষা না করে ফাহারিয়া অর্ডার দেয় “বিয়ার ফর হিম, ভট্কা ফর মি”।

ইস্তানবুলে ভট্কা? একটু চমকে উঠলাম। পরে জানলাম রাশিয়ান ভট্কা না, টার্কীর নিজের ভট্কা, অনেকটা ইরাকী ‘রাকীর’ (কড়া মদ) মতো। এক নিঃশ্বাসে ছোট গ্লাসটার সমস্ত তরল আগুনটা ফাহারিয়া নিজের গলা দিয়ে নামিয়ে দিলো। চোখে-মুখে একটা যন্ত্রণার ছাপ স্পষ্ট, বেশ বুঝলাম খেতে কষ্ট হচ্ছে। পর পর তিন গ্লাস ভট্কা খেয়ে যখন আবার অর্ডার দিচ্ছে, তখন আর থাকতে না পেরে বললাম, “ইউ ড্রিংক টু মাচ্—বড় বেশি মদ খাও তুমি”।

হেসে আমার কথাটা উড়িয়ে দিয়ে ফাহারিয়া অম্মান বদনে জবাব দেয়, “আই অ্যাম পেড ফর ইট—এর জন্তে আমি পয়সা পাই।” ভুলেই গিয়েছিলাম ফাহারিয়া নাইট ক্লাবের মেয়ে। ওর কাজই এই। চারপাশে তাকিয়ে দেখি আরো ডজনখানেক মেয়ে ঘুরে বেড়াচ্ছে খদ্দেরের খোঁজে। যতক্ষণ মদ খাওয়াবে ততক্ষণ বসে থাকবে খদ্দেরের কাছে, মদ শেষ তো তার সঙ্গও শেষ। ফাহারিয়ার সঙ্গও আমার কিছুক্ষণের মধ্যে শেষ হয়ে যেতো যদি সে-রাতে এক নাটকীয় ঘটনা না ঘটতো।

রাত দেড়টার সময় আমি আর জন বেরিয়ে এসেছি ‘পিগলস্’ থেকে। জনের আগ্রহে কিছুক্ষণের জন্তে গিয়েছি ‘লন্ড্রা’ নাইট ক্লাবে। ‘গলাতাসারায়ের’ মোড়ে যখন ট্যাক্সির জন্তে অপেক্ষা করছি, তখন হঠাৎ কয়েকজন পুলিশ কনস্টেবলের সঙ্গে ফাহারিয়াকে দেখে আশ্চর্য লাগল। আমাদের দেখে পুলিশদের হাত থেকে ছিটকে বেরিয়ে এল ফাহারিয়া। ওর সেই রূপ দেখে আমি অবাক। কালো ভারী স্কাটিনের গাউনটা বুকের উপর থেকে খসে পড়েছে, নীল চোখ দুটো মদের নেশায় লাল, পা দুটো টলছে। কোনো কিছু নেই হঠাৎ আমার উপর ঝাঁপিয়ে পড়লো ফাহারিয়া। ততক্ষণে পুলিশ কনস্টেবলরাও এসে পড়েছে। ফাহারিয়া আমার হাত ধরে টানছে আর বিড় বিড় করে কি বলছে আর কনস্টেবলগুলো আমার কাছ থেকে ওকে ছিনিয়ে নেবার জন্তে ওর চুল ধরে টানতে শুরু করছে। চিংকার করে কেঁদে উঠলো ফাহারিয়া। কিছুই বুঝিলাম না ব্যাপারটা কি। জন এতক্ষণ চুপচাপ ছিল, এবার এগিয়ে গিয়ে কনস্টেবলগুলোকে তুর্কীতে কি বোঝালো আর তারা চলে গেল। সামনে ট্যাক্সি দাঁড়াতেই জন তাতে আমাকে উঠতে বলে, ফাহারিয়াকে প্রায় পাঁজাকোলো করে পেছনের সীটে ফেলে দিলো। কয়েক মিনিটের মধ্যেই ব্যাপারটা হয়ে গেল। জন বুঝিয়ে বললো যে, নাইট ক্লাবের মেয়েদের জীবনে এ অতি সাধারণ ঘটনা। অত্যধিক মদ খেয়ে রাস্তায় মাতলামি করছিল ফাহারিয়া তাই পুলিশ ধরেছিল।

“তাতে আর কি হয়েছে, কাল সকালে ছাড়া পেয়ে যেতো”, জনকে বললাম।

“নট সো ইজি—অতো সোজা নয়। আমি যদি ওর দায়িত্ব না

নিয়ে পুলিশগুলোকে ঘুস না দিতাম, ফাহারিয়াকে ওরা সোজা জেলে পাঠাতো। কোর্টের ফাইন দিতে পারতো না, তাই কিছুদিন হাজতবাস করতে হতো।”

“তাতে আর ওর জীবনযাত্রার কি তফাত হতো?”

“হতো। জেল থেকে কপর্দকহীন অবস্থায় খালাস পেয়ে নাইট ক্লাবে চাকরি পাবার মতো ওর যোগ্যতা বা চেহারাও থাকতো না। ও তখন কোথায় যেতো জানো?”

“কোথায়?”

“সেই যে ‘জামে’র পাশের গলিতে ছোট ছোট অনেকগুলো ঘর দেখেছিলে যেখানে লেখা ছিল ‘ডগস্ নট অ্যালাউড, সো ডোন্ট বাইট’, তাদের একটাতে উঠতো ফাহারিয়া।”

জনের উত্তরে একটু শিউরে উঠলাম। ফাহারিয়ার তখন একটু নেশার ঘোর কেটেছে। উঠে এসে জনকে আর আমাদের বার বার ‘মেসি’, ‘তশকুর আদারাম’ আর ‘থ্যাঙ্ক ইউ’ বলে চলেছে। এক ধমক দিয়ে ওর বাড়ির ঠিকানা জিজ্ঞেস করে জন ট্যাক্সি ড্রাইভারকে একটা নোংরা গলির কাছে গাড়ি দাঁড় করাতে বললো। গলির মোড়ে নেমে ট্যাক্সি ড্রাইভারকে ভাড়া মিটিয়ে দেবার সময়, মনে হলো স্টীয়ারিং হুইল ধরে বসে আছে পিটার দিমিত্রিয়াদিস। ভালো করে দেখবার আগেই হুস করে বেরিয়ে গেল ট্যাক্সিটা।

একটা ছাদ-নিচু ছোট দরজা দেয়া বাড়ির সামনে গিয়ে দাঁড়ালো ফাহারিয়া। মূহু হুঁতিনটে টোকা দেবার পরই দরজা খুলে বাইরে এল আট দশ বছরের একটা ছেলে। ‘কাম ইন’ বলে ভিতরে আসবার জন্তে অনুরোধ জানায় ফাহারিয়া, কিন্তু জন ভিতরে যেতে নারাজ। “ইয়োক, ইয়োক—না, না” জন আমার দিকে চেয়ে অসম্মতি জানায়। আমার কাছে এসে দাঁড়িয়ে ফাহারিয়া এবার করুণ মিনতি জানায় “প্লিজ, প্লিজ”। অনিচ্ছাসত্ত্বে জন ভিতরে যেতে রাজী হলো।

ঘরের দৃশ্য দেখে আমি অবাক। নোংরা কদর্য একটা ছোট কুঠুরি, চারপাশে ছড়ানো ভাঙা বাস্তু, স্টুকেস আর ছেঁড়া ময়লা বিছানা। ফাহারিয়ার কালো স্মার্টিনের গাউন আর সোনালী জরীর স্ট্র্যাপ দেওয়া জুতোর সঙ্গে যেন এই পরিবেশকে ঠিক খাপ খাওয়াতে পারছিলাম না। পরে জেনেছিলাম ওসব ভাড়া করা।

একটা প্লেটে করে কালো কালো কিছু রুটির টুকরো আর খানিকটা ‘পনীর’ (চীজ) নিয়ে রাখলো আট দশ বছরের ছেলেটা।

সেই শুকনো পাউরুটি আর চীজ খেতে খেতে ফাহারিয়ার গল্প শুনলাম। ওরা আসলে টাকার না। ওর বাবা অনেক দিন আগে এসেছিল সোফিয়া থেকে, সঙ্গে এক বছরের ফাহারিয়াকে নিয়ে। নিজের মা’র কথা মনে নেই ওর। এখানে এসে আবার বিয়ে করে ওর বাবা আর তার এই ভাইটি হয়—আট দশ বছরের ছেলেটিকে দেখায় ফাহারিয়া। তারপর ওর বাবা একদিন চুরির অপরাধে জেলে যায় আর জেল থেকে বেরিয়ে হয় নিরুদ্দেশ। ওর মা কিছুদিন পরেই অল্প আরেক জনকে বিয়ে করে চলে যায় আনকারাতে।

ভোর তিনটের সময় যখন ফাহারিয়ার ঘর থেকে বেরিয়ে বড় রাস্তায় আসি সারা ইস্তানবুল তখন বিরাট অজগর সাপের মতো ঘুমুচ্ছে। হু’-একটা তারা মাঝে মাঝে টিম টিম করছে। ‘দি ম্যাডেনেস ইজ ওভার’ জন বলে। ইস্তানবুলের পাগলামি শেষ হয়ে গিয়েছে আজকের মতো। ভোরের দিকে যখন সারা রাত জাগার পর ক্লান্ত শ্রান্ত দেহ নিয়ে হোটেল পৌছলাম দরজা খুলতে খুলতে বুদ্ধ ‘কাপুজী’ (Kapudji)—চৌকিদার) প্রশ্ন করে “হ্যাড এ ফাইন নাইট মঁশিয়ে? রাত্রিটা ভালো কেটেছে তো?” ‘কাপুজী’ বিরাট কোনাক্ হোটেল কাজ করে, ও ফাহারিয়ার ছোট ছাদ-নিচু নোংরা ময়লা ঘরটা দেখেনি।

পরের দিন রাতে ‘পিগলস্’-এ গিয়ে শুনলাম ফাহারিয়ার চাকরি গিয়েছে। নাইট ক্লাবের ম্যানেজার পুলিশের ঐ ব্যাপার হবার পর ওকে চাকরিতে রেখে ‘পিগলস্’-এর সুনাম নষ্ট করতে চান না। এক কোণে চুপচাপ বসে ছিলাম, বেয়ারাটা এসে আস্তে আস্তে বললো, ‘ফাহারিয়া গন টু ওজগুর বার’। টিপ্স দিয়ে বেরিয়ে এলাম রাস্তায়। কোথায় যাবো কিছুই ঠিক করতে পারছিলাম না। হাঁটতে হাঁটতে কখন যে ‘ওজগুর’ বারের সামনে এসে দাঁড়িয়েছি বুঝতেই পারিনি। সম্বিং ফেরে ভিতর থেকে ভেসে-আসা ব্যাণ্ডের সঙ্গীতে।

সিঁড়ি দিয়ে নামছি দেখি মাইকের সামনে দাঁড়িয়ে ফাহারিয়া গান গাইছে। আমার দিকে নজর পড়তেই একটু হাসলো। আজ

আর কালো ভারী স্ফাটিনটা পরেনি। সাদা সিন্ধের একটা গাউন আজ ভাড়া করেছে। গান শেষ হবার সঙ্গে সঙ্গে হাততালির ফোয়ারা ছুটলো আর “বঁ সোয়ার, গুড ইভনিং” বলতে বলতে ফাহারিয়া এসে বসে আমার টেবিলে। কাল রাতে যে এত বড় একটা ব্যাপার হয়ে গেল ওকে দেখে তা মনেই হয় না। জিজ্ঞাসা করলো “ইয়োর ফ্রেন্ড?” বললাম, জন আসেনি। স্বীকার করতে লজ্জা হলো আজ জনকে না জানিয়েই আমি চলে এসেছি।

“ক্যান আই কল মাই ফ্রেন্ড?” নিজের বন্ধুকে আমার টেবিলে ডাকবার অমুমতি চায় ফাহারিয়া। পাশের খালি টেবিল থেকে উঠে আসে একটা মেয়ে। “মাই নেম সাবাহাল ডেমিজ্জে” বলে চেয়ারটা টেনে নেয় ফাহারিয়ার বন্ধু। সাবাহালকে দেখে আমি বিস্মিত হয়েছিলাম। এত ছোট মেয়ে এখানে দেখবো আশা করিনি। রোগা ফ্যাকাশে, ছোট্ট সাবাহালকেও আসতে হয়েছে নাইট ক্লাবে অর্থ উপার্জনের খাতিরে। কে জানে ওর কাহিনী হয়তো ফাহারিয়ার চেয়েও মর্মাস্তিক।

এর পর রোজ গিয়েছি ‘ওজগুর বারে’। হাসি, ঠাট্টায়, নাচে, গানে বেশ সময়টা কেটে গিয়েছে। সাবাহালকে আমি ডাকতাম ‘বেবী’ বলে আর কিছুদিনের মধ্যেই ফাহারিয়া আমার কাছে হয়ে গিয়েছিল শুধু ‘রিয়া’।

“আই অ্যাম নট বেবী, আই অ্যাম সেভেনটীন”, মুক্তোর মতো দাঁতে হাসির ঝিলিক মেরে প্রতিবাদ করতো সাবাহাল।

“ইউ ড্রিংক টু মাচ্”, রিয়াকে বলতাম।

“ইউ স্মোক টু মাচ্” ওর কাছ থেকে জবাব আসতো। মাঝে মাঝে ওদের প্রশ্ন করতাম ভবিষ্যৎ সম্বন্ধে— দু’জনেই নিলিগু জবাব দিতো, “হু নোস্ অ্যাণ্ড হু কেয়ার্স” (Who knows and who cares)।

টেমীর সঙ্গেও দেখা হয়েছিল ‘ওজগুর’ বারে। খামখেয়ালী আর্টিস্ট টেমী। ইস্তানবুলে এসে খুলেছে ‘স্যালোন দি মোদ’ (Salon de Mode)। রকমারি ফ্যাশানের বেশভূষা তৈরি করে নিজের স্টুডিওতে বসে আর সময় পেলে ছবি আঁকে। মাঝে মাঝে আনমনা হয়ে প্যারিসের কথা ভাবে, পারি, সুইট পারি। চার ঋতুর

শহর পারি—“Paris, Ville des Quatre-Saisons. Paris, it is not a city, it is a world by itself. It is a dream.”

বেবী, টেমীর মডেল। ঘণ্টার পর ঘণ্টা টেমী ওকে স্টুডিওতে বসিয়ে লুড্ ছবি আঁকে আর নতুন ফ্যাশানের ড্রক আর গাউন তৈরি করে ওকে পরায়। টেমীর খরচ যোগাতে বেবীর প্রাণান্ত, কারণ টেমীর উপার্জন না থাকারই সমান। নিজের যা কিছু ছিল নিঃশেষ করে দিয়েছে বেবী টেমীর জন্তে, কিন্তু তবুও টেমী ‘মডেল’ ছাড়া আর কোনো রূপেই ওকে দেখে না।

সেদিন রাতে বেবী আমার টেবিলে এল না। রিয়াকে জিজ্ঞাসা করাতে জানতে পারলাম টেমী নাকি প্যারিস চলে গিয়েছে। অনেক বোঝাবার পর বেবী এসে বসলো। খানিকক্ষণ চুপচাপ থাকার পর হঠাৎ ফুঁপিয়ে কেঁদে উঠে জামার নিচে বুকের উপর রাখা একটা ফটো বের করলো। ফটোটা টেমীর। সীন নদীর তীরে দাঁড়িয়ে আছে টেমী। ফটোর পেছনে লেখা “a Sabahal, pour une souvenir—সাবাহালকে একটা স্মৃতিচিহ্ন।” আর কিছুই রেখে যায়নি টেমী বেবীর জন্তে।

তারপর ক’দিন আর বেবীর দেখা নেই। রিয়াকে জিজ্ঞাসা করলে ‘জানি না’ বলে ও কথাটা এড়িয়ে যায়। ‘ওজগুর বার’ ছেড়ে দিয়েছে বেবী। কিন্তু কোথায় আছে? রিয়া কোনো উত্তরই দেয় না। মনটা যেন কেমন খারাপ হয়ে গেল। বেবীর সেই ফ্যাকাশে, রোগা চেহারা আর কচিকচি মুখটা কেবলই চোখের সামনে ভাসতে থাকে।

পরের দিন সকালে ইস্তানবুল ছেড়ে চলে যাবো এথেন্সে। বেয়গলুর নাইট ক্লাব, কাবারে আর বারের ভিড়ে হারিয়ে যাবো রিয়া ও বেবী আর ইউরোপের টুরিস্টদের ভিড়ে হারিয়ে যাবো আমি। সন্ধ্যাবেলা কি জানি কেন নিজের অনিচ্ছাসত্ত্বেও ‘ওজগুর’ বারে গেলাম। রিয়াকে বললাম, আমাকে বলো বেবী কোথায়। যাবার আগে আমি ওর সঙ্গে দেখা করতে চাই। রিয়া আবার ইতস্তত করতে লাগল। যখন বললাম যে, আমার সঙ্গে বেবীর দেখা না করলে আমি এক্ষুণি চলে যাবো, রিয়া শুধু “অল রাইট কাম উইথ মি” বলে আমায় নিয়ে ট্যাক্সিতে উঠলো।

অনেক ঘুরে ফিরে ট্যাক্সি দাঁড়ালো একটা গলির মোড়ে। চেনা চেনা মনে হলো গলির মোড়টা। ছাদ-নিচু ছোট দরজাওয়ালা বাড়ির সামনে দাঁড়ালো রিয়া। “এ তো তোমার বাড়ি”, রিয়ার ব্যবহার দেখে অবাক হই। একটু চিৎকার করে ধমকে বলি, “আমায় বেবীর কাছে নিয়ে চলো। এখানে নিয়ে এসেছ কেন?”

“বেবী হিয়ার—বেবী এখানে আছে।”

“বেবী এখানে আছে আর তুমি এতদিন কথা এড়িয়ে বলেছো তুমি জানো না ও কোথায় আছে!” রাগে সমস্ত শরীরটা রি রি করে উঠলো।

আমার দিকে আবার ঠিক সেই রকম করুণ দৃষ্টি নিয়ে তাকালো রিয়া, যে রকম করে প্রথম পরিচয়ের পর আমাকে ওর ঘরে আসতে বলেছিল ‘প্লিজ, প্লিজ’ বলে। “বেবী ভেরি ব্যাড, বেবী ভেরি ইল—বেবীর খুব শক্ত অসুখ হয়েছে।”

ধাক্কা মেরে ঝড়ের মতো রিয়ার সেই নোংরা, ময়লা, কদর্য কুঠুরির ভিতরে ঢুকে পড়লাম। সেই স্তূপীকৃত জঞ্জাল, ছেঁড়া বিছানা, চারপাশে ছড়ানো ভাঙা বাস্প আর স্টকেস।

“হ্যালো।”

ঘরের এক কোণ থেকে একটা কাতরানি শুনতে পেলাম। পা-ভাঙা একটা খাটের উপর শুয়ে আছে বেবী। আমার মাথাটা যেন ঘুরতে লাগল। কোথায় সেই ফ্যাকাশে, রোগা চেহারা আর কচি-কচি মুখ? বিছানার উপর শুয়ে রয়েছে একটা অর্ধনগ্ন কঙ্কাল।

আর সেই কচি-কচি মুখময় ছেয়ে রয়েছে লাল লাল, চাকা চাকা ক্ষত।

‘বেবী’, আমার কথাটা যেন চিৎকারের মতোই শোনালো।

“আই অ্যাম নট বেবী, আই অ্যাম সেভেনটীন”—অর্ধনগ্ন কঙ্কালটা ক্ষীণ হেসে বলে উঠলো। দু’ফোঁটা চোখের জল গাল বেয়ে নেমে আসে।

কালো ভারী স্ট্রাটিনের গাউনটা আবার পরে মার্বেল স্ট্যাচুর মতো আমার পাশে দাঁড়িয়ে রিয়া।

আমার চোখের সামনে ঘুরতে লাগল শুধু অসংখ্য লাল লাল চাকা চাকা ক্ষত।

ঝড়ের মতোই আবার বেরিয়ে এলাম।

ভোর তিনটের সময় পিটার দিমিত্রিয়াদিস্ যখন আমায় হোটেলে নামিয়ে দিয়ে গেল সারা ইস্তানবুল শহর তখন একটা বিরাট অজগর সাপের মতো একপাশে হেলে ঘুমুচ্ছে। এখানে ওখানে ছ’-একটা তারা টিম টিম করছে। ‘দি ম্যাডনেস ইজ ওভার—আজকের মতো পাগলামি শেষ হয়ে গিয়েছে ইস্তানবুলের’।

হোটেলে ঢুকে কি করে যে নিজের বিছানায় পৌঁছেছিলাম সব কিছু আজ মনে নেই, কিন্তু মাঝে মাঝে আজও এইটুকু স্মরণ হয় যে, জীবনে প্রথম সে রাতে আমি বন্ধ মাতাল হয়ে ঘরে ফিরেছিলাম আর সারা রাত কার জন্তে যেন কেঁদেছিলাম।

কুড়ি

ভোরের আলোয় পূবের আকাশটা হয়েছে লাল। রাতের পাগলামি শেষ হয়েছে আর আবার আরেকটা নতুন প্রভাতে ঘুম থেকে জেগে উঠেছে দুরন্ত ইস্তানবুল। রোজই এমন হয়। নিঃসীম রাতের অন্ধকারের বুকে চলে পাগলামি আর কিমিয়ে পড়ে মহানগরী ভোরের দিকে।

যখন হোটেল থেকে বাইরে এলাম, বেয়গলুর রাস্তায় সবে লোক চলাচল শুরু হয়েছে। পিটার দিমিত্রিয়াদিস্ তার কথা রেখে ট্যাক্সি নিয়ে ‘কালীমেরা’ (সুপ্রভাত) বলে এসে দাঁড়িয়েছে। জিনিসপত্তর চাপিয়ে গাড়িতে উঠতে যাবো, সেলাম করে দাঁড়ালো অতি পরিচিত, কানা, বন্ধ ‘সু-শাইন’। নিজের জুতোর দিকে তাকিয়ে একটু লজ্জাই পেলাম। রিয়ার পচা ছর্গন্ধময় নোংরা গলির কাদার ছাপ লেগে রয়েছে চারপাশে। রোজকার মতো বন্ধ এক নিমেষে ঝকঝকে পালিশ করে দিয়ে, গর্বের সঙ্গে তাকায় জুতোর দিকে, আমার তারিফের আশায়। কি জানি কি মনে হলো পুরো একটা লিরা-ই দিয়ে ফেললাম বন্ধকে।

মুখ কাচুমাচু করে বন্ধ বলে, “পার্দন, নো চেঞ্জ মঁশিয়ে”।

“তামাম, তামাম, বীর লিরা—ঠিক আছে, এক লিরা-ই দিলাম”, অহেতুক দয়া ছুঁড়ে মারি। “তশকুর আদারাম তশকুর”। আনন্দের আতিশয্যে আমার ওপর ধন্যবাদের বোঝা চাপিয়ে বন্ধ অস্থ খন্দেরের আশায় আবার নিজের জায়গায় গিয়ে বসে।

দাঁড়িয়ে দাঁড়িয়ে অনেকক্ষণ দেখলাম ‘কোনাক্’ হোটেলকে। মেথরের ঝাড়ু দেওয়া খুলোর মধ্যে দিয়ে দেখি বেয়গলুর শেষে আবছা আবছা ‘তকসীম স্কোয়ার’। পিটার মনে করিয়ে দেয়—“টাইম ফর প্লেন মঁশিয়ে”। পিটারের কথায় স্বরণ হলো আজ আমার শেষ দিন। বিদায় জানাতে হবে ইস্তানবুলকে আর মিডিল-ইস্টকে। মনটা ভারী হয়ে যায়। কই, ইউরোপ ভ্রমণের আশু সম্ভাবনায় তো আনন্দ আর উৎসাহ পাচ্ছি না। যাত্রার শুরুতে যখন নাগপুর থেকে বসে রওনা হই তখনও না মনটা এমনি ভারী হয়ে এসেছিল।

সারা রাস্তা পিটার কথা বলে না। আমি যাবো এথেন্স—পিটারের জন্মভূমি এথেনিকা। প্রতিবারের মতো আজ সকালেও মনটা ওর ঘরের জন্তে কেঁদে উঠেছে। মনটা ছুঁজনেরই কেঁদে উঠেছে—আমার মিডিল-ইস্ট ছাড়ার বিদায়-বেদনায় আর পিটারের তার জন্মভূমি না যেতে পারার নিষ্ফল দুঃখে।

গ্রীক এয়ারলাইন ‘টাই’ (T.A.E) কোম্পানীর বিরাট প্লেনটা দাঁড়িয়ে রয়েছে বিমানঘাঁটির এক কোণে। নিস্তব্ধতা ভঙ্গ করে পিটার প্রায় চৈচিয়েই বলে ওঠে, “ছোট প্লেন টেক ইউ টু এথেনিকা”। কথাটা বলেই নিজেকে আবার সামলে নেয় পিটার আর প্রতিবারের মতো নিজের সীট থেকে নেমে দরজা খুলে দাঁড়ায়। রোজকার মতো আমিও মনিব্যাগ খুলে গাড়ির মিটারের দিকে ইঙ্গিত করে পিটারকে প্রশ্ন করি—“পোসো কানি (Poso Kani) পিটার? কত হলো পিটার?”

আমার গ্রীক উচ্চারণ শুনে অনেক কষ্টে হাসি চেপে পিটার উত্তর দেয়, “ওহি, ওহি, নাথিং, ইউ গো মাই এথেনিকা, নো চার্জ”। পিটারের গলার স্বর ভিজে এসেছে, চোখটা কেমন যেন ঝাপসা। আমি যাবো ওর এথেন্সে, তাই আমার কাছ থেকে ভাড়া নেবে না। বিদায়ের মুখে একি ঋণের বোঝা চাপাচ্ছে এক সাধারণ ট্যান্ডি ড্রাইভার! টুরিস্টদের তো ভালো লাগে না পিটারের, তবে আমার প্রতি এ টান কেন?

“কেন পিটার, এ তোমার অস্থায়ী। অনেক টুরিস্টই তো গ্রীসে যায়। সবাইকার কাছ থেকে ভাড়া না নিলে তুমি তো ফতুর হয়ে যাবে।”

মরুপ্রান্তরের বুকে আমার যাত্রা শেষ হয়েছে।

বন্ধুদের মতে স্রেফ ছ'মাস 'শিয়ার ওয়েস্ট অব টাইম অ্যাণ্ড এনার্জি' করেছি আমি মিডিল-ইস্টে। উত্তর দিয়েছিলাম, ছ'মাস ইউরোপও তো ঘুরলাম, তবু তাঁরা ক্ষুণ্ণ। "ছ'মাস মিডিল-ইস্ট না ঘুরে পুরো চারমাসই ইউরোপ ঘুরলে আরো ভালো হতো"। তর্ক করে তাদের বোঝাতে পারিনি। প্যারিসের মমার্তে, মপারনাস্, শ্যাঙ্গেলীজে, বুলেভার, লাতিন কোয়ার্টার, রোমের কতশত ঐতিহাসিক প্রাসাদ, ভেনিসের গণ্ডোলা আর গ্রাণ্ড ক্যানাল, জার্মানির বিয়ার আর কারখানার চিমনির ধোঁয়া, জেনিভার আন্তর্জাতিকতা সবই আমার ভালো লেগেছে কিন্তু তার চেয়েও নিবিড়ভাবে ভালো লেগেছে আমার বসরার কোলাহলপূর্ণ নোংরা বন্দর, বাগদাদের অল্ রশীদ স্ট্রীট, "মোস্ট অ্যানশিয়েন্ট সিটি দামাস্কাস্," ইস্তানবুলের বেয়গলু আর তকসীম স্কোয়ার, মরুভূমির বালুরাশী আর মরীচিকা। প্যারিসের বড় রেস্টোরাঁর ডিনার-এ-লা-কার্তে, রোমের স্প্যাঘেটী, হটডগ, সসেজ আর হামবুর্গারের চেয়ে ভালো লেগেছে ছোট মাটিঘেরা আরবের অন্ধকার ঘরে বসে 'খাবোশ' আর 'রবা' আর ক্ষুদ্র তুর্কী হোটেলে 'পিলাভ্' আর 'পনীর' খেতে।

ইউরোপকেও আমি ভালোবেসেছিলাম কিন্তু কই ইউরোপ তো আমায় ভালোবাসেনি। ইউরোপও আমায় অভ্যর্থনা জানিয়েছে কিন্তু তার মধ্যে জন থমাসের আলিঙ্গনের উষ্ণতা তো খুঁজে পাইনি। ইউরোপে আমি ছিলাম লক্ষ লক্ষ মরশুমী টুরিস্টদের মধ্যে একজন—আনন্দ চেয়েছিলাম, পেয়েছিলামও সে আনন্দ, কিন্তু দাম দিয়ে কিনতে হয়েছিল তা। কিন্তু মিডিল-ইস্ট। তাকে শুধু আমিই ভালোবাসিনি, মিডিল-ইস্টও আমায় ভালোবেসেছিল। টুরিস্টদের জঘ্ন তুলে রাখা ভালোবাসা নয়—'সবার ওপরে মানুষ সত্য তাহার ওপরে নাই', সে মানুষের মতো ভালোবাসা।

মিডিল-ইস্ট আমায় পাউণ্ড, ডলার, ফ্রাঙ্ক, লিরা, পিয়াত্রা, আর মার্ক দিয়ে মাপেনি, আমায় দেখেছে রক্ত-মাংস, হাসি-কান্না আর সুখ-দুখে গড়া সাধারণ মানুষ হিসেবে।

কিছুদিন আগে রোটারী ক্লাবের এক মিটিং-এ আমায় বক্তৃতা দিতে হয়। ক্লাবের প্রেসিডেন্ট এডুলজী সাহেব আমার বক্তৃতার বিষয় নির্বাচনের সম্পূর্ণ স্বাধীনতা দিয়ে শুধু এইটুকুই অনুরোধ করেন যে, মধ্যপ্রাচ্য সম্বন্ধেই যেন আমি বলি। আমি বিষয় ঠিক করেছিলাম “ফ্রম লরেন্স টু নাসের—রোমান্টিক মিডিল ইস্ট”। রোটারীর বাঁধাধরা কুড়ি মিনিটের বক্তৃতার পর এডুলজী সাহেব প্রশ্ন করেন, “বাট হোয়ার ইজ রোমান্স ইন অল দিস্?” বেশ মনে পড়ে তাঁকে জবাব দিয়েছিলাম, “ইট ইজ এ রোমান্স উইথ ফেট অ্যাণ্ড ডেস্টিনি”। মধ্যপ্রাচ্যে আজ ভাগ্য আর নসীবের সঙ্গে রোমান্স চলেছে। আবার যখন কোনোদিন মিডিল-ইস্টে যাবো হয়তো নতুন মিডিল-ইস্টকে দেখতে পাবো।

হারুন-অল্-রশীদের থাউজ্যান্ড অ্যাণ্ড ওয়ান নাইটস্ যেমন আর দেখতে পাওয়া যায় না, তেমনি পাওয়া যায় না ওমর খৈয়ামের সে রোমান্টিক মিডিল-ইস্ট। বাগদাদের রাজপথে গজীর রাতে কোনো হারুন-অল্-রশীদ আর চন্দ্রবেশে ঘুরে বেড়ায় না, কুঞ্জছায়ার তলে কোনো ওমর খৈয়ামও সাকী ও সুরা নিয়ে আর বসে না। মরুভূমির বুক ঠেলে উটের কাফিলা আজও চলে কিন্তু ‘আর্মস এইড’-এর দৌলতে যুদ্ধের সাজোয়া গাড়িই ঘোরে বেশি। অনেক জল বয়ে গিয়েছে শাতীল আরব আর নীল দিয়ে। কত ঘুমন্ত ফারাওদের জাগানো হয়েছে আর ব্যাবীলনের কত ধ্বংসপ্রায় স্তম্ভই না মাটি ফুঁড়ে বেরিয়েছে। কিন্তু যে দিন চলে গিয়েছে তার চিন্তা করে কি হবে? মরুভূমির ওপারে যে নতুন সূর্য উঠছে তাকেই অভ্যর্থনা জানাচ্ছে আজ প্রাচীন মিডিল-ইস্টের নতুন আরব আর তুর্কী।

“ইউসুফে গুম গশ্তে বাজ আয়দ ব কিনান গম ম থুর।

কুলবয়ে ইহজান শওদ রুজি গুলিস্তান গম ম থুর ॥

দুঃখ করো না হারানো ইউসুফ, কিনানে আবার আসিবে ফিরে

দলিত গুল এ মরু পুনঃ হয়ে গুলিস্তা হাসিবে ধীরে”

(নজরুল)

“রোজ ইয়কে জেতো গুলিস্তা শুদ্ ইয়াদ মাকুন্?” যে দিন চলে গিয়েছে তার স্মরণ করে কি হবে?

লরেন্স থেকে নাসের—অনেক দূরে এগিয়ে এসেছে মিডিল-ইস্ট
কিরকুক থেকে হাইফা—মরুভূমির বুক চিরে অতিকায় হিংস্র

অজগরের মতো মাইলের পর মাইল তেলের পাইপ চলে গিয়েছে। কাউন্ট বার্নাডোট আর লক্ষ লক্ষ আরব-ইহুদীর রক্তের গড়া নতুন ইজরাইল জন্ম নিয়েছে। স্বপ্নে দেখা পরীর নির্দেশে কর্নেল ডিক্সন কুয়েটে পেয়েছিলেন তেলের অফুরন্ত ভাণ্ডারের সন্ধান। আজ সে ডিক্সনও নেই আর সে পরীও নেই। মিডিল-ইস্ট বছরের পর বছর পশ্চিম জুনিয়াকে শুধু তেলই যোগায়নি, যুগিয়েছে ফিল্মের গল্প আর নাম-না-জানা অনেক বিদেশী লেখকের খোরাক। রঙীন চশমা পরে এই সব লেখকেরা দেখেছে মিডিল-ইস্টকে আর সত্যি-মিথ্যে দিয়ে প্রমাণ করবার চেষ্টা করেছে ‘এক অদ্ভুত দেশ এই মিডিল-ইস্ট’। সহানুভূতি দেখায়নি কেউই। জন কিমচে, কলিন জ্যাক্সন, জন গান্ধার, ফাগুসন আরো কতশত লেখকের লেখাই তো পড়লাম কিন্তু দরদী মনের পরিচয় তো কোথাও পেলাম না। এদের মধ্যেই তো একজন লিখেছেন—

“We don’t like your country and we don’t love you either but we love your oil all the same.”

তিন প্রাচীন ধর্মের মিলনক্ষেত্র মিডিল-ইস্ট। একের পর এক জন্ম নিয়েছেন পীর-পয়গম্বরেরা আর অন্ধকার যুগ থেকে পৃথিবীকে করেছেন আলোকিত। এখানেই জিব্রাইল হয়েছেন গ্যাবরিয়েল, ইব্রাহিম হয়েছেন আব্রাহাম, ইসমাইল হয়েছেন ইশামেল, হাজরা হয়েছেন হ্যাগার, দাযুদ হয়েছেন ডেভিড্ আর ইয়াকুব হয়েছেন জ্যাকব। লক্ষ লক্ষ মুসলমানের কাবা আর খৃস্টানদের বেথেলেহেম রয়েছে এখানেই। একের পর এক এখানেই এসেছে গ্রীক, তাতার, তুর্ক, মঙ্গোল, আসিরিয়ান, স্যুনেরিয়ান, ব্যাবিলনিয়ান এবং আরও কতশত, আর রেখে গিয়েছে তাদের পদচিহ্ন কালের বালুভূমিতে।

ছোট্ট একটা ঘটনায় কথা আজ মনে পড়ছে। যাবার আগে ফর্দ নিয়ে বসেছিলাম কার জন্তে কি আনতে হবে। অনেকে অনেক দাবিই জানিয়েছিল। ‘বেটার হাফ’ চেয়েছিলেন, আমি নিজেকেই যেন ফিরিয়ে আনি। ফিরে এসেছি নিজে কিন্তু তাঁর ছুখ আমার মন আমি রেখে এসেছি মরুপ্রান্তরে। সবচেয়ে অদ্ভুত দাবি এসেছিল আমার ভ্রাতৃজায়ার কাছ থেকে। “দাদা, আমার জন্তে কিছু আনতে হবে না, শুধু আপনি যেখানে যেখানে যাবেন,

সেখানকার মাটি আমার জন্ম নিয়ে আসবেন।” অদ্ভুত দাবি হলেও তার নতুনত্ব আমার ভালো লেগেছিল। যে যে জায়গায় গিয়েছি, অল্প লোকের চোখ বাঁচিয়ে তুলে এনেছি মাটি। এক একটা মোড়ক তৈরি করে সমস্ত লেবেল লাগিয়েছি—ইরাক, ইরান, সৌদী আরবিয়া, সিরিয়া, টার্কী, কুয়েট, ইমেন, লিবিয়া, জর্ডন, ইজিপ্ত, বহেরিন, লেবানন আর পাকিস্তান। গ্যাই পাকিস্তানও।

আজ মরুপ্রান্তরে আমার যাত্রার শেষে কত কথাই না মনে পড়ছে, আর কত ছোটখাটো ঘটনাই না ভেসে উঠছে চোখের সামনে। প্যারিস, রোম, এথেন্স, বেলগ্রেড, ডাসেলড্রফ, ফ্রান্সফোর্ট, ভিয়েনা, মিলান, জেনিভা, কোপেনহেগেন,—কতশত নগরী আর দেশই তো দেখলাম কিন্তু তবু জানি না, মিডিল-ইস্টকেই কেন আমি এত নিবিড়ভাবে ভালোবাসি। ভালো লাগে আমার মরুপ্রান্তরের বালুরাশি আর শাতীল-আরবের তীরে খেজুর গাছের ছায়া।

কতদিন ছেড়ে এসেছি মিডিল-ইস্ট তবু মাঝে মাঝে মনে হয়, মরুপ্রান্তরের কোণে চক্রবালের কাছে দাঁড়িয়ে কারা যেন আমায় হাতছানি দিয়ে ডাকছে, “আহলীনওয়া আহলীন, আহলীনওয়া আহলীন”।

বাইশ

সোমবার ১৪ই জুলাই ১৯৫৮’র এক রোদ ঝলমলে সকাল।

ইস্তানবুল এয়ারপোর্টের লাউঞ্জে উড়ছে শত শত রঙীন ফাল্গুণ আর কাগজের ফুল। সারি দিয়ে দাঁড়িয়েছে সব বিদেশী রাজদূতেরা। বাইরে জনতার ভীড় মাঝে মাঝে দিয়ে ওঠে হাততালি।

টার্কীর প্রেসিডেন্ট জালাল বেয়ার, প্রধানমন্ত্রী আদনান মেন্দারেস আর পররাষ্ট্রমন্ত্রী জোরলুর কপালে দেখা দেয় চিস্তার রেখা। আটটা-নটা-দশটা। এত দেরী কেন? ঘন ঘন আকাশের দিকে দৃষ্টি যায়—ঐ বৃষ্টি প্লেন আসছে! কই না তো! তবে কী?

সাড়ে দশটা। ইরাক নৃপতি হিজ ম্যাজেস্টি ফইজল দ্বিতীয় আর প্রধানমন্ত্রী জেনারেল নুরী-এ-সইদ—যাঁদের অভ্যর্থনার জন্তে এত জাঁকজমক তাঁরা আর এসে পৌঁছলেন না। লাইন করে দাঁড়ানো গার্ড-অফ-অনার সরিয়ে ফেলা হলো। পাঁচ মিনিট পরে ইরাকী এয়ারওয়েজের একটা খালি প্লেন এসে নামলো। ইরাকী রাজদূত নগীব আল-রাবী দৌড়ে গেলেন পাইলটের কাছে। পেছনে ছুটলে খবরের কাগজের রিপোর্টারের একদল। চুপিচুপি নগীব আল-রাবীর কানে পাইলট জানালো—“সাংঘাতিক ব্যাপার। ফইজল, নুরী আর আবদুল ইল্লাহ নিহত। ইরাকে হয়েছে আমী-অফিসারদের Coup de etat (কু-দি-ত্যা)। ইনকিলাব রিভলিউশন, ক্রান্তি হয়েছে আজ ভোরে বাগদাদে।” প্লেন তক্ষুনি উড়ে গেলো ইউরোপে।

মুহূর্তের মধ্যে ইস্তানবুল এয়ারপোর্টেও একটা ছোটোখাটো রিভলিউশন হয়ে গেল। রঙীন ফাছুষ আর কাগজের রাশি রাশি ফুল মাটিতে পড়ল পায়ের তলায়। ধাক্কাধাক্কি, হৈ চৈ, দৌড়াদৌড়ি। পরপর ছ’খানি মিলিটারী প্লেন চললো আনকারা—যাত্রী জালাল বেয়ার, আদনান মেন্দারেস, জোরনু আর পাকিস্তানী রাজদূত হাসান।

আনকারায় অপেক্ষমান ইরানের শাহনশাহ রিজা শাহ পহলুভী আর পাকিস্তানের প্রেসিডেন্ট ইক্বন্দর মির্জা ভয়ে আর বিস্ময়ে শুনলেন ৩৭ বছর পুরোনো ইরাকের রাজসিংহাসনের পতনের সেই কাহিনী। শাহ’র হৃদয় বৃষ্টি বা একটু কেঁপেই উঠলো।

বাগদাদ প্যাক্ট কাউন্সিলের মিটিং আর হলো না। অফিসে পড়ল তালা। সব বানকোয়েট লাঞ্চ আর ডিনার গেল ভেস্চে।

জর্ডনের রাজধানী আম্মানের রাজপ্রাসাদ “রাগদান প্যালেস”-এ, ফইজল-ব্রাতা হুসেনের প্রাতরাশের টেবিলে “পরিজ” প্লেট গেল সশব্দে উল্টে।, তেহেরান থেকে অদূরে আহমদ-আবাদে ডাঃ মোসাদেক আর কাহিরাতে আবিদীন প্যালেসে নাসের ভাবলেন “ইনশাআল্লাহ”। আর ১৯৪১ সালের ব্যর্থ ইরাকী coup-এর নেতা রশীদ আলী তৈরি হতে লাগলেন ১৭ বছর পরে আবার বাগদাদে ফিরে যাবার জন্তে। লগুনে ১০ নম্বর ডাউনিং

স্ট্রীটে ম্যাকমিলান সাহেবের কপালে ওঠে চিস্তার রেখা—
 নরুপ্রাস্তরে অস্তমিত ব্রিটিশ সূর্যের বিদায় আভা দেখে। আর সুদূর
 ওয়াশিংটনে “হোয়াইট হাউস-”এ আইসেনহাওয়ার ডেকে পাঠান
 ডালেস্কে—“ক্রুশ্চফ্ তো নেই এর পেছনে?”

জন থমাসের ইরাক আর হারুন-অল-রশীদের “ক্র্যাডল অফ
 সিভিলাইজেশন” মেসোপোটেমিয়ায় এসেছে ইনকিলাব-ক্রান্তি।
 টাইগ্রীসের অপর পারে পুরানো বাগদাদের ফটক থেকে কিছুদূরে
 হারুন-অল-রশীদের প্রিয়তমা জুবদার সমাধির উপরে উঠল নতুন
 সূর্য। ঘুম থেকে জেগে উঠলো ইরাক আর বাগদাদের জনতা
 এক নতুন ইরাকে। রাতের অন্ধকারেই শেষ হয়েছে তাদের
 “দুঃখের আঁধার রাত্রি”। শেষ হয়েছে ফইজল, নুরী, আবদাল
 ইল্লাহ আর মুষ্টিমেয় শেখদের উৎপীড়ন, আর অত্যাচারের কালো
 ইতিহাস।

সেই সোমবার ১৪ই জুলাই ১৯৫৮।

ভোরের আলো তখনও ঘুমন্ত বাগদাদ শহরের কোলে এসে
 পড়েনি। নিস্তক রাতের বুকচিরে শোনা যায় শুধু কয়েকশত
 ভারী বুটের আওয়াজ—খট-খট-খট। মাঝে মাঝে দৈত্যকায়
 কয়েকটা সাঁজোয়া গাড়ির চাকার ঘড়ঘড়ানি একটানা শব্দ করে
 চলে। টাইগ্রীসের ফইজল সেতু (King Faisal one Bridge)
 পেরিয়ে “ফইজল স্কোয়ার” ঘুরে বুটের আওয়াজ শোনা যায়,
 কাছে, আরো কাছে। ইরাকের সাঁজোয়া বাহিনী “নাইটিঙ্
 ব্রিগেড” চলেছে জর্ডনের রাজধানী আম্মানে। যাত্রা শুরু হয়েছে
 ৩৬ মাইল দূরে তাদের ব্যারাক “বাকুবা” থেকে। যেতে হবে
 অনেকদূর—আম্মান, আর আম্মান থেকে বেরুট। ফইজল-ভ্রাতা
 হুসেন আর লেবানন প্রেসিডেন্ট ক্যামিল চামুনের টলায়মান
 সিংহাসন রক্ষা করতে। সঙ্গে চলেছে বিগ্রেড কমান্ডার
 ব্রিগেডিয়ার আবদেল করীম কাসেম্ আর কর্নেল আবদেল সলাম
 মহম্মদ আরীফ্।

বুটের শব্দ আর সাঁজোয়া গাড়ির চাকার ঘড়ঘড়ানি থেমে যায়
 হঠাৎ নিঝুম, নিস্তক “রিয়াব প্যালেস”-এর কাছে। সঙ্গীন উচিয়ে
 এগিয়ে আসে সশস্ত্র সাজী। ভিতরে দুঃখফেননিভ শয্যায় তখন
 গভীর ঘুমে আচ্ছন্ন হিজ ম্যাজেস্টি ফইজল আর তাঁর অভিভাবক-

মাতুল ক্রাউন প্রিন্স আবদেল ইল্লাহ। তেইশ বছরের যুবক ফইজল রঙীন স্বপ্নে বিভোর। আনকারার বাগদাদ প্যাক্ট মিটিং-এর পর “ব্র্যাক সী”তে কিছুদিনের নৌবিহারের স্বপ্ন আর প্রিয়তমা প্রিন্সেস ফজলিকার স্বপ্ন। আবদেল ইল্লাহ স্বপ্ন দেখছিলেন নুরী আর ফইজলের অবর্তমানে আবার কিছুদিনের একচ্ছত্র শাসনের।

মধুর স্বপ্ন ভেঙে যায় গুলীর আওয়াজে। দৌড়ে বেরিয়ে আসেন দুজনেই। সামনে দাঁড়িয়ে মৃতিমান বিভীষিকার মতো ক্যাপ্টেন আবদেল সালিম, হাতে সাব-মেশিনগান। কয়েক মুহূর্ত। একটা আগুনের ঝলকানি, নাটিতে লুটিয়ে পড়ে যুবক ফইজল আর ক্রাউন প্রিন্স আবদেল ইল্লাহর রক্তাধ্বস্ত মৃতদেহ।

বাগদাদ তখন জেগে উঠেছে। “রিয়াব প্যালেস”-এর বাইরে ঘুমন্ত চোখে এসে ভিড় করেছে অগুনতি নরনারী। জনতার হাতে ছুঁড়ে দেওয়া হয় আবদেল ইল্লাহর মৃতদেহ। জনতার উল্লাসে রাজপুত্রীর অন্তরমহলের কান্নার রোল আর শোনা যায় না।

ভারী বুটের শব্দ এবার এগিয়ে যায় আরো আগে। সঙ্গে চলে ফ্রুঙ্ক জনতা। লক্ষ্য ইরাকের প্রধানমন্ত্রী নুর-এ-সইদ-এর প্রাসাদ। ততক্ষণে বাগদাদ রেডিও ইরাকের জনতাকে জানিয়েছে নতুন ক্রান্তির বাণী। নুরী পালালেন। সঙ্গে তার একমাত্র বন্ধু প্রেয়সী সবিহা আব্বাস। প্রাসাদ থেকে রাজপথে—রাজপথ থেকে গলিতে—আরো আগে। একটা আশ্রয় চাই, অন্ততঃ কয়েকঘণ্টার জগ্গে। “লৌহপুরুষ” নুরী আজ আশ্রয়হীন। যে বাড়ির দরজায় ধাক্কা দেন তাঁর মুখের ওপরই তা বন্ধ হয়ে যায়। ছুটলেন অতি পুরোনো বন্ধু এক ডাক্তারের বাড়ি। ডাক্তার দিলেন তাঁর গাড়ি কিন্তু আশ্রয় দিতে জানালেন তাঁর অক্ষমতা। হাতে সময় কম। নুরী কামালেন তাঁর গৌফ আর পড়লেন কালো বোরখা। মোটরে করে পৌঁছলেন টাইগ্রীসের অপরপারে। গাড়ি ছেড়ে চললেন হেঁটে। কিন্তু গাড়ির ড্রাইভার খবর দিলো নেতাদের। মুহূর্তের মধ্যে অগুনতি সেনা এসে পৌঁছলো আর তার সঙ্গে এলো হাজার হাজার ফ্রুঙ্ক জনতা। জনতার ভিড়ের চাপে নুরী আর সবিহা ভেসে চললেন। রাস্তায় আরেক বন্ধুর বাড়ির দরজায় ধাক্কা দিলেন। দরজা একটু খুলে আবার

সশব্দে বন্ধ হয়ে গেল। ঘণ্টার পর ঘণ্টা জনতা খুঁজছে তাকে আর নুরী সেই জনতার ভীড়ের মধ্যেই ভেসে চললেন।

ছোটো একটা ছেলে বসেছিল রাস্তার ধারে একটা বাড়ির সিঁড়িতে। সে দেখে একি তাজ্জব ব্যাপার! বোরখার তলায় পাজামা! ইশারা করে দেখায় কয়েকজন মিলিটারী অফিসারদের। তারা ছুটে আসে। কাছে যেতেই বোরখার ভিতর থেকে নুরী চালালেন গুলী। কিছুক্ষণ পরেই নুরী আর সবিহার মৃতদেহ লুটিয়ে পড়ল বাগদাদের রাজপথে। ক্রুদ্ধ জনতা টেনে হিঁচড়ে নিয়ে চললো সেই মৃতদেহ। নুরীর সখের প্রাসাদ ততক্ষণে হয়েছে ধূলিসাৎ।

আজ নুরীর বিরাট প্রাসাদের সামনে সিঁড়িতে বসে কোকো-কোলা আর পেপসী কোলা বিক্রি করে ছোটো ছোটো ছেলেরা। ভাঙা দরজার কাছে দাঁড়িয়ে থাকে সান্দ্রী আর সকাল বিকেল দু'বেলা নুরীর প্রাসাদ দেখতে আসে জনতার ভীড়। নুরীর সখের জিনিষ পড়ে আছে এখানে ওখানে। হাঠাভানা সিগারের কয়েকটা বাস্ক। একটা পুরোনো তুর্কী হেলমেট, রেস কার্ড। অলেনবীর “স্ট্রাটেজী” বইয়ের কয়েকটা ছেঁড়াপাতা, রোমান কানুন-এর বিষয়ে একটা প্রবন্ধ, রেলওয়ে ইঞ্জিন সম্বন্ধে আরেকটা লেখা আর পড়ে আছে নুরী সখের ডিটেকটিভ নভেলের আধ-পোড়া কয়েকটা পাতা। এই তো ছেঁড়া একটা টুকরো—
“—Bellay bent forward and looked at the instruments. Sir James leaned accross him and asked. “Did we send an emergency Signal Captain?”

কিছুদিন পর লণ্ডনের সরকারী অট্টালিকার ওপর ইউনিয়ন জ্যাক উঠলো হাক মাস্ট হয়ে। স্মাভয়ের রয়াল চ্যাপেল মেমোরিয়াল সার্ভিস হোল। সম্রাজ্ঞী এলিজাবেথের তরফ থেকে সার্ভিসে এলেন ডিউক অফ গ্লসেস্টার—মৃত তিন বন্ধু ফইজল, আবদল ইল্লাহ আর নুরীর আত্মাকে শাস্তির বাণী শোনাতে। খৃস্টান চার্চে মুসলমানদের জন্তে সার্ভিস! হ্যাঁ তাই হয়েছিল কারণ স্মাভয় চ্যাপেল রয়াল ভিক্টোরিয়ান অর্ডারের চ্যাপেল আর নুরী, ফইজল আর ইল্লাহ তিনজনই এই অর্ডারের ছিলেন অনারারী নাইটস গ্রাণ্ড ক্রস।

নসীবের কি নিষ্ঠুর পরিহাস। যখনই তাঁর বিরুদ্ধে কেউ মাথা তুলবার চেষ্টা করেছে মুরী প্রয়োগ করেছেন তাঁর একমাত্র ফরমূলা—“Gag the Press, Call out the army and Shoot the People”। আজ সেই আর্মি আর সেই “পিপুল”ই তাঁর কাল হলো আর প্রেসকে গ্যাগ করতে তিনি আর বেঁচে রইলেন না।

ওয়াশিংটন আর লণ্ডনে শুরু হলো আবার চক্রান্ত। ১৫ই জুলাই নামলো মার্কিনী সৈন্য লেবাননে আর ১৭ই নামলো ইংরেজ ফৌজ জর্ডনে।

সেই দিনই বাগদাদের রাজপথে লাখ লাখ জনতা অভ্যর্থনা জানালো ক্রান্তির নেতা কাসেম আর আরীফকে। সৌদী আরেবিয়া থেকে ফিরে এলেন বয়োবৃদ্ধ নেতা জেনারেল নাজিব আলী রুবাই—নতুন রিভলিউশনারী কাউন্সিলের প্রেসিডেন্ট। জর্ডন আর ইরাকের ফেডারেশনের সমাপ্তি—হলো।

মাত্র তিনদিনে ইরাকের ৩৭ বছর পুরোনো একছত্র শাসনের সমাপ্তি হল। ১৯২১ সালে ফইজল প্রথম আরোহন করেন রাজগদীতে। ১৯৩৩ সালে আসেন গাজী আর ১৯৩৯ সালে বালক ফৈজাল। ১৯৫৩ পর্যন্ত তাঁর নামে যথেষ্টাচার করেছেন মুরী আর মাতুল ইল্লাহ। ১৯৫৩ সালে তাঁর রাজমুকুট পরার পরেও শেষ হয়নি মুরী আর ইল্লাহর অত্যাচারের।

যুবক কাসেম ২৪ বছর বয়সে, ১৯৬৪ সালে যোগ দেন বাগদাদের মিলিটারী একাডেমীতে আর তখনই শুরু হয় তার স্বপ্ন দেখা—ইরাককে করতে হবে স্বাধীন—বিদেশীদের হাত থেকে না—নিজের দেশেরই মুষ্টিমের লোকের অত্যাচার থেকে। ২৪ বছর পরে সে স্বপ্নের পরিসমাপ্তি হলো। এই ক্রান্তিতে মুরীরও অদৃশ্য হাত ছিল কারন তিনিই তো হুকুম দেন নাইনটিস্ ব্রিগেডকে জর্ডনে যেতে। কাসেমের ছাত্র আরীফ স্বপ্ন দেখে নাসেরের—স্বপ্ন দেখে আরব ঐক্যের।

মরুপ্রান্তরে এক বছরের মধ্যে অনেক পরিবর্তনই হয়েছে। Changeless East-এ এসেছে অনেক change, অনেক পরিবর্তন। মিশর আর সিরিয়া নিয়ে তৈরি হয়েছে “মিলিত আরব প্রজাতন্ত্র”।

জর্ডনের সিংহাসন টলায়মান। রাজা হুসেন ভাবছেন পাততাড়ি গোটাবো নাকি? নবলুসীর ভবিষ্যৎ বাণী—“destiny of Jordon is to disappear”—সত্যি হবে নাকি? ইরানের শাহনশাহ রিজা শাহ পহলুভী “তালাক-তালাক-তালাক” বলে মালকয়ে-আলম সোরায়াকে ত্যাগ করেছেন। সোরায়ার দোষ সে শাহকে দিতে পারেনি কোন পুত্রসন্তান। “ছুঃখিনী”—স্যাড্ সোরায়া হয়েছেন স্যাডার সোরায়া। মির্জা-সুরাবদী পার্টনারশিপ টেকেনি পাকিস্তানে। অনেকদিন ব্রিটিশের মুন খেয়েছেন ফিরোজ খাঁ মুন। গদীতে বসে শোধ করছেন সেই পুরোনো ঋণ।

১৯৫৮ সালে মরুপ্রান্তরে উঠেছে নতুন আশার সূর্য।

